

C U R S U S
THEOLOGICUS

P. DOMINICI VIVA

SOCIETATIS JESU.

P A R S P R I M A

DE DEO UNO, & TRINO.

EDITIO QUINTA.

C U E S

THEOLOGICAL

DOMINICAN

STUDIES

OF THE

DEBATE, ON THE

OF THE

CURSUS THEOLOGICUS

Ad usum Tyronum elucubratus,

Et in Quotidianis Prælectionibus

A. P. DOMINICO VIVA
SOCIETATIS JESU

SACRÆ THEOLOGIÆ PROFESSORE

Suis Auditoribus Traditus

In Palæstra Collegii Neapolitani ejusdem Societatis.

DICATUS

EXCELLENTISSIMO DOMINO

BARTHOLOMÆO V.
DE CAPUA

MAGNO ALTAVILLÆ COMITI XIX.

Principi Ariciz, Biccari Comiti, Duci Aeronorum, Comiti Montis
Auri, & Rotelli, Marchioni Arpadii, Utili Domino Civitatis
Nicoteræ, Baroni Vallis Majoris, Plancatellæ, &
Arnoni, &c. Ex Magnatibus Hispaniæ,
Domino Domus Capuz.

PARS PRIMA


DE DEO UNO, ET TRINO.



PATAVII, Ex Typographia Seminarii, MDCCXXVI
Apud Joannem Manfrè.

Superiorum Permissu, ac PRIVILEGIO.





Excellentissimo Principi
BARTHOLOMÆO V.
DE CAPUA

MAGNO ALTAVILLÆ COMITI XIX.
Principi Ariciæ, Biccari Comiti, Duci Aerolanorum, Comiti Montis
Auri, & Rotelli, Marchioni Arpadii, Utili Domino Civitatis
Nicoteræ, Baroni Vallis Majoris, Plancatellæ, &
Arnoni, &c. Ex Magnatibus Hispaniæ,
Domino Domus Capuæ.



*In rimatus occasionem, qua meum erga Te palam
profiterer obsequium, hanc tandem avidus, quam
qui maxime, arripui, Princeps Excellentissime, Tibi
nimirum opus istuc, quod nunc primum publicam laceffit lucem,
faustis avibus nuncupandi. Quid hoc muneris sit, rogas? Nil opus
est, ut illud verbis exornem. Cursus est Theologicus in Neapolitana*

Societatis Jesu Academia ad consecrissimam Auditorum coronam, paucis ab hinc annis non sine plausu prelectus. Auctor est meus gradu sanguinis Patrus, ex eadem Societate Theologus, de cujus ingenii laude nec quidquam commemorare modestia causa consilium est, nec plura possum, si velim, quam quæ jam fama tenet ex ejusdem Trutina Theologica pluries jam Typis, atque adeo aternitati mandata. Qui primo hoc edito sui ingenii, atque morata eruditionis specimine tantam sibi circumdedit famam, haud mihi dubium; quin hic altiora pertractans, atque in penitissima ipsa divinitatis adyta pervadens, par meriturus sit ejusdem fama suffragium. Hac spe delinitus Cursum hunc, quo tanquam publici Juris factò, Auctorem jam praela interverterant, consanguinitatis jure confidentior, veluti injecta manu, mihi asserui, ut tuo dicarem Nomini, tuisque innumeris sane obstrictus beneficiis aliquid tandem a meo Patruo representarem, quo si minus patria facerem, ingrati saltem animi vitio liberarer. Equidem rationes supputans, quæ me Tibi obnoxium habebant, immenso prope ære alieno, feliciter quidem, sed supra modum premi sentiebam. Recurrebant identidem animo tot in me jam inde ab Adolescentulo collata beneficia; Syncera illa, ac minime fucata amoris significationes, quibus me, quæ tua comitas fuit, ac fastigii submissio, Roma olim in Clementino Nobilium Collegio complexus es; non satis tui animi magnitudini facere ratus, me in eodem domicilio convictus ratione contubernalem habendo, nisi etiam artissimo necessitudinis nexu tibi adstringeres, ac tua me ambitiose cupidum consuetudine honestares: Præclara illa adultioris, ac proinde robustioris benevolentia documenta, quibus deinde & me, & meam domum tum Neapoli, tum potissimum Lupis dignatus es, cum hic novissime magno Principum Virorum exemplo, majori Tuæ animi Magnitudinis laude, maximo Austriacarum rationum incremento Universæ Hydruntina Provincia præesses. Ut alia omnia agerem, Tuque jam longe gentium abesses, obversabatur usque mentis oculis; non secus ac qui in solem acie defixus hæsit, solis ubique adumbratam effigiem sibi intueri videtur; obversabatur, inquam, altius medullis infixæ, quam ut ulla temporis injuria obliterari possit, Tua illa humana pene augustior imago; mores suavissimi, quibus publicam rem non sine quodam prudentia miraculo gerens, Te mihi etiam, meæque domui comem, & commodum impertiebare, & clarus omnibus me singulari benevolentia prosequere; Tua denique illa munificentia species amplissima, quæ tantum bonorum in me cumulasti, ut nihil jam felicitati meæ deesset, nisi ejusdem moderatio. His cum assidue tuorum in me promeritorum delecta-

rer

rer aequae, ac provocarer imaginibus, manus diutius sub pallio otiosus haberem? Puduist sane tandem vacuum agere, ac desidem pati tuis esse in nominibus. Qui de meo solvendo non eram, in consanguinei bona, tanquam mihi Vadis, Prædisque, confidentius invasi. Theologicas hasce illius elucubrationes qua jure, qua injuria mihi vindicavi, ut Tibi sisterem, atque aliquam hoc pacto rependerem gratiam. Sic enim mecum animo reputavi, nihil me Tibi gratius facere posse, quam si tua, quæ magnorum virorum amplissima merces est, servirem fama, gloria velificarer. Id autem me de facili affecurum, si studia hac educata in umbra, nunc vero in lucem, ac diem evocata assignaturus fama, gloria inculcaturus, Tuum etiam una eademque opera præfixum iis Nomen assignarem fama, gloria inculcarem. Hic me animus in id consilii impulit, ut Tibi hoc quidquid est muneris nuncuparem. Quanquam fateor, dum hoc ipsum exequor, me falsum animi, consilii devium ingenue redarguam necesse est. Ego ut tua serviam fama, gloria velificer? Sero me inconsulta audacia, seu potius amentia reprehendo. Non is es, qui eblandito indigeas fama suffragio. Eo emines in fastigio, cui vix ulla fieri possit laudis accessio. Seu genus inspectetur tuum, seu Tute ipse, iis circumfluis honorum stipendiis, ut possis quidem large aliis erogare, Tibi aliquid amplius repetere non possis. Ea nimirum es Altavillæ et stirpe de Capua, quæ originis antiquitate, perpetua Heroum serie, Titulorum magnitudine, dignitatum insignibus nulli secunda jamdiu Neapolitano in regno summo ab loco est. Et quidem, si originis repetatur Antiquitas in Heroica Normandorum Regum tempora supra septingentos annos revolvatur animus necesse est, ac Tancredi Altavillæ pridem Comitum in sua Neustria, quam Normandiam *Minores* appellant; ejus, inquam, qui bellica virtute commendatissimus cum duodecim liberis in Neapolitani Regni possessionem armorum jure venit, replicet memoriam. Qui enim Riccardus unus e duodecim liberis, ut in novo solo paterni tituli perennaret decus, illum in Scandiane Oppidum, cui ipse imperitabat, transtulit, Gentis apex, & auctor deprehendetur. Is namque fuit, qui Capuæ Principatu positus, armis ejecto Pandulpho Longobarda e gente, cognomento de Capua locum fecit; qui enim quarta ab eo stirpe in eundem Capuæ Principatum successit Robertus secundus, a Guilielmo; qui male audit, & eo Principatu, & vita spoliatus, quod adversus ipsum cum Romano Hierarcha Adriano IV. arma junxisset, nudum posteris titulum in gentilitium familia cognomen reliquit: ut ratum deinde fuit in Ludovico ejus filio, ac toti per manus traditum posteritati. Haud hic me latet, non deesse idoneos an-

*Et*ores, qui in hoc Ludovico Roberti filio excitatam Altavilla memoriam literis demandarint: Guilielmum nempe cognomento bonum, qui malo successit, paternis bonis Ludovico in gratiam recepto redditis, excepto Capuae Principatu, ut in eo revivisceret avita gloria titulus, hereditaria ditionis oppido, abolita Scandiana nomenclatione, Altavilla nomen fecisse. Utravis probetur sententia; id unum hinc liquet, adeo antiquam esse Tui praclarissimi generis originem, ut Nili instar caput pene occulat suum; ac posteros malit ortus Tuos mirari, quam nosse. Haec tibi laus a Generis antiquitate, atque amplitudine; quantae porro a Majoribus tuis accedit ad cumulum! Quantum lucis afflat Andreas ille, qui Carolo I. Andegavensi a consiliis fuit, cuius tanta apud eum fuit autoritas, ut is e Galliis Neapolim ad suos Regios administratos de quibusdam negotiis ad Fiscum pertinentibus scribens, opportune caverit, ut prius Andream consulerent, nihilque eo inscio molirentur. Tanti apud prudentissimum Regem erat hominis iudicium, ut eo inconsulto consuli rebus suis minime posse arbitraretur. Quantum adjicit claritudinis Bartholomaeus, vir ille saeculo major suo! Hic nempe, hic ille est spectatissimus Neapolitani Regni Logotheta, cui domus de Capua plurima accepta refert ad superbiam usque amplificata, & ornamenta dignitatis, & praesidia amplitudinis suae. Laboravit Regum Munificentia, ut illum honoribus, titulis, Dignitatibus, Dynastiis amplissimis exaugeret; sed ut plurima in ipsum pleno, ut ajunt, horreo congegnerit ornamenta, sensit ornamentis omnibus majorem. Tanta in ipso consilii vis, Jurisprudentiae laus, mentis capacitas, animi strenuitas in capeffendis negotiis, in explicandis dexteritas. Emicuit haec primum sub Carolo II. Andegavensi in credita sibi Provincia liberandi Regios liberos captivos ex Aragonensi potestate, quam ille sic feliciter expediit, ut Aricia ditionem, aliasque florentis Toparchias in egregie navate opera pretium regia liberalitate retulerit. Emicuit in ejusdem Neapolitani Regni pro Rege administratione. Emicuit in legatione splendide obita ad Nicolaum IV. Romae Sacrorum Principem. Emicuit in Testamento Philippi Flandria Comitissae, Caroli II. nepotis, qui hic Neapolitano in Regno decedens Reginae primum, tum Roberto Calabria Duci, tercio ab his loco Bartholomaeo Testamenti in rem conferendi curam demandavit, in ultimum post Bartholomaeum locum rejecta Vidua Coniuge: quod sane singulare est aestimationis argumentum. Ubi vero non emicuit modo, verum etiam supra quam cuquam credibile sit, eminuit, sub Roberto fuit, a quo Avenionem Legatus ad Clementem V. pro Neapolitani Regni successione adversus Hungaria Regem Caroli Martelli Germani

mani fratris filium, paternique juris heredem, tanta eloquentia vi, ac felicitate, tot rationum momentis, in re ceteroqui tam ancipiti, causam oravit, ut perorarit, eamque Roberto adjudicatam summa totius Regni gratulatione retulerit. Tum enimvero se supra suam conditionem efferre visus est Bartholomaeus, dignumque se prodidit, qui Magni nomenclatione honestaretur, Magnus Altavilla Comes a Roberto Rege jure quidem merito salutat. Qui enim Magnus non haberetur, qui vel ipso Alexandro Major, animum supra fortunam gerens, novisset non privatis quidem hominibus Civitates, ut ille, sed regna ipsa Regibus quodammodo elargiri? His adde Andream illum alterum, cui nuptui data Constantia Ladislai pridem Regis uxor; perinde quasi una Magnorum Altavilla Comitum domus Regium ita prope aquaret fastigium, ut quae in illud succederent Regina minus de pristina fortuna decedere viderentur: Adde & Joannem, illum palmarum plurimum Bellatorem, qui Ferdinandi Aragonensis partes secutus contra Gallos, qui regnum in Brutiis bello invaserant; adeo strenue Regem in acie pugnantem manu, opibus, ferro, consilio juvit, ut ex Equo miserrime delapso presto accurrens, Equumque supeditans suum, eum feliciter praesenti vita periculo, vel cum succapitis discrimine, eximeret, atque in tuto collocaret. Ubi novo calculo confirmatum, hoc splendidum Domus de Capua fatum esse, Regibus aut lingua, aut manu vel Regnum representare, vel vitam. Quae ex his in hanc familiam non profisciscuntur decora? Quibus ejusdem fama non ornatur, seu verius non oneratur praconiis? Tanta sunt, ut quidquid illa per se ceteroqui maximum in tanta prosapia commendationem attexere possit, reputet ejus gloria minus, quod tamen hoc magis in ejus commendationem cedat, quod minus. Quid enim amplius annectat? Romanasne purpuras, ac Sacras infulas, quibus Ludovici, Guilielmi, Annibales, Petri Antonii, alique ex hac domo inclaruere? Praclarissima ne de Comitibus, Ursinas, Acciajolas, Gonzagas Cognationes, quibus hac non semel mutuo fudere in-nexa familia? Splendidissima ne regalis prope Munificentiae monimenta, qua Neapoli, qua hereditariis in Toparchiis quodam prope dixerim pietatis fastu excitata, atque aternitati intuenda relicta: ut praeter ceteris augusta Basilica Dei parenti Virgineo a Monte Nuncupata Neapoli erecta, aedaeque magnifico sumptu adjecta, & Monachis e Divi Guilielmi Vercellensis familia, sub ejusdem Virginis auspicio degentibus ad inhabitandum assignata, etiamnum luculentissime restantur? Militares ne expeditiones ab hujus Prosapia Heroibus non semel, nec sine laude susceptas, a Ludovico III. ad Hydruntum sub Alfonso

Ara-

Aragonensi contra Turcas, infensissimos Christiani nominis hostes; a Fabricio ad Granatam sub Ferdinando Catholico contra Mauros: a Ferdinando Andrea Primi Termolensium Ducis Filio ad Mediolanum sub Carolo V. contra Gallos; a Vincentio Aloysio ad Salernum sub Philippo II. contra Thracum irruptiones; a Vincentio altero nostra memoria in Belgio sub Carolo II. contra fœderatos Austriaci nominis hostes? Florentissimas ne, atque amplissimas ditiones, quibus isthæc Prosapia pene totum Neapolitanum Regnum imperio complexa, plenoque adeo exundans alveo, ut se se capere non posset, in alios diduci alveos oportuit, & Conchenſium Principibus, Ducibus Termolensium novas, easque suo suppareſ fonti sufficere origines? Translatitia hæc putat, ut ut exaggerata, ut ut maxima: quæque singulatim inspecta singulas cælo aquare possent familias, sunt infra hujus fastigium. Singularia quædam præsefert hæc domus ornamenta, ac nativæ quasdam præcellentis gloria notas, quibus splendidior aliis illini divſcitius nitor vix possit, aut addi aliud non cumulum. Addis tu tamen, Bartholomæe Princeps Excellentissime, qui ita acceptam a Majoribus tuis gloriam virtute, ingenio, præclare gestis tutaris, ut illam augeas etiam de tuo. Hoc enimvero præstat Tuus ille integerrimus Juventa flos, quem non ad omnem gloriam modo, verum etiam ad omnem pietatis auram vernare jubes: Hoc tua illa morum suavitas, & affabilitas, qua ita Te paratum omnibus præbes, & obvium, ut in tanto præclarissima domus supercilio videaris nescire prorsus supercilium: Hoc illud recti, justique tenax studium, quo ita præes, ut in medio sit, utrum Te mali metuant magis, an diligant boni: Hoc tua illa celsitas indolis, & alacritas ad ardua quæque erecta, ac magnorum capax, & quantuncumque illi imponere, &, ut ita dicam, inadificare velis, latura: Hoc denique angusta illa Corporis proceritas, & habitus, par nempe præferens magno animo domicilium. Etenim si, ut ad rem optime animadvertit insignis ille Theodosii Augusti Laudator, non frustra Sapientium opinione, qui naturalium momenta Causarum subtilius scrutati, arcanis Cælestibus nobiles curas intulerunt, augustissima quæque species plurimum creditur trahere de Cælo; divinæque animus vel venturus in corpus dignum prius metatur hospitium, vel cum venerit, fingit habitaculum pro habitu suo, vel aliud crescit ex altero, & cum se paria junxerunt, utraque majora sunt; haud certe sine Cælestium consilio factum arbitror, ut tam procera, tam angusta Tibi corporis species obtingeret; ut nempe Magni animi inhabitantis esset indicio, pateretque, hoc habitum corporis praditum esse oportere, qui in

Magnorum Altavilla Comitum nasceretur familia . Hinc etiam acci-
disse autumo , ut novissime profusissima Caroli III. Invictissimi His-
paniarum Regis , Sexti nunc augustissimi Romanorum Imperatoris
munificentia , inter Hispanie Magnates adlegerere ; ac sub idem fer-
me tempus , Materno Caracciola cognationis jure nova , eaque amplif-
sima Aerolana ditionis , Biccari , Harpadii Tibi hereditas obveni-
ret . Par nempe fuit , ut ad magna natus animus , Magnis assuetus ,
magna etiam corporis specie conspicuus , in novo magnitudinis fastigio
emineret ; haberetque latiore dominationis campum , in quo spatia-
liceret . Affernit quidem alterum probata Tua domus fides erga Au-
gustissimam domum , alterum Tibi Materni sanguinis jus vindicavit ,
sed utrique addidit forma suffragium . Illa praestitere , ut oporteret Te
in majus provehi , hac ut deceret . Quamquam , ut verum fatear ,
hic ipse decor Tua Praclarissima parenti Caracciola e stirpe Famina
acceptus est referendus , qua veteres animo , virtute , corporis etiam
habitudine vincens Amazones , dignam se praeiuit , qua Te gigneret ,
ut Tu dignus eras , qui ex ea gignerere . Quae cum ita sint , quis
ita inunctis lippus oculis , quin videat , longe plus huic operi Tuo
nomine afferri celebritatis , & gloriae , quam opus ipsum , quantolibet
excipiaturs plausu , Tuo nomini possit afferre ? Tantum igitur abest ,
ut eas , quae me Tibi obaratum habent , hujusce muneris exhibitione
rationes dispungam , ut potius in eas novis referar nominibus , ubi
illud minime dedigneris . Hoc tamen non modo non animos infringit ,
sed facit , ut tibi illud alacrius sistam ; cum sic etiam tua serviam
gloria ; quando is Tibi jucundissimus gloria fructus , posse tui Pa-
trrocinii umbra gloriam aliis comparare . Excipe illud igitur humanif-
simo , quo soles , vultu ; siue enim aliquid inde in Te redundabit
celebritatis , & gloriae , siue longe plus in illud e Tuo praclarissimo
nomine refundetur , semper Tuo morem geres animo ad comitatem
unice nato ; alterum enim officio in Te meo dabis , alterum bene-
volentiae in me Tuae . Vale .

TYPOGRAPHUS AD LECTOREM.

Monstro finitimum ; ac portento simillimum jure merito reputatur in Republica literaria ; si forte fortuna codex bene magnus reperitur , qui typis obstetricantibus in lucem sit editus , & idem simul sit nitidissimus , ac mendis omnibus expurgatus . Acies acerrima oculorum , ut ut adamantina , ut ut lyncea , experientia teste , obtunditur , & hebetatur , dum minimorum multitudinem propemodum infinitam characterum attente perscrutatur , ut necesse sit non pauca , ac non levia certe corrigenda effugere , dum mens in innumeris aliis corrigendis absorbetur . Quid tamen , ubi operis Auctori longissime abest a Typographia , sexcentis , & amplius milliariis , ut nulla via valeat illud , velut Ursa suos catulos , expolire ? Quid vero , ubi pariter Auctor veluti prolem non agnoscens suam , renuat typis evulgari quæ ad discipulorum dumtaxat eruditionem in palæstra Gymnastica tradita sunt , ut in umbra delitescerent ? Quia tamen juris communis ea facta esse censentur , quæ in scholis celeberrimæ Universitatis publico usui exponuntur , ut proinde non sit amplius integrum eorum editionem impedire , illud tantum a Typographo exposcit Auctor , ut in fronte præfigatur , cursum hunc Theologicum Ad usum Tyronum dumtaxat esse elucubratum , eorumque captui accommodatum ; non vero ut lucis usura frueretur , & eruditorum oculis subijceretur . Quid demum , ubi Typographus Auctoris ope destitutus non aliis in editione operis uti potuerit autographis , nisi iis , quæ a discipulis ipsis , non usque omnino solertibus , excerpere valuit , quæ passim iis compendiariis notis , ac literarum contractionibus referta sunt , in quibus ne Auctor quidem ipse possit non raro suam mentem interpretari ? Hæc
autem

autem omnia impræsentiarum evenere in hujus operis editione , ut mirum proinde sit , quod innumeras non scateat mendis , & quidem in re gravissima , quæ præ manibus habetur , non levissimis . Hinc ne contemptui in posterum haberetur mea hæc Typographia , cujus summam solertiam hætenus experta est Italia , ac Europa universa , non pauci cursum hunc Theologicum longe a meis prælis abesse debere existimabant . Nihilominus oportuit id operis aggredi , ac speciali sedulitate , & labore mendis , quoad ejus fieri potuit , occurrere , ne tam uberi doctrinarum fonte privarentur , qui Trutinam Theologicam damnatarum Theſum ab eodem Auctore luce donatam Theologico succo redundantem degustarunt . Ea quippe vix in lucem edita quatuor ab hinc annis , octavam , ut fertur , hætenus subiit editionem , & plurimas alias facili negotio mox est subitura . Usque adeo communi omnium commendatione ubique terrarum excipitur . Quare si quid erroris tot , tantisque de causis in hujus operis Editione irrepserit , benignitati lectoris relinquitur excusandum , & corrigendum . Ita fiet , ut novo , ac perutili labori mox manus admoveam , typis mandando Cursum ejusdem Auctoris Theologico-moralem , octo itidem tractatibus comprehensum , qui pariter in celeberrima Collegii Neapolitani Academia publico usui discipulis traditus est.

NOI REFORMATORI

Dello Studio di Padova

HAvendo veduto per la Fede di Revisione, &c. Approbazione del P. F. Ambrosio Lisotti Inquisitore di Padova nel Libro intitolato *Cursus Theologicus ad usum Tyronum. Elucubratus*, &c. a P. Dominico Virva Soc. Jesu Sacra Theologia. Professore, non v'esser cos' alcuna contro la Santa Fede Cattolica, e parimente per Attestato del Segretario Nostro, niente contro Principi, e buoni costumi, concedemo Licenza a Gio: Manfrè Stampatore, che possi esser stampato, osservando gl'ordini in materia di Stampe, e presentando le solite copie alle Publiche Librarie di Venetia, e di Padova.

Dat. 3. Decembre 1711.

(Ferigo Marcello Proc. Ref.
(Girolamo Venier Kav. Proc. Ref.
(

Agoſtino Gadaldini Segret.

IN-

I N D E X

Q U Æ S T I O N U M

D E D E O U N O , E T T R I N O .

DISPUTATIO I.

DE Existētia , Essētia , & Attributis
Divinis. pag. 1

Q U A E S T I O I.

AN , & quomodo Dei existētia demon-
stretur? 2

ART. I. An Deum existere sit per se notum?
ibid.

ART. II. An , & quomodo demonstratur a
posteriori Dei existētia? 4

ART. III. An demonstretur quasi a priori
Dei existētia ex conceptu entis Optimi? 5

Q U A E S T . II. Utrum essētia Divina meta-
physice sumpta constitatur per predicatum
ascitatis? 12

Q U A E S T . III. Utrum ex parte objecti attri-
buta Divina distinguantur inter se , & ab
essētia? 17

Q U A E S T . IV. De nonnullis attributis in
particulari. 21

ART. I. An Deus ratione Immenstatis for-
maliter sit in spatiis imaginariis? ibid.

ART. II. Utrum futura fuerint ab aeterno
realiter presentia Eternitati Divina? 22

ART. III. Utrum Divina simplicitas conclu-
dat etiam compositionem ex genere , & dif-
ferentia? 26

DISPUTATIO II.

DE Visione Dei. 27

Q U A E S T I O I.

AN possit positive probari possibilis vi-
sionis Dei? 28

Q U A E S T . II. Utrum repugnet substantia su-
pernaturalis , seu Creatura , cui sit con-
naturaliter debita Dei visio? 29

Q U A E S T . III. An possit oculus corporeus ele-
vari ad Deum videndum? 35

Q U A E S T . IV. De lumine Glorie. 37

ART. I. An lumen Glorie relate ad Dei
visionem sit tota ratio agendi? 38

ART. II. An possit intellectus sine lumine
intrinsece elevari ad Deum videndum? 40

ART. III. Utrum intellectus inaequalis cum
equali lumine Glorie Deum videant inae-
qualiter? 43

Q U A E S T . V. Num sit possibilis species im-
pressa creata Dei? 48

Q U A E S T . VI. De termino visionis Beatifi-
cae. 53

ART. I. Num possit Deus ab intellectu crea-
to comprehendere? ibid.

ART. II. Num possit dari visio Dei prae-
cisa? 55

ART. III. Quidnam de facto Beati videant
in Deo? 58

DISPUTATIO III.

DE Scientia Dei. ibid.

Q U A E S T I O I.

Utrum in Deo detur potentia intellectiva
per modum actus primi physici intelli-
gendi? 59

Q U A E S T . II. Utrum Dei summa cognos-
civitas demonstretur ex eius summa imma-
terialitate? 62

Q U A E S T . III. An Deus per scientiam sim-
plicis intelligentiae videat possibilia in sci-
pso , & in seipsis? 69

Q U A E S T . IV. Quomodo per scientiam visio-
nis cognoscat Deus futura libera absoluta? 75

Q U A E S T . V. Utrum scientia visionis , an
scientia simplicis intelligentiae sit causa ve-
rum? 81

Q U A E S T . VI. De scientia media. 84

ART. I. An Deus videat contingētia con-
ditionate futura? 85

ART. II. Utrum futura libera conditionata
videantur a Deo in aliquo decreto , an in
seipsis? 88

ART.

INDEX QUÆSTIONUM.

ART. III. *Diluantur objecta.* 90
 QUÆST. VII. *An deitur in Deo scientia
 media reflexa?* 96

DISPUTATIO IV.

DE Divina Voluntate. 102

QUÆSTIO. I.

Per quid constituentur decreta Dei libera? 103

ART. I. Num apte salvetur libertas actus Divini per perfectionem quandam defectibilem, aut per complementa extrinseca, aut per meram habitudinem ad extrinseca connotata? 104

ART. II. Utrum complementum decreti liberi sit quodam terminatio ad objectum creatum, Deo intrinseca, & contingens? 107

QUÆST. II. De Providentia quoad ea, quæ spectant ad Prædeterminationem, & Reprobationem. 112

ART. I. Num Prædeterminatio fiat ante, an post merita absolute futura. ibid.

ART. II. De Reprobatione. 117

ART. III. *An permissio peccati possit esse effectus Prædeterminationis?* 118

DISPUTATIO V.

DE Deo Trino. 121

QUÆSTIO I.

DE vocabulis hujus Mysteriorum propriis. 122

QUÆST. II. Utrum præter distinctionem realem non personam, quæ intercedit inter Personas, deatur etiam distinctio virtualis inter Naturam, & Personalitatem? 125

QUÆST. III. Quodnam sit principium Quod productivum Verbi? 129

QUÆST. IV. Quare sola processio Verbi sit generatio, non vero processio Spiritus Sancti? 137

QUÆST. V. Utrum Verbum procedat ex cognitione tam necessarium, tam contingentium? 136

QUÆST. VI. Num Spiritus Sanctus disingueretur a Filio, si ab ipso non procederet? 141

CURSUS THEOLOGICUS

Ad Usū Tyronum elucubratus.

PARS PRIMA.

DE DEO UNO, ac TRINO.

PROOEMIUM.



In Heologia nomen, ut advertit Augustinus, Sermocinationem de Deo sonat, quod vox ipsa e Græcis fontibus derivata testatur. Octo tractatibus in nostris Scholis uberrimam tantæ facultatis doctrinam complecti consuevimus. Principem obtinent locum juxta methodum Angelici in 1. parte Disputationes de Deo Uno, & Trino: Agimus deinde de Angelis, qui Divinarum perfectionum speculum sunt lucidissimum: Et quia Deus est Alpha, & Omega, Principium, & Finis, ideo disputamus etiam de ultimo fine Creaturarum rationalium, seu de Beatitudine, ac de Actibus humanis, quibus illam assequimur: de quibus disputat in 1. 2. Angelicus. In tertio vero Tractatu agimus de Gratia, cujus præsidio ad obtinendum finem supernaturalem assurgimus; ubi plurima de vitiis, & peccatis gratiæ oppositis, ac de virtutibus supernaturalibus in genere, quæ quoddam sunt ipsius Gratæ satellitium. In quarto questionibus instituiamus cum Angelico in 2. 2. de Virtutibus Theologicis in specie; videlicet de Fide, Spe, & Charitate. In quinto de Virtutibus moralibus in suis, ac præsertim de Justitia. In sexto cum D. Th. in 3. parte agimus de Deo ut Redemptore. In septimo de Sacramentis in genere, ac in specie tanquam de præcipuis Redemptionis effectibus; & quia non vacat singillatim omnia percurrere, ideo post questiones de Sacramentis in genere, & in specie de Eucharistia, agitur octavo loco de Penitentia, relinquendo morali Theologiæ alias de aliis Sacramentis disceptationes.

Hoc itaque anno agendum nobis de Deo Uno, & Trino, ac I. De ejus Essentia, & Attributis. II. De ejus Visione. III. De Scientia. IV. De iis, quæ ad voluntatem Divinam spectant; ubi de Providentia, Prædestinatione, ac Reprobatione. Denique de ineffabili Mysterio Trinitatis.

Pars VII.

DISPUTATIO I.

De Existentia, Essentia, & Attributis Divinis.

Iuxta methodum, quam tradit Philosophus 2. poster. 1. discutiendum prius esset de Deo, An sit: deinde Quid sit, ut demum ejus proprietates, & Attributa dignoscantur: Verum quia Deum esse, fide Divina constat, idcirco solum inquirendum contra Atheos, Num Dei existentia demonstrari possit? Ut autem notitia confusa secundum quid nominis de Deo præmittatur, nomine Dei intelligi debet primum Ens, primative scilicet tum causalitatis, a quo omnia, tum perfectionis, infra quod omnia. Scientiæ naturales non solent de suis objectis præmittere questionem, An sint: sive quia eorum existentia est ipsis etiam sensibus notissima, ut quantitas, de qua Mathematicus; Corpus naturale, de quo Physicus; sive quia existentia objecti contingentis impertinens est ad demonstrationes scientiarum, quæ procedunt ex necessariis: At in Theologia longe aliter se res habet; tum quia ejus objectum, nempe Deus, est a sensibus abstractissimum, unde per rationem probari debet, tum quia est ens necessarium, atque adeo de ejusdem etiam existentia formari possunt scientiæ, ac necessariæ demonstrationes; tum demum quia principia aliarum scientiarum non supponunt existentiam proprii objecti, sed essentiam; Theologia vero cum procedat ex principiis revelatis, debet necessario prægnoscere existentiam Dei revelantis: aliter nisi existat revelans, nec darentur principia revelata, atque adeo nec Theologia. Inquiremus itaque I. Num, & quomodo demonstrari possit Dei existentia? II. Quodnam sit prædicatum essentiale Dei? III. Quomodo divina essentia a suis perfectionibus attributibus distinguatur? IV. Selectiora quædam de attributis in particulari.

A QUÆ-

QUÆSTIO I.

An, & quomodo Dei existentia demonstretur?

Quærendum 1. An Deum existere, sit per se notum? deinde, quomodo demonstrari possit existentia Dei a posteriori? Num possit etiam quasi a priori demonstrari?

ARTICULUS I.

An Deum existere, sit propositio per se nota.

I. **M**ultipliciter a Doctoribus apud Recapitulum q. 2. accipitur propositio per se nota. Communis cum Angelico 1. p. q. 2. art. 1. sumitur pro propositione, in qua prædicatum clauditur in ratione subjecti; huiusmodi enim propositio ex ipsis terminis, & non per medium extrinsecum fit nota, & ideo dicitur nota per se, hoc est, non per aliud. Hinc D. Thomas contra Scotum dividit propositionem per se notam in per se notam quoad se, & quoad nos: Illa est, qua prædicatum est de ratione subjecti, quod competit omnibus definitionibus etiam obscurissimis; v. gr. quod Tempus sit numerus numeratus motus, quod Motus sit Actus entis in potentia, prout in potentia &c. Propositio vero quoad nos per se nota est, quæ ex propriis terminis statim fit nobis perspicua: v. g. Totum est majus sua parte. Rursus alia propositio dicitur per se nota quoad omnes; alia quoad Sapientes tantum. Aliquæ enim propositiones statim ac audiuntur, percipiuntur ab omnibus, alix solum a Sapientibus. Idcirco Scotus negat divisionem istam propositionis per se notæ quoad se, & quoad nos; quia illa propositio, quæ est per se nota, videtur debere dici nota relate ad intellectum nostrum, atque adeo quolibet per se nota videtur debere dici nota quoad nos, seu quoad nostrum intellectum. Sed non est recedendum a doctrina Angelici, quæ nititur doctrinæ Philosophi 1. poster. 6. ubi docet, Aliqua esse notiora secundum se, quam nobis; alia vero esse notiora nobis, ignotiora secundum se; ergo potest propositio alia esse nota secundum se, alia quoad nos.

II. Dico 1. hæc propositio, Deus existit, est per se nota quoad se.

Prob. propositio nota secundum se, nisi sit de voce, juxta doctrinam Angelici, & Philosophi, est, cujus prædicatum convenit subjecto immediate, & formaliter ratione sui, non ratione alterius, cum quo connectitur: ut hæc: Homo est rationalis; siquidem rationalitas formaliter ratione sui convenit Homini; contra vero hæc, Homo est risibilis, non dicitur per se nota secundum se, quia risibilitas non convenit homini formaliter ratione sui, sed ratione rationalitatis, cujus est passio; atque prædicatum existendi convenit Deo immediate, & formaliter; cum ratione sui Deus sit cumulus omnium perfectionum, atque adeo sit necessitas existendi; ergo hæc propositio, Deus existit, est per se nota secundum se.

Neque dicas, Prædicatum existentie competere Deo ratione aseitatis, quæ est radix existentie Divinæ, ut rationalitas est radix risibilitatis. Nam, ut advertit Suar. disp. 3. metaph. sect. 1. & Lumbierius num. 213. illud est discriminis inter prædicata Divina, & creata, quod unum prædicatum essentiae creatæ, utpote limitata, formaliter, & ratione ratiocinata præscindit ab altero; prædicata vero Divina, utpote illimitata, præscindunt solum secundum explicatum, & implicitum, ut Homo præscindit ab Animalibus rationali, & sicut Ens præscindit a differentiis, quæ formaliter, & implicite juxta veriore sententiam imbibunt ipsum Ens: quodvis enim Divinum prædicatum, cum sit infinitum implicite, ad omnes omnino perfectiones excurrit; unde quamvis illas non explicet, implicite tamen non solum identice, sed etiam formaliter includit; ubi e contra rationalitas v. g. solum identice, & non formaliter est risibilis; & idcirco aseitatis formaliter necessitatem existendi includit. Adde existentiam affirmari de Deo ratione ipsius Dei, quatenus ipse est necessitas existendi; Creatura vero solum existit ratione alterius, hoc est ratione Divini decreti, unde juxta hunc alium sensum est propositio secundum se nota, Deus existit, non vero Creatura existit.

III. Dico 2. Hæc propositio, Deus existit, non est per se nota quoad nos. Ita communiter apud Maurum qu. 14.

Prob. Ut propositio dicatur per se nota quoad nos, debet ex ipsa apprehensione terminorum determinare intellectum ad assensum, ut hæc, Totum est majus sua parte; atque hæc propositio, Deus existit, perceptis terminis non statim determinat ad assensum, ut constat experientia, sed indi-

genus longo discursu; ergo non est per se nota quoad nos. Et ratio ulterior est, quia Deum apprehendimus imperfecte, & æigmatice, seu per Creaturas, non intuitive, & in se; & ideo non determinamur ad affirmandam Dei existentiam, nisi per Creaturas, & post altam rationationem; aliter Dei existentia ob summam evidentiam esset indemonstrabilis; sicut demonstrari non potest, Totum esse majus sua parte; cum demonstratio procedere debeat ex notioribus, & nihil sit notius hoc principio.

IV. Objic. 1. Illud est per se notum quoad nos, quod qui negat perceptis terminis, sibi contradicit; ut qui negaret, Totum esse majus sua parte; negat quippe totum esse totum; sed hujusmodi est, Deum existere; ergo Deum existere est per se notum quoad nos. Prob. min. quia Deus est cumulus omnium perfectionum, atque adeo existentiam includit; ergo qui negaret, Deum existere, negaret Deum esse hujusmodi cumulum, unde sibi contradiceret.

Confirm. qui negaret, existere aliquam veritatem, simul diceret dari hanc veritatem, quod nulla veritas detur, atque adeo sibi contradiceret; & ideo dari aliquam veritatem, est per se notum quoad nos; sed etiam qui negaret Deum existere, diceret, non existere ens includens existentiam: unde sibi contradiceret; ergo pariter Deum existere, est per se notum quoad nos.

Resp. argumentum probare, quod etiam sit per se notum quoad nos, Trinitatem Personarum, quæ sit cumulus omnium perfectionum, & Creaturam maximam existere; nam qui dicit Trinitatem, dicit Trinitatem cumulum omnium perfectionum includentem existentiam; ergo qui negaret illam existere, sibi contradiceret. Directe dico, Deum signate esse cumulum omnium perfectionum includentem existentiam: an vero exercite sit hujusmodi, non est per se notum: sed debet per discursum cognosci: unde Atheus negans Deum existere, dicit, Deum, qui signate existit, non existere exercite; unde non sibi contradicit aperte, & perceptis statim terminis; quanvis si intime per discursum eos penetret, sibi contradicat. In forma nego minorem: ad probationem dist. antec. Deus est cumulus omnium perfectionum, signate, concedo, exercite, subdistinguo, ita ut per discursum hoc innoteat, concedo, ita ut statim innoteat, nego antec. & distinguo similiter consequ.

Ad confirm. esto evidens esset, aliquam veritatem existere; at non est per se notum

quoad nos, existere primam veritatem, scilicet Deum.

V. Objic. 2. Hic terminus, Deus, significat Ens necessario existens; atqui perceptis terminis hujus propositionis, Ens necessario existens existit, statim determinatur intellectus ad id affirmandum; non secus ac cum dicit, Totum est majus sua parte; ergo etiam perceptis terminis hujus propositionis, Deus existit, statim intellectus id affirmat, atque adeo Deum existere, est per se notum quoad nos.

Confirm. Est per se notum quoad nos, existere sufficientiam cujuslibet Entis creati, dari ultimum finem omnium, dari necessitatem necessariorum, ac Numen ab omnibus colendum; sed hæc omnia sunt prædicata solius Dei; ergo est per se notum quoad nos, dari Deum.

Resp. recurrere easdem instantias de Trinitate, & Creatura perfectissima; Quare dist. maj. hic terminus Deus, significat Ens necessario existens in actu signato, concedo, in actu exercito, subdistinguo: ita ut hoc innoteat per discursum, concedo, statim perceptis terminis, nego maj. & distinctæ min. nego consequ. Sicut qui dicit, Trinitas optima existit, dicit, quod si ea sit possibilis, existat exercite; si vero sit chimæra, existat tantum signate; ita prorsus qui dicit, Deus existit.

Ad confirm. argumentum ad summum probat, quod sit per se notum quoad nos, Deum existere, sub conceptu aliquo convertibili cum Deo (quod. mox in tertia conclusione admittimus) non vero sub conceptu Entis necessarij, cumuli omnium perfectionum. In forma concessa maj. distinguo min. hæc prædicata sunt solius Dei, & cum Deo convertuntur, itaut hoc innoteat per discursum, concedo: itaut statim innoteat nego minorem, & consequentiam. Sicut in hoc syllogismo: Video venientem, & discerno a non veniente, veniens est Coryscus; ergo video Coryscum, & discerno a nostro Corysco; consequentia non tenet, quia variatur appellatio terminorum; ita in hoc alio syllogismo: Habeo perceptis terminis evidentiam de Numine ab omnibus colendo, hoc Numen est Deus; ergo perceptis terminis habeo evidentiam de Deo, consequentia non tenet ob variationem appellationis terminorum, sicut enim in primo casu habetur evidentia de veniente in quantum veniente, non in quantum Corysco, quamvis Coryscus identificetur cum veniente; ita in secundo casu habetur evi-

4 Pars I. Disp. I. De Essentia, & Attributis Divinis.

dentia de Numine colendo in quantum tali, non in quantum est Deus, quamvis cum Deo identificetur.

VI. Dico. 3. Quamvis non sit per se notum quoad nos, Deum existere sub conceptu Dei, seu Cumuli omnium perfectionum, est tamen per se notum Deum existere sub conceptu aliquo convertibili cum Deo, puta Supremi Legislatoris, Numinis colendi, &c.

Prob. Est per se notum quoad nos, dari obligationem ad non peccandum, puta ad non mentium, quibuscumque Creaturis perfectionibus, & perfectionibus impellentibus ad mentium; ergo est per se notum quoad nos, dari Ens aliquod superius quovis Ente creato obligans homines ad non mentium; ergo est per se notum quoad nos, existere Deum sub conceptu supremi Legislatoris obligantis ad non peccandum. Prima consequentia patet, quia nemo potest obligari, nisi a superiore, & debet esse superior quovis Ente creato, atque adeo Deus, qui obligare potest ad non faciendum aliquid, ad quod omnes Creaturæ impelluntur.

Hinc sequitur, non solum esse impossibile moraliter, ut docet Lugo disp. 5. de Incarnatione sect. 5. & Martinionius disp. 79. de Peccatis, sed etiam esse impossibile metaphysice peccatum pure Philosophicum, hoc est apprehensum dumtaxat ut dissonum naturæ rationali, & non ut offensam Dei, atque adeo Theologicum, ut docent communis. Ratio est, quia est impossibile metaphysice, quod quis peccet advertendo, quod homicidium v.g. sit dissonum naturæ rationali, quin simul advertat illud prohiberi ab aliquo superiore. Cum autem solus Deus sit superior toti naturæ rationali obligans ad non peccandum, hinc necessario qui peccat advertit, se transgredi Divinam legem, atque adeo Deum offendere; unde quodvis peccatum est Theologicum, seu offensivum Dei. Merito proinde ab Alex. VIII. confixa est Thesis illa dicens, Peccatum Philosophicum disconveniens graviter naturæ rationali, & recte rationi, non esse Dei offensam, nec dissolvere amicitiam cum Deo, nec esse pœna æterna dignum; quod fuisse ostendi in Trutina Theologica Thesium damnatarum.

Confirm. quia quod est cuilibet notum perceptis terminis, dicitur per se notum quoad nos; atqui cuilibet Nationi perceptis terminis notum est, dari Numen ali-

quod colendum; ergo per se notum est quoad nos, Deum existere sub hoc alio conceptu convertibili cum Deo, scilicet Numinis colendi. Minor constat omnium Patrum, & Philosophorum consensum; unde Aristoteles 1. topic. 9. ait: qui dubitaret sint ne Dei colendi, indigeret supplicio, & qui dubitaret, an nix sit alba, indigeret sensu; nemo autem ratione.

VII. Ex quibus sequitur 1. Neminem habere posse ad longum tempus ignorantiam Dei saltem sub conceptu convertibili cum Deo. Ratio est, quia nemo potest diu vivere, quin advertat se obligari ad sequendum conscientie dictamen, quod est præcox Divinæ voluntatis obligantis; ergo non potest diu carere cognitione Dei saltem sub conceptu Supremi Legislatoris obligantis ad non peccandum. Hinc Job. 36. dicitur: *Omnes homines vident eum, unusquisque in suetur procul.*

Sequitur 2. Nec posse dari Nationem aliquam, cui non innotescat Deus sub conceptu Numinis colendi: cum a posteriori constet, nullam fuisse hujusmodi Nationem, ut communissime docent Patres apud Gonetum disp. 1. de Deo art. 2. præsertim Damascenus l. 1. Orthodoxæ fidei cap. 1. dicens: *Notitia Dei omnibus a natura est infusa, neque id aliquis ratione mens ignorare potest.* Quod ipse Tullius etiam expressit lib. 1. de Natura Deorum, ubi habet: *Quæ enim Gens unquam fuit, est, aut quod genus hominum, quod non habeat sine doctrina anticipationem quandam Deorum, &c.*

Sequitur 3. Nec posse aliquem ad longum tempus habere ignorantiam invincibilem Dei sub conceptu Numinis ab omnibus colendi; aliter non esset bene constituta Respublica humana, si non posset quilibet facile agnoscere suum ultimum finem, ad quem ductu Naturæ tendit. Et quamvis aliquis in schola Atheistarum instructus, aut in sylvis educatus possit per aliquod tempus hujusmodi notitia carere; ea tamen est adeo obvia, ut non possit diu hominila carere, ita ut saltem non dubitet, ac proinde teneatur veritatem inquirere, & supernum lumen exposcere; Esto aliquando in pœnam culpæ hoc lumen Deus denegat, in quo casu ignorantia Dei esset saltem remore culpabilis, & vincibilis.

Adde, quod si posset dari ignorantia Dei omnino invincibilis, sequeretur, quod posset quis inculpabiliter Deos falsos adorare, & excusari a peccato Idololatriæ; quod nemo admiserit. Prob. sequela, quia Theologi

logi communissime contra Iansenium docent, Ignorantiam invincibilem excusare a peccato, ut constat ex propositione II. ab Alexandro VIII. proscripta, & ex verbis illis Christi Domini Joannis 15. *Si non venissem, & eis locus non fuisset, peccatum non haberent.* Unde Augustinus lib. 3. de libero arbitrio cap. 15. *Non tibi deputatur ad culpam, quod invitus ignoras, sed quod negligis quærere, quod agnoscis;* ergo habens invincibilem Dei ignorantiam a peccato Idololatriæ excusaretur, si coleret Deos falsos.

ARTICULUS II.

An, & quomodo demonstretur a posteriori Dei existentia?

VIII. **R** Abbi Moyses apud D. Thom. q. 10. de veritate art. 12. & Aliacenſis apud Suar. disp. 9. metaph. sect. 2. negarunt, posse Dei existentiam demonstrari. Hæc tamen sententia a D. Thom. dicitur manifeste falsa; & Theologis communiter cum eodem Suario damnatur ut erronea; & ab aliquibus ut heretica; ab aliis ut proxima errori; ab aliis ut parum tuta in fide; ab aliis ut temeraria. Sed abstinendo ab his censuris

Dico 1. ex Scripturis, & ratione constat, posse Dei existentiam demonstrari.

Prob. 1. pars, quia Sapientia 13. dicitur: *A magnitudine speciei, & Creaturae cognoscibiliter poterit Creator eorum videri;* ubi ly *videri*, ut advertit Vasquez, proprie significat evidentiam metaphysicam. Similiter ad Rom. 1. dicitur: *Quod notum est Dei, manifestum est in illis: invisibilia enim ipsius per ea, quæ facta sunt, intellecta conspiciuntur;* ergo ex Scripturis constat, Dei existentiam demonstrari posse non solum demonstratione morali, quod ab Adversariis admittitur, sed etiam metaphysica.

Prob. 2. pars, cum quia de facto ratione naturali demonstratur, ut mox videbimus; tum etiam quia nisi posset naturaliter demonstrari Dei existentia, deesset in natura medium necessarium ad honeste operandum, & ad assequendum ultimum finem, unde natura deficeret in necessariis: sequela est absurda; ergo & id, unde sequitur. Prob. sequela, quia medium necessarium ad honeste operandum, & ad contemnendum delectabile præ honesto est cognitio circa Dei præcipientis, & remuneratoris in æternum; sola enim cognitio probabilis non

est sufficiens, ut patet; si enim cognitio & evidens, & certissima de fide, quam habemus, vix sufficit, a fortiori si daretur cognitio tantum probabilis. Hinc solum potest aliquis culpabiliter avertere animum ab indaganda Dei existentia, & illam in corde suo insipienter negare; ac si advertat ad ea, quæ Dei existentiam ostendunt, facile in ejus clarum notitiam deveniet; ut enim diximus ex Damasceno: *Notitia Dei omnibus a natura est infusa, neque id aliquis ratione utens ignorare potest.*

IX. Dico 2. multipliciter demonstratur Dei existentia, tum demonstratione metaphysica, tum etiam morali.

Prob. percurrendo demonstrationes metaphysicas adductas a D. Thoma hic quest. 2. art. 3. quarum prima fundatur in eo principio: Omne, quod movetur, ab alio movetur; quin dari possit in motoribus processus in infinitum; ergo datur primus motor, qui, ut loquitur Boetius, *Immutans, stabilisque manens dat cuncta moveri.* Secunda: omne, quod fit, ab alio fit; ergo datur prima causa incausata. Tertia ab absurdo: quia si omnia essent contingencia, posset non esse, sed si posset omnia non esse, jam nihil esset possibile, quia si omnia non essent, nihil posset poni, cum non datur in tali hypothesi id, quod extrahat aliquid e nihilo; ergo si omnia essent contingencia circa ullum Ens necessarium, non daretur aliquid possibile, & consequenter nec de facto. Quarta, quia in creatis unumquodque dicitur magis, vel minus bonum, seu perfectum, per hoc, quod magis assimilatur enti optimo, non vero Enti imperfectissimo: sicuti illud dicitur magis calidum, quod magis appropinquat calidissimo, non frigidissimo; ergo ens optimum necessario existens non est chimæra, sed datur de facto. Prob. consequ. quia si esset chimæra, seu Ens imperfectissimum, illud in creatis esset melius, quod magis appropinquaret huic chimære. Quinta ex gubernatione rerum: nam inanimata per se tendunt in finem proprium; ergo ab alio cognoscendo debent ad talem finem dirigi, sicut sagitta a sagittario; aliter per accedens, & casu ad proprium finem collimarent; quod dici non potest; quia quod semper contingit, non contingit casu, aut per accedens. Quare quemadmodum (ut loquitur D. Athanas. & Nazianzen.) audito citharæ concentu, statim dicimus citharam a perito pulsari, & viso mirabili edificio commendamus opificis artem, ac audito Poemate cordato

6 Pars I. Disp. 1. De Essentia, & Attributis Divinis.

commendamus Poetam, ita viso Mundi opificio statim naturæ ductu agnoscimus reum omnium conditorum Deum.

Moralibus etiam demonstrationibus existentia Dei ostenditur. Primo qui sem ex necessitate Supremi Legislatoris, qui obliget Creaturam rationalem, upote quæ non potest ab ullo Legislatore creato obligari; cum ex conscientia dictamine teneatur non peccare quibuscunque Creaturis impellentibus ad peccandum, ut diximus articulo superiore. Secundo ex naturali persuasione de Providentia Supremi Numinis Remuneratoris: naturalis enim persuasio non potest esse falsa, aliter dubitare possemus de veritate primorum principiorum, ad quæ ab ipsa natura determinamur; atqui naturæ ductu inclinamur ad affirmandum, probos expectare a Numine bene factorum remunerationem, & improbos supplicium pro male factis; aliter non haberemus a natura stimulos ad virtutem, sed ab ea naturaliter retraheremur ob ejus arduitatem, & ad vitia inclinaremur ob eorum delectabilitatem; ergo evidens est, dari Deum remuneratorem. Verum omnis his, & aliis demonstrationibus, quæ passim a Doctoribus promouentur, & nobis sufficit eas innuisse; cum nonnullæ careant evidentiâ summâ, quæ statim possit quolibet intellectum convincere; & solum habeant evidentiam sufficientem ad convincendos non protervos, ut sunt demonstrationes de existentia formæ substantialis materiæ primæ, & similia.

X. Dico ulti. efficaciter Dei existentia demonstratur a posteriori ex eo præsertim principio: omne quod fit, ab alio fit; ergo datur prima causa incausata. Antecedens enim & lumine naturæ notum est, & ab ipsis Atheis admittitur; cum ex nihilo nihil causari possit. Quod si creatura posset esse a se, illi competere omnia prædicata divina; quippe quæ ad assecutorem consequuntur, ut dicemus questione sequenti.

Prob. itaque consequentia. In tantum admissio hoc antecedente negari posset existentia primæ causæ incausatæ, in quantum vel esset devenire ad duas primas causas se mutuo causantes, vel in causis esset abire in infinitum; sed neutrum effugium subsistit; ergo datur prima causa incausata. Prob. min. & quidem quod non possint duo se mutuo causare eodem genere causæ, constat evidenter ex iis, quæ communiter in Physicis docentur; quod scilicet non possit dari mutua prioritas; præ-

terquam quod si ambæ istæ causæ seorsum indigent causa a se distincta, a fortiori indigebunt ambæ unitim; sicuti si quilibet effectus indiget causa, a fortiori collectio effectuum, ut mox ostendemus.

Quod vero in causis non sit abire in infinitum, sic demonstratur: quilibet effectus est sibi:met insufficientis ad dandum sibi esse, & ideo indiget causa a se distincta, a qua habeat sufficientiam ad essendum: rursus hæc causa cum sit effectus alterius causæ, est pariter insufficientis ad dandum sibi esse, atque adeo indiget alia causa, & sic in infinitum; ergo nullus effectus habet sufficientiam ad existendum, unde sine prima causa nihil existeret. Prob. consequ. inductione, & a priori. Certe si pauper v. g. vel ignorans indigeat pecunia, aut doctrina, & illas debeat ab alio habere, & hic ab alio in infinitum, nemo posset esse dives, vel doctus: similiter si cadaver, ut movetur, debeat ab alio cadavere moveri, & hoc ab alio in infinitum, nullum cadaver moveri posset; si enim cadavera quo crescunt, eo majorem vim requirunt, ut moveri possint, quomodo potest intelligi quod si crescant in infinitum, possint omnia moveri, unum ab alio? evidens quippe est, quod defectus, (puta insufficientia, paupertas, ignorantia) qui per additionem finitam semper crescunt, non possunt per additionem infinitam decrescere ad non gradum, ita ut fiant carentia talis defectus; non secus ac impossibile est, quod accidentia per additionem infinitam evadant substantia, & frigus per additionem infinitam evadat calor.

Ratio a priori est, quia quamvis universum non teneat argumentatio a distributivo ad collectivum, sed a partibus ad totum; tenet tamen in casu nostro, in quo negatur de singulis effectibus perfectio aliqua essentialis, & pura, scilicet independentia, ut mox explicabimus. Certe istæ illationes non tenent: Singuli dies æternitatis futuræ habent alium post se; ergo etiam omnes: singulæ partes quantitatibus possunt inter se distanciacari per partes æquales; ergo etiam omnes collectivæ: singuli Homines habent duos oculos; ergo & omnes collectivæ. Hinc multi putant, argumentum a distributivo ad collectivum nunquam tenere vi formæ; Alii tamen cum Fasolo, & Martinez docent, solum non tenere in predicatis quantitatibus, aut quantitati attributis: v. g. singuli palmi in linea infinita habent alium post se: ergo & omnes

omnes. Alii hanc regulam tradunt cum hæc in solido lib. 1. tract. 1. contrav. 8. quoties prædicatum competit parti, qua pars est; tunc non tenet illatio a parte ad totum: v. g. singulæ durationes creaturæ ab æterno habent aliam ante se; ergo & omnes; Contra vero si prædicatum conveniat parti secundum se: v. g. singulæ durationes distinguuntur a re durante; ergo & omnes. Hanc regulam Esparza quærit. 2. de Deo, Pallavicin. lib. 8. sic clarius explicant: quoties prædicatum, quod tribuitur parti, minuitur, vel tollitur per conjunctionem cum altera parte, tunc non tenet a distributivo ad collectivum. v. g. singulæ guttæ oceani sunt parvæ; ergo & omnes collectivæ; scilicet vero si prædicatum non minuitur, v. g. singulæ partes aquæ sunt substantiæ; ergo & omnes. Verum hæc regulæ sæpe fallunt. Non enim tenet hæc illatio: singuli Homines sunt possibiles in sensu composito decreti de non producendis infinitis; ergo & omnes; Neque tenet: singuli actus liberi sunt possibiles, puta consensus, & dissensus; ergo & omnes collectivæ. Quare quicquid sit de his regulis.

XI. Equidem hanc regulam statuo cum Petro Hispano tractatu s. 5. de toto integrali n. 4. Universum tenet argumentatio a distributivo ad collectivum destructive, (hoc est per negationem) quoties prædicatum importat perfectionem aliquam essentialem puram. v. g. Nullus calor est substantia; ergo nec omnes; Nullus lapis est vivens; ergo nec omnes sunt viventes. Unde tenet in casu nostro: Nullus effectus est independens, & incausatus; ergo nec omnes collectivæ; atque adeo datur prima causa omnium incausata; Sicuti quia nullum cadaver potest de se moveri, nec omnia moveri possunt independentes ab alio movente totam collectionem cadaverum.

Quod regulæ istius sit vera, constat tum inductive, ut ostendimus, tum ratione; quia non aliter possunt omnia collectivæ cedere aliqua perfectione essentiali pura (quales sunt perfectiones, quæ Deo formaliter competunt) nisi per hoc, quod singula careant; ergo si carent singula, tenet illatio, quod careant etiam omnia collectivæ: v. g. non aliter possunt omnes calores negare independentiam a subiecto, nisi per hoc quod singuli careant hac independentia; & in casu nostro non possunt aliter omnes effectus excludere independentiam, nisi per hoc, quod singuli excludant; ergo sicut tenet hæc illatio: singuli calores indigent

subiecto; ergo & omnes collectivæ; ita pariter tenet; singuli effectus indigent causa a se distincta; ergo etiam tota collectio effectuum.

Confirm. paritate causarum intentionaliū: Voluntas enim ex Philosopho non potest in finibus progredi in infinitum, quia ejus appetitus est inexplorabilis; Nec potest intellectus in præmissis abire in infinitum sine primis principiis, in quibus sistat, quia sic nihil posset scire; ergo neque in causis realibus per se subordinatis erit progredi in infinitum; unde nullum est effugium Atheitarum. Quamvis autem in causis per accidens subordinatis posset dari processus in infinitum, puta in serie generationum ab æterno, hinc tamen non fit, quominus hæc ipsa series causarum arguat existentiam primæ causæ; Nam si istæ causæ per accidens subordinantur, eo ipso dari debet causa aliqua extra totam collectionem, a qua sic vel sic subordinentur, cum non possint seipsis subordinari; unde evidenter ex contingentia creaturarum Dei existentia demonstratur.

XII. Objic. 1. Non tenet illatio a distributivo ad collectivum destructive in serie infinita causarum causarum alios, & alios effectus sine ultimo; ergo neque tenet in serie effectuum causarum ab alia, & alia causa sine prima. Antecedens explicatur: sicuti potest dari series generationum in æternitate futura sine ultima, ita dari potest in eodem instanti series causarum sine ultimo effectū: unde non tenet hæc illatio: Nulla causa caret effectū a se distincto; ergo neque tota series causarum caret effectū distincto a tota collectione; unde nec tenet illatio in casu nostro.

Confirm. 1. in serie generationum per accidens non tenet argumentatio a distributivo ad collectivum; ergo neque in serie causarum per se. Antecedens explicatur: dicitur series generationum, seu causarum series per se, quoties, ut producantur effectus, necesse est, quod tota illa series causarum actu influat in talem effectum; v. g. si ut moveatur aqua, deberet moveri baculus, & baculus deberet moveri ab alio, & hic ab alio movente in infinitum; hæc series dicitur causarum per se. Dicitur vero series causarum per accidens, quoties, ut ponatur hic, & nunc effectus non est necesse, quod aliæ causæ antecedentes nunc influant: v. g. si detur series generationum ab æterno, Petrus qui nunc a suo Patre generatur, eodem modo cau-

8 *Pars I. Disp. 1. De essentia, & Attributis Divinis.*

satur, ac si generans nullatenus fuerit genitus ab aliis Hominibus, dummodo existat, & conservetur a Deo, quando causat, cum Avus, & Proavus nullatenus hic, & nunc influant in Filium. His explicatis, certe in serie generationum ab aeterno, quæ dicitur series causarum per accidens, non tenet hæc illatio: singuli Homines fuerunt geniti ab alio Homine; ergo omnes collectivè fuerunt geniti ab alio Homine distincto a tali collectione; ergo neque tenet illatio in serie causarum per se.

Confirm. 2. Non tenet illatio a distributivo ad collectivum constructive, seu per affirmationem; ergo nec destructive, seu per negationem. Antecedens explicatur: Non tenet hæc illatio: singuli Homines possunt causare alium hominem a se distinctum; ergo tota collectio hominum possibilitatem causare potest alium hominem ab ea collectione distinctum; ergo nec tenet consimilis illatio destructive: Nullus homo, vel nullus effectus habet sufficientiam ad existendum independentem a causa distincta; ergo nec tota Hominum, seu effectuum collectio; ut proinde dari debeat prima causa incausata.

Resp. concesso Antecedente, nego consequentiam. Disparitas est, quia in primo casu de causis causantibus in infinitum prædicatum causandi in actu secundo est accidentale; at in casu nostro de effectibus causatis in infinitum prædicatum insufficientis ad existendum est essentialiter; quilibet enim effectus essentialiter dependet a causa, non tamen quilibet causa essentialiter causat alium effectum.

Ad primam confirmationem, omisso antecedente, quod negatur, si repugnet creatura ab aeterno, nego consequentiam. Disparitas est eadem, quia in serie generationum ab aeterno prædicatum dependentis ab alia causa secunda est prædicatum accidentale, cum possit quilibet effectus immediate pendere a causa prima.

Ad 2. nego consequentiam. Non tenet illatio a distributivo ad collectivum constructive, ut in casu adducto: unde si aliquando tenet illatio, solum tenet ratione materiæ, non vi formæ: contra vero destructive semper tenet illatio in prædicatis essentialibus, ut ostendimus, atque adeo tenet vi formæ.

XIII. Objic. 2. In causis intrinsicis est abire in infinitum sine prima causa intrinseca incausata; ergo etiam in causis extrinsecis. Antecedens patet in sententia admi-

tentium infinitas partes actu distinctas in quantitate: palmus enim intrinsece causatur a duobus semipalmis, & hi a quatuor quartis in infinitum, quin deveniatur ad punctum, aut ad minimum naturale, quod causat, & sit incausatum. Consequentia videtur sequi, quia magis indiget effectus suis causis intrinsicis, sine quibus ne divinitus quidem potest existere, quam indigeat causa extrinseca, cum possit esse vel ab hac, vel ab illa.

Confir. quia in sententia admittentium possibilitatem infiniti creati, si datur lapis extra centrum, indiget sustentaculo, ne descendat, & si supra hunc lapidem addatur alius, & alius in infinitum syncategorematice, semper crescit indigentia sustentaculi; quod si lapides sint infiniti, nullo indigent fulcimine, cum non possint descendere; sicut non potest linea infinita retrahi, quia deberet describi spatium post lineam infinitam, & sic infinitum esset utrinque clausum, quod repugnat; ergo pariter dici poterit, quod singuli effectus indigeant causa, ne ruant in nihilum, non tamen collectio effectuum infinita.

Confirm. 2. Non tenet hæc illatio: quilibet creatura exceditur ab alia, seu excludit suprematam; ergo tota collectio creaturarum exceditur ab alia creatura, quæ sit omnium suprema; ergo neque tenet in casu nostro, quilibet effectus habet suam causam, seu excludit independentiam; ergo & tota collectio effectuum.

Resp. 1. argumentum cum prima confirmatione non habere vim adversus admittentes minima naturalia, & negantes possibilitatem infiniti creati. Deinde dari potest disparitas, & argumentum retorqueri: Nam partes quantitatis indigere aliis partibus componentibus, nihil aliud importat, quam singulas partes quantitatis excludere simplicitatem, & esse compositas; & ideo tenet illatio a distributivo ad collectivum, quod etiam omnes partes collectivæ excludant simplicitatem, & sint compositæ; ergo tenere etiam debet illatio in causis extrinsecis, singuli effectus excludunt independentiam; ergo etiam omnes collectivæ.

Ad 1. confirmationem responderi etiam potest, quod lapides illi infiniti per accidens posita illa combinatione non indigerent sustentaculo, nec possent descendere, secus vero si aliter combinentur.

Ad 2. retorquendo pariter argumentum: ex
co,

eo, quod nulla creatura sit suprema, atque adeo quælibet habeat aliud ens supra se, bene inferitur, quod neque toti collectioni creaturarum competat supremitas, sed dari debeat Deus ens supremum; ergo pariter ex eo, quod nulla creatura sit independens, nec tota collectio creaturarum sit independens; sicuti quia nullum cadaver est vivens, nec tota collectio cadaverum, unde demonstratur, dari primam causam incausatam.

ARTICULUS III.

Num demonstratur quasi a Priori Dei existentia sub conceptu entis optimi?

XIV. **C**um existentia sit una ex perfectionibus, quæ cumulum omnium perfectionum constituunt, atque adeo spectet ad constituendam Dei essentiam sub conceptu hujus cumuli, seu entis optimi, idcirco non concipitur tamquam proprietatis, sed tamquam pars essentie Divinæ: propterea si ex possibilitate entis optimi demonstratur ejusdem existentia, hæc demonstratio dicitur quidem esse a priori, quatenus ratione nostra prius est aliqd esse possibile, quam existere; non dicitur tamen esse demonstratio a priori rigoroſe; cum non sit demonstratio proprietatis ex essentia; sed minus rigoroſe, & quasi a priori, quia ex divina essentia, ejusque possibilitate descendit existentia tamquam pars ejusdem essentie. Utrum sic demonstrari possit Dei existentia? negant communiter Recentiores laudantes pro se D. Thomam 1. contra Gentes 12. ubi negat, posse Dei existentiam demonstrari aliter, quam per effectus, & a posteriori. Verum Angelicus ibi solum negat, Dei existentiam (utpote prædicatum Dei essentiale, & non proprietatem) demonstrari posse demonstratione a priori stricte dicta, scilicet assumendo pro medio definitionem ad inferendam proprietatem, præscindit tamen, An possit minus rigoroſe a priori demonstrari.

XV. Dico equidem, posse Dei existentiam quasi a priori demonstrari ex conceptu Entis optimi, seu cumuli omnium perfectionum excludentis quæcumque defectum, & imperfectiorem. Ita Perez 1. p. disp. 1. & Recentiores Hispani ex D. Anselmo lib. pro inspicute apud Arriagam disp. 2. de Deo scilicet. 2. Ita etiam Agidius, & Abulensis apud Recupitum quæst. 18.

Prob. si ex primis, & notissimis propo-

sitionibus demonstraretur possibilitas Dei sub conceptu Entis optimi, demonstraretur quasi a priori ejusdem existentia; sed ex primis, & notissimis demonstratur Dei possibilitas ex conceptu Entis optimi; ergo demonstratur quasi a priori ejus existentia. Major est evidens, & admittitur. Evidens quippe est, quod si non sit chimæra ens optimum includens omnes perfectiones, necessario existat; cum una ex perfectionibus, quas debet includere, sit existentia: sicut evidens est, quod Ens pessimum, seu purum malum, cum includat omnes imperfectiones, debet non existere. Minor itaque sic demonstratur. Nulla chimæra excludit contradictionem, quæ ex suo conceptu est malum, & imperfectio; ergo nulla chimæra excludit quæcumque imperfectionem; ergo quod excludit quæcumque imperfectionem, scilicet Ens optimum, non est chimæra, quod erat demonstrandum ex primis, & notissimis. Antecedens enim est ipsa notio chimære, quæ in hoc distinguitur ab omni non ipsa, quod contradictionem includat; quod vero contradictio sit malum, & imperfectio, est etiam ex terminis notum, nec ab ullo in dubium revocatur: Contradictio enim non potest esse bona, seu amabilis ab ulla voluntate, quia voluntas illam appetens frustraretur sine intento. Neque dici potest, quod chimæra sit bona, & non bona; Nam sic est solum bona cum addito distrahente, atque adeo absolute non bona. Prima consequentia evidenter descendit ex antecedente; sicuti enim, si nulla Creatura excludit aliquam ubicationem, vel durationem, evidenter sequitur, quod nulla Creatura excludat quæcumque ubicationem, ita cum nulla chimæra excludat aliquam imperfectionem, puta contradictionem, evidenter sequitur, quod nulla excludat quæcumque; sunt enim contradictoria aliquis, & nullus; & ideo impossibile est, ut chimæra aliquam, & nullam habeat imperfectionem, seu quæcumque excludat. Secunda consequentia descendit ex prima evidenter per conversionem simplicem: ex summis enim tenet conversio simplex in propositionibus universalibus negativis, juxta illud, *simpliciter feci*; v. gr. Nullus homo est lapis; ergo nullus lapis est homo; quare in casu nostro ex eo, quod nulla chimæra excludat quæcumque imperfectionem, evidenter inferitur, quod nullum Ens excludens quæcumque imperfectionem, seu Ens optimum, sit chimæra.

XVI. Confirm. & explicatur demonstratio tum a simili, tum a contrario: Bene enim demonstratur consimili ratiocinatione, quod Ens optimum non sit Creatura, dicendo: Nulla Creatura excludit dependentiam, quæ ex conceptu suo est imperfectio; ergo nulla Creatura excludit quamcumque imperfectionem; ergo quod excludit quamcumque imperfectionem, seu Ens optimum non est Creatura. Bene etiam demonstratur a contrario, quod Purum malum, seu Ens pessimum includens omnes imperfectiones sit chimæra, atque adeo non existat, dicendo: Nullum Ens reale distinctum a chimæra excludit possibilitatem, quæ ex suo conceptu est perfectio; ergo nullum Ens reale excludit quamcumque perfectionem; ergo Ens excludens quamcumque perfectionem, seu purum malum non est Ens reale, sed chimæricum. Similiter ergo demonstratur, quod purum bonum non sit chimæra, sed necessario existat dicendo: Nulla chimæra excludit contradictionem; ergo nulla quamcumque imperfectionem; ergo Ens excludens quamcumque imperfectionem, seu purum bonum, non est chimæra; atque adeo existit.

Ratio a priori, cur purum bonum non sit chimæra, est, quia chimæra essentialiter includit contradictionem, seu esse, & non esse; atqui quod est purum bonum, seu purum esse, includit tantum esse, non vero non esse; unde non habet constitutiva chimære; sicut enim pura lux non includit tenebras, ita purum esse non includit non esse, propterea Deus de se ipso dixit Moyſi Exod. 3. *Ego sum, qui sum*; quia in Deo nihil datur præter esse continens eminenter omne esse.

Neque dicant Athei, quod sicut Purum malum includit contradictionem, quia signate dicit tantum non esse, exercite vero, seu si daretur, diceret esse simul, & non esse, ita purum bonum includit contradictionem, quia signate dicit tantum esse, exercite vero, si daretur, diceret esse simul, & non esse: sicut Ens majus Deo signate dicit omnes perfectiones Divinas in gradu excellentiori, exercite vero repugnat.

Nam contra est, quia ex adducta demonstratione evidenter infertur, Purum bonum non solum signate, sed etiam exercite dicere tantum esse, & excludere contradictionem: Nam nulla chimæra exercite, seu si daretur, excludit contradictionem; ergo nulla exercite excludit quamcumque imperfectionem; ergo Ens exercite excludens

quamcumque imperfectionem, seu purum bonum non est chimæra; atque adeo existit; hæc autem ratiocinatio non militat circa purum malum, aut circa Ens majus Deo, cum evidenter falsum sit hoc antecedens; Nulla chimæra est purum malum, seu Ens majus Deo.

Item sic arguo: Nulla chimæra est bonum; ergo nulla est optimum; ergo Ens optimum non est chimæra, atque adeo existit. Antecedens est evidens, cum nulla chimæra sit Ens reale, quod unice convertitur cum bono; prima consequentia evidenter descendit; quomodo enim potest esse optimum, quod non est bonum? Quomodo v. g. calidissimum, quod non est calidum? secunda consequentia descendit per conversionem simplicem jam explicatam.

XVII. Obijc. 1. Chimæra est id, quod si existeret, utramque partem contradictionis involveret; ergo chimæra, si existeret, includeret simul, & non includeret imperfectionem; ergo demonstratio adducta non probat efficaciter, quod Deus non sit chimæra. Prob. secunda consequentia, quia Atheus concedit, nullam chimæram excludere contradictionem, dicit tamen, quod excludat, & non excludat imperfectionem, & sic negat ultimam consequentiam.

Confirm. 1. quia non apparet, quomodo possit ullatenus dici a priori demonstratio existentie Dei ex ejus possibilitate, posito, quod juxta doctrinam supra laudatam Suarezii, quodvis attributum Divinum, utpote illimitatum, implicite excurrit ad aliud; unde nequit possibilitas Dei esse prior, quam existentia.

Confirm. 2. quia non potest dici demonstratio illa, quæ a pluribus cordatis viris censetur inefficax; cum non possit a cordatis viris negari propositio, & illatio evidens.

Resp. Chimæram absolute dicere contradictionem, non vero dicere, & non dicere: & ideo chimæra absolute includit imperfectionem identificatam cum contradictione, non vero includit, & non includit; sicut absolute opponitur enti reali. Et ratio a priori est, quia chimæra dicit esse, & non esse, seu esse cum addito distrahente, atque adeo absolute dicit carentiam cujuscumque esse, seu perfectionis. Verum omissa prima consequentia, quod scilicet chimæra includat, & non includat imperfectionem, adhuc demonstratio nostra potest efficaciter instaurari, dicendo: Nulla chimæra in statu exercito excludit tantum

contradictionem, & consequenter quaecumque imperfectionem; ergo quod tantum excludit quaecumque imperfectionem in statu exercitio, scilicet ens optimum, non est chimæra.

Ad 1. confirm. quamvis quodlibet attributum Divinum implicite excurrat ad aliud, unde non possit ab alio distingui distinctione rationis propria, quæ distinctione præcisionis, ut animal distinguitur a rationali, sed solum impropria, quæ dicitur distinctione explicationis, ut Homo distinguitur ab Animali rationali; nihilominus in omnium sententia, attributum intellectivi in Deo dicitur prius volitivo per hoc, quod in creatis intellectio præcedat volitionem; ergo cum in creatis possibilitas rei præcedat existentiam, etiam in Deo ratione nostra Attributum possibilitatis est prius attributo existentia; unde demonstratio existentia Dei ex possibilitate optime dici potest a priori, licet non sit rigoroſe talis, ut prænotavimus ex eo, quod existentia Divina non sit passio, sed pars Divinae essentia; ac proinde est demonstratio quasi a priori.

Ad 2. Argumentum probat, quod neque a posteriori demonstrari possit cum Angelico Dei existentia; cum pariter multi cordati negarint, demonstrationes illas posterioriticas esse efficaces. Quare dicendum, ab iis tantum hæc negari, qui non intime advertunt ad vim propositionum, & ad bonitatem illationis, ad quæ si adverterent, ineluctabiliter inferrent Dei existentiam.

XVIII. Objic. 2. Si posset quasi a priori ex conceptu Entis optimi demonstrari Dei existentia, posset similiter demonstrari existentia Creaturae, vel Trinitatis optima includentis omnem perfectionem; sequela est falsa; ergo & antecedens. Prob. sequela, quia sicut nos dicimus, Nulla chimæra est bonum, atque adeo nec est optimum, seu purum bonum; ergo purum bonum non est chimæra; ita posset etiam argui: Nulla chimæra est Creatura, aut Trinitas optima includens omnes perfectiones; ergo Creatura, vel Trinitas optima non est chimæra; In tantum hæc ratiocinatio non tenet, quia Creatura optima est signate tantum optima, non exercite, seu significatur solum, quod sit optima, quin possit a parte rei poni Creatura, quæ sit optima, & omnes imperfectiones excludat, cum non possit excludere dependentiam: De Trinitate autem optima non constat evidenter, sed solum est de fide certum, quod non sit chimæra; argui hoc idem di-

cit Atheus de Ente optimo assumendo, quod sit chimæra; ergo.

Resp. nego sequelam. Ut autem advertatur discrimen inter Ens optimum, & Creaturam, vel Trinitatem optimam, sciendum primo universim, tunc eodem modo se habere rem signate, seu prout significatur, & exercite, seu prout ponitur a parte rei, quando prædicata illius nullam dicunt oppositionem, ut sunt prædicata Hominis rationalis; contra vero si prædicata rei, quæ concipitur, inter se opponuntur, tunc talis res aliter se habet signate, ac exercite; ut si concipitur homo hinnibilis; hic enim in actu signato est homo, sed in actu exercitio non est homo, quia hinnilitas destruit rationem hominis. Hinc Creatura optima solum signate est optima, non vero exercite, quia dependentia propria Creaturae opponitur predicato optimi excludentis quaecumque imperfectionem.

Sciendum 2. prædicata rei, quæ concipitur, aliquando evidenter non opponi, ut prædicata hominis rationalis; a'quando opponi evidenter, ut homo hinnibilis, Creatura optima, Numerus maximus; aliquando obscurum esse, an opponantur, ut Trinitas optima, Creatura ab æterno, &c. sicut autem quando evidenter aliqua prædicata opponuntur, tunc evidens est, quod aliter se res habeat signate, ac in statu exercitio; ita quando obscurum est, an opponantur, obscurum pariter est, an aliter se res habeat in actu signato, ac in exercitio: propterea quia obscurum est, quod est de fide certum, prædicata Trinitatis optima non opponi, ideo obscurum est, an aliter se habeat signate Trinitas optima, aliter exercite.

Ex his patet, quomodo hæc propositio, Nulla chimæra est Creatura optima, sit evidenter falsa, quia evidens est hæc prædicata inter se opponi, atque adeo huiusmodi Creaturam esse optimam signate, non exercite: Hæc alia vero propositio, Nulla chimæra est Trinitas optima, sit propositio obscure veritatis, licet de fide sit certa; cum obscurum sit, num hæc prædicata opponantur, atque adeo obscurum est, an Trinitas optima sit optima tum signate, tum exercite. Denique hæc propositio, Nulla chimæra est Ens optimum, quamvis prima facie sit obscura, post demonstrationes tamen adhibitas de Dei existentia sit evidenter vera, ita ut evidens sit prædicata entis optimi non opponi, ut proinde Ens optimum sit optimum tum signate, tum

tum exercite, quod Athenus negat.

XIX. Objic. ult. ex Haunoldo: Dum concipitur ens optimum, seu purum ens, vel concipitur ens reale, & assumitur, quod est demonstrandum; vel concipitur ens præscindens a reali, & chimærico; ergo non est evidens, quod non sit chimæricum; Sicuti quando a longe videtur homo ambulans, & concipitur sub conceptu præcise a rationali, vel irrationali, non est evidens, quod non sit bellua.

Confr. Purum non Ens, seu purum malum excludens quaecumq; perfectionem tantum signate dicit unam solum partem contradictionis, scilicet non esse, exercite tamen, seu si existeret, diceret utramque partem contradictionis, scilicet non esse, & esse; ergo id. m. posset dicere Athenus de Puro bono, quod scilicet signate tantum dicat unam partem contradictionis, exercite vero utramque.

Resp. quod sicut quando concipimus creaturam ab æterno, peccatum irremissibile, &c. concipimus aliquid præscindendo, num sit Ens reale, an chimæricum; non quidem præcise rigorosa, sicut Animal præscindit a rationali, vel irrationali, & ut compossibile cum utraque differentia, sed præcise minus rigorosa, quatenus non apparet, num sit ens reale, an chimæricum; ita cum concipimus ens purum, concipimus ens præscindendo ab ente reali, vel chimærico præcise minus rigorosa, idest ignorando, num sit possibile, an chimærica; deinde ex primis, & ætistimis demonstramus, non esse chimæram: ac demum inferimus quasi a priori, illud existere, & sic existentia Dei demonstratur demonstratione nullatenus posterioristica, seu per effectus, quin umquam in ulla propositione assumatur id quod est demonstrandum.

Ad confrim. nego. Conseq. Furum malum excludens omnes perfectiones si existeret, excluderet simul omnes perfectiones, quia esset purum malum, & simul non excluderet, quia non excluderet existentiam, quæ est perfectio; & ideo purum malum aliter se habet in actu signato, ac in exercito: contra vero purum bonum tum signate, tum exercite importat unam tantum partem contradictionis, ut constat ex demonstratis. Adde pariteret retorqueri posse: Nam purum malum, cum includat ex conceptu suo omnes imperfectiones, debet etiam includere impossibilitatem, & negationem existentie; ergo purum bonum, cum includat omnes perfectiones, debet etiam possibilitatem, & existentiam in-

cludere, unde apte D. Anselmus insert: Deus est id, quo melius excogitari non potest; ergo existit. Quæ omnia ulterius dedante confirmabimus anno insequenti cum de Beatitudine objectiva disp. 2. qu. 2.

QUÆSTIO II.

Utrum Essentia Divina metaphysice sumpta constituatur per Prædicatum Aseitatis?

I. Certeum est, essentiam Divinam physice consideratam importare cumulum omnium perfectionum. Difficulus est, Quænam sit illa specialis perfectio, quæ est omnium prima, & radix reliquarum, atque adeo constituat Divinam essentiam metaphysice consideratam? sicuti in Homine v. g. rationalitas essentiam constituit, quia ratione nostra ex illa descendunt omnes hominis proprietates, tanquam a priori. Non repugnat autem, quod in Deo unum prædicatum ratione nostra dicatur prius alio; prædicatum enim intellectivi dicitur prius volitivo etiam relate ad Deum per hoc, quod in creatis intellectu præcedat volitionem: immo seut in creatis prædicatum substantiæ v. gr. dicitur prius prædicato viventis prioritate a subsistendi consequentia, quatenus tenet hæc illatio, est vivens; ergo est substantia, & non e contra; ita etiam in Deo attributum substantiæ dicitur prius attributo viventis, intellectivi &c. ex sola subsistendi consequentia; si enim vivens insert substantiam, & non e contra, prædicatum viventis videtur veluti dependere a substantia, quatenus nequit esse sine illo, & sic videtur habere aliquam posterioritatem; & eodem modo in Deo possibilitas est prior, quam existentia, unde demonstratio existentie Dei ex ejus possibilitate procedit prioritilice. His explicatis

Aliqui cum Scoto, Suario, Vasquez, Molina, Arriaga Divinam essentiam reponunt in prædicato intellectivi; Aureolus, & Falsolus in ipsa Intellectione actuali; Argentina in Infinitate; Gillius, & Amicus in ratione Entis in tota latitudine essendi: Nonnulli Recentiores in aseitate, prout complectitur omnes perfectiones Divinas, ex quo complexo singule descendunt: Alii denum in prædicato aseitatis, seu cause incausate independentis a quovis alio, quæ sit simul sufficientia sui, & aliorum, ita

ut hæc una perfectio Divina sit radix omnium aliorum attributorum.

II. Dico equidem cum hac ultima sententia, Essentiali Divinam metaphysice sumptam reponi in prædicato afeitatis jam explicato. Ita communiter cum Esparza, Hauldoldo, Derkeni, Petavio, Recupito.

Prob. 1. ex Scripturis: dicitur enim Exodi 19. *Ego sum, qui sum*; & rursus: *Qui est misit me*; non potest autem aliter intelligi, quod Deus sit, qui est, nisi quatenus ipse est ratio essendi, sufficientia sui, & aliorum, independens ab alio, & a se; ergo &c. Consonat D. Thom. quæst. 7. de potentia art. 2. ubi docet, Deum distinguere a quovis alio, quatenus est per essentiam, idest a se.

Prob. 2. ratione: Illud est prædicatum constitutivum Divinæ essentiae, ex quo aliunde cognito, & affirmato deducuntur reliquæ perfectiones Divinæ; sed hoc est prædicatum entis a se; ergo. Major patet: nam si omnes Divinæ perfectiones deducuntur ex prædicato A, repugnat, quod hoc prædicatum radicetur in alio; ergo hujusmodi prædicatum est radix aliorum, & primo distinctivum Dei a non Deo, atque adeo constitutivum essentiae Divinæ metaphysice sumptæ. Prob. itaque minor. Postquam a posteriori ex contingentia creaturarum cognovimus dari ens necessarium, & Primam Causam incausatam, sufficientiam sui, & aliorum, bene inferimus, hujusmodi ens esse illimitatum in quocumque genere, & continere omnes perfectiones; nemo enim a semetipso limitatur, cum nemo possit non amare seipsum; ergo ex independentia, & afeitate reliquæ perfectiones Divinæ deducuntur. Notandum tamen, prædicatum afeitatis constitutivum Divinæ essentiae esse solum independentiam in essendo, non in causando, seu sufficientiam suimet, non sufficientiam aliorum: & ratio est, tum quia prædicata absoluta sunt priora respectivis, tum etiam quia ex prædicato absoluto afeitatis, seu independentie in essendo inferitur prædicatum respectivum independentie in causando, seu primæ causæ.

Confirm. 1. quia illud prædicatum in Deo est radix omnium perfectionum Divinarum, quod immediate, & formaliter opponitur prædicato, quod in Creatura est radix limitationis, & omnium imperfectionum; sed in Creatura hujusmodi prædicatum est Abaleitas, seu dependentia ab alio, quod immediate, & formaliter opponitur afeita-

ti; ergo afeitas est prima radix in Deo: Minor patet: Nam Creaturam dependere ab alio, importat Creaturam ex se nihil esse, & nullam ex se perfectionem habere; ergo radix defectuum, & imperfectionum in Creatura est abaleitas, & dependentia.

Confirm. 2. Primum distinctivum Creaturæ a non Creatura est Abaleitas; ergo primum distinctivum Dei a non Deo est Afeitas; atqui prædicatum primo distinctivum est etiam primo constitutivum, & essentialle; ergo. Maj. prob. quia ratio Entis per nihil aliud contrahitur ad esse creatum, quam per esse dependens, & ab alio, ut per se patet; ergo primum distinctivum Creaturæ a Deo est Abaleitas.

III. Objic. 1. Prædicatum essentialle rei debet esse prædicatum, quod in re illa est perfectissimum; atqui prædicatum perfectissimum in Deo est prædicatum summe Intellectivi, vel ipsa Actualis Intellectus, vel prædicatum illimitati; ergo in aliquo ex his consistit prædicatum essentialle Dei, non vero in Afeitate. Prob. min. Illud prædicatum in Deo est perfectissimum, quod ex Creaturis cognoscitur esse in Deo, & in Creaturis est perfectissimum, ac in Deo est perfectissimo modo, & cum independentia; atqui hujusmodi est prædicatum Intellectivi, vel illimitati; ergo.

Confirm. 1. quia nisi prædicatum substantiæ intellectivæ perfectissimæ, atque adeo etiam a se constitueret essentiam Divinam, deberet hoc prædicatum Intellectivi in Deo esse secundarium, & consequens ad essentiam; sed hoc dici non potest; ergo. Prob. min. Nullum prædicatum, in quo A convenit cum B, potest esse secundarium, & consequens ad essentiam: v. gr. quia essentia Hominis est rationalitas, quæ contrahit rationes communes substantiæ, viventis, sensitivi, hujusmodi prædicata hominis non possunt esse secundaria, & descendere ex rationalitate; cum ad rationalitatem necessario præsupponantur; ergo ratio substantiæ Intellectivæ, in qua Deus convenit cum Angelis, non potest esse prædicatum in Deo secundarium, quod probetur ex independentia, sed debet ad prædicatum independentiæ præsupponi.

Confirm. 2. quia essentia, & natura idem sonant ex Augustino lib. 2. de morib. Manichæorum; sed natura idem est, ac principium operationum, seu principium motus, & quietis; ergo illud prædicatum in essentia, seu natura Divina est perfectissimum, quod est principium operationis præstantissimæ,

finæ, ut est prædicatum Intellectivi; ergo in hoc reponitur Divina essentia.

Resp. nego min. ad probationem licet prædicatum Dei perfectissimum constitutum divinæ essentiz ex creaturis demonstratur, quod sit in Deo; falsum tamen est, quod hujusmodi prædicatum debeat esse in creaturis; aliter non esset prædicatum distinctivum Dei a non Deo. Hinc prædicatum intellectivi cum non distinguat Deum a creatura, nequit Divinam essentiam constituere; Universum enim prædicatum constitutivum cuiusvis essentiz debet esse primo distinctivum.

Ad confirmationem, verum est, quod in Homine prædicata substantiz, viventis, sensitivi non sint prædicata secunda, quæ ad essentiam consequuntur, cum non probentur ex rationalitate tamquam a priori, sed potius ad rationalitatem præsupponantur: At in Deo prædicata substantiz, viventis, intellectivi sunt prædicata secunda, quæ ad essentiam consequuntur, quia in Deo ex prædicato Aseitatis inferuntur. In forma nego min. Ad probationem dist. antecedens: non potest prædicatum commune esse secundarium, si probetur tamquam a priori ex prædicato differentiali, ut in casu nostro, nego; si non probetur, ut prædicatum Animalis relate ad rationalitatem, concedo antecedens, & nego consequentiam. Ex hoc quod prædicatum intellectivi sit commune Deo, & creaturæ, non inferitur, quod non possit esse prædicatum secundarium descendens ex independentia; nam prædicata Sapientis, Boni, Misericordis sunt etiam communia Deo, & creaturæ, & tamen in omnium sententia sunt prædicata secunda.

Ad 2. Haunoldus, & Franciscus de Lugo docent, quod Deus in ratione essentiz divinæ constituitur per aseitatem; in ratione vero Naturæ, seu primi principii operationum constituitur per vim intelligendi a se; quia putant essentiam esse radicem omnium perfectionum; Naturam vero esse radicem solum operationum. Equidem dico, essentiam physice sumptam identificari cum Naturæ, essentiam vero metaphysice sumptam importare radicem omnium perfectionum, & operationum; cuiusmodi est in Deo Aseitas; Naturam vero metaphysice sumptam sub conceptu Naturæ importare primum principium omnium operationum, non vero primum principium operationis perfectissimæ; atque adeo Naturæ divinæ sub conceptu naturæ non importat solum

Intellectivitatem, sed vim ad omnes divinas operationes.

IV. Objic. 2. Prædicatum independentis, & a se in Deo descendit ex prædicato omnipotentis; ergo non est aseitas primum Dei prædicatum. Antecedens probatur, nam si ens est omnipotens, aperte inferitur, quod sit a se; si enim esset ab alio, non esset omnipotens, quia non posset ponere illud a quo est citra mutuum causalitatem.

Confirm. 1. quia prædicatum independentis, & incausati est negativum; ergo debet fundari in positivo, scilicet in prædicato Illimitati in quavis ratione essendi.

Confirmatur 2. Prædicatum aseitatis est transcendens per omnia attributa Divina; ergo non est unum prædicatum radicans reliqua, ut debet esse prædicatum essentialiale.

Confirm. 3. si prædicatum Aseitatis esset prædicatum essentialiale, sequeretur, quod prædicata substantiz, viventis, intellectivi, in quibus Deus convenit cum creaturis, deberent descendere, & inferri ex Aseitate, atque adeo deberent dici prædicata attributalia Dei; consequens est falsum, ergo & antecedens. Prob. min. quia prædicatum commune Deo, & creaturis est potius prædicatum genericum, quam attributale; ergo sicut in homine v. g. prædicatum substantiz, quod inferitur ex rationalitate, non est ratio attributalis, seu proprietas, quia non inferitur ex rationalitate velut a priori, sed potius velut a posteriori; Ita ratio substantiz in Deo non potest esse attributalis.

Resp. prædicatum omnipotentis, aut Illimitati in Deo demonstrari ex prædicato Independentis tamquam a priori, seu tamquam ex prædicato prius intellecto, & affirmato, ut constat ex rationibus conclusionis, quare dist. antecedens: prædicatum independentis inferitur ex prædicato omnipotentis, velut a posteriori, ut ex fumo ostenditur ignis, & ex insibilitate rationalitas, conc. ex prædicato prius cognito, & affirmato, nego antecedens, & consequens. Ad probationem; sicut Homo nisi esset sensibilis, non esset rationalis, & tamen insibilitas demonstrat rationalitatem solum a posteriori, ita in casu.

Neque dicas, quod non sit major ratio, cur Aseitas inferat Illimitationem a priori, & non e contra. Nam ex contingentia creaturarum demonstratur existentia Dei immediate sub conceptu entis a se, & Incausati; ex quo deinde deducitur, quod

fit in omni genere illimitatum ens; ergo afeitas ratione nostra est prior illimitatio-
ne; deinde sicut in creaturis dependentia
inest a priori limitationem, ut ostendi-
mus, ita in Deo afeitas illimitationem.

Ad 1. confirmationem, ratio Incausati, &
independentis est ratio negativa solum gram-
maticaliter, non secus ac prædicatum Illimi-
tati, immensi, irrationalis &c. philosophice
tamen ratio incausati est positiva importans
sufficientiam sibi ad existentiam, atque adeo
sufficientiam omnium creaturarum, sicut
ratio illimitati philosophice importat ratio-
nem positivam, scilicet excursum ad quam-
cumque perfectionem, & ratio immensi
excursum ad quemcumque locum. Præter-
quamquod ex doctrina D. Dionysii, perfe-
ctiones divinæ cum ob sublimitatem effu-
giant aciem nostri intellectus, melius ex-
plicantur per rationes negativas, dicendo
quid non sint, quam per positivas, dicen-
do quid sint; sicut prædicata materiæ,
quæ est in confinio, nihili melius explican-
tur per rationes negativas dicendo, mate-
ria neque est quid, neque quantum, ne-
que quale &c. quam per rationes positivas.
Ex hoc autem quod perfectiones divinæ per
conceptum negativum explicantur, non se-
quitur, quod sint in se quid negativum,
sed important formaliter perfectionem po-
sitivam, quæ ratione suæ magnitudinis fun-
dat conceptum negativum.

Ad 2. negant multi, prædicatum afeita-
tis, seu incausati formaliter sumptum
transcendere prædicata reliqua divina; i-
demque docent de prædicato illimitati,
necessarii ad existentiam, boni &c., quam-
vis enim identice quodvis prædicatum di-
vinum sit illimitatum, necessarium, bonum,
non tamen formaliter; sed transmissio, quod
hæc prædicata sint implicite transcenden-
tia, non secus ac ratio entis implicite tran-
scendit suas passionem, scilicet unum, ve-
rum, bonum, ita ut non præcindat ab il-
lis præcissione perfecta, ut rationale a ri-
sibili, sed imperfecte, & secundum expli-
citum, & implicitum, ut Homo præcindit
ab animali rationali; vel præcissione non
mura, sicut in multorum sententia ens
præcindit a suis differentis, videlicet a
perfectate, & inaleitate; nihilominus hoc
solum sufficit, ut afeitas possit concipi
tamquam prædicatum purum, & essen-
ziale relate ad reliqua; sicut imperfecta
præcissione entis a suis attributis sufficit, ut
rationes unius, veri, & boni consequantur
ad rationem entis.

Ad ult. est equivocatio in nomine per-
fectionis attributalis: si nomine perfectionis
attributalis veniat perfectio illa, quæ
inferitur ex prædicato essentiali, in hoc
sensu etiam ratio substantiæ, viventis, in-
tellectivi in Deo est perfectio attributalis;
verum quia nomine perfectionis attributa-
lis apud Theologos venit illa perfectio,
quæ se habet per modum accidentis crea-
ti, ut omnipotentia, sapientia, immensi-
tas, idcirco prædicata, quæ dicuntur de
Deo tamquam prædicata substantia, ut
prædicatum substantiæ, viventis, Intellecti-
vi, non solent rigorose appellari attributa-
lia, sed minus rigorose; quatenus scilicet
Deo tribuuntur, & competunt; in quo
sensu etiam afeitas dici potest Dei attribu-
tum.

V. Obijcies ult. Prædicatum constitui-
vum essentia Divinæ nequit esse nisi ra-
tio entis in tota sua latitudine, seu Infini-
tas, aut afeitas, prout completur forma-
liter cumulum omnium perfectionum;
ergo nequit esse independentia, seu afeita-
tis, prout importat formaliter unam dum-
taxat divinam perfectionem. Prob. antec.
quia prædicatum constitutum essentia di-
vinæ debet esse perfectissimum; sed perfe-
ctius est prædicatum illimitati importantis
formaliter omnem perfectionem, quam præ-
dicatum independentis importantis unam
tantum perfectionem, cum totum sit ma-
jus sua parte: ergo.

Confirm. 1. quia Independentia debet
importare formaliter sufficientiam essendi,
seu omne id, quod requiritur, ut Deus
existat; sed ad hoc requiruntur omnes di-
vinæ perfectiones: ergo independentia for-
maliter includit cumulum omnium perfe-
ctionum. Minor patet, quia una ex per-
fectionibus divinis non intellecta, non intel-
ligitur quicquid requiritur, ut Deus existat.

Confirm. 2. nisi prædicatum essentialia
Dei esset illimitatio, seu afeitas prout for-
maliter involvit cumulum perfectionum,
sed esset sola independentia, tamquam
prædicatum radicans reliquas perfectiones,
eo ipso in hoc prædicato formaliter con-
tineri deberent reliquæ perfectiones; ergo
negari nequit, quod cumulus perfectionum
formaliter spectet ad constitutionem divinæ
essentiæ etiam metaphysice acceptæ. Prob.
sequela; quia si prædicatum independen-
tiæ radicaret reliquas perfectiones, debe-
ret illas præcontinere eminenter, sed per-
fectiones divinæ, utpote simpliciter simpli-
ces non possunt præcontineri eminenter,
nisi

nisi etiam præcontineantur formaliter; ergo si independentia radicaret reliquas perfectiones, eo ipso includeret illas formaliter.

Resp. nego antec. ad probationem nego, complexum omnium divinarum perfectionum esse ratione nostra quid perfectius, quam sit unum illud prædicatum, quod radicatur reliqua: complexum enim formaliter qua complexum dicit imperfectionem aliquam, scilicet compositionem, quæ excluditur ab uno simplici prædicato; & licet hoc prædicatum simplex (scilicet independentia) non dicat formaliter reliquas perfectiones, dicit tamen illas radicaliter, ac proinde continet, quicquid perfectionis est in complexo absque imperfectione distinctionis, & compositionis; quod etiam dicendum ab Adversariis in essentis creatis: nam prædicatum essentiale hominis v. gr. debet esse prædicatum perfectissimum radicans reliqua; nemo autem dixerit complexum omnium prædicatorum hominis esse prædicatum perfectius, quam sit sola rationalitas, ut radicans reliqua; ergo idem dicendum de Deo: præsertim quia sic non agitur de constitutivo Divinæ essentia sumptæ physice, quod procul dubio est cumulus omnium perfectionum, sed de constitutivo essentia metaphysicæ, seu de illo simplici prædicato, quod est perfectissimum, ex quo reliqua tanquam a priori descendunt.

Ad 1. confirm. sufficientia essendi physice sumpta importat formaliter cumulum perfectionum, sine quibus non potest intelligi quicquid requiritur, ut Deus existat; At sufficientia essendi sumpta metaphysice, quatenus est unum prædicatum importans formaliter independentiam ab alio, & exclusionem causæ limitantis, non importat formaliter cumulum, sed solum radicatur illum. In forma dict. maj. Independentia debet formaliter importare sufficientiam essendi metaphysice sumptam, hoc est non indigentiam causæ, concedo; sufficientiam essendi physice sumptam, seu quicquid requiritur, ut Deus existat, nego maj. & dict. min. nego consq.

Ad 2. nego sequelam. Ad probationem dico, prædicatum essentiale Dei præcontineret reliquas perfectiones simpliciter simplices, non quidem eminenter formaliter, sed eminenter radicaliter. Ad intelligentiam sciendum, perfectionem simpliciter simplicem dici illam, quæ est melior ipsa, quam non ipsa, seu quæ reddit subiectum

melius, quam sit quodcumque subiectum realiter distinctum, in quo non sit talis perfectio; Huiusmodi est perfectio bonitatis, potentia, sapientia, ratio viventis, intellectus &c. ubi e contra perfectio v. gr. volentis Mundum in Deo non dicitur esse perfectio simpliciter simplex, sed dicitur perfectio simplex; non enim est melior ipsa, quam non ipsa, cum non sit melior volitio, quam volitio Mundi: similiter dicitur perfectio simplex paternitas, cum non sit melior Filiatione, aut spiratione passiva. Hinc fit, quod perfectio simpliciter simplex non possit in aliqua entitate reali præcontineri eminenter, quin etiam præcontineatur formaliter; aliter ipsa non esset quid melius quacumque entitate reali, in qua non continetur formaliter; quia non esset melior tali entitate reali, in qua solum continetur eminenter, & non formaliter. At non est verum, quod perfectio simpliciter simplex debeat præcontineri formaliter in sua radice metaphysica: quia contineri in sua radice nihil aliud est, quam ex primo prædicato essentiali inferre perfectiones simpliciter simplices; possunt autem inferri, quin formaliter præcontineantur; sicut potest ex rationalitate inferri risibilitas, quin risibilitas contineatur in rationalitate formaliter, sed solum radicaliter.

Ratio a priori, cur perfectiones simpliciter simplices debeant formaliter contineri in essentia physica Dei, non vero in ejus prædicato essentiali, est, quia nisi formaliter continerentur in essentia divina physice sumpta, eo ipso talis essentia inciperetur, & esset perfectibilis, & defectuosa: contra vero si non præcontineantur formaliter in essentia divina metaphysice sumpta, solum sequitur, quod prædicatum essentiale Dei præscindat, seu ratione nostra (non vero realiter) non includat in suo conceptu formali eas perfectiones; quod non trahit in Deo ullam perfectibilitatem, aut defectum.

VI. Quæres hic, quomodo ex aseitare, & independentia inferantur seorsim reliquæ divinæ perfectiones?

Resp. cum Cattaneo disp. ult. quæst. 2. & aliis, Primo ex aseitare inferri necessitatem existendi: nam quod contingenter existit, debet ab alio determinari ad existendum; ergo quod est a se non est contingens, sed habet necessitatem existendi. Secundo inferunt unitatis Dei; nam quod necessario existit, non indiget alio a se
distinct-

distincto; ergo non potest esse multiplex, aliter unus alio indigeret: tum etiam quia si plures essent Dii, quilibet careret perfectione simplici ter simplici suprematatis; quilibet esset etiam contempnibilis, quandoquidem quolibet ex iis subleto, adhuc daretur Deus, seu omne bonum: tum deum quia quilibet careret supremo domino; nam vel non posset aliquid velle aliis invitis, vel si omnes idem deberent velle, unus deberet prius consulere voluntatem alterius. Hæc autem omnia non militant contra Trinitatem Personarum, ut patet contra Hæreticos Trithemitas, & contra Averroem 12. Metaph. 39. Tertio infertur simplicitas, seu carentia partium; nam vel singulæ partes essent Deus, & aliæ essent superflue, & contempnibiles, vel omnes complexim essent Deus, & jam singulæ ratione limitationis dicerent imperfectionem. Personæ Divinæ, quamvis sint plures, non dicunt ullam imperfectionem, quia non distinguuntur inter se ratione imitationis, sed ratione oppositionis relativæ. Quarto ex simplicitate nascitur immutabilitas, immensitas, æternitas, &c. nam quod est subiectum mutationi, non habet in se necessitatem omnium perfectionum. Quinto infertur illimitatio, quandoquidem quod est limitatum, est obnoxium mutationi: præterquamquod limitatio non habetur a se, sed a causa limitante; propterea complexum ex Deo, & creatura non est quid perfectius solo Deo, licet sit materialiter majus. Immo illud complexum formaliter importat imperfectionem illam propriam creaturæ, quæ non includitur in solo Deo; unde revera Deus solus est quid negativè perfectius, quam complexum ex Deo, & creatura. Denique infertur omnipotentia, omniscientia, & reliqua; tum quia aliter non haberet Deus perfectionem illimitatam excurrentem ad quamcumque perfectionem simpliciter simplicem; tum etiam quia si Deus est sufficientia sui ad existendum, & pariter sufficientia omnium, quæ ab ipso sunt, atque adeo potest omnia, est pariter vita indistincta ab ipso vivente, atque adeo perfectissime vivit, & omnia cognoscit. Ex afeitate itaque tamquam ex prima radice omnia Divina prædicata descendunt.

QUÆSTIO III.

Utrum ex parte objecti Attributa Divina distinguantur inter se, & ab essentia?

I. Quid attributa distinguantur realiter inter se, & ab essentia Divina, putant nonnulli apud Gillium lib. 2. tract. 5. inter quos quidam Gualterus, & Gilbertus Porrethanus. Distingui tantum modaliter, docuit Joannes de Viterbio, quod de attributo Infinitatis, & æternitatis docuit etiam Mayronus in 1. dist. 8. Scotistæ tamen admittunt distinctionem formalem inter illa. Inter Thomistas vero alii virtutalem, alii nullam ex parte objecti cum communiori.

II. Dico equidem, attributa inter se, & ab essentia non distinguuntur ex parte objecti, sed solum distinguuntur distinctione rationis, seu per diversos conceptus, ut dicitur communis de distinctione inter gradus metaphysicos.

Prob. 1. quia si attributa ex parte objecti distinguerentur, Deus non esset omnino simplex; nec natura Divina esset purus actus, sed diceret potentialitatem; non enim esset per se ipsam formaliter sapiens, potens &c. sed esset in potentia ad hujusmodi perfectiones, quod repugnat.

Neque dicas, quod sicut distinctio Personalitatum non obstat summæ Dei simplicitati, & actualitati, ita nec distinctio Attributorum. Nam primo, si paritas urget, nec obstat distinctio realis attributorum. Secundo, Ideo Personalitates distinguuntur inter se realiter absque detrimento simplicitatis Divinæ, quia ad perfectionem Divinæ essentia spectat secunditas ad intra, quæ sine distinctione reali non pura Personarum consistere nequit, ut docet Fides; quod tamen non habetur in casu nostro.

Prob. 2. Si qua ratione evinceretur, quod attributum sapientiæ v. g. ex parte objecti distingueretur ab omnipotentia formaliter sumpta, evinceretur etiam, quod sapientia radicalis identificata cum essentia ex parte objecti distingueretur ab omni potentia radicali: & rursus sapientia radicans sapientiam radicalem distingueretur ab omnipotentia radicante omnipotentiam radicalem; unde in distinctionibus, & formalitatibus abiremus in infinitum, quod nemo dixerit. Prob. sequela; Ideo enim sapientia forma-

lis per Scotistas ex natura rei distinguitur ab omnipotentia formali, quæ sunt diversi conceptus, atque adeo diversæ quidditates; sed etiam sapientia radicalis est diversus conceptus ab omnipotentia radicali; ergo.

Prob. demum argumento mirabili. Si attributa distinguerentur ex parte objecti ab essentia, eo ipso non distinguerentur; ergo non distinguuntur. Prob. sequela, si distinguerentur, eo ipso profluere, & manarent ab essentia, ergo deberent proprio in ipsa essentia intelligi, & formaliter præcontineri, atque adeo si distinguerentur, frustra superadderentur; unde non distinguerentur. Prob. conseq. quia impossibile est, quod proprietas emanet ab essentia, & in ea non præcontinetur: Rursus impossibile est perfectiones simpliciter simplices præcontineri, & non formaliter præcontineri: ergo si attributa Divina, quæ sunt perfectiones simpliciter simplices, promanarent ab essentia, deberent formaliter in illa præcontineri. Sicut enim perfectio sapientie v. g. quæ reperitur in creaturis debet in Deo præcontineri tum eminenter, tum formaliter; eminenter quidem, quia sine imperfectione limitationis, quam habet in creatura; formaliter vero, quia cum sit perfectio simpliciter simplex, non potest contineri eminenter, quin simul continetur formaliter; aliter non esset melior ipsa quam non ipsa, ut patet: ita perfectio sapientie attributalis præcontineri debet in Divina essentia eminenter, & formaliter, & quidem a fortiori; Nam si effectus, cui communicatur esse a sua causa modo imperfecto, & cum distinctione reali, debet in tali causa præcontineri, a fortiori Attributa, quibus communicatur essentia Divina perfectissimo modo, seu cum identitate reali, debent in tali essentia præcontineri non solum eminenter circa ullam distinctionem, & imperfectionem, sed etiam formaliter, cum sint perfectiones simpliciter simplices, aliter Divina essentia esset ab illis perfectibilis, quod repugnat.

Neque dicas, ascentem per nos radicare perfectiones simpliciter simplices, nec tamen illas præcontinere formaliter, sed solum eminenter radicaliter, juxta dicta questionem antecedenti; ergo idem dici potest in sententia admittentium distinctionem ex natura rei inter essentiam, & Attributa.

Negatur enim conseq., & disparitas est, quia in sententia nostra, dum concipitur predicatum essentiale ascentis solum, non

explicantur attributa ex imperfectione nostri intellectus, non ex imperfectione objecti; secus vero in sententia adversariorum, qui volunt, quod essentia Divina ex parte objecti non includat ex natura rei attributa; unde ab illis deberet esse perfectibilis; Non secus ac si Deus non contineret formaliter perfectiones simpliciter simplices, quæ reperiuntur in creaturis, deberet concipi ut perfectibilis his perfectionibus, & in potentia ad illas.

III. Hinc fit primo, attributa nec distincti sui ab essentia virtualiter ex parte objecti, seu distinctione æquivalente distinctioni distinctorum, & fundante precisiones objectivas. Ratio est eadem, tum quia hujusmodi distinctio gratis admittitur; obstatque summe Dei simplicitati: tum etiam quia trahit processum in infinitum. Quare solum distinguuntur ratione, seu ex parte actus attributa inter se, & ab essentia, cum differant penes connotata, non secus ac animal, & rationale, homo, & risibilitas, quæ distinctio a nonnullis vocatur virtualis, non quia æquivaleret distinctioni distinctorum, aut verificaret prædicata contradictoria; sed quia æquivaleret distinctis.

Fit 2. quod sicuti Homo quia animal sentit, non quia rationalis, ita ut sensus sit, quod homo sub conceptu animalis concipiat ut principium sentiendi, quod competet omnibus animalibus, non vero sub conceptu rationalis; unde distinctio sit solum penes conceptus; ita eodem modo Deus qua intellectus intelligit, non qua volitivus, per misericordiam parit, per justitiam punit in sensu formali explicato; realiter enim, & identice voluntas intelligit, Justitia parit, sicut in homine animalitas discurrit.

Confirm. demum conclusio, quia si adversarii vellent adstruere ex parte objecti distinctionem inter attributa totalia, v. g. inter omnipotentiam, & sapientiam, deberent etiam admittere distinctionem inter attributa partialia, v. g. inter potentiam productivam Angelis, & potentiam productivam hominis: nam etiam Deus creat Angelum per potentiam creativam Angelis, & non per potentiam creativam hominis; sicut intelligit per intellectum, non per voluntatem; sequela non admittitur; ergo &c.

IV. Objic. 1. Tenet ista causalis: Deus amat, quia intelligit, non vero intelligit, quia amat; ex intellectu enim descendit volitivum, non e contra; ergo intellectus,

& voluntas in Deo distinguuntur ex parte objecti.

Confirm. 1. Nisi intellectus, & amor in Deo distinguerentur, sequeretur, quod sicut Deus cognoscit peccatum, ita etiam amaret illud; nam sicut cognitionem terminari ad peccatum fert peccatum esse cognitum, ita amorem identificatum cum cognitione Divina terminari ad idem peccatum fert, idem peccatum esse amatum a Deo.

Confirm. 2. Intellectus Divina est actus vitalis; ergo procedit ab intrinseco principio; ergo intellectus habet rationem principii relate ad intellectionem Divinam, atque adeo distinguitur ab ea.

Confirm. ult. Intellectus procedit ab essentia Divina tamquam ab objecto formali motivo, ut conitat; ergo ab eo distinguitur.

Resp. sicut tenet hæc causalis: homo discurrit, quia est rationalis, non quia est animal, citra distinctionem objectivam inter rationale, & animal, quia sensus est, omne rationale discurrere, non omne animal: ita valet: Deus amat, quia intelligit, non e contra: sensus enim est: omne amans intelligit, non vero omne intelligens amat; ex summalis enim reduplicativa nihil aliud importat, nisi quod cuicumque competit ratio reduplicata, competit etiam prædicatum affirmatum.

Ad 1. confirm. forma non debet communicare subjecto omnes denominationes, quæ possunt a singulis prædicatis formæ prodire: sic cognitio denominat objectum cognitum, & non denominat illud spirituale, licet ipsa sit spiritualis; sic etiam Gratia in Christo Domino denominat illum Amicum Dei, non tamen filium adoptivum, & Verbum denominat humanitatem sanctam, non tamen Immensam, & omnipotentem. Ita in casu nostro actus Divinus terminatur ad peccatum, denominat illud cognitum, non amatum, quia peccatum non est capax talis denominationis. Universum enim ut aliquid dicatur amatum, non satis est, quod terminet amorem, sed requiritur, quod terminet amorem, qui sit illius persecutio; sic contritio, quæ odit peccatum ob amorem Dei, est indivisibiliter odium peccati, & amor Dei, quia tamen non est persecutio peccati, ideo peccatum, licet illam terminet, non denominatur amatum.

Ad 2. intellectus Divina est a principio intrinseco omnino indistincto ratione summx suæ perfectionis: quare sicut Deus di-

citur esse a se, non quidem positive, ita ut a se causetur, sed negative, quatenus non est ab alio; ita intellectus Divina est a principio intrinseco vitali non positive, ita ut ab eo causetur; aliter distingueretur realiter ab illo; sed negative, quatenus non procedit ab ullo principio extrinseco, sed existit vi, & efficacia principii secummet identificati.

Ad ult. intellectus Divina procedit ab essentia tamquam ab objecto formali motivo penitus indistincto: quatenus enim Deus consideratur ut objectum, seu ut ponens seipsum in prospectu ut cognoscatur, dicitur esse motivum formale; quatenus vero consideratur ut seipsum representans, dicitur intellectus, & intelligens.

V. Objic. 2. in Deo ex uno attributo demonstratur aliud, v. g. ex immaterialitate intellectivitas; ergo datur distinctio objectiva inter attributa; aliter, ut dicit Maryonus, in demonstrationibus istis nos negotiari-mur circa nostros cōceptus, non circa Deum.

Confirm. 1. si posset negari distinctio ex parte objecti inter attributa, quamvis ex uno aliud demonstraretur, posset etiam negari distinctio inter Personalitates, quamvis una ex alia procedat; hæc autem est hæres Sabellii; ergo.

Confirm. 2. quia inter naturam, & Personalitates Divinas negari non potest distinctio virtualis ex parte objecti; ergoneque inter essentiam, & attributa. Prob. antec. quia distinctio virtualis importat convenientiam in omni perfectione, & discrepantiam in aliquo prædicato, ut proinde de eadem entitate æquivalente pluribus verificentur prædicata contradictoria, peinde ac si daretur distinctio actualis; hæc autem distinctio virtualis sic explicata negari non potest inter Paternitatem v. g. & naturam Divinam, nam Paternitas est una Personalitas, non triplex; natura vero Divina est triplex Personalitas, & non una. Item Paternitas realiter distinguitur a filiatione, & non a natura; Humanitas Christi immediate unitur subsistentiæ Verbi, non vero nature, aut si immediate unitur nature Divinæ, non imitur Personalitati Patris identificatæ cum natura; ergo natura, & Personalitas verificant prædicata contradictoria; atque adeo virtualiter distinguuntur.

Resp. propter cognitiones imperfectas, quas de Deo habemus, posse nos Deum cognoscere sub una ratione, v. g. qua immaterialem, & ex hoc conceptu inferre idem

objectum sub alio conceptu, videlicet Intellectivi; & similiter cognito Deo sub ratione Intellectivi inferimus, quod sit Volitivus, quod est negotiari circa Deum cognatum ænigmatice, non vero circa nostras cognitiones.

Ad 1. confirm. Sicut ex distinctione reali Personarum non inferitur distinctio realis inter attributa, ita nec ulla alia distinctio objectiva. Fides docet, Personas Divinas opponi relative, atque adeo realiter distingui; cum relativa finit ad alterum; nullum tamen datur caput distinguendi ex parte objecti attributa.

Ad 2. Negant nonnulli, dari inter naturam Divinam, & Personalitatem verificationem contradictoriorum; unde negant, distingui virtualiter, putantes omnia salvari per distinctionem eminentialem, hoc est per distinctionem realem non puram, seu mixtam identitate reali, quæ intercedit inter Personas, quatenus Pater v.g. realiter a Filio distinguitur personaliter, & simul identificatur essentialiter, seu in Natura; unde distinguuntur distinctione faciente plures Personas, non plures Deos, & identificantur identitate faciente unum Deum, non unam Personam. Equidem censeo, præter hanc realem distinctionem eminentialem, quam docet Fides, requiri etiam distinctionem virtualem inter Naturam, & Personalitates ad verificanda ea prædicata contradictoria, quæ de iis dicuntur; quod in de Trinitate discutiendum. Censeo etiam, inter Volitionem Divinam necessariam, & liberam, seu inter essentiam Divinam, & decreta libera admittendam pariter esse distinctionem virtualem ex parte objecti, ut dicemus disp. 4. cum non possit aliter contradictio declinari, quod Deus sit Ens necessarium, & decreta cum eo identificata non sint necessaria; at inter attributa declinatio contradictio per distinctionem rationis: sicut inter Animal, & rationale in Homine; unde dispar ratio.

VI. Objic. ult. Pater Æternus non per voluntatem, sed per Intellectum generat Filium, qui proinde dicitur *Sapientia genita*: Pater vero, & Filius non per intellectum, sed per voluntatem spirant Spiritum Sanctum, qui dicitur *Amor spiratus*; ergo Intellectus, & Voluntas Divina verificant prædicata contradictoria realia, atque adeo distinguuntur ex parte objecti; quod similiter dicendum de aliis attributis.

Antecedens constat ex Concil. Toletano,

ubi hæc habentur: *Non est credendum, quod Pater voluntate Filium genuerit, nec quod Voluntas Sapientiam prævererit, sed Natura.* Et in Concil. Syrmienensi dicitur: *Si quis consilio Dei factum Filium Dei asserit, anathema sit*: ubi PP. cum Hilario lib. de Synod. anathem. 24. ly consilio intelligunt pro voluntate.

Resp. nonnullos cum Arriaga disp. 42. n. 70 ob hanc difficultatem admittere distinctionem ex parte objecti solum inter intellectum, & voluntatem, non vero inter alia attributa Divina. Verum difficultas hæc evacuat cum Esparza quest. 4. supponendo ex tractatu de Trinitate, quod duplex detur in Deo intellectus, & voluntas, scilicet Essentialis, & Notionalis. Intellectus, & voluntas essentialis identificatur adæquate cum Divina Essentia, atque adeo est communis tribus Personis, non secus ac reliqua attributa. Intellectus vero Notionalis constituitur per Naturam Divinam, & solum Personalitatem Patris; & voluntas notionalis constituitur per Naturam Divinam, & per utramque Personalitatem Patris simul, & Filii. Hinc Filius procedit ab intellectu notionali Patris, & non a voluntate notionali; & similiter Spiritus Sanctus procedit a voluntate, non ab intellectu notionali; quæ optime verificantur per hoc, quod detur solum distinctio realis inter Personalitatem Patris, quæ constituit intellectum notionalem, & Personalitates Patris, & Filii, quæ constituunt voluntatem notionalem, quin detur ulla distinctio formalis inter intellectum, & voluntatem essentialem.

Deinde transmissio, quod Filius dici possit formaliter procedere ab intellectu essentiali, & non a voluntate essentiali, & Spiritus Sanctus a voluntate, non ab intellectu essentiali, non per hoc admittenda est distinctio ex parte objecti inter voluntatem, & intellectum essentialium: nam sicut intellectio creata dicitur procedere formaliter ab intellectu, non a voluntate, & Amor formaliter a voluntate, non ab intellectu, quia quamvis realiter etiam intellectus amet, & voluntas cognoscat, in sensu tamen formali explicato per distinctionem rationis solum intellectus intelligit, & voluntas amat; & sensus est, quod Anima sub conceptu connotante intellectionem non sit Anima sub conceptu connotante amorem; unde distinctio habetur solum inter rationes, seu conceptus formales, non vero inter rationes objectivas: Ita prorsus dici potest

ARTICULUS I.

An Deus ratione Immensitatis formaliter sit in spatiis imaginariis.

potest in casu nostro, quod Filius cum sit sapientia genita, procedat ab intellectu, non a voluntate essentiali solum in sensu formali explicato, quatenus essentia Divina sub conceptu connotante sapientiam genitam non est essentia Divina sub conceptu connotante Amorem spiratum.

In forma dist. Antec. Pater non generat Filium per voluntatem notionalem conc., per voluntatem essentialem subdistinguo in sensu formali conc. in sensu reali nego antec. & conseq. sicut enim Spiritus Sanctus procederet insipienter, si non procederet ab intellectu essentiali, ita Filius procederet fortuito, & non voluntarie, si non procederet a voluntate essentiali.

VII. Ubi adverte ex Cyrill., & Nazianz. apud Esparzam, Arium hoc sophismate usum esse ad impugnamdam Filii Divinitatem: Vel Pater genuit Filium volens, vel nolens; si nolens, quis eum coegit? cum nemo sit supra Patrem: si volens; ergo cum libertate, & consideratione, quæ aut debet, aut saltem potest esse ante rem, quæ deliberata sit; ergo Pater antecedit natura Filium, atque adeo Filius est Creatura.

Ad quod PP. & Concilia respondent, Patrem generasse ab æterno Filium volendo, atque adeo libere, non quidem libertate a necessitate, seu indifferentia, sed libertate a coactione, quæ non importat in Filio posterioritatem, nisi tantum originis; ex hoc autem quod Filius generetur a Patre volente cum sola libertate a coactione, fit, quod unice PP. inferebant, nimirum quod Filius non procedat per voluntatem notionalem, nec ut amor spiratus, sed ut sapientia genita, quia procedit per intellectum notionalem, & in sensu reali procedit tam ab intellectu, quam a voluntate essentiali; in sensu vero formali procedit solum vi intellectus essentialis, non vi voluntatis essentialis.

QUÆSTIO IV.

De nonnullis Attributis in particulari.

Purima essent hic inquirenda de singulis attributis; sed quoniam non vacat, quæremus nonnulla dumtaxat magis utilia de Immensitate, Æternitate, ac simplicitate Dei.

Pars I.

I. Suppono, spatium reale esse ubicationem ipsam realem, spatium vero imaginarium ubicationem possibilem: & quia extra Empyreum possibilis est alia, & alia ubicatio in infinitum, ideo dicitur extra Empyreum esse spatium imaginarium infinitum; sicut ante initium Mundi dicitur fuisse tempus imaginarium, quia tunc erat possibilis alia, & alia duratio antecedens in infinitum; duratio enim possibilis constituit tempus imaginarium, & duratio realis tempus reale, non secus ac ubicatio possibilis constituit spatium imaginarium, & ubicatio realis spatium reale.

Dico nunc, Deum esse in spatiis imaginariis. Ita communiter cum D. Th. q. 8. a. 4. contra Vasquez, Monacum, Fasolum putantes, ibi Deum solum esse in potentia.

Prob. Deus actu, & formaliter fuit temporibus imaginariis, antequam quicquam conderet; ergo etiam actu, & formaliter est extra Empyreum in spatiis imaginariis. Et ratio a priori est, quia Deus est immutabilis; ergo non potest per mutationem temporis, aut loci realis existere de novo in aliquo loco, aut tempore, quo prius non existeret.

Confirm. Si Deus conderet duos Mundos inter se distantes, nequit dici, quod in spatio illo interjecto imaginario Deus non existat; aliter haberet duas præsentias inter se distantes, nec esset inmensus, sed concluderetur cancellis loci finiti realis; quod nemo dixerit.

II. Objic. Non potest Deus actu esse, ubi nihil est, seu in eo, quod est nihil; ergo non potest esse in spatiis imaginariis, quæ nihil omnino sunt. Prob. antec. quia aliter Deus esset in nihilo.

Confirm. ideo Deus circa mutabilitatem, aut imperfectionem non existit nunc actu, sed potentia v. g. in Antichristo, quia Antichristus nunc nihil est, & denominatio coexistentis Antichristo est partim intrinseca, partim extrinseca Deo; atqui hoc idem dicendum in casu; ergo.

Resp. dist. antec. Deus non potest esse, ubi nihil est, præter ipsum Deum, nego; ubi nihil est simpliciter, concedo antec. & nego conseq. Deus in spatiis imaginariis non dicitur esse in nihilo, sed in se ipso potente ibi ponere ubicationes possibili-

B 3 les.



les, sicut Deus antequam quicquam conderet, erat actu, & formaliter temporibus illis imaginariis, quin tunc esset in nihilo, sed in se ipso, qui solus tunc existebat, & poterat ponere durationes possibiles. Hinc celebre illud distichon Thomæ de Argentina relatum a Vasquio.

Dicubi tunc esset, cum præter eum nihil esset.

Tunc ubi nunc in se, quoniam sibi sufficit ipse.

Quod fallit intellectum, est imaginatio; cum enim Deus in spatio reali sit in omnibus per potentiam, per præsentiam, & per essentiam, idest ut explicat D. Th. hic quæst. 8. art. 3. per potentiam, quatenus omnia ejus potestati subduntur; per præsentiam, quatenus omnia nuda sunt, & aperta in oculis ejus; & per essentiam, quatenus adest omnibus ut causa; in spatiis autem imaginariis cum nihil Deus operetur ad extra, sed solum sit per suum esse absolutum, ideo videtur non esse actu in spatiis imaginariis. Sed imaginatio fallitur; Deus enim non aliter est ubicumque, & quodcumque per suum esse absolutum, nisi per hoc, quod sit in se ipso, cum ipse sit suum ubique, & suum quodcumque, seu sua Immenfitas, & Æternitas.

Ad confirm. nego min. cum spatium imaginarium sit ubicatio possibilis, non vero ubicatio existens, ut supponimus; ideo denominatio existentis in spatio imaginario non est denominatio coexistentis cū alio, ut est denominatio coexistentis cum Antichristo, quæ est partim intrinseca, partim extrinseca Deo; sed est denominatio adæquate Deo intrinseca; unde necessario ibi Deus existit ratione suæ immutabilitatis.

ARTICULUS II.

Utrum futura fuerint ab æterno realiter præsentia Æternitati Divinæ.

III. **Q**UOD Deus futura omnia habet sibi præsentia intentionaliter ab æterno, quatenus omnia simul cognoscit, quæ successive erunt, non dubitatur; sicut enim potest quis ex alta Turri simul videre homines sibi succedentes; ita potest Deus ex editissima æternitate sua simul prospicere, quæ erunt successive futura in æternum. Controversatur solum inter Thomistas, & DD. Societatis, an futura habuerint ab æterno in æternitate Divina non solum præsentiam intentionalem explicatam, sed etiam realem? Tho-

mistæ communis affirmant cum Cajetano q. 14. art. 13. Gonco, Joanne a S. Th., putantes hanc fuisse mentem Angelici i-bidem, & primo contra Gentes cap. 66. ubi docet, omnia mensurari æternitate, quæ cum sit indivisibilis, habet omnia sibi præsentia; ut punctum centri præsens est cuivis puncto circumferentiæ. Ex quo docent, Deum ab æterno cognovisse futura libera, si minus in decreto prædeterminante, (cum non possit per multos Thomistas Deus prædeterminare ad peccatum) saltem in præsentia illorum, quam habent in æternitate. Quandoquidem sicut quæ distant localiter sunt simul eidem indivisibili immensitati Divinæ localiter præsentia; ita quæ distant durative habent simul eidem indivisibili æternitati Divinæ præsentiam aliquam realem. Vasquez tamen disp. 64. c. 5. ostendit, non fuisse de mente D. Th. hujusmodi sententiam, quod multi etiam Thomistæ asserunt.

IV. Dico equidem cum communissima Scotistarum, Nominalium, & DD. Societatis contra Richardum, & Thomistas apud Vasquium loc. cit.: Temporalia, & futura non fuerunt ab æterno realiter præsentia æternitati Divinæ, atque adeo Deus non cognovit ab æterno certo, & infallibiliter futura libera ob eorum præsentiam in sua æternitate, sed quia, posita illorum futuritione determinata tamquam requisito necessario, confurgit in intellectu Divino ex infinita ejus perfectione representatio illorum determinata infallibiliter certa, prout dicemus de futuris liberis conditionatis in tract. de scientiæ media.

Prob. A esse præsens realiter B, importat, A coexistere B; sed futura non coexistunt ab æterno cum æternitate Divina; ergo non fuerunt ab æterno realiter præsentia æternitati Divinæ. Prob. minor: Temporalia, & futura non existerunt ab æterno; ergo non coexistunt ab æterno; ex terminis enim pugnat, quod coexistat id quod non existit.

Confirm. retorquendo paritatem Immenfitatis, in qua triumphant adversarii. Quamvis ubicatio Neapolitana localiter coexistat immensitati Divinæ, toti quidem, sed non totaliter; quatenus est, ubi est immenfitas, sed non ubicumque est immenfitas: At ubicatio Neapolitana non coexistit localiter immensitati Divinæ, v. g. Romæ, ubi non est ubicatio Neapolitana; ergo a pari quamvis Antichristus durative coexistat æternitati Divinæ, toti quidem, sed non

non totaliter, quatenus est, quando est æternitas, non tamen quodcumque est æternitas divina; non per hoc durative coexistit æternitati nunc, aut ab æterno, pro quando Antichristus non existit; ergo cum ab æterno Antichristus non existeret, non potuit ab æterno coexistere, & esse realiter præsens æternitati. Quare verum quidem est, quod Antichristus coexistat toti æternitati, cum æternitas sit indivisibilis, hoc tamen non sufficit, ut Antichristus dicatur coexistere Deo ab æterno; cum non coexistat æternitati Divinæ toti simul, & totaliter; sicut Neapolis toti immensitati localiter coexistit, non tamen coexistit localiter immensitati, quatenus existenti Romæ, quia non coexistit localiter immensitati toti simul, & totaliter.

V. Objic. 1. Si Deus ab æterno creasset Angelum, quem destrueret mane, potuisset ab æterno dicere: Angelus est mihi præsens, & coexistens; ista autem cognitio Divina est æternus, & infallibilis; ergo etiam post destructionem Angeli verum esset, quod Angelus sit Deo præsens, & coexistens, licet tunc non existat; aliter propositio illa æterna, & infallibilis de vera transiret in falsam; ergo sufficit, quod futura aliquando existant, ut coexistant toti æternitati, & ab æterno.

Resp. hoc argumentum probari, quod in Deo sint ab æterno ambæ veræ istæ propositiones contradictoriæ: lux mihi coexistit, lux mihi non coexistit; quia Deus aliquando coexistit luci, aliquando non. Drecte dico, propositionem illam, Angelus est mihi præsens ab æterno, esse veram etiam post destructionem Angeli, quia semper connotat idem tempus, quo Deus Angelo coexistebat; sicut ista propositio, Christus nascetur ex Virgine, etiam nunc est vera. & de fide, si connotet tempus Prophetarum, pro quando Christus erat nasciturus.

VI. Objic. 2. cum Thomistis: Dupliciter res temporanea existit. Primo per propriam mensuram, seu per durationem intrinsecam, & sic est in tempore limitato, & non ab æterno; Secundo per mensuram alienam, seu per æternitatem Divinam, quæ mensurat, & complectitur omnia tempora, quatenus omnia, quæ successive existunt, non successive mensurantur, & coexistunt æternitati indivisibili; sed simul omnia existunt in Nunc indivisibili æternitatis; ergo bene dici possunt omnia esse Deo realiter præsentia ab æterno, &

ab æterno existere, si minus per propriam, saltem per alienam mensuram; quatenus habent aliquando esse in Nunc æternitatis: Quod pariformiter dicunt de immensitate. Hinc in sententia Thomistarum Antichristus fuit præsens Deo realiter ab æterno; quia æternitas Dei indivisibilis ab æterno coexistit Antichristo existenti in tempore.

Confirm. quæ sunt in tempore successive, sunt simul intentionaliter præsentia intellectui Divino ab æterno, quia cognitio Divina est ab æterno, & tota simul; ergo etiam erunt realiter præsentia æternitati, quæ est tota simul.

Resp. licet æternitas sit tota simul, & indivisibilis, nec successive coexistat cum rebus successivis, successione se tenente ex parte æternitatis divinæ, successive tamen coexistit successione se tenente ex parte ipsarum rerum succedentium. Unde licet nihil sit futurum, aut præteritum Deo; quæ tamen nobis sunt futura, aut præterita, non dicimus, quod coexistant, sed quod coexisterint, aut coexistunt æternitati divinæ. Quare cum Antichristus sit nobis exiturus, dici non potest, quod existerit, aut coexistit ab æterno; sicut enim Deus immutabilis de non coexistente cum hoc Mundo sit coexistens, per hoc, quod Mundus transeat de non existente ad existentem; ita Deus æternus sit de novo coexistens Antichristo, per hoc, quod Antichristus de novo existat. Hinc falsum est, quod Thomistæ assumunt, scilicet temporanea existere ab æterno per alienam mensuram; sicut enim Neapolis non existit Romæ per mensuram Immensitatis Divinæ, ita nec temporanea ab æterno per mensuram æternitatis. Et ratio a priori est, quia licet æternitas complectatur omnia tempora, non dicitur tamen illis coexistere, nisi quando illa existunt; cum hæc denominatio coexistentis importet existentiam exercitam utriusque extremi.

Ad confirm. concesso antecedente, nego consequ. disparitas est, quia denominatio cogniti est mere extrinseca, & habetur adequate a cognitione terminata ad obiectum; cum autem cognitio Dei fuerit ab æterno, etiam futura denominantur cognita, seu præsentia intentionaliter ab æterno; quod etiam verum est, etiamsi Angelus sua cognitione limitata cognoscat futura ab æterno; At denominatio coexistentis habetur a forma partim intrinseca, partim extrinseca; ergo cum ab æterno non fuerit existentia Antichristi, non potest

est dici Dei æternitas coexistens Antichristo ab æterno. Hinc, ut cognitio Divina terminetur ad futura in quantum existentia pro sua differentia temporis, illa inveniendum, solum requiritur, quod futura ab æterno existant signare, seu prout significatur a denominatione cogniti: contra vero ut æternitas realiter coexistat cum futuris, requiritur existentia istorum exercita, quæ solum habetur in tempore; unde non possunt esse realiter præsentia Deo ab æterno.

VII. Ex quibus sequitur contra Thomistas, peccatum v. gr. Antichristi non posse a Deo infallibiliter cognosci ab æterno ratione suæ præsentis realis ab æterno; Neque posse cognosci in decreto permissivo talis peccati; quia si ponitur huiusmodi decretum de se indifferens, ut coniungatur cum peccato potius, quam cum negatione peccati, ut ponitur in sententia Societatis, non potest in eo videre peccatum potius, quam peccati negationem; si vero ponitur decretum illud prædeterminans, & connexum cum peccato, iam esset eversivum libertatis, ut supponimus. Præterquamquod communis Thomistarum negant, posse Deum prædeterminare ad peccatum. Quare dicendum, peccatum Antichristi a Deo infallibiliter ab æterno cognosci in se ipso per scientiam visionis: ad eum modum, quo per scientiam mediam infallibiliter cognoscuntur futura libera conditionata in se ipsis, quatenus ex suppositione, quod peccatum erit, vel esset sub aliqua conditione, intellectus Divinus ab æterno ob infinitam perfectionem in linea intelligendi necessitatur ad illud representandum prout erit, vel esset. Quidquid sit, an peccatum v. gr. Antichristi videatur etiam infallibiliter a Deo ab æterno in complexo scientiæ medix de futuritione conditionata illius sub auxilio A, & decreti collativi talis auxilii, quod in tertia disputatione explicabimus.

VIII. Quæri solet hic cum Angelico, An esse æternum sit proprium Dei, ita ut repugnet communicari creaturæ æternitatem a parte auctoris. Equidem huiusmodi repugnantiam conabar olim ostendere hac ratiocinatione: Fingamus Angelum productum esse ab æterno, certe quolibet determinata duratio huius Angeli fuit in tempore; ergo futuritiones, & negationes cuiuscumque durationis determinatæ fuerunt ab æterno; ergo fuerunt simul omnes ab æterno, quin potuerint huiusmodi ne-

gationes esse ab æterno una post aliam; licet una post aliam desierit; ergo omnes simul, & quidem infinitæ categorematice condurantur per tempus infinitum; ergo per tempus infinitum nulla fuit duratio talis Angeli, atque adeo hic Angelus fuit, & non fuit ab æterno. Antec. & prima consequent. Secunda negari non potest, sicut nec tertia; nam ad eum modum, quo si producerentur a Deo v. g. infiniti Angeli ab æterno, eo ipso deberent per tempus infinitum simul condurare (aliter si essent infiniti categorematice, per unum tantum diem, daretur æternitas utrinque clausa ab eo die usque ad diem præsentem) ita pariter dicendum de illis infinitis negationibus, & futuritionibus. Hæc ratiocinatio non militat contra creaturam in æternum, nam præteritiones, seu negationes cuiusque durationis determinatæ Angeli durantis in æternum sunt solum finitæ in infinitum, ut patet; contra vero futuritiones illæ debent esse ab æterno infinitæ categorematice, atque adeo sub hac collectione infinita debent per infinitum tempus condurare, non secus ac infiniti Angeli producti ab æterno. Iterum potest fufius instaurari hæc ratiocinatio, quæ facile aptari potest ad ostendendam etiam repugnantiam seriei generationum ab æterno. Michael ab æterno productus singulis annis æternitatis antecedentis habuit singulas durationes annuas, atque adeo habuit infinitas sine prima; ergo non habuit infinitas sine prima, ut proinde repugnet fuisse ab æterno. Prob. consequ. quia per hoc quod Michael ab æterno productus habuerit singulis annis singulas durationes annuas, manifeste sequitur, quod singulæ durationes annuæ fuerint in tempore, & quod illarum negatio, seu futuritio præcesserit ab æterno. Rursus ex hoc quod negationes singularum durationum annuarum præcesserint ab æterno, sequitur quod omnes istæ negationes singularum durationum fuerint simul ab æterno; ergo Michael creatus ab æterno non habuit in tota æternitate antecedente infinitas successive durationes annuas sine prima; atque adeo non fuit ab æterno. 2. pars huius antecedentis patet a contrario, si singulis annis æternitatis antecedentis annihilarentur singuli Angeli, & nullus Angelus producat in tempore, sequitur quod singulis annis poneretur negatio singulorum Angelorum, & quod debuerint esse creati ab æterno simul infiniti Angeli; ergo ex opposito si singulis annis ponantur singulæ

durationes annuz Michaelis, sequitur, quod debuerint esse ab aeterno simul infinitae negationes istarum durationum, quae licet successive definant, non successive tamen habuerint esse ab aeterno, sed simul; cum repugnet, plura seorsim sumpta esse ab aeterno, & unum poni post aliud, ut patet. Probatur itaque consequentia. Nam per hoc quod negationes omnes singularum durationum Michaelis fuerint ab aeterno simul, sequitur quod omnes pariter simul condurarint per aternitatem; (ad eum modum quo si infiniti Angeli fuerint ab aeterno simul, debuerint condurare simul per aternitatem, seu annis infinitis: aliter si dumtaxat per annum v. gr. condurarent simul, daretur aternitas utrique clausa ab eo anno, & ab anno presenti, inter quos clauderentur infinitae durationes annuz Michaelis) Atqui repugnat, quod per aternitatem a parte ante, seu annis infinitis existant simul omnes negationes durationum Michaelis simul, & quod pro iis annis existat aliqua duratio Michaelis (cum pugnent contradictorie haec duo, Nulla duratio existit, & Aliqua duratio existit) ergo prima duratio Michaelis debuit esse post aternitatem, qua omnes negationes durationum Michaelis simul condurarunt, atque adeo Michael ab aeterno positus non habuisset infinitas durationes sine prima, ac proinde repugnat poni ab aeterno.

Dices, hac ratiocinatione pariter confici; quod repugnet creatura in aeternum, quod nemo dixerit. Nam Michael durans per aternitatem consequentem habebit singulis annis singulas durationes annuas, atque adeo infinitas sine ultima. Quod autem haberet simul & non haberet infinitas durationes annuas sine ultima, sic evinceretur, si argumentum adductum esset efficax; Per hoc quod Michael sit habiturus singulis annis singulas durationes, sequitur quod singulae durationes sint futurae in tempore, & quod earum negatio, ac praeteritio futura sit in aeternum; Rursus sequitur, quod omnes istae negationes, ac praeteritiones sint futurae in aeternum simul (cum repugnet plura esse in aeternum seorsim, & unum definire post aliud) Hinc pariter sequitur, quod omnes negationes durationum Michaelis condurentur simul per totam aternitatem consequentem (aliter daretur aternitas utrique clausa, si per annum v. gr. dumtaxat essent simul omnes istae negationes infinitae) ergo infinitis annis Michael non est duraturus, atque adeo non habebit

infinitas durationes sine ultima.

Resp. disparitatem inter aternitatem a parte ante, & aternitatem a parte post esse manifestam, & inde sequi, quod argumentum militet solum contra creaturam ab aeterno, non contra creaturam in aeternum. Etenim quae sunt ab aeterno, si sint non tot quin plura, sunt infinita categorematice, hoc est adaequate extra causas; quae vero sunt in aeternum non tot quin plura, sunt solum infinita syncategorematice, quatenus semper erunt partim actu, partim in potentia infinita semper actu, seu extra causas, & infinita in potentia, seu intra causas. Quod ex eo patet, quia si ab aeterno Deus produxisset singulis annis singulos Angelos, eosque conservasset, nunc darentur Angeli infiniti categorematice; at si eosdem producat singulis annis in aternitate futura, semper erunt finiti in infinitum, & infiniti intra causas. Hinc Michael ab aeterno positus ita habuisset singulis annis singulas durationes annuas, ut negationes, ac futuritiones istarum durationum fuissent ab aeterno omnes simul infinitae categorematice, ac eodem modo deberent condurare simul per aternitatem; unde per aternitatem Michael non duraret: sicuti ex opposito si singulis annis aternitatis antecedentis Deus destruxisset singulos Angelos, necessario fuissent ab aeterno creati omnes isti Angeli infiniti categorematice, & sic debuissent per aternitatem simul condurare; ac proinde repugnat haec hypothesis, quod Deus ab aeterno ponat infinitos Angelos, quorum singulos singulis annis aternitatis destruat. Contra vero Michael in aeternum durans ita habebit singulis annis singulas durationes annuas, ut negationes, & praeteritiones istarum durationum semper sint futurae finitae in infinitum, seu finitae actu, & infinitae in potentia, unde nunquam deberent esse omnes simul extra causas: Sicuti si singulis annis aternitatis futurae ponantur, & conserventur singuli Angeli, nunquam erunt extra causas Angeli categorematice infiniti. Unde fit, quod possit Michael durare in aeternum, quin potuerit ab aeterno durasse.

Quare potest paritas aternitatis futurae retorqueri, dicendo: Si in aternitate futura deberent esse omnes simul negationes, ac praeteritiones durationum Michaelis, & sic condurare in aeternum, non posset Michael durare in aeternum, ut patet; ergo cum debeant omnes simul esse ab aeterno negationes, & futuritiones durationum Michaelis

chaelis, ut ostendimus, & sic condurare per æternitatem, non potuit Michael esse ab æterno.

Instabis, sicut in æternitate futura negationes, ac præteritiones durationum Michaelis in æternum durantis sunt omnes simul similitate eternitatis, similitate tamen temporis sunt finitæ semper in infinitum; ita in æternitate præterita negationes, ac futurationes durationum Michaelis ab æterno sunt pariter simul similitate eternitatis, similitate tamen temporis sunt finitæ in infinitum, non vero categorematice infinite; Cum in nulla parte eternitatis dari possint, aut debeant infinite. Hinc centum annis ante hanc durationem erant centum simul futurationes durationum; mille annis ante hanc durationem erant mille simul futurationes durationum, & sic in infinitum; ergo nullum sequitur inconveniens quod Michael sit ab æterno, sicut nec quod duret in æternum.

Resp. non eodem modo rem se habere in æternitate futura, ac in præterita; verum quidem est, quod in æternitate futura præteritiones durationum erunt semper finitæ in infinitum simul, similitate temporis, & omnes erunt simul solum similitate eternitatis, quatenus quilibet erit intra totam æternitatem futuram; At in æternitate præterita futurationes durationum etiam similitate temporis deberent esse simul omnes (ut proinde repugnet Michael ab æterno durans, ex hoc quod daretur aliqua ejus duratio, pro quando darentur simul negationes, ac futurationes durationum illius; quod evidenter repugnat.) Ratio est ex dictis, quia quæ sunt ab æterno sunt simul, quatenus non potest poni unum ante aliud; sicut si ab æterno sint singuli Angeli non tot quin plures, non possunt non esse simul similitate etiam temporis, ita ut aliquo tempore verum sit, Nunc dantur Angeli infiniti categorematice; aliter fuissent creati ab æterno omnes simul, & non successive, quamvis successive definierent, & tamen nunquam fuissent omnes simul; quod manifeste repugnat; ergo si ab æterno sunt futurationes singularum durationum Michaelis non tot quin plures, non possunt non esse simul similitate etiam temporis, ita ut aliquando verum sit, Nunc dantur infinite categorematice futurationes harum durationum. Rursus evidens est, quod quæ sunt ab æterno simul, debent simul condurare per æternitatem, seu annis infinitis.

ut proinde si ab æterno sint conditi simul infiniti Angeli, debeat per æternitatem verum esse, quod actu existant Angeli infiniti; sicuti si mulier sit prægnans ab æterno, debet per æternitatem esse prægnans, aliter daretur æternitas utrinque clausa; ergo cum ab æterno debeant simul esse infinite categorematice futurationes negationum Michaelis, debent pariter ille condurare per æternitatem, ita ut infinitis annis verum sit, Nunc dantur infinite futurationes durationum Michaelis; quo posito. evidenter sequitur, quod Michael per æternitatem, seu annis infinitis non durasset; ac proinde repugnat, Michaellem fuisse ab æterno, non repugnat tamen durare in æternum.

ARTICULUS III.

Num. Divina simplicitas excludat etiam compositionem ex genere, & differentia..

IX. SUB aliis terminis queritur cum Angelico qu. 3. art. 5. Utrum Deus sit in aliquo genere, puta, an sit sub prædicamento substantiæ, ita scilicet, ut ratio substantiæ univoce contrahatur a substantia creata, & increata, an vero analogice, ut ratio Entis analogice contrahitur a substantia, & Accidente, quin constituat speciem rigorose dictam compositionem ex genere, & differentia..

Dico equidem, Deum non esse compositionem ex genere, & differentia, nec ullam rationem: univoce dici de Deo, & creatura: ut proinde non sit in prædicamento substantiæ. Ita communiter cum D. Th. 1. contra Gentes 32. Suario, Gonet disp. 4. contra Scotum in 1. dist. 7. & Nominales apud Vasquez disp. 22.

Prob. ex Suario disp. 30. Metaphysic. sect. 4. Ratio generica debet esse extra conceptum rationis differentialis, ut possit esse utraque haberi compositio metaphysica speciei rigorose dictæ; sed nulla ratio communis Deo, & creaturæ est extra conceptum rationis differentialis Dei; eo modo, quo ratio Entis non est extra conceptum. Perfitatis, vel Inaleitatis; ergo Deus non componitur metaphysice ex genere, & differentia, nec ulla ratio univoce dicitur de Deo, & creatura. Major est Phil. 3. met. 10. & D. Thom. 1. par-

parte q. 3. art. 5. & patet; tum quia genus se habet ut materia, seu ut pars respectu compositi metaphysici, atque adeo non debet includi in compare; tum etiam quia aliter ratio Entis deberet esse generica, etiamsi non habeat differentias extraneas. Prob. min. quia differentialis ratio Dei est infinitas, seu excursus ad quancumque perfectionem; sed quolibet ratio communis Deo, & creaturæ, puta ratio substantiæ, sapientis, Boni, includitur in hac ratione differentiali; non secus ac in Perfeitate includitur formaliter, & implicite ratio Entis; ergo nulla ratio communis Deo, & creaturæ est extra conceptum differentialem Dei.

Confirm. perfectio infinita imbibens formaliter, & implicite quancumque perfectionem debet competere Deo; atqui non competit Deo ratione generis, quia aliter ratio generica non esset communis Deo, & creaturæ; ergo competit illi ratione differentie; ergo differentia Dei absorbet omnem omnino perfectionem, atque adeo etiam ipsam rationem, seu perfectionem genericam; quæ propterea non est ratio rigorose generica, seu communis Deo, & creaturis. Hinc Boetius apud Vasquez loc. cit. *Substantia* (inquit) *in illo non est vere substantia, sed ultra substantiam*; similiterque Dionys. Augult., & alii PP. docent, Deum non esse bonitatem, sed superbonitatem, non vivens, sed supervivens; quia scilicet huiusmodi perfectiones in quantum Divinæ, formaliter, & implicite excurrunt ad quancumque aliam perfectionem, ut ratio entis excurrit ad suas differentias; unde una perfectio Divina non præcindit ab alia perfecte ratione ratiocinata, ut animal a rationali, sed solum secundum implicitum, & explicitum, ut ratio entis a suis differentis; quicquid sit, utrum hæc distinctio appellari possit rationis ratiocinatæ imperfectæ, ut vult Granado apud Ariagam disp. 2. n. 73. an vero rationis ratiocinantis, quod est lis de voce.

X. Objic. 1. mensura, & mensuratum ex Phil. sunt homogenea, & cognata; ergo debent esse in eodem genere; ergo Deus mensurans perfectiones creatas debet esse in eodem genere cum istis.

Confirm. quia nisi Deus univoce conveniret cum creatura, non possemus ex cognitione creaturarum assurgere ad cognitionem Dei.

Resp. Aristotelem loqui de mensura strictè dicta, quæ coaptatur mensurato, ut

est quantitas, quæ mensurat aliam quantitatem; non de mensura large dicta, quæ scilicet nos ducit ad cognitionem alterius, sicut substantia dicitur mensura accidentium; cum ex perfectione accidentium arguamus perfectionem substantiæ. Sic Deus est mensura creaturarum, quia illa creatura est perfectior, quæ magis ad Deum accedit; cum quo tamen stat, quod Deus infinite distet a creatura; unde non sit in eodem genere.

Ad confirm. ex perfectione creaturarum non inferimus, quod in Deo sit perfectio ejusdem rationis, sed solum, quod in Deo sit consimilis perfectio cum excessu infinito; quod satis est, ut ex creaturis Deum agnoscamus: v. gr. dum cognoscimus creaturam sapientem, sed cum limitatione, ac dependentia, inferimus, in Deo esse sapientiam, sed citra limitationem, ac dependentiam, atque adeo Deum esse supersapientem; ita ut sapientia Divina, etiam formaliter, licet implicite, ad quodvis aliud prædicatum Divinum excurrat.

XI. Objic. 2. si daretur quantitas, vel qualitas infinita, esset in eodem genere cum quantitate, & qualitate finita; ergo etiam substantia Dei infinita est in eodem genere, seu prædicamento cum substantia creata.

Resp. omisso antecedente, nego consequ. disparitas est, quia, data possibilitate Infiniti creati, ratio differentialis non excurreret formaliter ad rationem genericam, sed ab ea præcinderet; quantitas enim v. gr. infinita non esset omnis omnino perfectio; ergo non deberet excurrere formaliter ad rationem genericam, ne implicite quidem, sicut rationale non excurrit ad animal; Contra vero ratio differentialis substantiæ increatæ, cum importet perfectionem simpliciter illimitatam, excurrit formaliter, & implicite ad rationem genericam; non secus ac differentie entis ad ens.

DISPUTATIO II.

De Visione Dei.

ANtequam de cognoscitivitate, seu scientia Dei agatur, disputant communiter Theologi cum Angelico, 1. parte qu. 12. de Dei cognoscibilitate, atque adeo de Dei visione, quæ uberem disceptandi segetem subministrat, Visionem autem Dei esse

esse possibilem, & de facto dari in Beatis, est de fide contra Armenos, & quosdam Græcos dicentes, Deum non videri immediate in se, sed in quadam similitudine, seu luce, aut theophania. Matth. 1. dicitur: *Angeli Dei semper vident faciem Patris mei*. 1. ad Corinth. 13. *Videmus nunc per speculum in enigmate, tunc autem facie ad faciem*. Quærendum itaque solum I. Num possit naturali ratione demonstrari, visionem Dei esse possibilem? II. Num sit possibile creatura, cui connaturaliter sit debita visio Dei? III. Num possit oculus elevari ad Deum videndum? IV. Inquirendum de lumine gloriæ ad visionem requisito. V. De specie impressa creatæ Dei. VI. De termino visionis beatificæ.

QUÆSTIO I.

An possit positive demonstrari possibilitas visionis Dei?

I. **N**on dubitatur, possibilitatem visionis facile demonstrari negative, ut dicemus etiam de possibilitate Unionis hypostaticæ in de Incarnatione; & vacuando scilicet dilucide argumenta, quæ ab Hæreticis adversus illam obijciuntur. Difficultas est, an possit etiam positive demonstrari?

Dico equidem cum communiori, possibilitatem visionis Dei esse positive indemonstrabilem. Ita Suar. lib. 2. cap. 7. Fasolus Molin. Gonet contra Vasquez in 1. 2. disput. 20. & Scotistas cum Scotto in 4. disput. 49. quæst. 8. quem tamen aliqui interpretantur de demonstratione minus rigorosa, seu de ratione valde probabili.

Prob. tum quia rationes hætenus adductæ non sunt demonstrativæ, ut mox constabit; tum etiam, quia ut possit aliquid evidenter cognosci, vel debet immediate cognosci per speciem propriam, vel mediate per speciem alienam attingendo evidenter id, cum quo illud immediate connectitur; sicut demonstratur existentia Dei per Creaturas; atqui visio Dei nequit naturaliter cognosci immediate per species proprias; cum enim essentia sit supernaturalis, erit pariter supernaturalis, & indebita ejus proprietates, scilicet ejus cognoscibilitas, atque adeo species impressa illius, quæ est physica objecti proprietates, qua sit proxime cognoscibile; Neque potest cognosci per speciem alienam modo explicato, quia en-

tia naturalia, quæ possunt a nobis evidenter cognosci, non habent connexionem cum ullo ente supernaturali, utpote indebito toti Nature: Ad eum modum quo nequit Trinitas Personarum ex creaturis demonstrari, eo quod creaturæ non habeant connexionem cum hoc mysterio, sed solum connectantur cum Deo, ut prima causa, quæ proinde naturaliter demonstrari poterit a posteriori.

II. Dices: naturali ratione demonstrari potest existentia Dei ut omnipotentis; ergo etiam, quod possit ponere etiam supernaturalia; ergo pariter, quod possit ponere visionem beatam; atque adeo possibilitas visionis est positive demonstrabilis.

Resp. concesso antec. nego 1. consequ. quamvis enim naturali lumine cognoscatur, quod Deus sit omnipotens, atque adeo possit ponere creaturas perfectiores in infinitum, non per hoc inferitur, quod possit ponere aliquod ens supernaturale, quod scilicet sit indebitum cuicumque substantiæ, seu naturæ possibili; sed solum inferitur, quod ratione omnipotentis possit illud ponere, si non repugnet: at quod absolute non repugnet, nequit naturali lumine cognosci. Deinde transmissa prima, nego secundam consequ. ex eo enim quod Deus deberet posse ponere etiam entia supernaturalia in genere ratione omnipotentis, hinc non fit, quod debeat posse ponere hoc ens supernaturale in specie, scilicet visionem beatam, unionem hypostaticam, &c. nisi aliunde constet, ea non repugnare.

III. Objic. 1. ex Scot. in 4. dist. 49. quæst. 8. Deus continetur intra specificativum potentie intellectivæ; ergo potest ab intellectu creato intuitivè videri; ergo bene demonstratur possibilitas visionis Dei. Prob. prima consequ. quia intellectus potest intuitivè ferri in quodvis aliud objectum contentum intra suum specificativum: ergo etiam in objectum Divinum.

Confirm. quia potest oculus intuitivè ferri in quodvis objectum contentum intra proprium specificativum; ergo a fortiori intellectus; nam quod convenit potentie inferiori, a fortiori convenit superiori.

Resp. nego primam consequ. Ad prob. nego consequ. ex hoc enim quod Deus continetur intra specificativum intellectus, sequitur solum, quod debeat posse clare cognosci, non tamen quod intuitivè; sicut nec quod comprehensive. Adde, argumentum probare nimis; probat enim, quod sicut naturæ viribus potest intellectus

intuitive attingere quodvis aliud objectum contentum intra suum specificativum, ita possit etiam naturaliter Deum intueri, quod nemo dixerit.

Ad confirm. Vel supponimus, quod possit oculus naturaliter intueri quodvis coloratum; & paritas probat nimis, quia deberet pariter intellectus posse naturaliter Deum intueri: vel supponimus, posse dari aliquod coloratum, vel lumen materiale supernum, quod non possit naturaliter oculus intueri, quale esset v. gr. lumen corporum Beatorum: & falsum est, quod possit potentia superior circa suum objectum, quodcumque potest potentia inferior circa suum; Nam potentia tactus v. gr. potest naturaliter tangere quodcumque corpus, & oculus non potest per adversarios naturaliter attingere quodcumque lumen, videlicet lumen corporum Beatorum. directe nego consequens. Non enim debet potentia superior universim ferri in suum objectum eo modo, quo ferit in objectum suum potentia inferior: potest enim aliquando competere subjecto imperfectiori prædicatum de se perfectius, dummodo hoc non fundetur in perfectione subjecti: sic Cælum est incorruptibile, & homo perfectior Cælo est corruptibilis, quia incorruptibilitas Cæli fundatur in imperfectione formæ non vitalis; poterit ergo potentia visiva ferri intuitive in omnes colores, quin debeat posse intellectus ferri intuitive circa quodcumque suum objectum. Et ratio a priori est, quia oculus ratione propriæ imperfectionis feritur in objectum, quod est inferius ipsa potentia visiva; contra vero intellectus fertur etiam in objectum, quod est supra quodcumque intellectum creatum; ergo quid mirum, si non possit naturaliter illud intueri?

IV. Objic. 1. ex Vaseq. & Recapito. Quilibet naturali appetitu inclinatur ad Deum videndum: ergo naturali ratione ostenditur possibilitas visionis Dei. Consequens sequitur, quia inclinatio naturalis non est ad terminum naturaliter inaccessibilem; aliter, ut notat D. Th. quæst. 27. de veritate, esset inclinatio frustranea, & potius ad torturam. Prob. antec. quia quilibet visio effectui inclinatur naturaliter ad videndam ejus causam: ergo visus effectibus naturalibus naturaliter inclinatur ad videndam primam causam; nec talis inclinatio quiescit, donec illa immediate videatur, juxta illud Psal. 16. Satiabor, cum apparueris gloria tua.

Confirm. quia naturaliter quilibet incli-

natur ad assequendam felicitatem; hæc autem in visione Dei consistit; ergo ut supra.

Resp. nego antec. ad prob. dico, unumquemque naturaliter visio effectui inclinari ad cognoscendam ejus causam cognitione clara, & evidenti, non tamen intuitiva, quod ex hoc ipso probatur; quia appetitus naturalis non fertur ad terminum naturaliter inaccessibilem; sed visio Dei nequit naturæ viribus obtineri, ut ipsi Adversarii admittunt; ergo natura non inclinatur ad Deum videndum. Quare solum dari potest appetitus elicitus (non vero innatus) alijus boni supernaturalis; qui sæpe est quedam velleitas conditionata, quæ haberi solet de bono, quod non apparet evidenter possibile: & sic aliquando appetitus visio effectui comprehendere ejus causam, & Deum ipsum videre. Ad illud, quod additur, fatietas Animæ in statu elevationis non habetur, nisi per Dei visionem; at in statu puræ naturæ haberetur fatietas citra Dei visionem, ut supponimus.

Ad confirm. naturaliter inclinamur ad assequendam felicitatem naturalem, non vero supernaturalem, seu Dei visionem; felicitas autem naturalis consistit in cognitione abstractiva Dei clara, commensurata naturæ, & meritis, ut dicemus in de Beatitudine.

QUÆSTIO II.

Num repugnet substantia supernaturalis, seu Creatura, cui sit naturaliter debita visio Dei?

I. DE fide est, nullum intellectum hactenus creatum posse naturaliter Deum videre: ut definitum est in Concilio Viennensi adversus Beguardos, & Beguinæ; & habetur in Clementina *Ad nostrum*, de Hæreticis. Ratio est, quia prima ad Timotheum. 6. dicitur: *Quæ lucem inhabitat inaccessibilem, quem nullus hominum vidit, sed nec videre potest*; & ad Roman. 6. *Gratia Dei vita æterna*. Dubitatur tamen, an creari possit intellectus, cui sit connaturaliter debita Dei visio? In partem affirmantem inclinant Mayor., Molin. Valen. Conink, Arriag. disp. 5. sect. 7. cum Ripalda disp. 3. sect. 3. ubi dicit, non invenire repugnantiam hujus subitantiæ supernaturalis. Quod etiam videtur docere Scotus in 2. dist. 23. quæst. 1. dicens:

cent. Tenes propter auctoritatem, quod Deus non possit facere voluntatem impeccabilem per naturam. Communissime tamen cum D. Th. Scoto, Suario, Vafq. & alijs negant, esse possibilem, adeo ut Nazarius censcat, sententiam oppositam esse temerariam, Salas periculofam, Cabrerus sapere hæresim: ex Scripturis enim constat, eam repugnare. Etenim prima ad Timot. 1. dicitur. *Soli Deo immortali, & invisibili*. & cap. 6. ut diximus, *qui lucem habitat inaccessibilem*; quæ verba non possunt intelligi, quod Deus a creaturis solum existentibus naturaliter videri non possit; aliter non diceretur simpliciter invisibilis, ita ut uni Deo competat invisibilitas, sicut soli Deo competit immortalitas essentialis. Constat id etiam auctoritate Patrum: Augustinus 12. de Civitate. 1. habet: *Creatura intellectualis, quia Creatura est, hoc (nempe Deum videre) non ex se potest, sed ex illo, a quo creata est*. Idem docent Dionys. & alii apud Suar. Recupit., Ruiz: propterea communissime Theol. ex auctoritate Scripturarum, & patrum docent, substantiam supernaturalem repugnare; & solum disputant, An possit assignari ratio naturalis evincens hanc repugnantiam? Nos hic præcipuas discutimus.

I. Prima celebris ratiocinatio est illa, quam promovent Esparza quæst. 18. & Hannoldus num. 126. inferentes repugnantiam substantiæ supernaturalis ex perfectione majori visionis Dei supra comprehensionem cujuscumque objecti creati, quæ nulli creaturæ est debita. Supponunt enim primo, nulli intellectui deberi connaturaliter comprehensionem objecti perfectionis se; sicut nequit Cælum inferius comprehendere orbem cælestem superiorem: Secundo visionem Dei esse cognitionem felicitativam, & satiationem Naturæ intellectualis; comprehensionem vero cujuscumque objecti creati non esse satiationem; juxta illud August. *Inquietum est cor meum, donec requiescat in te*. His positis sic arguunt: Intellectui creato, cui est indebita connaturaliter cognitio imperfectior, a fortiori est indebita cognitio perfectior; v. g. si homini obliuiscutionem potentia intellectiva est indebita comprehensio Angeli, a fortiori est indebita comprehensio Archangeli; sed cui libet intellectui creato est indebita connaturaliter comprehensio illius Universi, cujus est pars, & talis comprehensio cum non sit felicitativa, est cognitio imperfectior visionem beatam; ergo nulli intellectui creato

possibili est connaturaliter debita visio Dei; atque adeo repugnat substantia supernaturalis. Minor patet ex præsuppositis; comprehensio enim cujuscumque objecti creati non explet appetitum naturæ rationalis, atque adeo non est felicitativa, sicut est visio Dei; quæ proinde est præeligibilior quacumque comprehensione objecti creati, non secus ac amor, & fructus Dei intuitive v. si est præstantior, ac præeligibilior quolibet amore objecti creati.

III. Equidem tamen cum communiori censeo, hanc ratiocinationem esse inefficacem. Primo quia quamvis convinceret repugnantiam intellectus creati, cui sit debita visio Dei felicitativa, non probat tamen, repugnare intellectum, cui sit debita visio Dei, quæ non felicitet, qualis esset visio Dei præciva, qua intuitive attingatur Deus solum sub conceptu communi Deo, & Creaturæ, v. g. sub conceptu substantiæ intellectivæ, quin attingatur ut Ens a se, vel ut infinitus; quod fieri posse, communius Adversarii admittunt. Secundo; neque probat repugnantiam intellectus, cui sit debita visio Dei felicitativa: nam, quoties fit transitus ab uno genere cognitionis ad aliud, non tenet illatio a minori ad majus: sicut enim non tenet hæc illatio: Igni ratione limitationis non debetur vis productiva caloris ut novem; ergo neque debetur Igni vis productiva substantiæ ignis, quæ est perfectior calore ut novem: ita nec tenet hæc illatio: Intellectui A titulo suæ limitationis in linea intelligendi non debetur connaturaliter comprehensio objecti perfectionis se, aut Universi, cujus est pars; ergo a fortiori non debetur illi visio Dei felicitativa, quæ est quid præstantius qualibet comprehensione objecti creati. Et ratio est, quia visio Dei est in diverso genere cognitionis, ac sit comprehensio objecti creati, a qua differt tum in modo attingendi, tum ratione objecti: objectum enim increatum infinite dilatat a creato; & propterea cognitio objecti increati reponitur in ordine diverso a cognitione objecti creati. Sic etiam titulo limitationis intellectus Angeli cum lumine gloriæ nequit comprehendere Angelum, & tamen potest Deum videre: Sic etiam species impressa creata Dei nequit concurrere naturaliter ad comprehensionem objecti creati, & tamen potest naturaliter concurrere ad Dei visionem.

Confirm. Non tenet hæc illatio: Nulli intellectui creato debetur comprehensio objecti

jecti perfectioris se; ergo nulli debetur cognitio abstractiva Dei, secundum quod est in statu purae naturae felicitativa; ergo neque tenet illatio Adversariorum in casu nostro. In cognitione enim abstractiva Dei duo respectus considerari debent, alter ad objectum creatum immediate attractum, & secundum hanc rationem non felicitat; alter ad Deum attractum mediate, & secundum hanc rationem dicitur felicitare in statu purae Naturae cognitio abstractiva Dei, quae est consentanea naturae, & meritis uniuscujusque. Certum autem est, cognitionem hanc abstractivam Dei in quantum felicitativam esse debitam in pura Natura, quin sit debita comprehensio objecti perfectioris in infinitum; ergo poterit etiam esse debita visio Dei felicitativa, etiamsi non sit debita comprehensio objecti perfectioris in infinitum.

IV. Secunda ratiocinatio est Suarii lib. 2. de Deo sic discurrentis: De facto non datur substantia creata supernaturalis, ut definitum est in Concilio Viennensi; ergo repugnat. Prob. consequ. quia communissime DD. & Patres docent, Universum esse optimum (quicquid sit, utrum Deus moraliter necessitetur ad optimum, quod in de Incarnatione discutimus) docent etiam communissime Theologi cum D. Th. 1. p. quæst. 59. art. 1. ad perfectionem Universi requiri, quod in eo datur omnes gradus, & ordines Creaturarum; atqui substantia ista, quae posita naturaliter Deum videre, esset in altiori gradu, & ordine Creaturarum, quam sint Creaturae intellectivæ, quae dantur de facto potentes solum abstractivè Deum cognoscere: sicut visio Dei est in altiori gradu, quam cognitio Dei abstractiva; ergo si substantia supernaturalis esset possibilis, deberet de facto dari, atque adeo si non datur, repugnat. Qua ratiocinatione ostendimus cum eodem Suario, naturali ratione convinci Angelorum existentiam ex hoc præcise, quod sint possibiles, & contineant in Universo optimo novum gradum entium.

Et sane communis est Patrum, Conciliorum, & Philosophorum sententia, Universum de facto esse optimum, ut omnes naturali instinctu sentiunt. Concil. Francofordiense habet: *Credamus, Deum omnia velles, quæ meliora sunt.* Augustinus lib. 1. de liber. arbit. cap. 5. *Quicquid tibi vera ratio melius occurrat, hoc scias Deum fecisse bonorum omnium Conditorum.* Phil. 2. de Cael. 34. *Natura semper facit, quod est optimum.*

Certum est etiam, Universum non fore optimum, si careret quovis gradu, & ordine entium. Nam illud dicitur bonum, & perfectum, quod est aptum ad finem suum: v. g. Gladius est perfectus, si sit aptus ad feriendum: finis autem Universi est manifestatio Divinae gloriae, & Divinarum perfectionum per Creaturas; Cuncta enim, ut dicitur Prov. 16. *propter seipsum operatus est Deus:* ergo ut Universum sit perfectum, & optimum, debet maxime ad id conducere: atqui ad manifestandas Divinas perfectiones non conducere perfecte, si careret iis Creaturis, quæ maxime omnium Divinas perfectiones adumbrant, ut sunt Creaturae perfectissime, quæ constituunt gradus entium perfectiores representando attributa Dei præstantiora, qualis perfectio esset substantia supernaturalis: ergo Universum non esset optimum, si careret quolibet gradu, & ordine entium, ac præferret substantia supernaturali, si esset possibilis. Sicut enim cognitio, quæ est imago intentionalis objecti, non dicitur esse perfecta, & optima, si clare non representat prædicata præstantiora objecti; ita effectus, qui est imago naturalis suæ causæ, non dicitur esse perfectus, & Optimus, atque adeo Universum non esset effectus Optimus Primæ causæ, nisi clare Divinas perfectiones adumbraret; quas certe clare non adumbraret, si careret quolibet gradu, & genere entium, & præferret si careret substantia supernaturali, posita ejus possibiliter.

Confirm. 1. quia longius præstaret substantia ista supernaturalis Natura Angelicæ de facto existenti, quæ solum potest abstractivè connaturaliter Deum cognoscere, quam præstet Natura Angelica humana: atqui Natura Angelica, cum participet Divinum intellectum simplici modo, quam homo, ideo constituit gradum, & ordinem entium excellentiorem, ut proinde dari debeat de facto, si est possibilis, ut hic supponimus: ergo a fortiori substantia supernaturalis dari deberet de facto, si esset possibilis.

Confirm. 2. ex Amico n. 150. Deus ex sua providentia regulariter operatur juxta naturalem rerum inclinationem secundando exigentias causarum secundarum; atqui si esset possibilis substantia supernaturalis, & non daretur de facto, Deus per totam æternitatem operaretur contra naturalem inclinationem visionis, & ejusmodi accidentis supernaturalis: quippe quæ nunquam essent in subiecto proprio ab iis exigito: ergo substantia-

stantia supernaturalis non est possibilis, potest, quod non detur.

V. Dices: ex hoc, quod sit possibilis species Angelica perfectior illa, quæ de facto est omnium prima, non sequitur, quod ea debeat de facto dari; ergo ex possibilitate substantiæ supernaturalis non inferitur, quod debeat dari de facto.

Confirm. 1. ex possibilitate Corporis simplicis, aut Angeli compositi ex materia spiritali, & forma Angelica non sequitur, quod de facto dentur; ergo neque in casu.

Confirm. 2. Ex possibilitate unionis hypostatice, & ordinis supernaturalis non sequitur, quod deberint poni in hoc Universo; cum Deus potuisset condere Universum optimum absque ullo ente supernaturali; ergo idem dicendum de substantia supernaturali.

Resp. concessio antecedente, nego consequens. Disparitas est, quia in iis, in quibus est abire in infinitum, scilicet in multitudine specierum, & individuorum, non est possibile optimum; & ideo non debuit in iis dari optimum, sed satis est, quod in tali numero, pondere, ac mensura ea ponantur, ut apte congruant cum reliquis. Unde Augustinus 9. de Civit. 15. dixit, *Ordinem, seu pulchritudinem esse parium, ac disparium congruam dispositionem*. In iis vero, in quibus non est abire in infinitum, videlicet in generibus, & in gradibus entium debuit dari optimum, ut Universum sit optimum, & ut quilibet Dei perfectio per Creaturas aptissimo modo representetur: Unde sicut non esset optimum Universum, si deesset genus Intellectivi, in quo Deus convenit cum Creatura, ita neque esset optimum, si deesset substantia, cui esset connaturaliter debita visio Dei.

Ad 1. confirm. transmissio antecedente, nego consequens. Perfectio Corporis simplicis abunde compensatur per simplicitatem Naturæ Angelicæ, & per Corpus compositum; sicut etiam perfectio Angeli compositi ex materia spiritali: contra vero perfectio substantiæ supernaturalis (sicut etiam Naturæ Angelicæ) non posset aliunde compensari, & ideo Universum non esset perfectum, si iis careret.

Ad 2. Ordo Gratiæ, & Gloriæ, & ipsa unio hypostatice debuit in Universo poni, ut esset Universum numeris omnibus absolutum: Quare ut notat suavius loc. cit. & dispersa quæst. 1. de Angel. art. ult. Accidentia supernaturalia sunt quidem indebi-

ta cuivis Naturæ, seu substantiæ particulari, sunt tamen debita toti Naturæ, quatenus conditæ ad manifestandas Dei perfectiones: Quicquid sit, utrum ista exigentia sit in ipsa natura, an potius in ipso Deo habente moralem necessitatem ad optimum ponendum. Hinc etiam unio hypostatice fuit exigita in tota natura, licet ut congrue poneretur, non debuit poni a Naturæ incunabulis, sed post preces Patriarcharum, & Deiparæ.

VI. Dices 2. Universum est perfectum, si sit aptum ad finem illi a Deo præstitutum manifestandi gloriam suam in hac, vel illa mensura: ergo adhuc esset perfectum, si careret Angelis, Unione hypostatice, substantia supernaturali, &c. si Deus noluisse per tales Creaturas gloriam suam manifestare.

Resp. si antecedens esset verum, sequeretur, quod Universum dici posset perfectum, etiam si esset Tuguriolum, in quo essent duo cæci, & claudi vermes, & zoophita; quod nemo dixerit. Quare Universum est non solum optimum secundum quid, id est aptum ad finem minus perfectum, sed est optimum simpliciter tum materialiter, tum formaliter, scilicet aptum ad finem simpliciter optimum. Sicut enim decet, Deum Sapientissimum ponere media optima ad finem ipsi præstitutum; ita decet præstitui sibi finem optimum. Quod autem ita de facto sit, docet instinctus naturalis, & omnium sensus alie, & congrue de Deo sentientium; propterea Deus voluit per Creaturas adumbrare suas perfectiones perfectissimo modo, tum ratione finis perfectissimi, tum ratione mediorum maxime idoneorum; atque adeo omnes omnium Entium gradus, & ordines posuit: cum autem substantiam supernaturalem non posuerit, dicendum a posteriori, eam repugnare.

Ex quibus etiam sequitur, repugnare substantiam, cui sit connaturaliter debita Gratia, aut quodcumque aliud ens supernaturale: Ratio est, quia huiusmodi Creatura procul dubio confitueret novum gradum, & ordinem Entium præ omnibus existentibus sublimiorem, atque adeo deberet de facto dari.

VII. Tertia ratio, quam promover Maurus qu. 25. est, quia visio Dei est supernaturalis, & Gratia exigens Dei visionem est, ut loquitur D. Petrus, participatio nature Divine antonomastice; atqui si esset possibilis substantia supernaturalis creata,

Gra-

Gratia, & visio non essent supernaturales, nec essent participationes Divinæ naturæ antonomastice; quandoquidem essent etiam participationes hujus substantiæ creatæ; Sicut calor nequit dici antonomastice participatio naturæ Divinæ, cum etiam participet naturam ignis; ergo substantia supernaturalis repugnat.

Confirm. ex conceptu supernaturalitatis. Illud dicitur supernaturale, quod est supra omnem naturam non solum creatam, sed etiam creabilem, atque adeo quod est indebitum cuivis creatæ substantiæ, seu naturæ; (pro eodem enim hic venit substantia, & natura, quæ sonat principium motus, & quietis) atqui si esset possibilis substantia supernaturalis, visio Dei, & Gratia non essent accidentia indebita cuivis substantiæ creatæ etiam possibili, ut patet; quandoquidem deberentur huic substantiæ supernaturali, de qua est questio; ergo si hæc esset possibilis, visio Dei, & Gratia non essent accidentia simpliciter supernaturalia; quod est contra Fidem, cum Apostolus dicat: *Gratia Dei vita æterna*, & Concilia sæpe doceant, Gratiæ esse donum Spiritus Sancti, quod sonat donum omnino indebitum, & secundum substantiam supernaturale. Prob. maj. quia nisi Ens supernaturale esset illud, quod est indebitum cuivis substantiæ, etiam possibili, sequeretur 1. quod si Deus poneret Angelum Superiorem supremo nunc existente, cognitio illius Angelicæ esset indebita cuivis substantiæ nunc existenti, deberet dici supernaturalis. Sequeretur 2. quod si Deus nunc destrueret Angelum supremum, cognitio huic debita, quæ nunc est naturalis, post ejus destructionem evaderet supernaturalis; quia tunc nulli esset debita.

VIII. Ultima celebris, & efficax ratiocinatio est D. Thomæ q. 12. a. 4. & contra Gentiles cap. 52. quam Scotus impugnatur, sed defendunt Cajetanus, Suarez lib. 2. cap. 9., Gonetius, Haunol., Maurus, Platelius, & alii; fundaturque in eo principio, quod Modus cognoscendi, seu operandi sequatur modum essendi; sic autem procedit: Omnis natura cognoscitiva ea solum objecta potest naturaliter cognoscere intuitive, & immediate, quæ sunt in eodem gradu materialitatis, vel immaterialitatis cum ipsa; cætera vero objecta, quæ sunt in ordine superiori essendi, seu immaterialitatis, vel non potest simpliciter cognoscere, vel cognoscit juxta modum essendi proprium cognoscentis, hoc est per abstractionem ab

objectis ejusdem ordinis cum cognoscente: sed Deus est actus purissimus, & in supremo ordine immaterialitatis, utpote carens materia etiam metaphysica; (scilicet ratione generica stricte dicta, ut explicavimus in calce disputationis antecedentis) ergo nulla potentia cognoscitiva creatæ, utpote habens materialitatem saltem metaphysicam, potest naturaliter Deum cognoscere, nisi modo quodam materiali, hoc est abstractive, non intuitive. Probatur major tum inductione, tum a priori. Inductione quidem, quia quatuor sunt genera cognoscitivorum; Primum est cognoscitivorum materialium, seu sensitivorum, quæ solum possunt attingere objecta materialia, & sensibilia. Secundum est Animæ rationalis, quæ simul est intellectiva, & simul forma Corporis, & ideo cognoscit objecta modo consentaneo suo modo essendi, hoc est cognoscit objecta spiritualia modo materiali, seu per dependentiam a phantasmatibus, & a conditionibus materiæ; & quia Anima solum initio unitur Corpori, potest tamen deinde naturaliter, etiam extra Corpus, existeret, ideo Anima solum dum est in corpore, cognoscit objecta spiritualia dependenter a phantasmatibus, & ad modum rerum materialium; quando vero separatur a corpore, ex cognoscit prout sunt in se independentem a phantasmatibus. Tertium genus cognoscitivorum sunt Angeli, qui cum careant materia physica, possunt naturaliter intuitive cognoscere etiam objecta spiritalia, quæ carent materia physica. Quartum genus est ipse Deus, qui carens materia etiam metaphysica potest naturaliter intuitive etiam seipsum actum purissimum cognoscere. Nunc sic: Potentia sensitivæ nullatenus possunt Animam rationalem intueri: Anima rationalis, dum est in corpore, nequit naturaliter intueri Angelum; ergo neque Angelus habens metaphysicam materialitatem potest naturaliter intueri Deum omnis materiæ expertem; atque adeo inductione evincitur illa major, quod scilicet Omnis natura cognoscitiva illud solum objectum potest intuitive attingere, quod convenit cum ipsa in eodem genere immaterialitatis.

Prob. deinde eadem major a priori, quia modus operandi sequitur modum essendi; ergo modus cognoscendi potentie cognoscitivæ creatæ, utpote habentis aliquam materialitatem, saltem metaphysicam, non potest excludere omnem materialitatem relative ad attingendum Deum actum purissimum;

rum; unde solum ænigmatice, & abstractive potest illum naturaliter cognoscere. Neque dicas, sufficere, quod ipsa cognitio creata habeat materialitatem metaphysicam. Nam cognitio in hoc sensu solum in modo effendi, non in modo operandi conformaretur suæ potentie.

Confirm. plus distat modus effendi Dei a modo effendi Creaturæ, quam modus effendi Angeli a modo effendi hominis, vel Brutorum; atqui propter excessum Angeli in modo effendi supra Homines, & Bruta, non potest naturaliter ab homine, & ne supernaturaliter quidem a Brutis intuitive videri; ergo a fortiori non potest Deus videri intuitive a Creatura viribus propriis.

IX. Dices cum Scoto; Hinc sequi primo, quod Angelus superior, utpote immaterialior, non possit naturaliter videri ab Angelo inferiore. Secundo, quod neque intellectus informatus lumine gloriæ, utpote continens metaphysicam materialitatem, possit naturaliter Deum videre.

Resp. nego utramque sequelam. Ad primam, licet Angelus superior sit perfectior, non per hoc est immaterialior; cum sit in eodem ordine materialitatis metaphysicæ cum Angelo inferiore, & ideo potest naturaliter ab hoc intuitive videri (sicut etiam ab Anima rationali separata) visione consentanea materialitati metaphysicæ Angeli Superioris; quatenus sicut Angelus superior est metaphysice compositus ex genere, & differentia, ita cognitio attractiva talis Angeli facit physicam compositionem cum potentia cognoscitiva; quia tamen Deus omnem compositionem excludit, ideo cognitio naturaliter attractiva immediate Dei excludere debet omnem compositionem physicam cum potentia cognoscitiva, ut proinde solus Deus possit connaturaliter seipsum intueri.

Ad secundam, Intellectus informatus lumine gloriæ ideo potest connaturaliter Deum videre, quia continendo tale lumen continet Dei instrumentum, quo ad talem effectum supernaturalem elevetur obedientialiter; sufficit enim, quod in Deo causa principali visionis præsupponatur actus purissimus proportionatus ad connaturaliter seipsum videndum: sic ex. gr. licet non possit naturaliter Creaturæ competere jurisdictio in alias Creaturas intellectuales æquales, aut superiores, poterit tamen ex extrinseco Dei favore; quia sufficit, quod in Deo ea jurisdictio præcontineatur. Simili-

ter quamvis non possit Creatura naturaliter cognoscere arcanæ cordium, objecta supernaturalia, aut futura libera, & contingentia, poterit tamen instrumentaliter per donum prophetie.

X. Objic. 1. pro possibilitate substantiæ supernaturalis cum Molina. Aggregatum ex intellectu humano, & lumine gloriæ est quid finitum, cui connaturaliter debetur visio Dei; sed potest dari aliqua substantia intellectiva creata, quæ æquivalet huic complexo; ergo dari potest substantia intellectiva, cui debeat naturaliter visio Dei. Prob. min. quia universim perfectiones, & prædicata, quæ reperiuntur in pluribus entitatibus finitis, possunt in eadem indivisibili entitate finita perfectiori reperiiri.

Resp. nego min. quam esse falsam ostendunt innumeræ instantiæ. Intellectus, & intellectus creata sunt quid finitum, & tamen repugnat intellectus creatus identificans sibi intellectionem: Complexum ex humanitate, & unione hypostatica est quid finitum, repugnat tamen natura creata, cui indivisibiliter competit utriusque illius entitatis perfectio, quia essentialiter natura ista deberet subsistere per substantiam increatam. Sic concursus causæ efficientis, & materialis: relate ad productionem formæ materialis est quid finitum, si tamen possit Agens indivisibiliter supplere utrumque concursum in genere causæ efficientis, eo ipso esset Agens increatum; utpote creativum. Idem dicas in casu nostro; lumini enim gloriæ debetur visio tanquam instrumento virtutis Divinæ, cui id competit principaliter.

XI. Objic. 2. Lumini gloriæ debetur connaturaliter visio Dei; ergo a fortiori poterit deberi substantiæ intellectivæ; cum possit substantia aliqua adeo crescere in perfectione, ut æquipollet perfectioni accidentis, nempe luminis gloriæ: sic quia calor competit vis productivæ caloris, dari poterit substantia ignis, cui id etiam competit.

Confirm. De facto datur unio hypostatica substantialis, cui debentur omnia dona supernaturalia, & ipsa visio beata; ergo a fortiori dari poterit substantia aliqua aboluta, (utpote perfectior modali, qualis est unio Hypostatica) cui visio beata debeatur.

Resp. nego consequentiam; Sicuti non potest dari substantia creata, cuius connaturale subsistere per substantiam increatam,

tam, quamvis Humanitati Christi Domini sub unione Hypostatica id competat; sic etiam dari nequit substantia immobilis, vel inconfervabilis, licet immobilitas essentialiter competat ubicationi, & inconfervabilitas durationi.

Ad confum. nego pariter consequentiam. Disparitas est, quia Humanitati Christi Domini sub unione hypostatica debetur visio Dei ratione Sanctitatis Increatae per Unionem inducitur, a qua humanitas redditur infinitae Sancta: hoc autem non competit formae substantiali absolute.

XII. Objic. ult. Accidens est essentialiter Entis Ens; ergo dari debet subiectum substantiale, cui debeatur; ergo possibilis est substantia supernaturalis, cui debeatur Gratia, lumen gloriae, visio beata, & quodcumque accidens supernaturale.

Resp. nego consequentiam. Ad hoc ut Accidens sit Entis Ens, sufficit, quod sit possibile subiectum substantiale, cui possit inhaerere, etiam si ab illo non exigatur; aliter nullum daretur accidens supernaturale, seu cuiusvis substantiae indebitum: Sic modus est essentialiter veluti Ens entis, seu modificans subiectum, & non per hoc unio hypostatica, quae in hoc sensu est Entis Ens, debet exigi ab ullo subiecto, sed sufficit, quod sit possibile subiectum, quod ab illa modificetur. Adde, non omnia accidentia naturalia esse naturaliter exigita a subiecto naturali; (ut est v. g. impulsus impressus lapidi) ergo nec accidens essentialiter debet simpliciter a subiecto exigi.

Q U A E S T I O III.

An possit oculus corporeus elevari ad Deum videndum?

I. **N**on est hic Quaestio, An possit Oculus obedientialiter producere visionem Dei, ut potest lapis, sed an possit suscipere denominationem videns, quod certe non potest lapis: Ad id enim requiritur, quod potentia possit actu vitali percipere obiectum; quod quia nequit lapis, idcirco licet possit lapis visionem, aut actum fidei obedientialiter producere, non per hoc poterit videre, aut credere. Difficulus est. An idem dicendum sit de oculo corporeo?

Dico equidem cum communissima, Ne-

que oculum, neque aliam potentiam materiale elevari posse ad Deum videndum. Est fere omnium Catholicorum contra Dionem, qui apud Recupitum dixit, posse Bruta Deum videre, & contra Bonaspei: Est etiam contra Ariagum disp. 7. de Anim. & contra Quiros apud Lumbier putantes, posse dari potentiam materiale cognoscitivam spiritus. Aliqui tamen censent conclusionem hanc esse de fide, cum Scriptura dicat, Deum esse invisibilem, & PP. communissime id intelligant de oculo corporeo. Illud autem Job. 10. *In carne mea videbo Deum*, intelligunt Patres vel de visione terminata ad Christum Dominum, vel de visione Dei in carne; non tamen per carnem, sed per intellectum post resurrectionem.

Prob. In hoc differt potentia intentionalis a potentia pure productiva, quod haec possit divinitus elevari ad quodlibet producendum, ut ostendimus in de Sacramentis; illa vero non possit extra proprium specificativum vagari: v. g. nequit auris attingere nisi sonum, quin possit audire coloratum, sicut nec etiam videre sonum; ergo neque potest oculus videre, nisi lucidum, & coloratum, atque adeo nequit Deum videre, aut intelligere. Et ratio a priori est, quia potentia intentionalis specificatur a suo obiecto formali, hoc est reponitur in tali specie, & differentia essentiali per ordinem, ac tendentiam ad tale obiectum formale, ut constet inductione; ergo cum non possit Deus variare rerum essentias, non poterit efficere, quod potentia intentionalis extra proprium specificativum vegetur; atque adeo sicut nequit Deus efficere, quod Leo v. g. discurrat, planta sentiat &c. ita nec quod oculus videat v. g. sonum, aut odores, & a fortiori Angelos, aut ipsum Deum. Et eadem est ratio de qualibet potentia materiali; quippe quae specificatur ab obiecto materiali, & corporeo, unde non poterit elevari ad videndum Deum.

II. Confirm. ab absurdis; Nam si posset ab oculo Deus videri, posset etiam Deus audiri ab aure, olferi, gustari, tangi &c.; unde possemus etiam Deum comedere, digerere, &c. posset etiam Brutum suis potentis materialibus Deum percipere, & sic beari, possetque etiam discurre &c. quo quid absurdius? Ratio ulterior est; quia potentia intentionalis, dum percipit obiectum, non attingit illud mortuo modo ipsarum potentiarum productivae, sed modo vitali,

tali, ac proprio attingendum illud, quatenus pertinens ad se, & intra proprium specificativum, atque adeo ut potens ab intrinseco circa illud per suos actus versari; ergo cum non possit oculus ita versari circa Deum, variaretur essentia oculi, si posset Deum videre.

III. Objic. 1. Potest oculus elevari ad attingendum lumen materiale supernum proprium corporis gloriosi; ergo etiam ad videndum Deum. Prob. consequ. quia licet Deus non sit formaliter materialis, est tamen eminenter objectum materiale; ergo sicut potest oculus elevari ad videndum lumen supernum, ita ad videndum lumen eminentiale, scilicet Deum; in neuro enim casu vagaretur extra proprium specificativum; quia dici poterit, quod specificativum essentiale oculi sit lumen ut sic, præscindendo a naturali, & superno, a formali, & eminentiali; quamvis naturaliter non possit nisi lumen naturale, & formale videre.

Confirm. primo, quia licet Intellectus non possit naturaliter videre Deum, potest tamen supernaturaliter confortatus lumine gloriæ; ergo etiam oculus.

Confirm. 2. quamvis oculus non possit naturaliter producere Dei visionem, potest tamen obediencialiter; ergo poterit etiam obediencialiter Deum videre; sicut enim potentia productiva oculi non vagatur extra proprium specificativum, si producat visionem Dei; ita nec potentia visiva, si Deum videat: & ratio ulterior est, quia sicut dari potest potentia productiva, cujus specificativum essentiale magis late pateat, quam specificativum naturale; ita dari potest consimilis potentia visiva; cum de facto oculus non possit naturaliter, possit tamen supernaturaliter videre lumen supernum corporum Beatorum; ergo sicut oculus non vagatur extra proprium specificativum essentiale producendo visionem Dei, aut videndo lumen supernum, ita nec videndo lumen eminentiale, scilicet Deum. Hinc Exodi 23. dicitur: *loquebatur Dominus ad Moysen facie ad faciem*, indicando, quod se præbuerit visibilem oculis corporeis.

Resp. argumentum probare, quod possit etiam Deus audiri, gustari, &c. cum enim possint huiusmodi etiam potentie elevari ad attingendum sonum, aut saporem supernum, deberent pariter posse elevari ad sonum, aut saporem eminentialem. Quare nego consequ. Ad probationem, lumen supernum, cum sit materiale, est intra spe-

cificativum oculi: secus vero lumen eminentiale, scilicet Deus spiritus purissimus, qui magis elongatur a specificativo oculi, quam Angelus, sonus, sapor: quare licet possit intra specificativum essentiale oculi includi lumen materiale supernum, non tamen lumen eminentiale, sicut nec Angelus, sonus, sapor.

Ad 1. confirm. nego consequ. Intellectus naturaliter Deum cognoscit abstractive; ergo si eleveatur ad Deum videndum, non vagatur extra proprium specificativum; sicut nec vagatur oculus, dum attingit divinitus lumen supernum; secus vero si Deum attingeret.

Ad 2. supponimus, dari in quolibet Ente Deo subiecto potentiam quodlibetam, seu potentiam ad producendum obediencialiter quodlibet; nam dum producit obediencialiter effectum indebitum, non agit qua talis potentia, sed qua ens Deo subiectum, atque adeo ut potens instrumentaliter producere, quicquid potest Deus principaliter se solo: contra vero potentia intentionalis, dum vitaliter operatur, agit qua talis potentia; & ideo solum potest elevari ad attingendum objectum perfectius, & perfectius, quod tamen sit intra proprium specificativum. Hinc, si oculus qua ens Deo subiectum eleveatur ad producendam Dei visionem, tunc elevatur ad ponendum id, quod se solo non potest; at si elevaretur ad videndum Deum, elevaretur ad essendum id, quod non est, atque adeo essentia oculi mutaretur; quod repugnat. Verba illa Exodi 23. indicant vel magnam familiaritatem Moysis cum Deo, vel visionem figuræ corporeæ, in qua Deus, aut Angelus Moysi loquebatur.

IV. Objic. 2. Magis distat Deus ab intellectu creato, quam Angelus ab oculo; ergo si potest intellectus creatus divinitus videre Deum, a fortiori poterit oculus videre Angelum; atqui si posset videre Angelum spiritualem, posset etiam Deum; ergo absolute potest oculus corporeus divinitus Deum videre.

Confirm. non videtur, cur objectum spirituale non possit esse intra specificativum essentiale potentie materialis; etenim materialitas potentie duo fert, & divisibilitatem, & impenetrabilitatem; sed divisibilitas potentie materialis non obstat; tum quia dari potest aliquod materiale indivisibile, ut in sententia Thonulica Animæ Brutorum; tum etiam quia dari potest aliud spirituale divisibile, ut sunt habitus infu-

infusi; gratia &c. Neque obstat impetrabilitas, ut patet; praeterim quia si potest substantia materiz conjungi cum Anima spiritali tanquam potentia cum actu ad faciendum unum per se, quidni poterit potentia materialis attingere objectum spirituale?

Confirmatur 2. potest Anima rationalis spiritalis attingere objectum materiale visione materiali oculari; ergo potest etiam viceversa potentia materialis attingere objectum spirituale actu spiritali.

Resp. dist. antec. Magis distat Deus entitatively, concedo; in ratione repraesentabilis, nego antec. & conseq. Aliter sicut potest intellectus aliquo modo naturaliter, scilicet abstractive, Deum cognoscere, ita posset naturaliter oculus aliquo modo attingere Angelum.

Ad 1. confirm. Sicut potest intelligi, quod sonus non fit intra specificativum formale potentiz visivae materialis, licet sonus etiam fit materialis, seu indigens materia; ita a fortiori intelligi potest, quod objectum immateriale non fit intra specificativum potentiz materialis; idque quia potentia materialis ex sua essentia tali objecto materiali, puta colorato, commensuratur, & ab eo specificatur: unde sicut nequit divinitus extra propriam speciem esse; ita nec extra proprium specificativum vagari: quod non contingit, si materia faciat unum per se cum Anima spiritali.

Ad 2. Anima rationalis cum fit forma corporis, habet potentias materiales, quae suis actibus materialibus attingere possunt objectum materiale: at potentia materialis, utpote specificata ab objecto materiali, nequit attingere spirituale.

V. Obijc. ult. Potentia calefactiva ignis, licet fit materialis, non solum potest producere calorem in subiecto spiritali, puta in Dæmone, sed etiam potest ipsum cruciare; ergo oculus non solum potest obediuntialiter visionem Dei producere, sed etiam Deum videre: sicut enim virtus calefactiva specificatur naturaliter a subiecto corporeo, & divinitus etiam ab incorporeo; ita potentia visiva specificari poterit naturaliter ab objecto materiali, & divinitus etiam a spiritali.

Confirm. quia conditiones potentiz cognoscitivae non debent esse in objecto cognoscibili: ergo potest potentia esse materialis, & objectum esse spirituale. Prob. antec. quia potest potentia esse finita, & objectum infinitum, ut quando intellectus

cognoscit Deum; ergo poterit etiam potentia esse materialis, & objectum esse spirituale.

Resp. neg. conseq. Ignis Tartareus elevatur ad producendam in spiritu qualitatē spiritalē doloriferam, quae cruciat Dæmones in virtutis combustivae, non tamen calefacit Dæmonem, qui est incapax talis effectus; unde potius paritas retorquetur.

Ad confirm. dist. antec. Conditiones impertinentes ad specificandā potentia cognoscitivam in genere cognoscibilis non debent esse in objecto cognoscibili, concedo; conditiones essentielles, nego antec. & conseq. finitudo objecti non pertinet ad specificandam potentiam cognoscitivam limitatam, sicut pertinet materialitas; aliter sicut potentia intellectiva limitata etiam naturaliter potest Deum cognoscere; ita potentia materialis etiam naturaliter posset attingere spiritum, & oculus Deum videre.

QUAESTIO IV.

De Lumine Gloriae.

I. Lumen gloriae est qualitas supernaturalis consortans, seu elevans intrinsicē, & permanenter intellectum Beati in ordine ad Dei visionem eliciendam; Sicut enim in via datur habitus fidei, seu lumen fidei habituale intrinsicum, & permanens in ordine ad eliciendos actus fidei supernaturales; ita in Patria datur lumen gloriae in ordine ad Deum videndum; cum enim de fide sit ex Concil. Viennensi contra Beguardos, & Beguinas, non posse intellectum solis naturae viribus Deum videre, qui lucem habitat inaccessibilem; ideo dari debuit principium elevans potentiam naturalem, scilicet lumen gloriae, quod communiter docent esse intrinsicum, & permanenter inhaerere intellectui Beatorum, quia connaturale est, potentiam ad suos actus compleri complemento intrinsicō, & permanente; sicut habitus tam naturales, quam infusi fidei, spei, & aliarum virtutum intrinsici sunt, & permanentes. Et ratio a priori est, quia cum vita consistat in hoc, quod possit vivere movere seipsum per virtutem intrinsicam, perfectio operationis vitalis consistit in hoc, quod procedat a perfecta virtute intrinsicā movendi seipsum. Quærendum hic primo, an lumen gloriae sit tota ratio agendi,

di, seu producendi visionem beatam? Secundo an sine lumine intrinseco possit intellectus elevari ad Deum videndum per omnipotentiam speciali modo extrinsecus assistentem? Tertio utrum inaequalitas visionum non solum defumatur ex inaequalitate luminis gloriæ, sed etiam ex inaequalitate intellectuum?

ARTICULUS I.

An lumen gloriæ relate ad visionem sit tota ratio agendi?

II. Certum videtur, lumen gloriæ concurrere ad visionem Dei non mere formaliter, hoc est illuminando intellectum, ut docuit Bacchonus apud Lumbiern. 420. sed etiam efficienter: cum vires naturales intellectus sint insufficientes, nec requiratur lumen ut mera conditio, sed etiam ut complens vires potentie intellectivæ; sicut relate ad actus supernaturales requiritur gratia actualis ut adjuvans, juxta illud Jo. 15. *sine me nihil potestis facere*. Hoc posito, Recentiores Thomistæ cum Soto, Bagnez, Lumbier docent, lumen gloriæ non quidem esse totum agens, sed esse totam rationem agendi, seu producendi visionem, ita ut intellectus non influat in visionem immediate, sed solum mediate per lumen, tamquam per instrumentum a Deo infusum: sicut in sententia Thomistica substantia non producit substantiam immediate, sed per virtutem accidentis, tamquam per instrumentum connaturale, quod sit tota ratio immediate productiva substantiæ. Communitur tamen DD. Societatis docent oppositum cum D. Th. quæst. 12. art. 5. ubi dicit, lumen requiri, ut augeat, fortificet, confortet vires naturales intellectus.

III. Dicendum itaque cum communi contra Thomistas, lumen gloriæ esse solum partialem rationem agendi, atque adeo etiam intellectum partialiter immediate concurrere ad Dei visionem producendam. Ita communissime in Schola Societatis, teste Mauro, Ripalda, & Oviedo, qui 1. 2. tract. 1. contr. 8. conatur ostendere, Thomistas non nisi vocibus discrepare, nec aliud velle, dum dicunt, lumen esse totam rationem agendi, quam quod sit tota ratio elevandi intellectum.

Prob. 1. a pari. Gratia actualis, & habitus infusi solum partialiter influunt in actus salutares; ergo etiam lumen gloriæ in

visionem, atque adeo non est tota ratio agendi. Consequentia sequitur; antec. constat ex dicendis in de gratia, ubi ostendimus voluntatem etiam coagere; tum quia, ut notat Augustinus, Deus relate ad actus salutares dicitur esse *Adjuvor noster*, non posset autem voluntas dici, quod adjuvetur, si nihil ipsa ageret; tum etiam, quia Apostolus dicit, *Plus omnibus laboravi*; & experientia teste laboramus in exercendis actibus salutaribus, atque adeo voluntas partialiter agit; tum etiam quia voluntas vitaliter operatur in exercitio actuum salutarium; ergo debet immediate influere, ut mox explicabimus; tum demum, quia actus salutaris, ut sit liber, debet esse a potentia eligente; voluntas autem est potentia eligens, non gratia, quæ voluntatem adjuvat; ergo actus salutaris debet esse cum concursu voluntatis; aliter voluntas mere passive se haberet, & tamquam aliquid inanime, quod est contra Tridentin. sess. 6. can. 4.

Prob. 2. a priori, quia esto verum esset, quod quando intellectus elevatur ad producendum effectum indebitum per qualitatem, tamquam per Dei instrumentum supernaturale, non deberet ipse coagere; (quod tamen est falsum; cum elevari non sit mere informari a virtute adæquate producente, sed ab illa adjuvari, aliter aqua diceretur formaliter calefacere, per hoc, quod informetur a calore adæquate calefaciente) nihilominus ut intellectus elevetur ad producendum actum vitalem, debet essentialiter ipse concurrere; cum actus vitalis sit essentialiter motus ab intrinseco, atque adeo ab hoc, & in hoc; non enim potest vivere in actu secundo nisi potentia, quæ seipsam movet, & immediate in eum actum influat; aliter motus cadaveris, qui habetur ab extrinseco per impetum impressum, posset dici vitalis. Hinc licet verum esset, quod substantia producat substantiam solum per virtutem accidentis tamquam per instrumentum connaturale; (quod in communiori sententia est falsum) at non potest intellectus producere actum vitalem, nisi influat immediate in illum; quod hic supponi potest ex lib. de Anim. & constat ex dicendis in de Beatitudine, ubi ostendimus, non posse intellectum videre Deum visione increata, aut visione creata a solo Deo producta; ergo lumen gloriæ non potest esse tota ratio agendi.

IV. Objic. 1. Nisi lumen esset totalis ratio agendi, sequeretur, quod etiam intellectus

edict

effectus causa partialis, & principalis visionis; non aliter ac est causa partialis principalis cognitionis naturalis; ac proinde haberet potentiam naturalem videndi Deum: sequela est absurda: ergo & id, unde sequitur. Prob. sequela, quia intellectus concurreret ad visionem per suam entitatem, ac potentiam naturalem: ergo haberet potentiam naturalem videndi Deum.

Resp. nego sequelam: licet Intellectus partialiter per suam Entitatem naturalem concurrat ad Dei visionem, non per hoc dicitur causa naturalis partialis relate ad talem effectum, quia non concurrat ad illum ut exitum; unde non dicitur agere per virtutem partialem naturalem, sed per virtutem inchoatam, congenitam, & obedientialem; sicut aqua per virtutem obedientialem producit gratiam in baptismo: cum hoc tamen discrimine, quod Aqua concurrat ad productionem gratiæ per virtutem obedientialem transcendentialem, & quatenus est ens subiectum Deo; contra vero Intellectus concurrat ad productionem visionis per virtutem obedientialem predicamentalem, & propriam, seu quatenus est intellectus Deo subiectus, qui potest elevari ad intelligendum divinitus, quod non potest naturaliter, ita ut assimilaret sibi visionem productam in prædicato cognoscitivi. Quare in tantum hæc potentia obedientialis non dicitur transcendentialis, seu transcendens per quodcumque ens, quia Deo subiectum, sed predicamentalis, quia spectat ad hoc particulare genus entis, scilicet ad intellectum relate ad intellectionem supernaturalem, in quam refundit prædicatum suum proprium cognoscitivi, quod non refunditur per potentiam transcendentialem obedientialem, ut quando aqua in baptismo producit gratiam. Ad prob. sequelæ concessio antecedente, nego consequens; nisi enim fiat lis de voce, habere potentiam naturalem relate ad aliquem effectum est habere potentiam ad effectum exitum: cum autem intellectus non exigit visionem Dei, non dicitur habere potentiam naturalem ad illam, licet physice causet illam per suam entitatem naturalem elevatam per lumen.

Utrum autem intellectus dici debeat causa principalis visionis, an vero causa instrumentalis? est pariter lis de voce: potest enim dici causa instrumentalis, quatenus concurrat ad effectum, tamquam principium improporionatum indigens elevatione: potest etiam, & solet communius dici

causa principalis, quia assimilatur sibi effectum in prædicato cognoscitivi; spectat enim ad causam principalem assimilare sibi effectum.

V. Objic. 2. ex Joanne a S. Th. Ut intellectus possit per suam entitatem, ac potentiam naturalem concurrere ad productionem visionis, debet aliquid ejus prædicatum præcontinere, puta vitalitatem; sed non præcontinet; cum vitalitas, visionis sit identice supernaturalis, atque adeo non præcontenta in entitate naturali; ergo, nequit intellectus concurrere ad productionem visionis.

Resp. per instantiam; ut lumen possit causare visionem, debet præcontinere aliquid ejus prædicatum, scilicet supernaturalitatem, sed non præcontinet, quia supernaturalitas est identice vitalis, atque adeo non præcontenta in lumine non vitali; ergo non potest lumen concurrere ad productionem visionis. Secundo directe distinctius. maj. deberet intellectus præcontinere vitalitatem visionis secundum rationem abstractam a supernaturalitate, concedo; secundum rationem contractam ad supernaturalitatem, nego majorem, & distincta minore nego consequentiam. Sic etiam per Adversarios lumen debet præcontinere supernaturalitatem visionis secundum rationem abstractam a vitalitate, cum lumen non sit vitale, non vero secundum rationem contractam ad vitalitatem. Et eodem modo intellectus præcontinet cognitionem naturalem formaliter solum secundum rationem vitalitatis, non vero secundum rationem expressivi, seu imaginis objecti, quæ ratio formaliter præcontinetur in alia concausa partiali, scilicet in specie impressa. Verum quidem est, quod Thomistæ, ut instantiam effugiant, dicunt, lumen esse vitale, & idcirco posse producere visionem vitalem; Sed communius, & verius id negant; licet enim lumen compleat potentiam vitalem, non per hoc est vitale, cum non profuatur ab intrinseco, quod spectat ad rationem vitalitatis.

VI. Objic. ult. ex eodem: Lumen gloriæ est tota ratio proportionis potentie intellectivæ cum visione; ergo in priori ad lumen intellectus est omnino improporionatus ad visionem; ergo nec habet virtutem illam, ne partialem quidem, ad visionem producendam; cum virtus omnis includat aliquam proportionem.

Confirm. Intellectus agit in quantum elevatus per lumen; ergo tota ratio agen-

di est lumen elevans ; sicuti quia Aqua v. gr. calefacit in quantum calida , ideo tota ratio calefaciendi est calor .

Resp. nego antec. Lumen complet proportionem , atque adeo supponit in intellectu proportionem inchoatam cum visione ; quod ex eo patet , quia si oculus habens pro suo speciativo formali colorum , informaretur lumine gloriæ , non posset Deum videre , sicut potest intellectus ; quia scilicet in oculo deest virtus illa inchoata , quæ reperitur in intellectu ; hic enim cum habeat Deum intra suum speciativum formale , potest naturaliter Deum cognoscere abstractive , & ideo divinitus potest videre illum intuitive .

Ad confirm. dico , Reduplicativam sepe reduplicare meram conditionem , ut dum dicitur : Ignis agit in quantum approximatus , Bonum in quantum cognitum amatur ; Sepe vero reduplicare rationem formalem partialem ; ut dum dicitur : Intellectus in quantum informatus specie impressa objecti cognoscit ; Causa secunda agit in quantum est sub concursu Dei : Sepe etiam reduplicare totam virtutem agendi , ut cum dicitur ; Aqua in quantum calida calefacit ; paries in quantum albus disgregat visum : Sepe demum reduplicare virtutem agendi elevatam , ac præsupponentem solum virtutem inchoatam , ut cum dicitur : Aqua in quantum elevata causat obedientialiter Gratiâ . Et in hoc solum sensu dicitur in casu nostro , Intellectus in quantum elevatus producit obedientialiter Dei visionem .

ARTICULUS I.

An possit Intellectus sine lumine intrinseco Deum videre ?

VII. **D**icendum cum communi DD. Societatis , Scoto , Aureo-
lo contra Thomistas , & Lumbier nu. 464. posse Deum sine ulla qualitate intrinseca elevare intellectum ad visionem beatificam per suam Omnipotentiam extrinsece specialiter assistentem . Ita etiam D. Th. qui licet hic quæst. 12. art. 4. dicat , non posse Intellectum videre Deum sine lumine gloriæ , intelligendum tamen est de lege ordinaria ; nam quæst. 10. de verit. dicit , id fieri posse per omnipotentiam Divinam : Hæc sunt verba Angelici art. 11. *Sicut Di-*

vina Omnipotentia Subjecta sunt corpora , ita & mentes ; unde sicut potest aliqua corpora producere ad effectus , quorum dispositio in ipsis non invenitur ; sicut fecit Petrum super aquas ambulare sine hoc , quod ei dotem Agilitatis tribueret ; ita potest mentem ad hoc perducere , ut Divine essentie uniantur in statu via modo illo , quo uniantur in Patria , sine hoc , quod a lumine gloriæ perfundatur .

Prob. concl. Univerſum Deus potest dupliciter promovere causam de se insufficientem ad causandum aliquem effectum , scilicet vel addendo vires intrinsecas , vel extrinsecas assistendo per suam omnipotentiam specialiter concurrentem , & suppletentem defectum virtutis intrinsecarum ; ergo potest Deus dupliciter intellectum elevare ad Dei visionem , scilicet tum per lumen intrinsecum , tum etiam per omnipotentiam specialiter assistentem . Antecedens patet ; nam potest v. g. Deus oculum , vel intellectum complere ad visionem parietis tam per speciem impressam intrinsecam , quam immediate , suppondo extrinsece vires talis speciei ; sicut etiam ex D. Thom. loc. citat. poruit sine dote Agilitatis intrinseca complere potentiam progressivam D. Petri ad ambulandum super aquas . Hinc idem Angelicus 1. parte quæst. 105. art. 2. dixit : *Erroneum est dicere , non posse Deum facere per seipsum omnes effectus causæ create* . Conseq. prob. quia licet Dei visio dicat essentialem connexionem cum intellectu ratione vitalitatis , unde non possit divinitus suppleri concursus immediatus intellectus ; (aliter actus non esset vitalis , si non esset ab hoc , & in hoc , seu si non procederetur ab intrinseco) nullam tamen connexionem dicit cum lumine gloriæ essentialem ; ergo potest divinitus visio citra influxum luminis prodire .

Confirm. Per hoc quod Deus suo concursu generali proprio causæ primæ concurrat ad visionem simul cum intellectu , & lumine , non per hoc visio definit esse vitalis , & supernaturalis ; ergo neque per hoc quod Deus concurrat concursu speciali supponendo vires luminis . Similiter cognitio naturalis non definit esse vitalis per hoc , quod Deus ad illam concurrat concursu generali proprio causæ primæ ; ergo nec visio Dei definit esse vitalis , per hoc , quod omnipotentia specialiter ad illam concurrat supponendo defectum luminis . Et ratio a priori est , quia ut actus sit vitalis , sufficit , quod procedat ab intrinseco , seu quod potentia vitalis in illum influat , li-

et non influat adaequate.

VIII. Obijc. 1. ex Joann. a. S. Th. intellectus intrinsece impotens, & improporcionatus ad visionem ponendam debet fieri intrinsece potens, ut possit illam ponere; aliter posset ponere sine potentia ad ponendum; sed non potest fieri intrinsece potens sine lumine intrinseco; aliter etiam oculus fieri posset potens videre Deum per aliquod extrinsecum; ergo intellectus sine lumine intrinseco elevari non potest ad Deum videndum.

Confirm. Intellectum visioni proportionari, est denominatio intrinseca; alioquin etiam oculus posset visioni Dei per aliquod extrinsecum proportionari: sed denominatio, quae habetur a forma intrinseca, suppleri nequit ab Omnipotentia extrinseca assistente; ergo sine lumine intrinseco nequit intellectus reddi proportionatus ad Deum videndum.

Confirm. 2. Nequit Deus supplere defectum cause formalis in ordine ad effectum formalem; sed, si suppleret defectum luminis intrinseci, suppleret defectum cause formalis in ordine ad effectum formalem; ergo nequit supplere defectum luminis intrinseci. Prob. min. Effectus formalis luminis intrinseci est elevare intellectum reddendo illum intrinsece adaequate potentem; & proportionatum visioni producendae; sed, si suppleret Deus defectum luminis intrinseci, suppleret hunc effectum formalem; quatenus redderet intellectum intrinsece adaequate potentem; & proportionatum visioni producendae; ergo suppleret defectum luminis intrinseci in ordine ad effectum formalem.

Resp. requiri in intellectu virtutem intrinsecam inchoatam ad Deum videndum; aliter etiam oculus, & lapis possent elevari ad videndum Deum; virtus tamen intrinseca inchoata intellectus compleri potest tum per lumen intrinsecum, tum per Omnipotentiam extrinsecam assistentem: sicut in oculo ad videndum parietem requiritur virtus partialis intrinseca, quae tamen compleri potest vel per speciem impressam intrinsecam, vel per hoc, quod Deus supplet defectum huius speciei; Sic etiam ut possit homo Montem, vel Navim movere, requiritur vis motiva partialis intrinseca, quae tamen compleri potest vel per additionem virium intrinsecarum, vel per vires extrinsecas Angeli, aut Dei specialiter concurrentis. In forma distinguo majorem: Intellectus intrinsece impotens,

hoc est non habens potentiam intrinsecam adaequatam, imo neque partialem naturalem ad Deum videndum, sed solum inchoatam, & obedientialem, debet fieri potens intrinsece, hoc est potentiam intrinsecam inchoatam debet habere completam, sive per lumen intrinsecum, sive per vires extrinsecas Omnipotentiae specialiter assistentis, concedo; debet fieri potens intrinsece, hoc est debet habere potentiam completam unice per aliquod intrinsecum, nego majorem, & distinguo minorem; nequit nisi per lumen intrinsecum habere potentiam completam intrinsece, concedo; completam vel intrinsece, vel extrinsece, nego minorem, & consequentiam. Oculus quia caret virtute intrinseca inchoata in ordine ad Deum videndum, nequit fieri potens extrinsece adaequate per Omnipotentiam assistentem: contra vero intellectus, qui est potens intrinsece inchoate. Quare verum est, tum quod intellectus debeat esse potens intrinsece, tum quod debeat esse potens adaequate; non tamen debet esse potens intrinsece adaequate; & committitur enim fallacia sensus compositi, ut si dicatur: Haec Capra est Mater, & est Petri; ergo est Mater Petri; aliter etiam Omnipotentia concurrens ut causa prima concursu generali cum lumine Glorae, deberet esse intrinseca intellectui, quia sine tali concursu intellectus cum lumine non est potens intrinsece adaequate visionem ponere.

Ad 1. confirm. dist. maj. intellectum visioni proportionari per virtutem inchoatam est denominatio intrinseca, concedo; per virtutem completam, si haec habeatur per omnipotentiam assistentem, nego majorem, & consequentiam; Potest enim huiusmodi denominatio virtutis complete esse partim intrinseca, & partim extrinseca, ut in exemplis adductis.

Ad 2. Recurrunt instantiae adductae: & directe dico, posse Deum supplere defectum cause formalis in genere cause efficientis, efficiendo immediate, quod efficit aliqua causa formalis: v. gr. Albedo, quae informat subiectum, disgregat visum; licet Deus non possit supplere defectum albedinis in genere cause formalis, & informare subiectum, potest illam supplere in genere cause efficientis, & sic immediate visum disgregare, quin detur albedo informans subiectum; Et eodem modo potest supplere defectum luminis gloriæ in genere cause efficientis, efficiendo immediate.

diate simul cum intellectu visionem, quin detur lumen informans intellectum: Sic etiam potest Deus defectum causæ materialis supplere in genere causæ efficientis, ut de facto conservat accidentia Eucharistica, supplendo defectum causæ sustentantis, fortius influendo in illa efficienter. Equivocatio est in hoc, quod lumen in genere causæ formalis elevat intellectum intrinsece, sed producit visionem in genere causæ efficientis; Omnipotentia non potest supplere effectum formalem luminis, cum non possit intrinsece intellectum elevare; sed potest supplere vices luminis, efficiendo immediate cum intellectu id, quod efficeret lumen. In forma nego min. Ad prob. nego pariter minorem.

IX. Obijc. 2. Intellectus debet esse completus non solum physice, sed etiam vitaliter, ut possit visionem producere; sed nequit esse vitaliter completus sine lumine intrinseco; ergo sine hoc lumine nequit proxime Deum videre. Prob. min. quia complementum vitale debet esse intrinsecum; aliter operatio vitalis non esset motus ab intrinseco.

Confirm. 1. Potentia physice incompleta nequit compleri sine complemento physico: ergo potentia incompleta vitalis nequit compleri sine complemento vitali, seu sine principio vitaliter concurrente ad actum vitalem; sed Omnipotentia extrinseca non est principium, quod possit vitaliter concurrere ad visionem; ergo nequit intellectus compleri extrinsece ab Omnipotentia in ordine ad Deum videndum.

Confirm. 2. Si daretur visio sine lumine intrinseco, daretur actus secundus sine actu primo; lumen enim complet actum primum relate ad actum secundum visionis, ergo ut supra.

Confirm. 3. quia Clemens V. in Concilio Viennensi, ut refertur in Clementina *Ad nostrum* de Hæreticis, damnat Beguardos, & Beguinas, alioque dicentes, quod anima non indigeat lumine gloriæ ipsam elevante ad Deum videndum, & eo beate fruendum; ergo insistendo verbis Concilii non potest dari Visio Dei absque lumine gloriæ per solam Omnipotentiam speciali modo influentem in illam.

Resp. recurrere instantias de oculo relate ad visionem Parietis; de virtute motiva Montis &c. quæ possunt per Omnipotentiam compleri in ordine ad actum vitalem. Deinde argumentum probat, quod Omnipotentia concurrens ut causa prima

concurfu generali ad visionem simul cum intellectu, & lumine impeditur, quominus visio sit actus vitalis, quia Omnipotentia non est comprincipium vitale, & intrinsecum, seu vitaliter concurrens ad visionem. In forma di. maj. Intellectus debet esse completus vitaliter, hoc est debet habere virtutem vitalem completam, concedo; hoc est debet habere complementum vitale, & intrinsecum, nego majorem, & distinguo pariter minorem; Non potest intellectus esse completus vitaliter sine lumine intrinseco, hoc est non habet virtutem vitalem completam sine lumine intrinseco, nego, hoc est non habet complementum vitale sine lumine intrinseco, omitto minor. (revera enim lumen, licet sit intrinsecum intellectui, non per hoc est vitale, cum non sit ab intrinseco, ut diximus) & nego consequentiam. Ad probationem minoris, di. antec. quod complet potentiam vitalem debet esse intrinsecum, nego; quod complet potentiam vitalem, si sit vitale, debet esse intrinsecum, conc. antec. & nego consequ. Sic Omnipotentia suo concursu generali proprio causæ primæ complet virtutem vitalem, nec per hoc est intrinseca: & si Deus suppleret vices speciei impressæ relate ad cognitionem parietis, compleret potentiam vitalem; & tamen huiusmodi complementum non esset vitale, seu intrinsecum.

Ad 1. confirm. nego primam consequentiam. Disparitas est, quia effectus physicus nequit prodire, nisi physice dentur, quæ constant causam physicam; at operatio vitalis prodire potest, licet non omnia, quæ complent causam vitalem, sint intrinseca, & vitalia, ut ostendimus.

Ad 2. di. antec. Daretur actus secundus sine actu primo præciso, nego, sine aliquo actu primo sufficienti, concedo antec. & nego consequ. Effectus, qui procedit a causa præcisa nequit haberi sine illa; qui vero procedit a causa A sufficienti, potest prodire sine tali causa, per hoc, quod procedat a causa B, quæ pariter sit sufficiens; lumen intrinsecum est causa visionis sufficiens, non vero præcisa, & ideo etiam sine lumine intrinseco haberi potest actus primus completus in ordine ad productionem visionis.

Ad 3. resp. expresse Coacil. Viennense damnare tam malignos Beguardos, quam infideles illas mulieres Beguinas, qui in regno Alemanie asserbant, quod *qualibet intellectualis natura in se ipsa naturaliter fo-*
ben-

beata; unde inferebant, quod non indigeat lumine gloriæ, qua elevetur ad Deum videndum. Quare mens Concilii est, quod anima non possit Deum videre viribus naturæ, sed quod indigeat compriincipio elevante, quod connaturaliter est lumen intrinsecum: Quinimo Concilium, ut præscinderet ab hac questione scholastica, non dixit, quod anima indigeat lumine intrinsecum, sed solum dixit, quod indigeat lumine elevante ad Deum videndum, satis enim est, quod anima a compriincipio supernaturali elevetur, sive hoc sit lumen intrinsecum, sive sit aliud compriincipium extrinsecum, quod luminis intrinsecum aequipollcat in ordine ad elevandum intellectum; unde compriincipium hoc extrinsecum bene potest dici, quod sit æquivalenter, si minus formaliter, lumen elevans.

ARTICULUS III.

Utrum Intellectus inaequalis cum aequali lumine aequaliter Deum videant?

X. **D**ari de facto in Beatis visionum inaequalitatem, non dubitatur apud Catholicos, cum definitum sit in Florentino, pro meritum diversitate inaequaliter Deum videri, juxta illud Apostoli: *Qui parce seminat, parce & metet*; & Joannis 14. *In domo Patris mei mansiones multae sunt*: Sicut enim damnati inaequaliter puniuntur, pro inaequalitate demeritorum; ita Beati premiantur inaequaliter pro inaequalitate meritum. Negant hoc Joviniani, quia in parabola illa Evangelii dicitur denarius diurnus æque solutus primis, & novissimis laborantibus in Vineâ. Negant etiam Lutherani dicentes, quod Christus æque pro omnibus meruerit. Sed parabola illa ex Augustino intelligenda est de auxiliis ad beatitudinem comparandam necessariis, quæ aliquando ex benigna Dei liberalitate æque dantur tam in Pueritia, quam in ætate adulta, necnon etiam in provecâ. Lutherani vero docentes, Justitiam in nobis unice derivari ab imputatione extrinsecæ meritum Christi, & ideo esse in omnibus æqualem, damnantur a Tridentino sess. 6. can. 11.

Difficulus nunc est, Utrum visionum, & beatitudinis inaequalitas unice oriatur ex inaequalitate luminis elevantis, an etiam provenire possit ab inaequalitate intellectum, ut proinde clarius Deum videat Angelus v. g. quam Homo, si uterque æ-

quali lumine elevetur? Thomistæ putantes, lumen esse totam rationem agendi docent, inaequalitatem visionum non posse ab intellectu inaequalitate provenire; quod etiam docent Gabriel, Paludanus, Suar., Vasq., Valent., Becan., & alii non pauci, etiam putent, intellectum cum lumine influere in visionem. Opposita tamen sententia est Scoti, & Scotistarum communiter, Molin., Ripald., Lessi., Ovid., & aliorum quamplurium, quibus favet D. Tho. qui, ut advertit Cajetanus apud Arriagam disp. 7. n. 32. docet, visionis perfectionem magis attendi secundum perfectionem luminis; ac proinde vult, quod etiam attendi debeat secundum perfectionem intellectus.

Alii tamen docent, de possibili provenire posse hanc inaequalitatem ab intellectu inaequalitate, de facto tamen non ita accidere.

XI. Dico equidem cum Angelico, & Scotistis, visionum inaequalitatem oriri etiam ab inaequalitate intellectu.

Prob. Universim quoties causa est perfectior, & in effectum influit formaliter ut perfectior, hoc est assimilando effectum sibi secundum illud prædicatum, in quo est perfectior, toties causat effectum perfectiorem; sed intellectus Angelicus v. gr. cum lumine ut unum, est causa visionis perfectior, quam sit intellectus humanus cum lumine pariter ut unum; & in visionem influit formaliter ut perfectior, hoc est assimilando illam sibi in vitalitate, in qua intellectus Angelicus præstat humano; ergo intellectus Angelicus cum aequali lumine producit visionem perfectiorem, quam humanus; atque adeo visionum inaequalitas oriri etiam potest ex inaequalitate intellectu.

Neque dicas 1. Verum esse, quod si causa perfectior agat formaliter ut perfectior, causat effectum perfectiorem, sed non esse verum, quod agat ut perfectior per hoc, quod assimilet sibi effectum in eo prædicto, in quo alteri præstat.

Nam contra est, quia inductione constat, id esse verum; Oculus enim v. g. perfectior cum aequali lumine, ac specie objecti agit formaliter ut perfectior, & clarius videt, cum assimilet visionem sibi in predicato vitalitatis materialis, in qua præstat oculo minus perfecto; & eadem ratione duo oculi inaequales, si æqualiter eleventur ad videndam lucem Corporum beatorum, inaequaliter illam vident: Sic etiam duo intel-

lectus æquales cum lumine inæquali inæqualem causant Dei visionem; ergo pariter viceversa duo intellectus inæquales cum lumine æquali.

In tantum oleum v. g. in Sacramento Unionis, & Aqua in Sacramento Baptismi, si æqualiter eleventur, causant gratiam æqualem, quia Oleum non influunt in Gratiam formaliter ut perfectius, assimilando sibi effectum in eo prædicato, in quo præstat aqua; similiter si duo oculi inæquales eleventur æqualiter ad producendam Dei visionem, non causabunt effectum inæqualem, quia non influunt ut inæquales, cum non assimilent sibi effectum, nempe Dei visionem, in vitalitate materiali propria oculi: contra vero quando oculi inæquales æqualiter eleventur ad videndam lucem materialem corporum Beatorum, causant visionem inæqualem; ergo eodem modo intellectus inæquales æqualiter elevati inæqualiter Deum vident, eo quod assimilent sibi effectum in eo prædicato, in quo unus intellectus alteri præstat, videlicet in prædicato intellectivi; & ideo intellectus perfectior producit visionem Dei supernaturalem formaliter ut perfectior est.

Neque dicas 2. Intellectum non assimilare sibi visionem Dei; cum intellectus non possit naturaliter producere nisi cognitionem Dei ænigmaticam. Nam contra est, quia negari non potest, quod visio Dei assimilatur intellectui in vitalitate intellectiva propria talis potentie; licet enim naturaliter non possit intellectus Deum cognoscere nisi ænigmaticè, nihilominus cum Deus sit intra specificativum potentie intellectivæ, ideo visio Dei est effectus ita proprius talis potentie, ut non possit alteri competere; ac proinde intellectus perfectior causando visionem Dei agit formaliter ut perfectior, hoc est assimilando sibi visionem in vitalitate unice spectante ad potentiam intellectivam, in qua ratione intellectus perfectior excedit minus perfectum.

XII. Confirm. 1. quia voluntas sub illustratione Spiritus Sancti intensa v. g. ut duo non solum potest libere consentire, vel non consentire, sed etiam potest libere ponere consensum intensum ut unum, vel ut duo, vel ut tria; ergo sicut voluntas ratione conatus naturalis, quem exiit, potest ponere actum supernaturalem intentum ut tria, licet principium supernaturale sit intentum ut duo; ita poterit intellectus perfectior sub lumine ut duo ponere visionem

perfectam ut tria, ita ut duo gradus respondant luminis, & tertius majori perfectioni naturali intellectus.

Neque dicant Adversarii, voluntatem sub principio supernaturali intenso ut duo, non posse ponere actum supernaturalem intentum ut tria. Nam oppositum docent communius apud Martinon. disp. 38. num. 218. & Ripaldam. disp. 48. n. 4. Et ratio est perspicua: nam si poterit lumen supernaturale simul cum intellectu producere visionem vitalem, quam nequit se solo sine virtute naturali intellectus; quare non poterit illustratio supernaturalis intensa ut duo (v. g. de Dei bonitate) adjuvari ab illustratione naturali intensa ut tria de eadem Divina Bonitate, in ordine ad producendum amorem Dei supernaturalem intensum ut tria? Unde poterit etiam Voluntas suo conatu naturali ponere actum supernaturalem magis intensum, quam sit principium supernaturale: aliter, ut notat Maitrus, frustra conaretur voluntas ad diligendum Deum ex toto corde, hoc est intensius & intensius.

Confirm. 2. quando intellectus elevatur ad Deum videndum, non solum elevatur secundum rationem Entis, seu per potentiam obediencialem transcendentealem, sed elevatur formaliter qua intellectus, seu per potentiam obediencialem predicamentalem, cum transfundat in effectum prædicatum vitalitatis intellectivæ; ergo sicut potest elevari formaliter, qua intellectus est, ita potest elevari, qua intellectus perfectior, & sic transfundere in effectum vitalitatem intellectivam perfectiorem.

Confirm. demum, quia si intellectus Angelicus, & humanus divinitus cognoscant objecta, quorum cognitio est indebita, scilicet arcana cordium, futura contingencia, aut objecta supernaturalia; vel si cognoscant simul objecta naturalia, quæ non possunt naturaliter simul cognoscere, ita ut huiusmodi cognitio sit quoad modum, licet non quoad substantiam, supernaturalis; certe cognitio Angelica, cæteris paribus, erit perfectior, quia relate ad tales cognitiones potentia intellectiva perfectior influit formaliter ut causa perfectior assimilando sibi effectum; ergo etiam relate ad visionem Dei, quæ est quoad substantiam supernaturalem.

Ex quibus fit, quod non solum de possibili, sed etiam de facto intellectus perfectior causet cæteris paribus visionem perfectiorem; cum connaturale sit, quod causa

per-

perfectior perfectus influat in effectum, quem sibi assimilât, ut ostendimus inductione.

XIII. Objic. 1. ex majori perfectione potentia non infertur major perfectio actus; nam homo est perfectior Aquila, & tamen visio hominis non præstat visioni Aquilæ; ergo licet complexum ex intellectu Angelico, & lumine ut unum sit perfectior complexio ex intellectu humano, & lumine ut unum, non proinde ex illo prodire debet visio perfectior.

Confirm. 1. Actus supernaturalis nequit prodire, nisi juxta mensuram concursus exhibitæ a potentia illum exigente; sed solum lumen gloriæ exigit visionem, non vero intellectus; cum non possit potentia naturalis exigere effectum supernaturalem; ergo solum ad mensuram luminis crescit perfectio visionis. Prob. major, quia universum inductione constat, effectum mensurari solum a perfectione causæ illum exigentis; sic si Homo, & Aquila causent visionem ocularem, hæc solum commensuratur perfectioni potentia visiva illam exigentis, non vero perfectioni Animæ; & si Aqua, & oleum producant Gratiâ in Sacramentis, hæc solum commensuratur perfectioni elevationis: & si causa prima, scilicet Deus, aut causa universalis, scilicet sol, concurrant ad effectus sublunares, isti solum commensurantur perfectioni causæ secundæ particularis illos exigentis.

Confirm. 2. quia aliter aliquis gradus visionis supernaturalis tribueretur perfectioni majori potentia naturalis, unde posset aliquis actus supernaturalis meritorius tribui Naturæ, non Gratiæ, quod est error Semipelagianorum.

Resp. perfectionem majorem causâ non inferre majorem perfectionem effectus, nisi illa influat formaliter ut causâ perfectior, assimilando sibi effectum, ut in casu nostro intellectus perfectior influit formaliter ut perfectior, assimilando sibi effectum, nempe visionem in ea formalitate; in qua unus intellectus alteri præstat, videlicet intellectualitate. Quamvis enim intellectus solum habeat potentiam naturalem, & partialem relate ad cognitiones Dei ænigmaticas; habet tamen potentiam inchoatam, & obedientialem relate ad Dei visionem, ita ut ad illam concurrat non per potentiam obedientialem transcendentalem, hoc est quatenus est Ens Deo subiectum, sed per potentiam obedientialem prædicamentalem, seu quatenus est tale ens, nempe quatenus est intellectus, causando scilicet Dei visio-

nem, qua reddatur videns; ubi lapis v. gr. si elevetur per potentiam obedientialem transcendentalem ad producendam Dei visionem, per illam non reddetur videns Deum, sed solum reddetur habens Dei visionem; & ideo intellectus causando Dei visionem assimilât illam sibi in prædicato intellectuali, seu in vitalitate propria potentia intellectuali; unde intellectus perfectior agit formaliter ut perfectior, transfundendo suam majorem perfectionem in ipsam visionem.

Ad 1. confirm. Quamvis intellectus nuda sumpcus non exigit Dei visionem, exigit tamen illam intellectus sub lumine, ita ut hujusmodi effectus quæ vitalis respondeat intellectui, & quæ supernaturalis luminis; unde sicut ex majori perfectione luminis crescit perfectio visionis, ita etiam ex majori perfectione intellectus. Homo, & Aquila in visionem ocularem non influunt formaliter, nisi secundum quod habent potentiam visivam; non vero secundum quod Anima potest producere intellectiones, & volitiones, in quo Homo præstat Aquilæ, unde potius hæc paritas retorquetur. Similiter aqua, & oleum non influunt in Gratiâ formaliter, sed solum quatenus sunt Ens Deo subiectum, & ideo non mensurant perfectionem Gratiæ. Pariter Deus, & sol ita influunt cum causâ secundâ particulari in effectum, ut non assimilent illum sibi.

Ad 2. Quamvis perfectioni majori intellectus respondeat aliquis gradus visionis supernaturalis; nihilominus illi respondet secundum quod est vitalis, non secundum quod est supernaturalis; unde non sequitur, quod possit ullus actus supernaturalis meritorius vitæ æternæ tribui Naturæ, & non Gratiæ. Et similiter per Adversarios perfectioni majori luminis respondet aliquis gradus visionis vitalis, solum secundum quod est supernaturalis, non secundum quod est vitalis, quod est dicere, visionem esse identice vitalem, & supernaturalem, ita ut non esset vitalis, si non procederet a potentia vitali, nec esset supernaturalis, si non procederet a principio supernaturali. Explicat Cardin. de Lugo concursum duorum intellectuum inæqualium ad visionem Dei exemplo duorum calamarum, quorum alter sit altior polior; si enim uterque elevetur a Deo ad producendos characteres aureos, certe erunt elegantiores characteres efformati a calamo poliori, quin hinc fieret, quod characteres

ali supernaturales secundum ullum gradum exigantur a calamis : & eodem modo, si duo oculi inæquales eleventur ad videndum lumen supernum Corporum Beatorum, oculus perfectior videbit perfectius, nec tamen ullus gradus hujus visionis indebitur respondebit virtuti naturali oculi. Similiter in casu nostro.

Ubi adverteo, hac in re passim urgeri posse Adversarios respondendo per instantiam, applicando supernaturalitati luminis, quod illi obijciunt circa vitalitatem intellectus. Si enim verum esset, quod aliquis gradus visionis supernaturalis unice tribueretur perfectioni majori intellectus perfectioris (quod nobis obijciunt) quare non est verum, quod aliquis gradus visionis vitalis unice in eorum sententia tribuatur perfectioni majori luminis intensioris, ita ut nullatenus ille gradus in sensu reali tribuatur potentie intellectivæ vitali?

XIV. Objic. 2. ex Suar. Intellectus producit visionem in quantum elevatus per lumen: ergo solum ratione luminis elevantis, atque adeo luminis, non intellectui respondet perfectio visionis; sicuti quia Aqua v. gr. calefacit in quantum calida, perfectioni caloris, non Aquæ respondet calor productus.

Confirm. 1. quia tota ratio agendi, vel saltem exigendi visionem residet in solo lumine; sicut quando Aqua calefacit, solus calor agit, & exigit calorem; ergo ut prius.

Confirm. 2. quando Aqua elevatur ad producendam Gratiā, elevatur in quantum Ens subditum Deo, & major perfectio Aquæ de materiali se habet in ordine ad productionem Gratiæ: unde Aqua perfectior non producit Gratiā perfectiorem; ergo, dum elevatur intellectus ad visionem, elevatur in quantum est intellectus subditus Deo, & major perfectio intellectus se habet de materiali: unde non producit visionem perfectiorem.

Resp. dist. antec. Intellectus agit ut elevatus per lumen, si fiat sensus, quod tota ratio elevandi sit lumen, concedo; si fiat sensus, quod tota ratio agendi sit lumen, sicut tota ratio calefaciendi in Aqua est calor, nego antec. & conseq.

Ad primam Confirm. etiamsi detur Thomistis, quod intellectus non sit partialis ratio agendi, nec influat in visionem, adhuc non negatur ab ipsis Thomistis, quod intellectus sit vera causa visionis, & non se habeat ut aqua calida, relate ad productionem caloris, cujus non est vera causa,

cum aqua resistat calori, intellectus vero non resistat luminis, & visioni: sicut enim per Thomistam substantia ignis est vera causa principalis, dum producit ignis, ita ut agat ut quod, licet non influat immediate in ignem, quia calor est tota ratio agendi, seu agens ut quo tanquam causa instrumentalis; ita intellectus per Thomistas est vera causa visionis agens ut quod, licet lumen sit tota ratio agendi agens ut quo. Propterea, ut notat Didacus de Sylva in 1. p. q. 12. ar. 13. negari nequit a Thomistis, quod intellectus perfectior causet visionem perfectiorem, cum intellectus perfectior licet non influat, adhuc sit vera causa visionis, & illam causet formaliter ut causa, sibiimet assimilando.

Ad 2. nego conseq. Aqua non assimilat sibi Gratiā in alio predicato proprio aquæ qua talis, & ideo perfectio major aquæ se habet de materiali; contra vero intellectus assimilat sibi visionem in vitalitate intellectiva, cum agat per potentiam obedientialem predicamentalem, & ideo major perfectio intellectus se habet de materiali.

XV. Objic. 4. Si posset lumen ut duo cum intellectu perfectiori causare visionem ut tria, sequeretur primo, quod hic effectus supernaturalis excederet in supernaturalitate perfectionem suæ causæ. Secundo quod posset adeo crescere perfectio intellectus in infinitum, ut visio sub uno tantum gradu luminis esset perfectior visione ipsa intensissima Christi Domini. Tertio posset adeo crescere perfectio intellectus, ut compensaret defectum luminis; unde visio Dei posset esse sine lumine gloriæ.

Resp. ad 1. dist. sequi. Effectus hic excederet perfectionem suæ causæ inadequatè, concedo; causæ adequatè, nego sequelam, & recurrit instantia: Sicut enim quando lumen est ut tria, & perfectio intellectus est ut duo, licet visio habeat vitalitatem ut tria, adeo ut excedat vitalitatem intellectus secundum se spectati, non per hoc excedit perfectionem suæ causæ adequatè; ita viceversa quando perfectio intellectus est ut tria, & lumen ut duo, licet visio habeat supernaturalitatem ut tria, unde excedat supernaturalitatem solius luminis secundum se spectati, non per hoc excedit perfectionem suæ causæ adequatè. Et ratio est, quia licet omnes tres gradus visionis supernaturalis causentur a lumine ut duo, non causantur tamen totaliter totalitate causæ.

causæ, sed solum totaliter totalitate effectus; unde nil mirum, quod possint prodire a lumine ut duo: Ad eum modum quod tres gradus vitalitatis in visione prodire possunt a potentia vitali perfecta ut duo, si concurrat lumen intensum ut tria.

Ad 2. concedo sequelam: non est inconveniens, quod adeo crescat perfectio potentie, ut compenset defectum alterius principii; sicut potest adeo crescere perfectio potentie visive, ut sub luce ut unum videat, quæ videt alia potentia minus perfecta sub luce ut 100. aut ut 1000.

Ad 3. nego sequelam: Sicut nunquam potest adeo crescere perfectio potentie visive, ut compenset defectum omnino defectum lucis, nec potest adeo crescere lumen gloriæ, ut compenset omnem defectum intellectus, adeo ut visio procedat a solo lumine sine intellectu: ita nec potest adeo crescere perfectio intellectus, ut sine alio lumine visionem producat. Et ratio est, quia lumen gloriæ, & intellectus sunt causæ heterogenæ, ut sunt oculus, & species objecti; immo etiam sunt causæ diversi ordinis; unde nequit ex infinito unius incremento compensari totalis defectus alterius.

XVI. Obijc. ultimo: Beati ex Florentino vident Deum inæqualiter pro diversitate meritorum: ergo inæqualitas visionis solum habetur a luminis inæqualitate, quod datur in premium meritum, non vero ab inæqualitate intellectuum: Aliter posset intellectus perfectior cum minori merito æqualiter Deum videre, ac intellectus minus perfectus cum merito majori: unde saltem de facto inæqualitas visionis unice habetur ab inæqualitate luminis.

Huic argumento alii aliter respondent. Aliqui cum Tatarco docent, intellectum minus perfectum habere a Deo majus lumen, quam intellectum perfectiorem, si merita sint æqualia, ut possint æqualem visionem, ac premium habere. Alii cum Molin., & Baisio, utrumque intellectum habere æquale lumen, sed intellectum minus perfectum magis a Deo elevari extrinsece, & sic visionem utriusque esse æqualem. Alii cum Joanne a S. Thoma, Deum impedire, ne lumen collatum intellectui perfectiori causet visionem perfectiorem. Alii apud Leisium, quod premium immediatum sit æquale in habentibus æqualia merita; visio vero, quæ est premium mediatum, sit inæqualis; si intellectus sint inæquales.

Equidem tamen censeo cum Recentioribus communius, visionem, quæ respondet merito, & luminis, esse in utroque intellectu æqualem, & ideo premium esse æquale, cum relate ad lumen, tum relate ad visionem, quæ tali luminis respondet: Ad visio ut respondens perfectioni intellectus est inæqualis, ac proinde premium materialiter, & identice in utroque est inæquale, licet formaliter quæ premium est, sit æquale: Sic v. gr. si in premium detur vestis pretiosa duobus, quorum alter sit corpore eleganti, unde formosius incedat, hic non diceretur habere premium majus formaliter, sed solum materialiter, quatenus ex tali premio majus lucrum reportaret. Et similiter si in premium detur gladius æqualis duobus virum, aut artis militaris inæqualibus, qui viribus; aut arte militari præstaret, reportaret majus premium materialiter, non formaliter.

In forma dist. antec. Beati vident Deum inæqualiter pro diversitate meritum, quatenus solum pro diversitate meritum visiones, in quantum sunt formaliter premium, sunt inæquales, concedo, ita ut non possint esse premium materialiter inæquale pro diversitate intellectum, nego antec., & consequ. Ratio autem, cur sic explicanda sint verba Concilii, est, quia hoc fert connaturalitas luminis gloriæ, quod causet visionem perfectiorem cum intellectu perfectiori: verba autem Conciliorum, sicut etiam Scripturarum ex Augustino explicanda semper sunt in sensu excludente miraculum, quoad ejus fieri potest.

XVII. Colligo vim nostræ ratiocinationis. Est axioma Theologicum, quod ordo Gratiæ imitetur ordinem Naturæ, seu quod causæ supernaturales imitentur naturales, (hinc enim dicimus v. g. lumen gloriæ debere esse intrinsecum, quia causæ naturales non agunt, nisi sint intrinsece completæ; Dicimus etiam Sacramenta causare Gratiam inæqualem in subjectis inæqualiter dispositis, quia hoc accidit in causis naturalibus) æqui causæ naturales inæquales causant effectum inæqualem, quando illum assimilant sibi in eo prædicato, in quo sunt inæquales, non vero si non assimilant, ut constat inductione; nam duo oculi inæquales, & duæ species objecti inæquales causant visionem inæqualem, eo quod illam sibi assimilant; contra vero duæ Aquæ inæqualiter perfectæ, si sint æqualiter calidæ, causant calorem æqualem, quia illum sibi non assimilant; sicut etiam

etiam Homo, & Equus si habeant potentiam visivam æqualem, causant visionem æqualem; ergo idem dicendum in causis supernaturalibus. Hinc duo intellectus inæquales causant visiones inæquales, quia illas assimilant sibi in vitalitate intellectiva: contra vero duæ Aquæ inæquales non causant in Sacramento Gratiæ inæqualem, si æqualiter eleventur, quia non assimilant Gratiæ sibi in eo prædicato, in quo sunt inæquales.

QUÆSTIO V.

De Specie impressa creata Dei.

I. **N**omine hujus speciei impressæ venit qualitas intentionalis representativa Dei in actu primo, & per se ordinata ad concurrendum ad Dei visionem influxu objectivo vice ipsius Dei; eo modo, quo species impressa Parietis est per se ordinata ad causandam visionem Parietis vice objecti absentis; cum hoc tamen discrimine, quod species vicaria Parietis suppleat defectum, & absentiam Parietis; unde dicitur virtus illius, & proxima ejus intelligibilitas; contra vero species impressa creata Dei non suppleat ullum Dei defectum, nec dicatur Virtus vicaria objecti increati, aut proxima ejus intelligibilitas, sed sit instrumentum libere a Deo assumptum ad influendum in visionem vice ipsius objecti divini; atque adeo sit solum applicativa proximæ intelligibilitatis divinæ: eo pacto quo Creatura, quando coagit cum Omnipotentia potente de se proxime producere effectum adæquatè, non dicitur esse virtus productivitatæ Divinæ, sed Instrumentum libere assumptum a Deo Omnipotente ad coagendum cum ipso. In hoc autem differt concursus objectivus speciei impressæ a concursu effectivo intellectus in speciem expressam, seu in cognitionem, quod concursus objectivus habeatur ab eo, quod est virtualis imago objecti, seu quod habet virtutem causandi de se imaginem objecti tamquam virtus illius, secus vero concursus effectivus.

Prob. Hujusmodi speciem impressam creatam Dei esse possibilem, docent communis recentiores cum Suariorum, Valent., Arriag., Fafolo, contra Thomistas cum Granado, Amic., Recup.; imo Vasq. 1. parte dist. 38. docet etiam, dari de facto, & identificari

cum lumine gloriæ; quod tamen negat Suar. lib. 2. c. 12. Quod attinet ad D. Th. putant Thomistæ, eam negari ab Angelico, cum dicat quæst. 2. art. 2. per nullam similitudinem creatam videri posse Divinam essentiam. Sed D. Th. interpretandus est cum Suario, & Vasquio, quod loquatur de similitudine objectiva physica, in qua Deus videatur, non vero de intentionali, per quam videatur; cujusmodi est hæc species impressa; vel quod loquatur de similitudine intentionali, seu de specie inpressa, quæ exigatur ab objecto increato, sicut exigitur ab objecto creato.

II. Dico itaque, possibilem esse speciem impressam creatam Dei.

Prob. tum negative, tum etiam quia hujusmodi species non arguit imperfectiorem in Deo, sed potius abundantiam perfectionis, quatenus potest Deus visionem producere influxu objectivo, tum immediate per se ipsum, tum mediate per hanc speciem; Sicut arguit in Deo abundantiam perfectionis posse effectus creatos producere influxu effectivo non solum immediate per se ipsum, sed etiam mediate per causas secundas. Neque possit dici hæc species essentialiter superflua; Ratio est quia hæc non deserviret ad hoc, ut Deus possit proxime intelligi per virtutem propriam, & principalem, sed solum ut possit proxime intelligi per hoc instrumentum liberum, seu per applicationem suæ intelligibilitatis: Sicut vis causativa in Creatura non deservit, ut Omnipotentia possit proxime producere per virtutem propriam, & principalem, sed ut possit proxime producere per instrumentum creatum libere assumptum.

Confirm. & explicatur: Potest Deus ex perfectione suæ Omnipotentie communicare Creaturæ vim productivam, ita ut per causas secundas non reddatur proxime productivus, (cum hoc habeat de se) sed solum fiat proxime productivus mediate; ergo pariter objectum Divinum ex perfectione suæ intelligibilitatis potest Creaturæ communicare vim suam influxivam objectivam, ita ut per hanc Creaturam non fiat proxime intelligibilis, (cum hoc habeat de se) sed solum sit proxime intelligibilis mediate; atqui hujusmodi Creatura esset species impressa Dei, gerens vices essentie Divinæ suo influxu objectivo; ergo hujusmodi species non repugnat.

Confirm. 2. quia communis admittitur, quod possit Deus elevare v. gr. lapidem ad pro-

producendam visionem beatam in intellectu, supplendo vices tum luminis influentis effectivæ, ac se tenentis ex parte potentis, tum etiam essentis Divinæ influentis objective; ergo secundum se non repugnat, quod influxus objectivus, qui habetur immediate ab essentia Divina, habeatur immediate a Creatura obediencialiter elevata; ergo sicut potest hic influxus objectivus haberi obediencialiter a lapide, ita poterit haberi connaturaliter a specie impressa creata, seu a qualitate de se ordinata ad cauſandum connaturaliter hunc effectum.

III. Obijc. 1. Species impressa creata Dei argueret in Deo defectum, & indigentiam; ergo repugnat. Prob. antec. De ratione speciei impressæ est ultimo complere, ac determinare objectum in ratione intelligibilis; ergo supponit objectum complebile, ac determinabile in ratione intelligibilis; sed quod est complebile, & determinabile, eo ipso est defectuosum, & indigens; ergo species impressa Dei arguit in objecto increato defectum, & indigentiam.

Confirm. 1. Angelus cum non indigeat specie impressa, ut seipsum intelligat, non cognoscit seipsum per speciem impressam; & si daretur hæc species, argueret in Angelo indigentiam; ergo cum Deus non indigeat specie impressa, ut proxime possit videri a Beatis, ideo huiusmodi species non datur; & si daretur, inferret in Deo indigentiam, & defectum: Species enim de se est vicaria objecti, suppletque ejus vices in hoc, quod cum non possit immediate objectum influere in cognitionem sui, quando potentia est distans, tunc infuit per speciem: cum ergo Deus sit intime præsens intellectui Beatorum, non indiget specie sui vicaria; & si illa daretur, argueret indigentiam in objecto increato.

Confirm. 2. Illud præstat species impressa ex parte objecti, quod præstat lumen gloriæ ex parte potentis; sed lumen gloriæ supplet defectum potentis; ergo species impressa defectum objecti. Quare sicut nequit intellectus Divinus intueri seipsum per lumen distinctum, ita objectum increatum videri nequit per speciem impressam distinctam.

Resp. neg. antec. De ratione speciei impressæ solum est gerere vices objecti influendo objective in cognitionem, perinde ac ipsum objectum influeret immediate; quod convenit tam speciei impressæ obje-

cti creati, quam increati. Quod vero suppleat defectum objecti, videlicet aut ejus materialitatem, aut distantiam, aut non existentiam, reddatque illud proxime intelligibile, tanquam ejus virtus, & non tanquam instrumentum libere assumptum ab ipso objecto, spectat solum ad speciem impressam objecti creati. Quare ad probationem antecedentis, distinguo antecedens: de ratione speciei impressæ ut sic est complere, ac determinare objectum in ratione intelligibilis, si Tò complere sumatur proprie, connotando in objecto incomplectionem, & defectum, nego; si Tò complere sumatur improprie, ita ut significetur, quod libere adjunctum objecto, ut per illam fiat proxime intelligibile, eo modo, quo Omnipotentia adjunctum libere causa secunda, cum qua agat, concedo antec. & nego consequentiam. Sic si Rex libere utatur Ministris ad Regni gubernationem, quod potest ipse immediate gubernare, Minister solum improprie dicitur complere vim gubernativam regiam; secus vero si indigeat tali Ministro.

Ad 1. confirm. Angelus de facto non cognoscit seipsum per speciem impressam, ut docent communis, sicut nec objecta secundum compenetrata, quia ea species est naturaliter superflua; cum possit objectum immediate exhibere influxum objectivum: Hinc tamen non sequitur, quod non possit divinus Angelus seipsum cognoscere per speciem impressam; cum possit Deus impedire, ne Angelus immediate influat objective in intellectum proprium. Similiter Divina essentia de facto immediate exhibet influxum objectivum in intellectum Beatorum, cui est intime præsens, ut docent communis; Hinc tamen non sequitur, quod non possit hunc ipsum influxum exhibere per speciem impressam. In forma concedo antec. & nego secundam partem consequentis. Adde, quod si paritas Angeli teneret, sequeretur, quod sicut Angelus de facto seipsum cognoscit necessario, & quantum potest; ita Beatus, cui Deus est intime præsens, deberet necessario Deum cognoscere, quantum est cognoscibilis; quod est falsissimum; cum Deus sit Speculum voluntarium, nec sufficit, quod sit intime præsens intellectui creato, ut propterea debeat cognosci, sed requiritur, quod sit præsens intentionaliter per influxum objectivum, qui potest libere sive ab ipsamet essentia Divina, sive per speciem impressam promanare.

Ad 2. diversimode lumen gloriæ se tenet ex parte potentiz, ac species impressa Dei se tenet ex parte objecti; nam lumen est necessarium potentiz create, ut possit Deum videre, & licet possit etiam videri Deus sine lumine intrinseco, at hoc nequit fieri ad arbitrium ipsius intellectus, sed ad arbitrium Dei specialiter concurrentis: contra vero species impressa Dei non est necessaria, ut Deus videatur, sed ad arbitrium ipsius objecti potest adhiberi: propterea lumen arguit imperfectionem in potentia; contra vero species impressa arguit in objecto Increato abundantiam perfectionis.

IV. Objic. 2. Hæc species impressa est essentialiter superflua; ergo impossibilis. Prob. antec. In priori ad ipsam habetur quicquid per ipsam præstatur, scilicet Deum esse proxime intelligibilem.

Confirm. si quantitas identificaretur cum materia, quantitas superaddita esset essentialiter superflua, quia impenetrabilitas haberetur in priori ad quantitatem superadditam; ergo cum de facto identificetur cum Deo proxima intelligibilis, species superaddita, qua Deus reddatur proxime intelligibilis, esset essentialiter superflua: sicut etiam esset essentialiter superflua in Deo ubicatio, aut duratio distincta, quia per immensitatem, & æternitatem est essentialiter ubique, & quandocumque.

Neque obstat paritas de Omnipotentia, quæ de se est proxime productiva, & tamen potest libere adhibere instrumentum creatum, quo reddatur proxime productiva mediate. Nam causa secunda, cum qua ceagit Omnipotentia, non est ratio, *quæ*, sed est ratio, *quæ* agit simul cum Omnipotentia: contra vero species impressa non est ratio *quæ*, sed est ratio *quæ* Deus intelligitur; ergo est essentialiter superflua; non secus ac in Deo est essentialiter superflua potentia intellectiva distincta, qua Deus intelligatur, aut habitus distinctus, quo facilius ad operandum.

Resp. nego antec. Ad probationem: In priori ad speciem impressam Deus est proxime intelligibilis solum immediate, & principaliter; per speciem vero fit proxime intelligibilis mediate, & tamquam per instrumentum libere assumptum; sicut Omnipotentia per causas secundas fit proxime productiva mediate.

Ad 1. confirm. Ratio, cur quantitas identificata cum materia non possit reddi impenetrabilis mediate per quantitatem distin-

ctam, tanquam per instrumentum, est, quia quantitas præstat suum effectum formalem impenetrabilitatis in genere cause formalis; atque adeo essentialiter semper in actu secundo, & eodem modo est impenetrabilis; cum effectus formalis non distinguatur ab ipsa forma; nec dependet ab ipsa quantitate causare, vel non causare impenetrationem: contra vero Deus fit proxime intelligibilis in actu secundo in genere cause efficientis, quatenus libere influit in visionem, & ideo sicut potest magis, vel minus movere intellectum ad visionem magis, vel minus claram; ita potest libere causare visionem vel immediate, vel per speciem impressam. Idem dicat de ubicatione, & duratione, quæ pariter causant suos effectus in genere cause formalis; & ideo repugnat in Deo ubicatio, aut duratio distincta, nec non potentia intellectiva distincta, cum non possit intellectio Divina causari a Creatura. Repugnat etiam in Deo habitus facilitans, quia licet possit Deus per Creaturas causare, quod potest immediate, nequit tamen per Creaturas acquirere facilitatem ad operandum.

V. Utrum autem, sicut Omnipotentia influit influxu effectivo immediate cum causa secunda in effectum; ita essentia Divina influat etiam immediate influxu objectivo simul cum specie impressa? Dicendum, hoc non esse necessarium. In tantum enim Omnipotentia agit immediate partialiter simul cum causa secunda, in quantum salvari debet in effectu creato immediata dependentia a Deo; atqui hæc immediata dependentia visionis a Deo optime salvatur, etiam si species impressa influat in visionem adequate influxu objectivo, quia hic influxus objectivus speciei impressæ est etiam in genere cause efficientis, & cum eo etiam Deus immediate concurrat efficienter in visionem; ergo non est necesse, quod essentia Divina immediate, & inaduate influat in visionem influxu objectivo; quando visio causatur a specie impressa. Nihilominus fit transmittatur, quod cum specie impressa etiam influat partialiter influxu objectivo ipsa essentia Divina, nihil contra conclusionem.

Ad id, quod additur, scilicet, quod causa secunda coagens cum Omnipotentia fit ratio *quæ*, & causa principalis, species vero impressa fit ratio, *quæ* Deus fit proxime intelligibilis, & causa instrumentalis visionis: Respondeo, id esse verissimum, ex hoc tamen non inferri, quod huiusmodi species

impressa repugnet; nam similiter species expressa, seu visio Dei est ratio, quae Deus videtur, ex hoc tamen non sequitur, visionem Dei repugnare; unde nec inferitur, quod non possit Deus reddi proxime intelligibilis mediante per speciem impressam, ad eum modum, quo Omnipotentia redditur proxime productiva mediante per causas secundas.

VI. Obijc. 3. Species ista impressa debet esse infinitae perfectionis; ergo repugnat. Prob. antec. in eo genere immaterialitatis debet esse species impressa, in quo est obiectum; sed obiectum increatum est in supremo genere immaterialitatis, excludens etiam materiam metaphysicam, scilicet rationem genericam, ac rationem individualement, quae sit mere materialis, seu non spectet ad essentiam, & rationem formalem Dei; ergo species impressa obiecti increati deberet etiam excludere materialitatem metaphysicam, atque adeo deberet importare perfectionem infinitam. Prob. major, quia non alia de causa Angelus v. gr. nequit intelligi per speciem impressam materialem, & corpoream, nisi quia Angelus, & eius species impressa debent esse in eodem ordine immaterialitatis. Et ratio a priori est, quia species impressa est actus secundus intelligibilitatis obiecti; ergo debet esse in eodem genere immaterialitatis, in quo est actus primus, seu ipsum obiectum: Sicuti actus secundus intellectivitatis, seu intellectio debet esse in eodem genere immaterialitatis, in quo est actus primus, seu ipse intellectus; & idcirco intellectus Angeli v. gr. nequit intelligere per intellectionem materialem, nec intellectus Divinus per intellectionem creatam.

Confirm. 1. Ideo intellectio Divina, seu actus secundus intellectivitatis Divinae debet esse in eodem genere immaterialitatis, in quo est potentia intellectiva Divina, quia dari debet proportio inter actum primum, & secundum; ergo pariter species impressa Dei, quae est actus secundus intelligibilitatis Divinae, debet esse in eodem genere immaterialitatis, in quo est actus primus, seu obiectum increatum; atque adeo debet cum eodem Deo identificari; sicut intellectio Divina identificatur cum intellectu.

Confirm. 2. Magis distat ab obiecto increato species creata, quam ab obiecto Angelico species materialis; sed Angelus, quia excludit physicam materialitatem, nequit fieri proxime intelligibilis per speciem materialem; ergo Deus excludens metaphysicam

materialitatem a fortiori nequit fieri proxime intelligibilis per speciem creatam, quippe quae includit metaphysicam materialitatem.

Resp. 1. per instantiam de specie expressa, seu de visione Dei, quae non debet esse infinitae perfectionis, nec debet esse in eodem genere immaterialitatis, in quo est obiectum. Ad paritatem de Angelo respondere debent Adversarii; potest enim Deus cognosci cognitione finita, licet Angelus cognosci nequeat cognitione materiali; ergo similiter poterit Deus cognosci per speciem impressam finitam, licet Angelus cognosci nequeat per speciem impressam materialem.

Resp. 2. directe, nego antec. Ad prob. distinguo majorem: Species, quae connaturaliter ab obiecto promanant, debet esse in eodem genere immaterialitatis, in quo est obiectum, concedo; species libere a Deo assumpta, nego majorem, & consequentiam. Ad prob. major. ideo nequit Angelus intelligi per speciem impressam materialem, quia species obiecti debet proportionari potentiae intellectivae; & quia intellectus est spiritualis, nequit Angelum intelligere, nisi habeat in se speciem impressam Angeli spiritualem; at ut intelligatur Deus infinitus, neque species expressa, neque impressa Dei debet esse infinita; cum intellectus creatus videns Deum non sit infinitus.

Ad rationem a priori: bene probatur, quia species naturaliter promanans ab obiecto tamquam actus secundus connaturalis, debeat proportionari suo obiecto, & ideo species obiecti corporei est corporea, species Angeli est Angelica, & species impressa Dei connaturalis est ipse Deus; Et idem dicas de actu cognoscitivo, qui debet proportionari suae potentiae: At licet non possit Angelus cognosci per cognitionem materialem, potest tamen Deus in omnium sententia cognosci per cognitionem creatam; ergo licet non possit Angelus cognosci per influxum speciei impressae materialis, potest tamen Deus cognosci per influxum speciei impressae creatae. Et ratio a priori est, quia intellectus non est proportionatus ad intelligendum Angelum per speciem sive impressam, sive expressam materialem, est vero proportionatus ad intelligendum Deum infinitum per speciem tam impressam, quam expressam finitam.

Ad 1. confirm. Sicut debet dari proportio inter intellectum, & intellectionem Divinam, ita inter obiectum increatum, &

speciem impressam connaturalem talis objecti, & ideo huiusmodi species est ipse Deus; at potest Deus fieri proxime intelligibilis mediante per instrumentum libere assumptum, cuiusmodi est species impressa creata Dei.

Ad 2. R. esp. 1. per instantiam. Magis distat Deus a cognitione creata, quam Angelus a corporea; ergo si nequit Angelus intelligi cognitione corporea, nec poterit Deus cognitione creata. In forma dist. majorem: Magis distat Deus entitative, concedo; in ratione repræsentabilis, & repræsentativi, nego majorem, & consequentiam. Ratio, quare cognitio materialis non possit repræsentare Angelum, possit vero cognitio creata repræsentare Deum, est, quia cognitio debet proportionari potius intellectui cognoscenti, quam objecto; & idem dicas de specie impressa, quæ magis proportionari debet intellectui, & speciei expressæ ab ea causatæ, quam objecto, ex quo proficit.

VII. Objic. ult. Si esset de ratione speciei impressæ supplere defectum objecti, repugnaret species impressa creata Dei; sed illud est de ratione speciei impressæ; ergo. Prob. min. quia inductione constat, quancumque speciem impressam, dempta ista, de qua est controversia, supplere defectum objecti; ergo de ratione speciei impressæ est supplere hunc defectum: Aliter posset quis contendere, quod Deus sit capax habitus distincti, dicendo, quod de ratione habitus sit facilitare potentiam creatam dumtaxat, non vero increatam, & similiter, quod possit Deus prædeterminare ad peccandum sine amore peccati, licet id non possit Creatura.

Confirm. quia Accidens subiectivum de sua ratione perficit subiectum; & quia Deus nequit perfici, ideo dicimus, repugnare accidens, quod subiectetur in Deo, non vero dicimus, posse in Deo dari huiusmodi accidens, quin Deus perficiatur; ergo quia accidens objectivum, seu species impressa de sua ratione perficit objectum, & Deus non potest perfici, ideo debemus dicere, quod repugnet huiusmodi accidens relate ad Deum, non vero, quod possit dari, quin per illud Deus perficiatur.

R. esp. sicuti ex hoc, quod omnis species expressa, seu cognitio creata distinguatur ab intellectu, non sequitur, quod de ratione cognitionis ut sic præcidentis a creata, vel increata, sit distingui ab intellectu; ita ex hoc, quod omnis species impressa creata suppleat defectum objecti, non

sequitur, quod hoc sit de ratione speciei impressæ ut sic, præcidentis a specie impressa objecti creati, & increati. In forma nego minorem: Ad probationem nego consequentiam. Paritas de habitu non est ad rem, quia omnes concedunt, habitum esse accidens subiectivum distinctum a potentia, & ideo in Deo repugnat. Pariter prædeterminatio ad peccatum de se fert amore peccati, ut ostendimus suo loco; & ideo nequit Deus ad peccatum prædeterminare.

Ad confirmationem; Sicut repugnat in Deo accidens subiectivum, ita etiam accidens objectivum, seu species impressa naturaliter promanans ab ipso Deo; non tamen repugnat species impressa creata Dei quæ solum sit instrumentum libere assumptum, quo Deus reddatur proxime intelligibilis mediante.

VIII. Inquirunt ulterius Theologi, Num species impressa Dei identificetur cum lumine gloriæ, ut contendit Vasquez, an vero ab eo distinguatur? Et num ea detur de facto? Nobis non vacat in his immorari. Communius docent primo, de possibili tam posse identificari, quam posse distingui a lumine gloriæ; sicut v. gr. dari potest actus Misericordiæ identificatus cum actu Obedientiæ, & ab eo distinctus. Quod possit identificari lumen gloriæ cum specie impressa, ex eo probant, quia non dicunt prædicata impossibilia; potest enim eadem qualitas elevare intellectum, & sic se tenere ex parte potentia, ut est lumen gloriæ, & simul esse virtualis imago objecti, & sic se tenere ex parte objecti, ut est species impressa. Quod vero possint realiter distingui, probant, quia sicut dari potest habitus charitatis, qui solum se tenet ex parte potentia, & illustratio Spiritus Sancti, seu Gratia actualis, quæ se tenet ex parte objecti; ita dari potest lumen gloriæ, quod solum se teneat ex parte potentia, & species impressa, quæ solum se teneat ex parte objecti, tamquam imago virtualis illius. Et ratio a priori est, quia sufficit, quod lumen gloriæ compleat intellectum, ac determinet illum ad Dei visionem remote, exigendo scilicet speciem impressam distinctam.

Neque dicas, quod posito lumine gloriæ intellectu non indigat hac specie, ut determinetur ad visionem Dei potius, quam alterius objecti. Nam primo intellectus sub lumine est indifferens ad exprimendas, vel non exprimendas Personalitates Divinas, necnon hæc, vel illa Dei attributa, has,

vel

vel illas Creaturas in Deo; unde potest a specie impressa ad id determinari. Secundo potest intellectus esse determinatus mere remote ad Dei visionem, per hoc quod immediate exigit speciem impressam: sicut materia prima, v. gr. est determinata ad impenetrationem partium remote, per hoc, quod exigit quantitatem, a qua fiat proxime impenetrabilis.

Docent communis secundo, hanc speciem impressam Dei nec identificari cum lumine, nec dari de facto, quia connaturalius visio Dei prodit per hoc, quod essentia Divina intime præsens intellectui Beatorum immediate infuit in illam influxu objectivo; Sicut Angelus v. g. connaturalius suæ specie impressa distincta cognoscit seipsum, & objecta creata sibi intime præsentia. Quamvis autem Deus connaturaliter agat per causas secundas principales, non tamen per instrumentales libere assumptas, ut esset species impressa creata Dei. Verum quidem est, quod si ea constitueret novum gradum entium, ut constitueret substantia supernaturalis, si esset possibilis, deberet ea de facto dari, posito, quod Deus condiderit Universum Optimum, tamquam imaginem sui realem perfectissimam, in qua Divinæ perfectiones ad vivum adumbrarentur; eo modo, quo quælibet causa naturalis ponit in suo effectu imaginem sui perfectissimam, quam potest. At negandum, quod hæc species constituat novum gradum entium; sicut non constituit v. gr. corpus simplex novum gradum entium. Quare sicut non debet dari in Universo optimo v. g. Corpus simplex, quia ejus perfectio abunde compensatur a complexo Angeli simplicis, & corporis compositi, quatenus in hoc complexo perfectiori modo continentur perfectiones corporis simplicis; ita nec dari debet ista species impressa, quia ejus perfectiones compensantur a complexo luminis gloriæ, & influxus objectivi immediate prodeuntis ab essentia Divina.

Neque dicas, quod sic posset perfectio Creaturæ Creatricis v. gr. compensari a complexo potentie educivæ, & influxus creativi Dei, nec non perfectio substantiæ supernaturalis a complexo intellectus Angelici, & visionis beatæ, aut saltem ab unionem hypostaticam exigente visionem. Nam disparitas est manifesta, quia lumen gloriæ exigit influxum objectivum Dei, ut exigitur a specie impressa; & ideo in eo complexo luminis, & influxus objectivi Dei

Part I.

perfectiori modo continetur species impressa; contra vero nec potentia educiva exigit influxum creativum, nec intellectus Angelicus visionem beatam; Et licet unio hypostatica visionem beatam exigit, non exigit tamen illam sibi, (ut exigitur a substantia supernaturali) sed naturæ, quæ unit hypostatice Deo; & ideo in illa non continetur perfectio substantiæ supernaturalis, in qua reluceat hoc Divinum attributum, quod possit seipsum intueri Deus.

QUÆSTIO VI.

De Terminis Visionis Beatificæ.

I. **P**ER visionem hanc videtur Deus, & quæ in Deo continentur, sive formaliter, ut Personalitates, & attributa, sive eminenter, ut Creaturæ possibiles, & existentes. Inquirendum tamen primo, an Deus ita videatur, ut possit comprehendi? Secundo, An possit videri cognitione præcisiva, videndo v. gr. unam Personam, aut unum Atributum sine aliis? Tertio quidam de facto Beati videant in Verbo, & quas Creaturas ex existentibus, aut possibilibus? Esset etiam hic inquirere, an ex cognitione omnium possibilem sequatur comprehensio Omnipotentis. Sed de hoc dicendum in de incarnatione, ubi ostendimus ex D. Th. 3. p. q. 10. Scoto, Gabriel, Vasc. disp. 50. Christum Dominum de facto non videre in Verbo omnia possibilia clare, & distincte actu, sed solum habitu, quatenus, ut explicat Scotus, potest ad libitum clare, & distincte videre Creaturas possibiles in quolibet collectione majori, & majori in infinitum, quin possit videre omnes, eo quod ex hac cognitione sequeretur comprehensio Omnipotentis, quæ intellectui creato repugnat. Quod etiam dicemus in de Angelis ostendendo, repugnare speciem impressam universalissimam.

ARTICULUS I.

Nam possit Deus ab intellectu creato comprehendi?

II. **D**icendum cum communissima, id repugnare. Conclusionem hanc Molina, & Suarius putant esse de Fide: Vasc., & Arriag. negari non posse sine temeritate.

D 3

Prob.

Prob. Jerem. 13. dicitur: *Magnus confilium, & incomprehensibilis cogitatus*: In Lactantius c. *firmius*, Deus dicitur *Immensus, & incomprehensibilis*, quod etiam Patres docent apud Ruiz. Et ratio est, quia ex Aug. epist. 112. Illud comprehenditur, cuius nihil latet videntem, scilicet tum ex parte objecti, tum ex parte modi cognoscendi: seu ut explicante communiter cum D. Th. prima parte q. 12. art. 7. Illud comprehenditur, quod cognoscitur cognitione adæquantur intrinsecam cognoscibilitatem objecti; sed nulla cognitio creata, utpote finita, potest adæquare intrinsecam Dei cognoscibilitatem; cum Deus sit intrinsece cognoscibilis a se ipso cognitione Divina adæquantur merum objecti; ergo nulla cognitio creata potest Deum comprehendere.

Ratio a priori est, quia cognoscibilitas intrinseca est passio objecti; ergo tanta est uniuscujusque cognoscibilitas, quanta est ejus entitas, & perfectio; ergo ut possit adæquari intrinseca cognoscibilitas, v. gr. Angelus ex parte modi tendendi, debet talis cognitio adæquare cognitionem illam, qua Angelus semetipsum comprehendit: sicut enim corpus non comprehenditur, nisi a corpore ejus molem adæquantur: ita spiritus non comprehenditur, nisi ab intellectu adæquantur ejus quantitatem virtutis seu perfectionem, & consequenter ut Deus comprehendatur, requiritur cognitio Divina. Hinc fit, quod si posset dari cognitio, quæ adæquaret solum extensive, & non intensive intrinsecam Dei cognoscibilitatem, talis cognitio Deum non comprehenderet. Quod est dicere; si posset dari cognitio clara, & distincta omnium prædicatorum, & attributorum Dei tam totalium, quam partialium, nec non omnium possibilem in Deo, ita tamen ut hujusmodi cognitio extensive infinita non esset simul infinita intensive, hujusmodi cognitio non esset Dei comprehensio: quicquid sit, an ea dari possit.

III. Objic. 1. Ut Angelus comprehendat seipsum, non debet cognitio comprehensiva Angeli continere perfectionem Angelicam entitative, sed solum repræsentative; aliter hujusmodi cognitio non esset accidens; ergo ut possit Deus comprehendere, non debet cognitio comprehensiva Dei adæquare Divinam perfectionem: ergo potest Deus a Creatura comprehendere.

Confirm. Apostolus, 1. ad Corinth. 9. habet: *Sic errate, ut comprehendatis*; ergo

possimus Deum comprehendere.

Resp. Sicut cognitio, qua Angelus semetipsum comprehendit, distinguitur ab Angelo, cognitio tamen, qua Deus semetipsum comprehendit, non distinguitur a Deo; ita cognitio comprehensiva Angeli non debet entitative adæquare perfectionem Angelicam, cognitio tamen comprehensiva Dei adæquare debet perfectionem Divinam. Ratio a priori est, quia illa cognitio dicitur esse comprehensiva objecti, quæ ponitur vi speciei impressæ perfectissimæ, quam potest hujusmodi objectum ponere connaturaliter; ergo cum Angelus habeat hujusmodi speciem impressam, ac expressam distinctam a semetipso, Deus vero identificatam; ideo comprehensio Angeli non debet adæquare entitative perfectionem Angeli, secus vero comprehensio Dei.

Ad confirmationem: Apostolus non loquitur de comprehensione strictè dicta, sed de illa, qua Deum allequimur, juxta illud Cantic. 3. *Tenui eum, nec dimittam*.

IV. Objic. 2. Licet cognitio Archangeli sit perfectior cognitione Angeli terminata ad Formicam, non per hoc Angelus non comprehendit Formicam, si attingat omnia ejus prædicata clara, & distincte; ergo licet cognitio Divina sit infinitè perfectior cognitione creata, non per hoc cognitio creata non est comprehensiva Dei, si attingat clare, & distincte omnia Dei prædicata: sed potest sic attingere; ergo potest Deus comprehendere.

Resp. nego consequ. Disparitas est, quia cognitio Angeli terminata ad Formicam adæquat ejus intrinsecam cognoscibilitatem tum ex parte objecti, tum ex parte modi cognoscendi, licet non adæquet ejus cognoscibilitatem extrinsecam, quæ potest ab Archangelo, aut a Deo cognosci, & supercomprehendi; at nulla cognitio creata potest adæquare intrinsecam Dei cognoscibilitatem ex parte modi cognoscendi. Præterea Dei cognitio, quæ supercomprehendit omnes Creaturas, seipsum non supercomprehendit, sed solum comprehendit, adæquando sui cognoscibilitatem; cognitio vero Archangeli supercomprehendit Formicam, & ideo dari potest cognitio aliqua minus perfecta, quam sit cognitio Archangeli, quæ comprehendat Formicam; non potest tamen dari cognitio minus perfecta, quam sit cognitio Divina, qua Deus comprehendatur.

ARTICULUS II.

Num possit dari Visio Dei præcisiva.

V. Difficultas est, Num possit cognitio intuitiva Dei esse eodem modo præcisiva, ac cognitio Dei abstractiva: ita scilicet, ut possit unum Divinum attributum videri sine alio, aut essentia sine attributis, vel Personalitatibus, aut una Persona Divina, non visa alia: eo prorsus pacto, quo possimus hæc prædicata Dei attingere præcisive per cognitionem abstractivam. Qua in re non disputatur, Utrum huiusmodi præcisio possit esse ex parte objecti: nam si supponatur ex parte objecti aliqua distinctio, sive formalis, sive virtualis, v. gr. inter attributa Divina, tunc per visionem Dei præcisivam attingeretur ex parte objecti unum attributum sine alio; si vero non deat ex parte objecti ulla distinctio, tunc per visionem præcisivam unum attributum videretur sine alio, non quidem objective, sed formaliter, quatenus unum diceretur, & non aliud; eo pacto quo quando videtur Homo a longe, dicitur videri Animal non viso formaliter rationali, per hoc, quod non discernatur, num sit rationale. Negant possibilem huiusmodi Dei visionem præcisivam, seu inadæquatam Thomistæ communiter cum Suzr., Vasq. Molin., Haunol., Maur. Affirmant Scotistæ, Granadus, Arriaga, & Recentiores communis.

VI. Dico equidem cum hac secunda sententia, dari posse visionem Dei formaliter præcisivam; ita ut essentia videatur sine attributis, & unum attributum sine alio, prout explicavimus, sicut contingit in cognitione abstractiva Dei præcisiva.

Prob. tum negative, tum etiam, quia de facto Beatus videt attributa partialia visionis præcisiva; ergo eodem pacto videre potest præcisive attributa totalia. Antecedens patet; quia Beatus licet videat attributum totale Divinæ Omnipotentia, non videt tamen clare, & distincte Deum, ut potentem singulas Creaturas possibiles producere; aliter de facto in Deo viderentur clare, & distincte omnia possibilia, quod non admittitur, immo dubitatur, num id sit possibile. Consequentia sequitur, quia sicut videtur Omnipotentia ut potens unum possibile, & non ut potens aliud, licet utrumque prædicatum identificentur; ita poterit formaliter attingi Omnipotentia sine

immanentia, aut Abscisa sine attributis, licet identificentur ex parte objecti. Et ratio a priori est, quia Deus est speculum voluntarium, tum quoad substantiam, tum quoad modum; atque adeo sicut libere se manifestat, ita libere se manifestat hoc, vel illo modo, ostendendo Beatis hoc, vel illud suum attributum sive parziale, sive totale.

Neque dicas, Omnipotentiam non connecti cum possibilitate Creaturae, & idcirco visa Omnipotentia non debent necessario videri clare, & distincte omnia possibilia. Nam primo in mea sententia Omnipotentia est ipsa possibilitas possibilium formalis, & necessaria. Secundo omnes concedunt, quod possint in Deo a Beatis videri aliqua possibilia, quin Deus teneatur manifestare omnia; ergo sicut potest Deus libere manifestare suam Omnipotentiam, ut potentem creare hoc possibile, non ut potentem creare illud; ita potest libere manifestare Omnipotentiam non manifestata immanentia formaliter.

Confirm. quia cognitio experimentalis potest esse præcisiva formaliter. V. g. dum attingimus experimentaliter actum amoris Dei, quem elicimus, possumus ignorare, an sit supernaturalis, & sic attingere prædicatum amoris Dei formaliter, præscindendo a supernaturalitate cum illo identificata. Pariter visio corporea potest intuitive attingere colorem secundum rationem specificam, non discernendo individualement, ergo a fortiori poterit intellectus attingere intuitive objectum secundum unum prædicatum formaliter, & non secundum aliud, prout contingit per cognitionem abstractivam.

VII. Dico secundo: potest pariter in Deo videri una Persona non visa alia opposita, ex. gr. videri potest Persona Patris non visa Persona Filii.

Prob. licet relativa sint simul natura, & cognitione, unde non possit unum relativum cognoscere altero non cognito; nihilominus non est necesse, ut eodem modo tendendi utrumque cognoscatur; ergo potest una Persona Divina intuitive videri non visa altera, etiam si altera opposita cognosci tunc debeat abstractive. Antecedens patet, quia potest v. g. intuitive videri servus cognitus ut servus, non viso Domino, & Filius non viso Patre. Et de facto cognoscimus Creaturas intuitive, ut Creaturas, atque adeo ut dicentes essentialiter seipsas, ac dependentiam a Deo, quin Deum cognoscamus intuitive; ergo idem in casu nostro.

VIII. Objic. 1. Visio Dei manifestat Deum ut est in se; ergo secundum omnia prædicata, & attributa Divina; ergo nequit dari visio Dei præcisiva, & inadæquata, ita ut unum attributum videatur sine alio.

Confirm. 1. In hoc distinguitur cognitio intuitiva ab abstractiva, quod hæc posset unum prædicatum ab alio abstrahere, eo quod attingat objectum per species alienas, quæ possunt illud repræsentare secundum unam rationem, non secundum aliam; at hoc nequit contingere in visione intuitiva manifestante objectum per species proprias, cum manifestet illud prout est in se: ergo. Antecedens probatur, quia solum abstractivè potest v. gr. Homo cognosci secundum prædicata Hominis præscindendo ab ejus existentia, non vero intuitive; & hoc non aliunde, nisi quia sola cognitio abstractiva est præcisiva; aliter si posset Deus videri non visa Immenitate v. gr. posset etiam videri non visa ejus existentia, quod obstat conceptui visionis intuitivæ, quæ essentialiter terminatur ad existentiam objecti.

Confirm. 2. quia aliter possent omnia attributa Divina videri, non visa Aseitate; in quo casu Deus videretur, ut supponitur, & simul non videretur; tum quia non visa essentia Divina Deus non videretur, tum etiam quia visio intuitiva necessario est quidditativa, seu attractiva quidditatis, & essentia objecti.

Resp. magnam vim ab Adversariis fieri in hoc, quod visio intuitiva videat objectum prout est in se, perinde quasi non posset videri prout est in se, quin attingatur clare, & distincte omnia prædicata objecti; ut de facto non manifestantur Beatæ omnia attributa partialia. In forma dist. antec. visio manifestat objectum prout est in se, hoc est immediate, & non aliter, ac est in se, concedo; hoc est omni modo, ac est manifestabile, manifestando clare, & distincte omnia ejus prædicata, nego ant. & conseq.

Ad primam confirmationem nego antecedens; Visio intuitiva potest esse præcisiva non secus ac abstractiva cognitio; in eo tamen differunt, quod cognitio intuitiva, quia talis, feratur in objecti existentiam, ita ut ratio, propter quam affirmetur objectum existere, non sit aliud, quam ejus existentia, ad quod non requiritur, quod objectum existat; Deus enim intuitive cognoscitur ab æterno futura absoluta, & conditionata, quin illa extiterint ab æterno;

nec requiritur, quod objectum influat in cognitionem intuitivam vel immediate, vel media specie impressa; cum satis sit, quod existentia objecti pro tali tempore sit ratio, cur illud cognoscatur pro eo tempore existere. Hinc fit primo, posse haberi cognitionem abstractivam de Homine non attracta ejus existentia, non tamen cognitionem intuitivam. Fit secundo, non posse haberi visionem Dei intuitivam, quin ejus existentia attingatur; cum hoc essentialiter requiratur ad cognitionem intuitivam quæ ealem, ut ad exercitiam existentiam objecti terminetur, & ab eodem determinetur.

Ad 2. concedo sequelam, & nego, quod non visa Aseitate non videretur Deus; nego etiam, quod visio intuitiva sit necessario quidditativa; sicut enim si attingatur Homo sub prædicato risibilis, non sub prædicato rationalis, habetur cognitio Hominis, & non quidditativa, seu secundum prædicatum Hominis essentialia; ita si cognoscatur Omnipotentia non attracta Aseitate, habetur cognitio Dei, licet non sit quidditativa.

IX. Objic. 2. Si posset visio Dei esse præcisiva, non secus ac cognitio ænigmatica, sequeretur, quod sicut potest abstrahere Deus cognosci sub prædicato communi Deo, & Creaturæ, v. g. sub prædicato substantiæ, viventis, &c. ita posset sic confuse videri; sed hoc obstat conceptui visionis Dei, quæ debet Animum satiare objecto beatifico, attingendo illud, ut bonum infinitum continens omne bonum; ergo.

Neque dicas; hoc solum pertinere ad visionem Dei quæ beatificam, non vero ad visionem Dei non beatificam; nam visio Dei non beatifica videtur repugnare, ut docent Thomistæ cum Suar., Vasq. contra Scotistas, Lugo, Arriag.; aliter deberetur Angelis, sicut Angelo inferiori deberetur visio terminata ad superiorem; tum etiam quia posset ea deberi in premium ob meritum naturale, unde visio Dei non esset essentialiter supernaturalis; tum demum quia, ut notat Haunoldus, posset hæc visio deberi propter meritum levissimum supernaturale, quod videtur esse contra Trident. dicens, cuiuslibet merito supernaturali respondere vitam æternam, atque adeo visionem beatificam. Et ratio a priori est, quia visio Dei debetur Amico Dei; Amico autem debetur visio satisfactiva, & beatifica; aliter esset contemptibilis visio Amici; ergo quælibet Dei visio est beatifica.

Resp.

Resp. concedo sequelam, & nego, repugnare Dei visionem non beatificam; dicemus enim in de Beatitudine, posse visionem Dei conjungi cum peccato habituali; in quo casu videns Deum esset miserimus eo, quod videret illum infernum sibi: potest itaque dari visio Dei attingens Deum v. g. sub prædicato substantiæ solum, quæ certe non esset beatifica, eo quod non esset formaliter possessiva summi boni. Non est autem verum, quod hæc visio posset esse debita Angelis, aut dari in præmium meriti naturalis. Nam omnis visio Dei ex modo tendendi est supernaturalis, & indebita. Posset quidem in alio ordine dari in præmium meriti supernaturalis; non tamen in præsentis providentia, in qua ex Trident. omnis Dei visio est beatifica. Ad rationem a priori dico, posse in alio ordine deberi Amico Dei ratione Gratiæ hanc visionem non plene satisfaciunt; quæ non propterea esset contemptibilis; sicut non est contemptibilis confamilis cognitio abstractiva Dei in statu puræ Naturæ. Denique transmissio, quod repugnet visio Dei non beatifica attingens Deum sub prædicato communi Deo, & Creaturæ; poterit saltem dari visio præcisiva attingens Deum sub prædicato proprio, puta sub prædicato Omnipotentis, quæ, ut hic supponitur ex dicendis in de Beatitudine, esset satisfactiva essentialiter, licet non integraliter.

X. Objic. ult. Personalitates Divinæ non habent distinctam visibilitatem a visibilitate essentia; ergo nequit essentia videri sine Personalitatibus, aut e contra.

Confirm. Personalitates non possunt ad extra influere influxu proprio; ergo eodem influxu objectivo, quo Deus insuit in visionem essentia; insuit in visionem Personalitatum; ergo ut supra.

Confirm. 2. quia aliter posset quis videre essentiam Divinam, & negare, Deum esse Trinum, quod esset invadere actum erroneum in Beatis.

Resp. Antecedens esse falsum; si enim potest Personalitas Verbi terminare unioem hypostaticam, quin hæc terminetur ab essentia Divina, poterit similiter terminare visionem. Quod si velis Personam Verbi prout includentem essentiam Divinam, & Verbi Personalitatem terminare unioem hypostaticam, quin hæc terminetur ad Personalitatem Patris identificatam cum essentia; poterit similiter visionem terminare sola Persona Verbi; ut proinde nec Pater, nec Spiritus Sanctus videatur. Sed

omisso antecedente nego consequentiam; Si enim potest videri essentia sine attributis, a quibus non distinguitur ex parte objecti, poterit etiam videri sine Personalitatibus, licet haberent eandem visibilitatem. Et ratio est, quia præcisio per nos non consistit in hoc, quod unum prædicatum terminet visionem, alterum non terminet, sed in hoc, quod unum prædicatum discernatur, & de eo certificemur, non de alio; atque adeo visio terminatur ad entitatem relate ad connotatum unius prædicati, non alterius.

Ad 1. confirm. recurrit eadem responsio. Quare concessio antecedente, & prima consequentia, nego secundam; & recurrit etiam instantia de attributis partialibus; eodem enim influxu, quo Deus insuit in visionem Omnipotentia; ut potentis creare hominem, insuit in visionem Omnipotentia; potentis creare infinitum; potest tamen Deus videri ut potens hominem, non discernendo, an possit creare infinitum earegorematicum.

Ad 2. transmissio, quod non possit Dei visio componi cum aliquo errore intellectus, eo modo, quo potuit in Christo Domino componi cum aliquali mixtione, non per hoc non poterit dari visio præcisiva, attingens v. gr. essentiam sine Personalitatibus; in hoc enim casu Deus non concurreret ad actum erroneum, quo diceretur, Deus non est Trinus, sed solum ad affirmandam unitatem essentia; præciscendo ab unitate, vel Trinitate Personarum, ut dicitur ab Adversariis, quando visio Dei præciscit ab attributis partialibus.

XI. Ex dictis habes contra quamplures Thomistas, quod qui videret in Deo clare, & distincte omnia, & singula prædicata, quæ sunt in Deo formaliter, eo ipso videret omnia, quæ in Deo continentur eminenter, hoc est omnes creaturas possibiles. Ratio est, quia in Deo non solum sunt formaliter attributa totalia, sed etiam partialia; atqui impossibile est cognosci clare, & distincte attributa partialia, puta Deum ut potentem creare hominem, Angelum, &c. quin clare, & distincte cognoscantur omnes istæ Creaturæ possibiles; ergo.

ARTICULUS III.

*Quidnam de facto Beati videant
in Deo?*

XII. **C**ertum est 1. Beatos de facto videre Divinam essentiam, Personalitates, & attributa totalia. Ita communiter; & ratio est, quia aliter non haberetur Dei cognitio adequata, nec Beatitudo esset integraliter perfecta; sicut enim cognito Homine v. gr. inquirimus naturaliter ejus proprietates, ita viso Deo naturaliter cupimus cognoscere ejus attributa, non quidem partialia, cum non possint omnia cognosci, sed totalia.

Certum est 2. Beatos videre in Verbo varias creaturas tam possibiles, quam existentes; dicit enim Concil. Senonense decret. 13. *Beatis pervium esse Divinitatis Speculum, in quo quidquid illorum interfit, innoscat.* Et hujusmodi cognitio Creaturarum in Verbo ab Augustino in primum caput Genes. vocatur *Maturina*, utpote clarior, ubi cognitio Creaturarum in seipsis vocatur *Resperina*. Idcirco autem Patres, & Theologi dicere solent, quod Creaturæ cognoscantur in Verbo, non quia Verbum sit illud medium speciale, in quo Creaturæ videntur, sed quia (ut in similibus solent) Verbo appropriant opera Sapientiae, licet sint Trinitati communia. Advertendum etiam, dupliciter posse Creaturas in Deo, seu in Verbo videri; primo formaliter, quod habetur quoties Deus dicit respectum transcendentalē ad Creaturas: tunc enim in eo respectu tamquam in medio cognito formaliter rellucet Creatura, ad quam terminatur; secundo causaliter, quoties scilicet Deus exhibet concursus objectivum, quo manifestetur aliqua Creatura, ad quam non dicit respectum essentialē. Hinc fit, quod Creaturæ possibiles, quæ manifestantur Beatis, videntur in Deo formaliter, si supponatur, quod Omnipotentia sit ipsa possibilitas necessaria Creaturarum, & illarum idea, aut saltem quod cum possibilitate Creaturarum connectatur. Contra vero Creaturæ existentes videntur in Deo causaliter, ut docent Scotistæ, Okamus, Recupit., Platel. num. 84., contra Thomistas, Suar., Fasol., quia scilicet essentia Divina nullam dicit connexionem cum Creaturarum existentia. Et licet futura libera videri possint formaliter in complexo Scientiæ mediæ, & Decreti prædefinitivi, aut

permissivi actus, ut notat Lumbier de Scientia Dei n. 282. futura tamen libera conditionata nullatenus videri possunt formaliter in Deo, cum non detur decretum absolutum relate ad illa, cum quo essentialiter connectantur.

Dices, Creaturæ possibiles non sunt in Verbo formaliter, sed eminenter; ergo non possunt in Verbo videri formaliter, etiam in facta hypothesi.

Resp. Creaturas possibiles non videri ut existentes formaliter in Verbo, sed videri in Verbo formaliter, quatenus videntur in Verbo ut motivo formali, seu ut medio, in quo est vis motiva ad earum cognitionem; propterea videntur in Verbo formaliter motive, non terminative.

XIII. Queritur nunc, Quasnam Creaturas de facto Beati videant in Verbo?

Ad quod dicendum, Beatos omnes clare, & distincte cognoscere mysteria nostræ Fidei, res naturales præcipuas, & res, quæ in hoc mundo geruntur specialiter ad ipsos pertinentes; horum quippe cognitio connaturaliter exigitur, unde videtur ad Beatitudinis complementum pertinere; & probabiliter videtur etiam aliqua futura contingentia ad ipsos spectantia ob eandem rationem, & juxta Decretum laudatum Concil. Senonensis.

Utrum autem cognitio ista futurorum dicenda sit intuitiva, an abstractiva? et quæstio de voce; non est intuitiva, si ad hanc requiratur dependentiam ab ipsa existentia exercita objecti; erit tamen intuitiva, si ad hanc solum requiratur, quod intellectus de ipsa existentia objecti certificetur.

DISPUTATIO III.

De Scientia Dei.

Quamvis simplicissima sit Dei Scientia; ex modo tamen nostro concipiendi dividitur in scientiam simplicis intelligentiæ, seu necessariam, prout terminatur ad possibilia, & ad Dei existentiam; in scientiam Visionis, seu liberam, prout terminatur ad contingentia; & in scientiam conditionatam, seu mediam, prout terminatur ad futura libera, conditionata. Dicitur autem scientia isthæ mediæ, quia mediat inter scientiam necessariam, & liberam, & de utraque aliquid participat; nam de scientia simplicis intelligentiæ partici-

pat

pat per hoc, quod Deus necessario cognoscit, quid esset facturus Petrus v. g. si vocaretur, consentire, necne? de scientia visionis participat etiam, quia contingenter consensus potius, quam dissensus videtur a Deo, posita tali vocatione facta Petro. Participat etiam de scientia necessaria, quatenus futura libera conditionata cognoscuntur antecedenter ad quodvis decretum liberum, non secus ac objecta necessaria; & participat de scientia visionis, quatenus contingenter videtur assensus conditionatus potius, quam dissensus. Dividitur deinde Scientia Dei in practicam, prout est de objecto operabili ab ipso Deo, & Speculativam, quæ sistit in mera contemplatione objecti. Datur etiam scientia approbationis, & reprobationis, quæ superaddit complacentiam, aut displicentiam Divinam de aliquo objecto, unde connotat actum Divinæ voluntatis. Nobis hic agendum de triplici illa scientia, Simplicis intelligentiæ, Visionis, & Media. Sed antecedenter inquiremus, Num detur in Deo vere, & proprie potentia intellectiva, an vero solum detur actus intelligendi? Et Utrum Dei summa Cognoscitivitas ex ejus summa Immaterialitate demonstretur?

QUÆSTIO I.

Utrum in Deo detur potentia intellectiva per modum actus primi physici intelligendi.

I. Difficultas est, An sicut in Deo datur vere, & proprie v. g. Misericordia, Justitia &c. ratione distincta ab actibus harum virtutum, ita detur potentia intellectiva per modum actus primi physici, an vero hujusmodi prædicatum importet in suo conceptu formali aliquam imperfectionem, unde non possit Deo competere; sicut nequit Deo competere formaliter v. g. Obedientia, aut Penitentia, & in multorum sententia nec Justitia prædicta? Ubi notandum, non esse questionem de potentia logica, seu de possibilitate intrinseca, ac non repugnantia ad intelligendum; evidens enim est, non repugnare, quod Deus sit intelligens, æque adeo, quod habeat hujusmodi potentiam logicam intelligendi: est ergo quæstio de potentia physica, seu de actu primo physico ut ratione distincto ab actu secundo intelligendi: Nec est quæstio de intellectu notionali, sed de essentiali.

Quamvis autem quæstio hæc videatur de voce, non eatenus est contemnenda, cum ad Deum pertineat, & ad prædicata Divina rite cognoscenda plurimum conferat: sicut non contemnitur in Theologia quæstio illa, an Deus sit dicendus stricte justus, nec fuit contemnenda in Ecclesia Dei celeberrima illa quæstio, sine dicendus Dei Filius Homiusion, seu similis substantiæ cum Patre, an Homiusion, seu Consubstantialis?

II. Dico equidem non dari in Deo proprie, & formaliter Intellectum, seu potentiam intelligendi per modum actus primi physici. Ita communiter cum Thomistis, Suar., & aliis apud Ruiz contra Scotum, Henricum, Arrubal, Arriag., qui pro sua sententia laudat etiam Suarezium.

Prob. 1. autoritate D. Th. 1. p. q. 4. r. art. 4. ubi hæc habet: *Intelligere, & velle non sunt tales actus, qui designent processionem rei a Deo distinctam vel essentialiter, vel personaliter, unde respectu horum actuum nequis salvari ratio potentia in Deo.* Ex quibus verbis colligitur, quod quia conceptus Patris generantis Filium explicat processionem Filii a Patre, ideo datur in Patre potentia intellectiva notionalis, seu potentia generativa in ordine ad Filium, quem generat, quia vero Intellectus essentialis Dei non fert processionem ullam intellectionis ab intellectu, ideo non datur in Deo potentia intellectiva essentialis, seu actus primus intelligendi, sed solum intellectio, quæ nec sit actus primus, cum non dicat ordinem ad secundum, nec sit actus secundus, cum non dicat ordinem ad primum.

Prob. 2. ratione. Universim potentia physica non datur, nisi ad actum realiter distinctum; sed in Deo non datur intellectio realiter distincta ab actu primo, seu a potentia intellectiva; ergo in Deo non datur vere & proprie potentia physica intelligendi, seu Intellectus per modum actus primi. Major constat; nam quia Animalitas v. g. potest identificari cum rationalitate, non dicitur Animalitas habere potentiam physicam, sed solum logicam, seu non repugnantiam ad identificari cum rationalitate; nec rationalitas dicitur habere potentiam physicam, sed solum logicam ad subsistentiam, cum quia identificatur.

Confirm. De ratione actus primi, seu potentie physice ad intelligendum est esse id, quod dicit ordinem ad actum secundum intelligendi realiter distinctum, utpote qui vel producit, vel saltem recipitur in ta-

li potentia; sed huiusmodi conceptus sonat imperfectionem, cum importet distinctionem realem inter intellectum, & intellectum; ergo non competit Deo potentia intellectiva proprie dicta per modum actus primi physici.

III. Obijc. 1. Deus intelligit; ergo potest intelligere; ergo habet potentiam intelligendi; sed huiusmodi potentia est physica, utpote a parte rei; ergo datur in Deo potentia physica ad intelligendum.

Confirm. 1. Datur in Deo Intellectio, quæ est actus secundus physicus; ergo datur Intellectus, seu actus primus.

Confirm. 2. quia Patres, & præsertim Augustinus, admittunt in Deo memoriam secundam; sed memoria secunda importat potentiam intellectivam conjunctam cum specie objecti; ergo datur in Deo potentia intellectiva.

Confirm. 3. Competit Deo potentia generativa per modum actus primi, licet actus secundus talis potentie (scilicet actio generativa) identificetur cum ipsa potentia, nempe cum Paternitate; ergo competit etiam Deo potentia intellectiva per modum actus primi, etiam intellectio identificetur cum tali potentia. Et ratio a priori videtur esse, quia sufficit, quod potentia ratione nostra distinguatur ab actu secundo, ut habeat rationem potentie in priori ad actum secundum: Sicut potentia ad existendum dicitur esse in priori ad existentiam, licet non distinguatur, nisi logice, ab actuali existentia.

Resp. committi in argumento fallaciam sensus compositi, ut quando dicitur: Hæc Capra est Mater, & est Petri; ergo est Mater Petri; concedimus enim, quod Deus habeat potentiam ad intelligendum (quatenus non repugnat quod Deus intelligat) concedimus etiam, quod hæc potentia physice, seu a parte rei existat; negamus tamen, quod habeat potentiam physicam ad intelligendum; ea enim non repugnantia ad intelligendum est solum potentia intelligendi logica.

Ad 1. confirm. Concedimus in Deo intellectionem, seu actum intelligendi, negamus tamen actum secundum strictè dictum; sicut & actum primum.

Ad 2. Patres admittere in Deo memoriam secundam loquuntur de intellectu notionali, qui est vere potentia physica, & generativa Verbi realiter ab ea distincti distinctione eminentiali; nos vero disputamus de intellectu essentiali, qui iden-

tificatur cum intellectione.

Ad 3. Potentia generativa Patris non est potentia per modum actus primi relate ad generationem activam, cum qua identificatur, sed relate ad generationem passivam, a qua distinguitur; unde relate ad generationem activam non habetur paritas, sed identitas rationis. Ad rationem a priori, verum quidem est posse Deo competere plura prædicata, quæ solum ratione inter se distinguantur, dummodo in conceptu suo non importent imperfectionem, ut Sapientia, Bonitas, Omnipotentia: At ostendimus, potentiam intellectivam, seu actum primum intelligendi importare imperfectionem, & distinctionem realem ab actu secundo; ergo nequit formaliter Deo competere potentia intellectiva, ita ut ratione tantum distinguatur actus primus ab actu secundo, sed solum competit Deo potentia logica, seu non repugnantia ad intelligendum; sicut competit potentia logica, seu non repugnantia ad existendum. In eo tantum sensu dicitur potentia logica ad existendum, aut ad intelligendum esse in priori ad actualem existentiam, aut intellectionem, quatenus potentia ista logica est prædicatum universalius, unde est in priori a subsistendi consequentia; ita ut teneat hæc illatio: Deus existit, aut intelligit; ergo potest existere, aut potest intelligere; non tamen e converso: Deus potest existere; ergo existit; sicut quia Animal est prædicatum universalius, & prius a subsistendi consequentia relate ad Hominem, tenet hæc illatio, Petrus est Homo; ergo est Animal; & non viceversa: Est Animal; ergo est Homo.

IV. Obijc. 2. ex Arriaga. Competit Deo formaliter quæcumque perfectio reperitur in Creaturis, si in suo conceptu nullam importet imperfectionem; at potentia intelligendi reperitur in Creaturis, & nullam dicit in conceptu suo imperfectionem, saltem secundum quod est potentia intelligendi radicalis, seu quatenus Angelus v. gr. est intelligens ut quod, seu quatenus est substantia intellectiva per se subsistens, cui non repugnat intelligere; ergo competit Deo formaliter potentia intelligendi saltem radicalis.

Confirm. Si daretur in Deo id, per quod convenit cum intellectu creato radicali, & per quod disconvenit ab actuali intellectione creata, daretur in Deo potentia intelligendi per modum actus primi; sed datur in Deo formaliter, tum id per quod

quod convenit cum intellectu creato radicali, nempe esse intelligens ut quod, per se subsistens, cui non repugnat intelligere; tum id, per quod disconvenit ab intellectione creata, nempe intellectionem identificari cum intellectu, quod intellectioni creatae non convenit; ergo datur in Deo potentia intelligendi per modum actus primi. Major est clara: dari enim in Deo formaliter actum primum intelligendi, est Deum convenire formaliter cum Creatura præcise quatenus potest intelligere, non quatenus intelligit.

Resp. nos solum negare, quod Deo formaliter competat potentia intelligendi physica, non logica; argumentum autem probat, quod Deo competat potentia intelligendi radicalis logica, quia probat, competere Deo esse principium per se subsistens, cui non repugnat intelligere; ergo non probat intentum. In forma dist. min. Potentia intelligendi logica reperta in Creaturis nullam dicit formaliter in suo conceptu imperfectionem, concedo, physica, nego minorem, & consequentiam. Adde, quod si nequit dari in Deo formaliter actus primus intelligendi, quia ex suo conceptu dicit distinctionem realem ab actu secundo, pariformiter nec dari potest formaliter in Deo potentia physica intelligendi radicalis, quia hæc etiam ex suo conceptu dicit distinctionem realem a potentia formalis intelligendi.

Ad Confirm. nego maj. Ad probationem, dari formaliter in Deo actum primum intelligendi, est dari in Deo formaliter id, per quod convenit cum Creatura, quatenus Creaturas potest intelligere potentia physica, concedo, potentia logica, nego; hoc autem datur in Deo, non illud. Quare Deus ratione suæ intellectionis formaliter solum est intelligens ut quod, seu id, quod habet potentiam logicam, hoc est non repugnantiam ad intelligendum.

V. Objic. ult. datur in Deo scientia per modum habitus intellectualis facilitantis ad intellectionem; ergo etiam potentia intelligendi per modum actus primi. Consequentia sequitur; nam sicut in Creaturis habitus dicit distinctionem a potentia intellectiva, ita actus secundus intelligendi distinguitur ab actu primo; unde utrobique par ratio: Antecedens probatur, quia dantur in Deo formaliter virtutes morales, Misericordix, Justitiæ &c., quæ ex suo conceptu sunt habitus; ergo etiam dantur in Deo virtutes intellectuales, videlicet

scientia, sapientia, prudentia per modum habitus.

Confirm. 1. quia datur in Deo formaliter intellectio, quæ est vita in actu secundo; ergo etiam datur Intellectus, seu vita in actu primo.

Confirm. 2. Intellectio est vita in actu secundo; ergo est motus ab intrinseco; motus autem est actus entis in potentia prout in potentia, quod præfertur imperfectionem, & tamen citra imperfectionem competit Deo; ergo etiam potentia intelligendi per modum actus primi.

Resp. nego antecedens; ad probationem Nonnulli Patres apud Vasq. negant, dari in Deo formaliter virtutes secundum conceptum virtutum, putantes, quod virtus essentialiter sit habitus facilitans, quod Deo competere nequit: unde Phil. 7. Eth. 1. dixit: *Neque virtus, neque vitium est Dei, sed quod præstabilis est virtuti*. Alii tamen admittunt in Deo formaliter conceptum virtutis sive moralis, sive intellectualis, putantes, virtutem ex suo conceptu non esse habitum facilitantem ad actum honestum, sed solum esse quamdam determinationem voluntatis ad amandum honestum; unde pro distinctione, & multiplicitate objectorum honestorum multiplicantur in Deo virtutes morales; quia vero in Creaturis huiusmodi determinatio nequit haberi citra accidens superadditum facilitans potentiam, ideo virtutes in Creatis sunt habitus distincti. Quare in forma, si Adversarius velit supponere, quod virtutes ex suo conceptu sint habitus, nego, dari in Deo formaliter virtutes; si nolit id supponere, concedo, dari in Deo tam virtutes morales, quam intellectuales; non tamen potentiam intelligendi: quia hæc solum in suo conceptu importat imperfectionem, non vero habere determinationem ad bonum.

Ad 1. confirm. Intellectio Divina est ipse actus vivendi, non vero actus secundus vivendi, cum non detur actus primus in Deo formaliter.

Ad 2. Intellectio Divina est vita in actu, & non est formaliter motus ab intrinseco, sed solum est actus ab intrinseco, seu a se: quare si nomine actualis vitæ veniat formaliter motus ab intrinseco, nego id formaliter competere Deo; motus enim ex suo conceptu importat imperfectionem; si vero nomine actualis vitæ veniat esse actualitatem perfectissimam ab intrinseco, seu a se, Deus in hoc sensu est for-

formaliter actualis vita perfectissima. Conveniendum itaque semper est in definitionibus ad dirimendas huiusmodi questiones, quæ multum habent de voce.

Ex quibus omnibus fit, quod interroganti, num detur in Deo formaliter intellectus? responderi debeat, non dari, si nomine intellectus veniat potentia physica ad intelligendum; dari vero, si nomine intellectus veniat potentia logica, seu non repugnancia ad intelligendum.

QUESTIO II.

Utrum Dei summa Cognoscitivitas demonstratur ex eisdem Summæ Immaterialitate?

I. **D**Eum esse sapientiam, multipliciter demonstratur: primo quia scientia est perfectio simpliciter simplex. Secundo quia Deus causat scientiam in Creaturis, ergo illam præcontinet; dicitur enim Ps. 93. *Qui plantavit aurem, non audit, aut qui fixavit oculum, non considerat*. Tertio ex Divina libertate, sicut etiam ex Providentia, ex eo quod Deum omnes venerentur ut scelerum Vindicem &c. Quare solum difficultas est, num efficaciter inferatur Dei Sapientia ex prædicato Immaterialitatis, juxta doctrinam Angelici 1. p. q. 49. a. 1. ubi ostendit, radicem cognoscitivitatis esse Immaterialitatem, non secus ac radix volitivitatis est intellectivitas; ut proinde inferatur, Deum esse summe cognoscitivum per hoc præcise, quod sit summe immaterialis. Sic autem ratiocinatur. Cognoscencia in hoc differunt a non cognoscencibus, quod hæc non habeant nisi formam propriam; illa vero nata sint habere formam etiam alterius rei: Siquidem species, seu forma cogniti est in cognoscente; atqui habere formam dumtaxat propriam est habere esse limitatum, & coarctatum, habere vero formas aliarum rerum est quædam extensio, & amplitudo essendi; unde Philosophus 3. de anima, 37. dicit, quod anima sit quodammodo omnia: ergo cognoscencia a non cognoscencibus differunt per hoc, quod ista habeant esse coarctatum; illa vero extensum, & amplum. Subsumit deinde Angelicus. Atqui coarctatio formæ habetur per materiam, ut proinde formæ quo magis sunt immateriales, eo magis accedant ad quandam infinitatem; ergo immaterialitas est radix co-

gnoscitivitatis, & secundum modum immaterialitatis est modus cognitionis. Propterea 2. de anima t. 24. docet Philosophus, quod plantæ non cognoscant propter suam materialitatem; sensus vero fit cognoscitivus, quia receptivus specierum sine materia, & intellectus sit magis cognoscitivus, quia magis a materia separatus, & immixtus, ut dicitur 3. de anima, t. quarto: Unde cum Deus sit in summo immaterialitatis, sequitur, quod sit in summo cognitionis. Hactenus Angelicus, qui qu. 6. art. 1. fusius explicaverat, quoniam pacto omnis coarctatio formæ habeatur per materiam; quia scilicet materia non perficit formam, sed illam communem de se ad multa determinat, & coarctat ad hoc potius, quam aliud compositum constituendum; propterea forma quodammodo finitur per materiam, per hoc quod recepta in materia fiat forma determinate huius rei; contra vero materia, quamvis etiam a forma coarctetur ad hoc potius quam aliud compositum constituendum, nihilominus a forma perficitur, & sic extenditur ad esse perfectius, quam sit ipsa in se; unde materię proprium est coarctare, ac limitare, formæ vero perficere, ac extendi. Ex quibus inferit, quod esse Divinum, utpote summe immateriale, sit illimitatum, atque adeo summe cognoscitivum, formæ vero creatæ, quo magis sunt immateriales, eo minus sint coarctate, ac proinde magis cognoscitivæ, cum cognoscitivitas sit amplitudo essendi.

II. Probatio isthæc quamvis Angelica, ob sui profunditatem non est adeo dilucida, ut loquitur Martínez, quin possint adversus illam multa objectari. Et primo quidem, quia omnis probatio procedere debet ex notioribus, & clarioribus; hæc autem ratiocinatio veritatem aperitissimam, qualis est, Deum esse summe sapientem, infert ex principio obscurissimo, quod immaterialitas sit radix cognoscitivitatis, & secundum modum immaterialitatis sit etiam modus cognitionis. Deinde si minus probat notius per ignotius, saltem probat idem per idem, dum probat, Deum esse summe cognoscitivum, seu habere omnem amplitudinem essendi, per hoc quod sit summe immaterialis, seu excludat omnem coarctationem. Tertio, citò probaret ignotius per notius, ad probatio isthæc non videtur esse a priori, sicut v. gr. ex rationalitate inferitur a priori risibilitas, sed potius videtur inferri ex immaterialitate

cognoscitivitas, sicut ex definitione inferitur definitum, puta quando ex animali rationali inferitur homo.

Denique ratiocinatio Angelici non videtur efficax, cum non possit explicari, quantum sit ista immaterialitas, quæ fundet cognoscitivitatem. Nam primo non potest dici, quod sit negatio materiæ primæ: Bruta enim quamvis materiam primam includant, adhuc sunt cognoscitiva; & Angelus superior, quamvis non magis materiam primam excludat, quam Angelus inferior, adhuc est magis cognoscitivus. Neque dici potest secundo cum Godoy §. 7. quod importet minorem conjunctionem cum materia prima, ac minorem dependentiam ab illa: Non enim est explicabile, quamnam sit minor conjunctio cum materia, ac minor dependentia in Angelo Superiore præ inferiore, ut proinde ille sit magis cognoscitivus; nec est explicabile, quomodo Elephas v. gr. sit magis cognoscitivus, ac piscis, per hoc quod minorem habeat cum materia prima conjunctionem. Neque tertio, quod magis cognoscitiva habeant minorem emissionem a materia; Nisi explicetur idem per idem, aut potius per ignotius. Neque quarto quod materiale idem sonet ac receptivum, atque adeo illud sit magis cognoscitivum, quod est minus receptivum. Nam ex eodem D. Th. quod est magis cognoscitivum, plures formas alienas potest in se habere ac recipere, atque adeo debet esse magis receptivum. Neque dici potest ultimo cum Martinez, nomine materiæ venire eis prope nihil, atque adeo illud esse magis cognoscitivum, quod magis recedit a Nihilo, unde Deus utpote infinite elevatus a Nihilo, est infinite cognoscitivus: Nam plantæ magis recedunt a nihilo, quam elementa, & tamen æque cognoscitivitatem excludunt. Præterquamquod per immaterialitatem sic explicatam posset pariter probari ratio volitivi, ratio activi, ratio justæ &c. quia quo magis aliquid recedit a nihilo, eo magis habet hujusmodi perfectiones.

III. Cajetanus interpretatur D. Th. loco laudato dicens, ideo ex immaterialitate haberi cognoscitivitatem, quia cognoscens, & cognitum sunt magis unum, quam materia, & forma, ut notavit Averroës 3. de anima 5.; liquidum materia non sit forma per hoc, quod illi uniatur, sed ex utraque sit aliquod tertium; atque adeo remanet in suo esse materia, dum unitur formæ: contra vero cognoscens per cogni-

tionem tanquam per unionem intentionalem cum re cognita sit unum intentionali-ter cum illa; unde Philosophus dixit, Animam esse quodammodo omnia, quia scilicet potest omnia cognoscere; & hac ratione immaterialitas dicitur radix cognoscitivitatis; ut proinde Deus summe immaterialis sit summe intellectivus.

Sed contra Cajetanum facit primo, quod ista identitas inter cognoscens, & cognitum non est realis, sed metaphorica; secundo quod illa explicatio rem de se claram, quod scilicet Deus sit sapiens, obnubilat, & obscurat. Idemque dicas adversus explanationem Joannis a S. Th. q. 16. art. 1. ubi ait, cognoscitivum elevari supra modum materiæ, non solum quia cognoscens unitur cum objecto cognito, quod est extra se; quod non convenit materiæ, quæ non potest uniri nisi formæ, quam habet intra se: sed etiam quia cognoscens unitur objecto modo immateriali, hoc est non proprio ipsius materiæ; unitur enim illi non per informationem entitativam, sed per representationem vitalem illius. His autem explanationibus rejectis, ut doctrinæ Angelici ab objectis vindicetur, conabor ostendere, Primo verum esse, quod immaterialitas coincidat cum cognoscitivitate, si perpendatur, quid veniat nomine immaterialitatis. Secundo in ratiocinatione Angelici non explicari idem per idem, nec notius per ignotius. Tertio immaterialitatem rite intellectam esse radicem cognoscitivitatis, ita ut ex illa tanquam a priori hæc inferatur. Quarto omnem etiam substantiam completam expectem materiæ corporeæ esse intellectivam: Ex quo deinde sequitur, Deum esse summe Sapientem, quia est in summo immaterialitatis, ac repugnare substantiam immaterialem completam non cognoscitivam; Sicut etiam sequitur, substantiam omnem intellectivam esse separantem volitivam, & etiam liberam.

IV. Dico itaque 1. cum Lumbier de Attributis n. 541. & de Scientia Dei n. 21. Immaterialie coincidit cum cognoscitivo, ita ut omne cognoscitivum sit immateriale, & quod est magis cognoscitivum sit magis immateriale, si nomine immaterialitatis non veniat negatio materiæ entitativæ, sed negatio materiæ exercitivæ, seu negatio exercitii ad materiam spectantis, quod est, pati, recipere, & componere cum forma; in quo sensu Philosophus 2. de anima dixit, plantas non cognoscere propter suam materialitatem; sensum vero ef-

fe cognoscitivum, quia est receptivus specierum sine materia.

Prob. ex una parte certum est, cognoscitivitatem non haberi per negationem materiæ entitative sumptæ; aliter bruta non possent esse cognoscitiva, cum non excludant materiam; & Angelus superior non posset esse magis cognoscitivus, quam inferior, cum æque materiam excludant: ex altera parte, si nomine immaterialitatis veniat negatio materiæ exercitive; seu negatio exercitii ipsius materiæ, quod est pari ac recipere, optime explicantur omnia, præsertim quod omne cognoscitivum sit immateriale, & quod perfectius cognoscitivum sit magis immateriale; ergo in hoc sensu immateriale, & cognoscitivum coincidunt.

Prob. secunda pars antecedentis: & primo quidem universim verum est, quod omne cognoscitivum sit immateriale exercitive; caret quippe exercitio materiæ relate ad formam cognitam, entitative sumptam; nunquam enim cognoscens qua tale recipit in se formam cognitæ entitative, sed solum repræsentative; ex. gr. oculus cognoscendo parietem non recipit in se formam parietis, sed solum ejus imaginem: ubi ex opposito non cognoscitiva recipiunt entitative formam, quam habent; v. gr. planta formam plantæ, quin possit aliam formam in se recipere, nisi solum entitative; dum enim planta recipit formam accidentalem caloris, vel frigoris, non potest illam aliter recipere, quam per informationem immediatam; ergo omne cognoscitivum est immateriale exercitive, seu aptum natum habere formam alienam, & amplitudinem essendi absque exercitio immediato ipsius materiæ relate ad illas formas entitative sumptas. Unde apparet, quid intersit inter aerem v. gr. & oculum, dum uterque recipit in se speciem coloris; aer enim, utpote non cognoscitivus, solum habet in se speciem coloris entitative sumptam, nullatenus vero formam coloris; contra vero oculus habet tum speciem coloris entitative, tum formam coloris repræsentative & intentionaliter; ac proinde differt oculus ab aere non cognoscitivo per hoc, quod habeat in se formam alienam, & amplitudinem essendi absque exercitio materiæ immediato relate ad talem formam; quamvis enim oculus recipiat visionem coloris, non recipit tamen entitative, & immediate ipsam formam coloris. Præterea si in aere, vel ligno poneretur divinitus visio coloris, aer diceretur quidem habens vi-

sionem coloris, sed non diceretur videns colorem, quia solum materialiter haberet in se repræsentationem coloris, non vero intentionaliter, & cum amplitudine essendi, sicut illam habet oculus, dum attingit colorem.

V. Deinde verum pariter est, quod cognoscitivum perfectius sit minus immateriale exercitive, quatenus minus habet de exercitio materiæ etiam mediato, seu relate ad species intentionales formarum alienarum, ut constat inductione; Etenim Deus, utpote summe cognoscitivus, est in hoc sensu summe immaterialis, quatenus habet in se formas omnes alienas, non solum non recipiendo illas entitative, & immediate, sed nec recipiendo illas mediate, hoc est non recipiendo species illarum aut impressas, aut expresse, cum non indigeat ad cognoscendum specie objecti; nec cognoscat cognitione distincta ab ipso cognoscente; cum enim eminenter in se contineat Deus omnes cognitiones creatas, ac omnia earum objecta, consequenter habet in se quicquid perfectionis habetur in cognoscitivis creatis absque ulla receptione, & exercitio materiæ, aut alia imperfectione. Præterea Angelus, utpote minus cognoscitivus, quam Deus, habet aliquam exercitivam materialitatem relate ad formas alienas, quas tamen est in se habere, eo quod recipiat in se earum species impressas, & cognitiones, atque adeo habet aliquod exercitium materiæ immediate relate ad species, & cognitiones, & mediate relate ad formas, quas habet in se repræsentative. Homo vero, qui est minus cognoscitivus, quam Angelus, non solum recipit species, & cognitiones objectorum, sed etiam phantasmatas, & ideo est exercitive magis materialis, quam Angelus. Brutum cum sit minus cognoscitivum, quam homo, ut possit percipere objecta præsentia, futura, distantia, debet plures habere species materiales, quam homo: qui potest simul & unico actu ea cognoscere. Planta vero, quæ nullatenus est cognoscitiva, nullam potest habere formam alienam sine exercitio immediato materiæ relate ad illam entitative sumptam; & ideo Philosophus dicit, plantas propter materialitatem non cognoscere. Rursus inter Angelos, & inter bruta magis cognoscitivum est minus materiale exercitive, modo explicato. Angelus enim superior, cum sit magis cognoscitivus, habet species universaliores, & clariiores, & ideo pauciores, &

minus intensas species recipit; unde minus habet de exercitio materiæ, etiam relate ad species clariore minus intensas; quia quamvis species magis intensa, qua indiget Angelus inferior, ut possit attingere objectum ea claritate, qua attingitur a superiore, sit species indivisibilis, est tamen virtualiter divisibilis, quatenus æquivalet pluribus gradibus speciei divisibilis; & consequenter relate ad hujusmodi species habetur majus exercitium materiæ saltem virtuale. Idemque dicas de brutis: Elephas enim, qui est magis cognoscitivus, quam piscis, & oculus perfectior, indiget specie minus intensa, & minus universali ad percipiendum objectum ea claritate, qua percipitur a cognoscitivo minus perfecto. Similiter talus v. gr. qui est sensus minus perfectus, quam oculus, ut percipiat objecta, qua potest simul oculus percipere, debet accedere ad illa objecta, & sic plures ubicationes, durationes, species, & actus debet recipere; & oculus plures actus recipere debet, quam imaginatio, qua simul potest imaginari præterita, & futura; & sic de aliis. Quare inductione constat, omne cognoscitivum esse exercitive immateriale, & perfectius cognoscitivum in altiori gradu hujusmodi immaterialitatem participare.

VI. Dico 1. D. Th. & Philosophus docentes, cognoscitivitatem consistere in immaterialitate exercitiva, prout ostendimus in prima Conclusionem, non explicant idem per idem, nec notius per ignotius.

Prob. quoties aliquid explicatur per genus, & differentiam, seu per ejus definitionem, non explicatur idem per idem, nec notius per ignotius; cito apud rusticos magis innoscat definitum, quam definitio; atqui juxta doctrinam D. Tho. & Philosophi cognoscitivum explicatur per genus, & differentiam; ergo &c. Probatur minor, quia dum dicitur, cognoscitivum esse quod natum est habere formas alienas sine materia exercitiva, explicatur essentia cognoscitivitatis per prædicatum genericum; (etenim etiam non cognoscitivum, ut aqua, natum est habere formam alienam, puta calorem, frigus) quam per prædicatum differentiale: siquidem a non cognoscitivo differat per hoc, quod formas alienas habere potest sine exercitio immediato materiæ relate ad illas formas entitative sumptas.

Confirm. Bene explicatur communiter vivens dicendo, quod sit principium motus ab intrinseco; ergo bene pariter expli-

Paris I.

catur cognoscitivum dicendo, esse id quod natum est habere formas alienas sine materia exercitiva. Prob. consequentia; ideo rite explicatur ratio viventis per principium motus ab intrinseco, quia inductione constat, Omne vivens moveri ab intrinseco, & eo perfectius aliquid vivere, quo magis movetur ab intrinseco; atqui pariter inductione constat ex dictis, omne cognoscitivum esse immateriale exercitive: & eo perfectius aliquid esse cognoscitivum, quo magis est exercitive immateriale; ergo apte pariter est explicatio ita cognoscitivi.

VII. Dico 3. Ita cognoscitivum coincidit cum immateriali exercitive, ut tamen ratiocinatio D. Thom. inferens in Deo ex immaterialitate summa cognoscitivitatem summam non probet cognoscitivitatem ex immaterialitate exercitiva, neque ex immaterialitate entitativa, sed ex immaterialitate præcisa ab utraque. Ita Cornejo de Scientia Dei disp. 1. dub. 2. Lumbier de Attrib. n. 553.

Prob. Et sane quod non inferatur a priori cognoscitivitas ex immaterialitate exercitiva, patet, quia immaterialitas exercitiva est solum conceptus clarior cognoscitivitatis, sicut conceptus principii motus ab intrinseco est conceptus clarior, ac definitio viventis: atque adeo sicut non demonstratur ratio viventis ex ratione principii motus ab intrinseco, ita non demonstratur cognoscitivitas ex immaterialitate exercitiva. Neque demonstratur ex immaterialitate entitativa; cum bruta sint cognoscitiva, quamvis non careant materia entitative sumpta. Demonstratur proinde ex perfectione immaterialitatis ut præcipientis ab immaterialitate entitativa, exercitiva; & argumentum D. Thomæ videtur hoc pacto procedere: Ex perfectione immaterialitatis, seu ex perfectione positiva excludentis materiam, ejusque coarctationis, ac conditionis in operando provenit ratio cognoscendi; sed Deus est hoc pacto summe immaterialis; ergo summe cognoscitivus. Major probatur, tum quia ex elevatione rei spiritualis, atque ex elevatione rei corporeæ supra condiciones coarctativas materiæ proprias provenit amplitudo essendi, & quod possint accipi formæ aliarum rerum representative; tum etiam quia experientia constat, cognoscencia eo esse perfectiora, quo magis a materia, aut a conditionibus materiæ elevantur.

Confirm. 1. quia quoties quod prædicatur ita se habeat, ut unum explicet vel causam,

E sam,

nam, vel negationem causæ relatæ ad alterum, illud dicitur esse ratione nostra priori, & illativum posterioris; & ideo dicitur communis, Aseitatem explicantem sufficientiam essendi, atque adeo negationem causæ extrinsecæ, pro priori se habere ad illimitationem essendi; ergo cum immaterialitas explicet negationem causæ intrinsecæ materialis, & conditionum coarctativarum materiæ, pro priori se habet ad cognoscitivitatem, quam trahit.

Confirm. 2. quia quoties ænigma unius prædicati est in priori ad ænigma alterius, toties illud dicitur esse radix hujus: v. gr. Intellectivum dicitur esse prius volitivo, quia ænigma intellectivi est intellectio, quæ est in priori ad ænigma volitivi, quod est volitio; Sed ænigma immaterialitatis est ipsum esse exclusivum materiæ, & conditionum coarctativarum, quod est in priori ad cognitionem, quæ est ænigma cognoscitivitatis, seu amplitudinis essendi, cum cognitio pullulet ex cognoscitivitate; ergo immaterialitas explicata est in priori ad cognoscitivitatem. Esse autem materiam de se coarctativam, ex eo etiam fit perspicuum, quia inductione constat, omne materiale esse limitatum, nec exercere suas physicas operationes absque physica approximatione; contra vero quod est immateriale, per cognitionem se extendit ad absens, & ad possibile, & ideo dicitur habere amplitudinem essendi.

VIII. Ex dictis patet, quomodo in Deo ex Aseitate inferatur illimitatio essendi, quod enim causam excludit, est sibi sufficientia ad essendum, atque adeo est omne esse: Ex illimitatione autem inferitur immaterialitas; quod enim est ens illimitatum, carce subiecto, & forma; quandoquidem esse illimitatum excurrit ad omne esse, subiectum vero non excurrit ad formam, nec forma ad subiectum: Ex immaterialitate domum inferitur cognoscitivitas, quia quod est omne esse absque ulla materia, aut exercitio materiæ, debet omnes formas alienas in se eminenter continere, atque adeo debet esse cognoscitivum.

In Angelis tamen carentibus materia entitativa, ut notat Aureolus, ex spiritualitate inferitur cognoscitivitas tanquam a signo; cum enim inductione constet, omne cognoscitivum esse immateriale exercitive, & eo perfectius esse cognoscitivum, quo magis est immateriale, recte colligitur, quod carens materia prima careat etiam præ aliis entibus materialibus exercitio ma-

teriz primæ; quare cum Angelus magis debeat carere exercitio materiæ primæ, quam brutum; sibi utrumque propter carentiam aliqualem materiæ exercitive est cognoscitivum, a fortiori erit cognoscitivus Angelus, & quævis alia substantia spiritualis ex majori carentia materiæ exercitive. Quamvis autem in Angelis ex immaterialitate entitativa tanquam a signo inferatur cognoscitivitas, & ex cognoscitivitate immaterialitas exercitiva, recte deinde ex immaterialitate præscindente ab entitativa, & exercitiva inferatur priori cognoscitivitas. Etenim ex doctrina Philosophi, & D. Th. sæpe fit optime huiusmodi regressus demonstrativus. Sic ex operatione hominis nobilissima, videlicet ex intellectu inferimus a posteriori nobilitatem principii intellectivi, & immaterialis; & deinde ex nobilitate principii intellectivi, & immaterialis inferimus a priori nobilitatem effectus, seu operationis intellectivæ pariter immaterialis.

IX. Quæri solet hic, Utrum repugnet substantia spiritualis non intellectiva? Et communius docent, repugnare. Ratio ex dictis est, quia implicat substantia immaterialis entitativæ, cuius operatio non fit pariter entitativæ immaterialis; ergo a fortiori, cuius operatio non fit immaterialis exercitive: si enim brutum entitativæ materiale adhuc habet aliqualem carentiam materiæ exercitivæ, & est cognoscitivum; a fortiori debet id competere substantiæ entitativæ immateriali; atque adeo implicat substantia immaterialis non cognoscitiva; cum autem substantia omnino immaterialis non possit aliter cognoscere objectum, quam per intellectiōem, sequitur, quod debeat esse etiam intellectiva.

Confirm. 1. ex Falso, quia omne prædicatum importans perfectionem simpliciter simplicem debet esse radix alicujus operationis, & principii operativi consentanei, eo quod omne esse sit propter operari; atqui immaterialitas entitativa est prædicatum importans perfectionem simpliciter simplicem, videlicet spiritualitatem, nec potest assignari operatio magis illi consentanea, quam cognitio, quæ pariter est spiritualis, & exercitive immaterialis; ergo immaterialitas entitativæ radicat cognitionem, & principium cognoscitivum, atque adeo repugnat substantia spiritualis non cognoscitiva.

Confirm. 2. quia esse est propter operari, & esse perfectius propter operationem per-

perfectiorem; sed omnis substantia immaterialis est perfectior materiali, eo quod illa sit independens, haec vero dependens a materia; ergo omnis substantia immaterialis habere debet aliquam operationem perfectiorem, quam substantia materialis; sed non haberet hanc operationem perfectiorem, si substantia materialis posset habere operationem, quae est vita in actu secundo; & attractiva alienae formae sine exercitio materiae relate ad illam; (sicut habet brutum, utpote cognoscitivum) substantia vero immaterialis huiusmodi operationem non haberet; cui repugnat substantia immaterialis, cum non competat operatio, quae sit vita in actu secundo; & attractiva formae alienae absque exercitio materiae relate ad illam: huiusmodi autem operatio non potest esse aut vegetatio, aut insensatio, ut patet; ergo debet esse intellectio, atque adeo repugnat substantia immaterialis non intellectiva.

X. Obijc. 1. Non implicat accidens spirituale non intellectivum, ut est gratia supernaturalis; ergo neque implicat substantia spiritualis non intellectiva.

Confirm. quia dari potest substantia materialis cognoscitiva, ut sunt bruta; ergo poterit ex opposito dari substantia immaterialis non cognoscitiva.

Resp. 1. per instantiam; Non repugnat accidens supernaturale non intellectivum, ut est gratia; ergo neque repugnat substantia supernaturalis non intellectiva. Directe deinde nego consequentiam; disparitas est, quia accidens non queritur propter se, sed propter substantiam, ad quam ordinatur; & ideo satis est, quod accidens spirituale non intellectivum ordinetur ad substantiam intellectivam; sicut satis est, quod accidens supernaturale ordinetur ad substantiam naturalem, cito repugnet substantia creata supernaturalis: sic etiam sufficit, quod potentia volitiva ordinetur ad intellectivam, quam praesupponit, eo quod volitio sit inclinatio ad objectum jam apprehensum; cum nihil sit volitum, quin praecognitum: quare omnis substantia immaterialis debet esse intellectiva formaliter, & ut quod, accidens vero immateriale; satis est, quod sit intellectivum reductive, quatenus vel adjuvat intellectiorem, vel infert vim cognoscitivam in supposito.

Ad confirm. recurrit eadem instantia; Ex eo enim, quod possit dari substantia naturalis intellectiva, non sequitur quod ex opposito dari possit substantia supernatura-

lis non intellectiva; ergo ex eo quod dari possit substantia materialis cognoscitiva, neque sequitur, quod viceversa dari possit substantia immaterialis non cognoscitiva; sic etiam dari potest substantia incompleta subsistens, ut est anima, & materia, quin possit dari substantia completa non subsistens. Universum enim dari possunt duo praedicata non mutuo connexa; sicut enim cognoscitivum connectitur cum substantia, quin tamen substantia connectatur cum cognoscitivo; omne enim cognoscitivum est substantia, & non omnis substantia est cognoscitiva; sic etiam subsistens connectitur cum substantia, quin connectatur substantia cum subsistente; omne enim subsistens est substantia, at non omnis substantia est subsistens, cum forma materialis sit substantia, & non sit subsistens; ita connectitur substantia spiritualis cum cognoscitivo, quin connectatur cognoscitivum cum substantia spirituali. Adde, quod licet dari possit substantia materialis cognoscitiva, non tamen intellectiva; quare sicut repugnat substantia materialis intellectiva; ita repugnat ex opposito substantia immaterialis, quae non sit intellectiva.

XI. Obijc. 2. In tantum repugnet substantia immaterialis non cognoscitiva, quia operatio pullulans ex tali substantia deberet esse perfectior operationibus pullulantibus a substantia materiali; atque adeo si ex substantia materiali, puta bruti, prodire potest actio cognoscitiva, a fortiori ex substantia immateriali; sed haec ratio est nulla; ergo nulla conclusio. Probatior minor, quia dari potest aliqua substantia immaterialis, cujus nulla sit operatio; sicut enim datur de facto materia corporea, & probabiliter dari potest materia spiritualis, cujus nulla sit operatio, sed totum esse ordinetur ad recipiendam formam, ejusque operationes; ita potest dari substantia immaterialis completa, cujus nulla sit operatio.

Confirm. 1. quia non implicat substantia materialis completa, quae nullam habeat operationem materialem; & huiusmodi est in multorum sententia Caelum Empyreum, quod ex D. Thom. in 2. dist. 2. q. 2. art. 3. non est operativum, & solum ordinatur, ut sit Beatorum Sedes, ad quod non spectat quod operetur; ergo neque implicabit substantia immaterialis, quae nullam habeat operationem, atque adeo non sit cognoscitiva, sed esset veluti Sedes Angelorum, si in alia providentia solum Angeli

essent a Deo creati, & ad beatitudinem ordinati. Neque hinc sequitur, quod hujusmodi substantia non operativa esset frustranea, quippe quæ licet non ordinaretur ad operationem, ordinaretur tamen ad finem sublimiorem, videlicet ut sit Beatorum Sedes, ad quod non requiritur, quod sit substantia operativa. Sic post diem Judicii Cæli non erunt frustra cum suis potentis, quamvis non influant amplius in sublimitate, quia tunc cedent in ministerium hominis glorificati; Sic etiam in Beatis non erit frustra potentia nutritiva, quamvis nunquam sit proditura in actum secundum, quia deservit ad integrandum Corpus Beati.

Confirm. 2. quia immaterialitas nullam videtur habere connexionem cum amplitudine essendi propria cognoscitivorum; etenim ratio immaterialitatis, seu spiritualitatis solum dicit penetrabilitatem cum alia re a se divisa: sed penetrabilitas non fert de se intellectivatem; aliter materia spiritualis, si esset possibilis, deberet esse intellectiva; & accidentia materialia, quæ independentem a quantitate possunt penetrare, deberent pariter esse cognoscitiva, saltem reductivè, quod est falsum: ergo non repugnat substantia immaterialis non cognoscitiva.

Resp. nego minorem. Ad probationem nego antecedens. Omne enim esse est propter operari, juxta communissimum sensum, & celebre effatum; unde esset in natura frustra, quod aliquo pacto ad operationem non ordinatur. Sic materia tam corporea, quam spiritualis ordinatur ad operationem formæ, quam recipit; quod si ad illam non ordinaretur, in omnium sententia esset frustranea. Nec alia de causa dicimus, Angelos de facto esse substantias completas, nec posse uniri ad faciendum unum per se cum materia five corporea, five spirituali, nisi quia hujusmodi materia non indiget ad suas operationes ponendas; ac proinde hujusmodi materia esset in illis frustranea, posito quod non ordinaretur ad operationes totius compositi.

Ad 1. confirm. etiamsi transmutatur, quod non repugnet substantia materialis non operativa, & quod ita de facto sit Cælum Empyreum, non proinde sequitur, ut notas Lumbier de Attributis num. 560. quod non repugnet substantia immaterialis non operativa. Disparitas est, quia materialitas propter suam coarctationem capax est, ut contineatur intra solum gradum essen-

di; secus vero immaterialitas, quæ de se fert amplitudinem essendi, atque adeo cognoscitivitatem. Cæterum probabilius videtur etiam substantia materialis non operativa repugnare, cum omne esse sit propter operari; esto etiam operatio ad altiore aliquid finem ordinari possit, sicut Empyreum, ejusque operatio ordinatur ad Sedem Beatorum. Ad auctoritatem D. Th. putantis loco laudato, Empyreum non esse operativum, putant multi D. Thom. retraxisse deinde sententiam 1. p. qu. 66. art. 3. ad secundum, & quodlib. 6. artic. 19. ubi docet; Cælum Empyreum influere sine motu. Responderi etiam potest cum Godoy nu. 188. D. Thomam negasse Empyreum actuale duntaxat influxum, non vero vim operativam; nam in 2. dist. 2. q. 2. art. 3. ad 2. hæc habet: *Lux Cæli Empyreï non est per modum fulgoris irradiantis in alia corpora, & ideo nec etiam illuminationem in alia corpora influit; cujus ratio est, quia cum sit virtuosissimum, & maximum, sine lumine Solis omnia illuminaret.* Verius tamen alii respondent, D. Thomam solum negasse Empyreum influxum lucis, non vero alios influxus, ratione quorum in diversis terræ partibus sub eodem climate, & prospectu astrorum diversi effectus producuntur. In aliis Cælis post diem Judicii cessabit influxus in sublimitate, eo quod cesset finis talis operationis; & propter eandem rationem cessat in Beatis operatio virtutis nutritivæ, quia per hoc sequatur, quod hujusmodi entia solum intra gradum essendi contineantur, quin sint operativa.

Ad 2. Immaterialitas substantia complete infert quidem penetrationem, sed simul infert cognoscitivitatem, ut ostendimus; cum enim, experientia teste, magis aliquid elevatur a conditionibus, & exercitio materiæ, eo magis sit cognoscitivum, seu majorem habeat amplitudinem essendi, & magis sit capax habendi formas alienas; bene sequitur, quod carens simpliciter materia careat pariter exercitio immediato materiæ relate ad formas alienas, magis quam careat tali exercitio substantia materialis, atque adeo magis sit cognoscitivum, quam quælibet substantia materialis; ac proinde sit brutum est cognoscitivum, a fortiori erit cognoscitiva substantia immaterialis cognitione sibi consentanea, videlicet spirituali, & intellectiva; & cum Deus sit summe immaterialis, & elongatus a conditionibus materiæ, consequenter est summe intellectivus, immo est ipsissi-

ma intellectio: Materia spiritualis, cum non sit substantia completa, sufficit, quod reductivè sit intellectiva, quatenus ordinatur ad operationem formæ Angelicæ: Accidentia materialia non sunt cognoscitiva, ne reductivè quidem, si non deserviant ad cognitionem materialem substantiæ materialis, quia nullam habent immaterialitatem propriam entium cognoscitivorum, quamvis independentè a quantitatè dicantur, improprie tamen penetrabilia.

XII. Quæres hic etiam, Utrum omnis substantia immaterialis sicut est intellectiva, ita pariter debeat esse volitiva? Et communius etiam affirmant cum Angelico 1. p. q. 19. a. 1. Ratio est, quia sicut unicuique rei naturali inest entitativè propria forma, ita intellectui cognoscenti formam alienam inest intelligibiliter talis forma; atqui quilibet res naturalis duplicem habet habitudinem ad formam naturalem, ut quando illam non habet ad eam tendat, quando habet, in ea quiescat; & eodem modo tendit ad perfectiones & proprietates talis formæ, ut aqua ad frigus, lapis ad centrum; quæ habitudo in rebus carentibus cognitione appellatur appetitus naturalis; ergo pariter natura intellectus consimiles debet habere habitudines ad formas apprehensas, ita ut quando illas non habet, si apprehendat ut consentaneas, illas desideret, si apprehendat ut malas, & disconvenientes, ab illis fugiat; & de iis gaudeat post adeptionem, si sint bonæ; tristetur, si sint malæ; quæ habitudo in habente intellectum dicitur appetitus rationalis, seu voluntas; sicut in habente sensum dicitur appetitus animalis; quare repugnat substantia immaterialis intellectiva, quæ non sit pariter volitiva.

Confirm. quia substantia intellectiva esset imperfectior substantia materiali cognoscitiva brui, si hæc per appetitum animale posset inclinari ad assequendam formam cognitam sibi convenientem, substantia vero immaterialis non posset per appetitum rationale inclinari ad assequendam formam intellectam sibi consonam; ergo repugnat substantia intellectiva, quæ non sit intellectiva.

XIII. Quæres demum, Utrum substantia immaterialis intellectiva, & volitiva debeat pariter esse libera, ita ut repugnet volitivum non liberum? Et communius pariter affirmant cum eodem Angelico 1. p. q. 84. ar. 4. Ratio est, quia omne intellectivum ratione immaterialitatis triplicem habet uni-

versalitatem, videlicet in essendo, per hoc quod possit esse intelligibiliter omnia; in iudicando, per hoc quod possit iudicare de quacunque re, num sibi sit conveniens, aut disconveniens, aut indifferens; ac demum in appetendo, per hoc quod possit velle, aut nolle, quod propositum est ut conveniens, aut disconveniens, aut indifferens. Et in hoc stat formaliter libera. Etenim quamvis ad prosequendum bonum ut sic voluntas necessitetur, relate tamen ad bona particularia, cum plurima sint impossibilia, debet voluntas posse alterutrum ex impossibilibus prosequi, cum in singulis reperiat suum specificativum formale, nempe rationem boni; quoties autem inter duo impossibilia potest alterutrum eligere, est formaliter libera; ergo omnis substantia immaterialis non solum est intellectiva, & volitiva, sed etiam formaliter libera; atque adeo Deus summe immaterialis est summe intellectivus, & volitivus, ac perfectissime liber.

QUÆSTIO III

An Deus per scientiam simplicis intelligentia cognoscat possibilia in se ipso, & in seipsis.

I. Notandum 1. in hoc differre unum a cognosci ex alio, & cognosci in alio, quod cognosci unum ex alio sit, cognitionem unius causare cognitionem alterius, ut quando ex præmissis cognoscitur conclusio, vel ex fumo ignis: Cognosci vero unum in alio, non importat duas cognitiones, unam ab alia causatam, nec importat unam cognitionem quomodocumque terminatam ad utrumque objectum; nam qui videt causam, & effectum, v.g. Angelum, & eius cognitionem, non dicitur videre effectum in causa, & qui videt Petrum, ac speculum, non dicitur videre Petrum in speculo: quare videre unum in alio est, dari unam cognitionem directè, terminatam ad A, quod tamquam medium cognitionem determinet ad cognoscendum indirectè B, propter connexionem cum illo: Sic dicitur videri Petrus in speculo, quando visio speculi directè determinat ad cognoscendum indirectè Petrum: sic etiam videmus Cæsa-rem in imagine, quando species propria Imaginis propter similitudinem Cæsaris, quam continet, est ratio, & medium, cur cognoscatur Cæsar: Sic possibilia videntur in

Deo tamquam in medio cognito, quando Deus imago, & idea possibilem attingit immediate, & est ratio, cur possible in eodem ipso Deo indirecte attingantur.

Notandum 2. quod cognoscere obiectum in seipso sit ipsum obiectum esse rationem, cur cognoscatur, sive quia immediate causat cognitionem sui, sive quia causat hanc cognitionem mediate per speciem impressam sumit, ut accidit in Creatis; sive quia est ratio determinans intellectum ad sui cognitionem, ut accidit relate ad cognitionem Divinam. Sic Deus in sententia Societatis praevidet futura libera absoluta, & conditionata in seipsis, non quia cognitio Divina ab illis immediate, vel mediate causatur, sed quia iis positus pro sua temporis differentia, aut pro statu conditionato, datur immediate determinativum, cur in Deo sit illorum cognitio; atque adeo huiusmodi obiectum est simul terminativum, & determinativum Divinae cognitionis. His explicatis

II. Dico 1. Deus videt formaliter possible in se ipso. Ita communiter cum D. Thom., Suar. contra Nominales, & Vafq. disp. 60.

Prob. A, videri formaliter in B, est per visionem directe terminatam ad B, ob connexionem, quam habet cum A, simul cognoscere indirecte ipsum A; & hoc pacto diximus in calce disput. antecedentis, Beatos videre in Verbo Creaturas: sed Deus videndo directe seipsum, ex vi talis obiecti ut medii cogniti, propter continentiam, quam habet possibilem, simul indirecte cognoscit possible; ergo Deus videt formaliter possible in seipso.

Juxta hunc sensum admittimus cum Hericé, Pallavic., Patel. n. 96. contra Martinez disp. 4. sect. 3. quod sicut Deus videt possible in se ipso, ita etiam videat se ipsum in Creaturis; cum enim Creatura essentialiter dicant respectum ad Deum, tamquam ad suum principium (quae habitudo cognosci nequit, nisi cognitio simul Deo indirecte) ideo Deus videndo directe Creaturas, videt indirecte seipsum, atque adeo videt seipsum in Creaturis. In quo etiam sensu Deus cognoscit seipsum indirecte in cognitionibus Creaturarum terminatis ad Deum; cum non possint huiusmodi cognitiones directe cognosci, non cognitio indirecte termino, ad quem dicunt essentialiter respectum.

Confirm. Deus videt Patrem in Filio, quia Filius dicit essentialiter respectum

ad Patrem, ut ad sui principium; ergo etiam videt seipsum in Creaturis, quia Creaturae dicunt essentialiter respectum ad Deum, ut ad sui causam. Antecedens est D. Thom. in 1. dist. 27. quest. 2. art. 2. ubi habet; *Licet Pater non se cognoscat in Filio, sicut in obiecto, vel specie, quia sic Filius haberes aliquam rationem principii relate ad Patrem, cognoscit tamen seipsum in Filio, in quantum videt, Filium esse similitudinem suam, sicut principium videtur in eo, cuius est principium, quamvis etiam in seipso videatur.*

III. Dices 1. Si Deus cognosceret possible in se ipso, daretur in Deo duplex cognitio, altera, quae esset in priori terminata ad essentiam Divinam, altera in posteriori terminata ad possible; sed hoc nemo dixerit; ergo Deus non cognoscit possible in seipso, & consequenter nec se ipsum in Creaturis. Minor patet, quia si daretur duplex cognitio, unum cognosceretur ex alio, non vero in alio.

Confirm. quia cognitio terminata directe ad essentiam esset cognitio terminata ad obiectum, quod tamquam medium cognitum inferret cognitionem possibilem; sed de ratione medii est mediare inter duo; ergo essentia Divina medietur inter cognitionem ipsius essentiae, & cognitionem possibilem; atque adeo daretur in Deo duplex cognitio.

Resp. nego sequelam; daretur enim una tantum cognitio terminata ad utrumque correlativum, nempe ad Omnipotentiam, & possible; cum relativa ex Philosopho sint simul natura, & cognitione; licet ea cognitio directe terminetur ad Omnipotentiam, & indirecte ad possible, quia intrinseca cognoscibilitas Omnipotentiae fert, ut in ipsa cognoscantur possible, quae praetercontinet, & non e converso. Quare in hoc tantum sensu dici potest, quod ratione nostra cognitio Divina pro priori terminetur ad Omnipotentiam, & pro posteriori ad possible, quatenus Omnipotentia est ratio, cur cognoscantur indirecte possible, & non e contra; unde solum habetur prioritas a substituendi consequentia. Idem dicas, quando in speculo cognoscimus Petrum, aut in Caesaris imagine Caesarem, nec non quando in Creaturis cognoscitur Deus tamquam earum principium; tunc enim huiusmodi cognitio pro priori terminatur ad Creaturas, quia Creaturae sunt ratio, cur attingatur indirecte Deus.

Ad confirm. solum medium reale mediat inter duo realiter distincta, non vero medium obiectivum; sufficit enim, quod Omnipotentia ratione sua cognoscibilis manifestet directe seipsam, & indirecte possibilia, ut dicantur possibilia cognosci in Omnipotentia tanquam in medio cognito, quin deus duplex cognitio, inter quas mediet Omnipotentia.

Hic autem adverte, posse claritatis gratia supponi, quod Omnipotentia aut sit ipsa formalis possibilitas creaturarum, aut connectatur cum earum possibilitate: licet etiam dato, quod non connecteretur, (quatenus si per impossibile deficeret possibilitas v. gr. Leonis, non proinde deficeret Omnipotentia secundum suum esse absolutum, sed solum deficeret secundum esse respectivum ad Leonem, & idcirco sit magis necessaria Omnipotentia, quam possibilitas Leonis, & omnium Creaturarum) nihilominus adhuc juxta hanc sententiam dici posset, quod Deus videret possibilita in seipso, hoc est in eo respectu ad possibilitatem v. g. Leonis sibi intrinseco, & absolute necessario, licet sit magis necessarium ipsum esse absolutum Omnipotentia, quam hic respectus ad possibilitatem Creaturarum: Ad eum modum, quo in decreto de condendo Antichristo Deus videt Antichristum futurum, licet hujusmodi decretum intrinseco Deo non habeat necessitatem illam, quam habet Deus, sed sit omnino contingens.

IV. Dices 2. Si Deus cognosceret seipsum in Creaturis, Creatura essent obiectum directum, atque adeo motivum, & specificativum cognitionis Divinae; sed repugnat, Divinam cognitionem moveri intentionaliter, & specificari a Creaturis: ergo.

Respond. concedo, quod Creatura essent obiectum directum. Utrum autem essent etiam obiectum motivum, & specificativum, constabit ex mox dicendis pro secunda conclusione, cum in hoc sit æquivocatio. Illud est certum, quod ratio cognoscendi in Deo sit unice ipse Deus; Creatura vero possunt solum esse obiectum terminativum, ac determinativum, tanquam conditio.

V. Dices ultimo. Si Deus cognosceret seipsum in Creaturis, cognosceret se imperfecto modo, cum medium illud sit imperfectum; ergo nequit seipsum in Creaturis cognoscere.

Respond. quod in tali medio imperfecto

Deus cognosceret se modo minus perfecto, quam cognoscat se in sua essentia, non tamen cognosceret se modo imperfecto positive; ut mox dicemus etiam de cognitione Divina terminata ad possibilia in se ipsis, quæ est quidem minus perfecta formaliter, quam sit cognitio possibilium in Divina essentia, non tamen est cognitio imperfecta: Sicut Omnipotentia est attributum ratione nostra minus perfectum, quam attributum bonitatis, aut prædictum Aseitatis, non est tamen imperfectum. Effet imperfecta in Deo cognitio sui met in Creaturis, si esset abstractiva, hoc est per species Creaturarum, sicut nos Deum cognoscimus per Creaturas: at Deus cognoscit se in Creaturis per hoc solum, quod Creaturae sint ratio, cur Deus cum iis connexus cognoscatur; quæ cognitio neque est rigorose abstractiva, neque rigorose intuitiva, nisi lis sit de voce, quippe quæ non repræsentat directe ipsum Deum.

VI. Dico 2. Possibilia non solum a Deo cognoscuntur in seipso, sed etiam in seipsis. Ita Arriag. disp. 19. Hevic. disp. 15. Granad., & alii Recentiores cum Vasq., & Nominal., qui negant connexionem Omnipotentia cum possibilibus, putantes, ægata hac connexionem non posse aliter possibilia a Deo cognosci, quam in seipsis. Est tamen contra Thomistas, Molin., Suar. lib. 3., Lumbier.

Prob. Hic modus cognoscendi possibilia in seipsis importat de se perfectionem deputatam ab imperfectione; ergo non est Deo denegandus. Quod importet perfectionem, patet, quia cognoscere obiectum immediate, & in seipso clare, & comprehensive procul dubio est magna perfectio; immo non posse aliter cognoscere, quam mediare importat imperfectionem, nempe indigentiam medii. Hinc perfectius Deum cognoscimus intuitive, & in seipso, quam abstractive, & in alio. Præterea, quod hic modus cognoscendi nullam importet imperfectionem, ex eo liquet, quia de facto Deus cognoscit futura libera tam absoluta, quam conditionata immediate in se ipsis, præfertim quia nequit aliter futura libera conditionata cognoscere, ut dicemus cum de scientia media; ergo modus cognoscendi possibilia in seipsis importat perfectionem deputatam ab imperfectione.

Neque dicas, disparitatem esse inter cognitionem futurorum, & cognitionem possibilium, primo quia futura libera Deus nequit aliter cognoscere, quam in seipsis;

possibilia vero debet aliter cognoscere, scilicet in sua essentia; ergo cognitio futurorum in seipsis est necessaria, possibilem vero est superflua, atque adeo importans imperfectionem. Secundo quia dum Deus cognoscit futura libera in seipsis, cognitio Divina nullam haurit novam perfectionem, aut specificationem a tali objecto, sed puram terminationem, qua posset Deus careere absque detrimento perfectionis Divinæ; contra vero dum cognoscit possibilia in seipsis: ergo hæc, non illa cognitio refundit in Deum imperfectionem.

Resp. 1. Falsum esse, quod non possit Deus futura libera absoluta aliter cognoscere, quam in seipsis; potest enim ea infallibiliter cognoscere etiam in complexo scientiæ mediæ (quod si conferretur v. gr. auxilium, A, Petro, consentiret) & decreti de collatione talis auxilii, ut dicemus, cum de scientia visionis. Deinde hoc transmissio, nulla est utraque disparitas; Non prima; quia licet possit Deus aliter cognoscere possibilia, quam immediate, non infertur, quod cognitio immediata dicat imperfectionem, aut superfluitatem: sicut licet Christus Dominus cognoscat objecta per visionem beatificam, non sequitur, quod scientia infusa attingens eadem objecta dicat imperfectionem, aut superfluitatem. Et ratio a priori est, quia cognoscere objectum pluribus viis est quid perfectius, quam uno tantum modo illud cognoscere; dummodo modus cognoscendi non dicat positivam imperfectionem: atqui modus cognoscendi possibilia immediate in seipsis non dicit positivam imperfectionem (aliter Deus non posset futura libera in seipsis cognoscere) ergo cognoscere possibilia tum in essentia Divina mediate, tum in seipsis immediate, est quid perfectius, quam solum illa cognoscere mediate in essentia Divina. Verum quidem est, quod cognitio possibilem in Divina essentia formaliter ratione nostra sit perfectior, quam cognitio possibilem in seipsis (sicut in Deo potentia v. gr. creativa Angelis est formaliter perfectior, quam potentia creativa Canis) at minor ista perfectio non est imperfectio positiva, sed præcisiua, quæ Deo non repugnat.

Neque obstat secunda disparitas, quia licet Deus carere possit cognitione prout terminata ad hos ætus liberos creaturarum, & non possit carere cognitione possibilem, non fit quod possibilia causent aut immediate, aut per speciem sui cognitionem

Divinam, sed solum fit, quod huiusmodi possibilia pure determinant intentionaliter, & extrinsece Divinam cognitionem ad speciem huius cognitionis; non secus ac futura libera sunt purum determinativum, non causa cognitionis Divinæ, quoad talem terminationem; ergo cum hoc non importet imperfectionem, non est Deo denegandum.

VII. Objic. 1. Si Deus cognosceret possibilia in seipsis, objectum formale specificativum Divinæ cognitionis esset ens creatum; sed hoc repugnat; ergo non potest Deus cognoscere possibilia in seipsis. Major patet: Illud enim est specificativum alicujus potentie, vel operationis, quod attingitur immediate, & primario, & independenter ab alio prius actio, ut patet in potentius sensitivis. Minor constat ex Angelico, quia cognitio suam perfectionem desumit ab objecto specificativo, hoc est objecto primario, & immediato, ita ut ab illo ejus perfectio mensuretur; sed cognitio Divina nequit perfectionem essentialem suam desumere ab objecto creato, & ab illo mensurari; ergo non potest objectum formale specificativum cognitionis Divinæ esse ens creatum.

Resp. magnam vim ab Adversariis fieri in his vocabulis, quibus explicatis difficultas evanescit. Et 1. Resp. per instantiam: sicut cognitio specificatur ab objecto, ita potentia productiva a suo termino; ergo si nequit cognitio Divina specificari ab objecto creato, nec poterit Omnipotentia a termino creato specificari; quod tamen non admittitur; Nam Omnipotentia essentialiter est in hac specie v. gr. potentis ponere Angelum, Leonem &c. quia terminatur ad hæc possibilia; ita ut si per impossibile Leo repugnaret, Omnipotentia non esset huius speciei, nec haberet hanc perfectionem, quam habet de facto, eo quod non esset potens ponere Leonem. Directe dico cum Martinez sect. 4., quod si nomine specificativi veniat objectum, quod causet cognitionem aut immediate, aut per speciem sui, certe cognitio Divina specificari non poterit ab objecto creato: si vero nomine specificativi veniat id, quod pure determinat cognitionem Divinam ad hanc speciem cognitionem, tunc sicut potest futurum liberum specificare scientiam visionis, & sicut possibilia specificant Omnipotentiam; ita possunt possibilia specificare cognitionem Divinam, quin per hoc aut sint objectum primarium, aut causent Di-

vinam cognitionem, sed solum terminent, ac pure determinent intentionaliter illam. Quare sicut Omnipotentia, ut productiva Angeli dicitur specificari ab Angelo extrinsece, non quia ab Angelo desumit perfectionem, & speciem, sed quia sub hoc conceptu potentis ponere Angelum sufficit hanc specie denominationem ab Angelo, ita pariter cognitio Divina specificatur ab objecto creato.

Ubi advertit, quod sicut Omnipotentia specificatur a possibilibus, non quia possibilia sint in priori ad Omnipotentiam, seu sint ratio, cur Omnipotentia possit ad illa se extendere, sed quia Omnipotentia, utpote perfectissima, de se est determinata ad praeteritendum quodcumque non repugnat; unde ex hoc, quod Musca non repugnet, arguimus tamquam a posteriori, quod Omnipotentia possit ad illam se extendere, non secus ac ex fumo arguimus a posteriori existentiam ignis: ita prorsus cognitio Divina specificatur a possibilibus, non quia possibilia sint in priori ad cognitionem, & illam causent, sed quia cognitio Divina, utpote perfectissima, de se est determinata ad exprimendum omnibus modis non importantibus imperfectionem quodcumque objectum cognoscibile, atque adeo quodvis possibile; unde nos ex hoc, quod Musca v. g. sit possibilis, arguimus tamquam a posteriori, quod cognitio Divina sit in tali specie, & exprimat Muscam possibilem, ita ut Musca sit determinativum objectivum Divinae cognitionis, quam terminat, quin exerceat ullam prioritatem, aut causalitatem erga Divinam cognitionem; eo quod solum sit ratio, cur a nobis cognoscatur Divina cognitio esse in tali specie, sicut fumus est ratio cognoscendi ignem.

Neque dicas, futura libera esse praerequisita, ut cognitio Divina ad illa terminetur; non enim ideo erunt futura, quia cognoscuntur, sed ideo cognoscuntur, quia erunt. Nam dispar est ratio inter cognitionem necessariam, & contingentem. Cognitio Divina terminata ad futura libera debet habere determinativum contingens, & extrinsecum; aliter non esset cognitio indifferens, & contingens; at cognitio necessarium habere debet determinativum necessarium intrinsecum, non secus ac Omnipotentia relate ad possibilia; Unde sicut Omnipotentia ex seipso est determinata ad continendum omnia possibilia; ita cognitio simplicis intelligentiae ex seipso est deter-

minata ad exprimendum omnibus modis non importantibus imperfectionem omnia possibilia.

VIII. Obje. 2. In Deo cognitio possibile in sua essentia est ipse actus proprius cognoscibilitatis intrinsecae Divine essentiae, quae determinat ad expressionem sui, & possibilem; ergo cognitio possibile in seipsis debet etiam esse actus proprius intrinsecae cognoscibilitatis possibilem; aliter non attingeretur in seipsis; sed huiusmodi actus repugnat; ergo repugnat in Deo cognitio possibile in seipsis. Minor probatur, quia actus proprius intrinsecae cognoscibilitatis possibilem habere debet pro objecto primario, & pro specificativo, ac motivo formali Creaturas; sed repugnat in Deo actus habens pro motivo primario, & formali Creaturas; ergo repugnat in Deo actus proprius intrinsecae cognoscibilitatis possibilem.

Confirm. 1. quia repugnat actus Divinae voluntatis, quo Deus amet Creaturas propter seipsas; ergo repugnat etiam actus Divini intellectus attingens Creaturas propter seipsas. Et ratio a priori est, quia huiusmodi actus non essent perfectissimi, prout decet Deum.

Confirm. 2. quia passim PP. cum Augustino, Ambr., Dionys. docent, Deum omnia in se intueri, & nihil extra se intelligere. Aug. lib. 83. questionum, q. 46. ait, *Sacrilegium esse, quod Deus exeat extra se ad aliquid cognoscendum.*

Resp. hanc etiam objectionem laborare in aequivoco. Quare distinguo consequens: Cognitio possibile in seipsis est actus proprius intrinsecae cognoscibilitatis possibilem, si faciat sensum, quod huiusmodi cognitio directe ad possibilia terminetur, & ab iis determinetur eo pacto, quo cognitio futurorum in seipsis, concedo; si faciat sensum, quod ab iis causetur, nego consequentiam, & distincta minore subsumpta, nego ultimam consequentiam. Ad prob. min. si nomine objecti primarii, & specificativi, seu motivi formalis veniat objectum causans vel per seipsum, vel per speciem sui cognitionem, quae ab illo suam hauriat perfectionem, & speciem, prout communiter hoc vocabulum usurpatur, nego, possibilia esse objectum primarium, & specificativum Divinae cognitionis attingentis possibilia in seipsis; si nomine objecti primarii, & specificativi veniat objectum, quod ratione sui terminet, ac determinet intentionaliter Deum ad huiusmodi cognitionem; sicut

quan-

quando futura libera cognoscuntur a Deo in seipsis, nego repugnare, quod Creatura in hoc sensu sit obiectum primum Divine cognitionis.

Ad 1. confirm. nego consequentiam. Non licet enim universum ex voluntate Divina arguere ad intellectum; potest enim Divina voluntas Creaturas nolle, & tamen Divinus intellectus nequit illas non cognoscere. Disparitas in casu nostro est, quia amare Creaturas propter se, & non propter Deum importat imperfectionem moralem in voluntate Divina; at cognoscere Creaturas in seipsis non importat ullam imperfectionem; aliter non posset Deus futura in seipsis cognoscere.

Ad 2. auctoritates Patrum sumendæ sunt in sano sensu; aliter nec posset Deus futura in seipsis cognoscere. Negant itaque solum PP. quod Deus cognoscat Creaturas in seipsis, aut cognitione causata ab earum specie, aut cognitione commensurata earum cognoscibilitati; non vero cognitione determinata immediate ab ipsis Creaturis, & radicaliter determinata ab ipsa essentia Divina, quæ exigit posse hæc possibilia ponere, & eadem exprimere omni modo non importante imperfectionem.

IX. Objic. 3. Cognitio possibilem in seipsis est supervacanea, atque adeo indigna Deo; ergo non datur. Prob. antec. quia cognitio Divina prout terminatur ad Deum, & ad possibilia in Deo, est cognitio comprehensiva Dei, atque adeo absorbens omnem omnino perfectionem in linea cognoscendi; ergo cognitio terminata immediate ad ipsa possibilia est omnino supervacanea, habens quidem novum modum cognoscendi, sed non novam perfectionem in linea cognoscendi; sicut tertia entitas ex. gr. superaddita partibus simul sumptis est superflua, quia adderet toti novum modum essendi, sed non novam perfectionem in essendo.

Confirm. vel huiusmodi cognitio possibilem in seipsis spectat ad perfectionem Divine cognitionis, vel non; si dicatur secundum; ergo est superflua: primum dici nequit, quia eo ipso ac cognitio Divina comprehendit Divinam essentiam, & omnia, quæ in ipsa continentur, adæquat intrinsicam Dei cognoscibilitatem, atque adeo est cognitio Dei perfectissima; ergo cognitio possibilem in seipsis nequit conferre ad perfectionem Divine cognitionis.

Resp. in Deo considerari posse tum prædicata absoluta, ut est Ascritas, Bonitas, &c., tum prædicata respectiva realia, ut

est Omnipotentia potens hoc, vel illud possibile; tum demum prædicata respectiva intentionalia, ut est omnis scientia terminata ad possibilia omni modo possibili, scilicet tum in seipso, tum in seipsis. Hinc cognitio Divina terminata ad Deum, & ad possibilia in Deo per hoc, quod sit actus proprius cognoscibilitatis Divine, est quidem comprehensiva Dei secundum ejus prædicata absoluta, & respectiva realia, sed non secundum respectiva intentionalia, seu secundum quod Deus est expressio possibilitum in seipsis. In forma nego antecedens. Ad probationem distinguo antecedens: est comprehensiva Dei secundum ejus prædicata absoluta, & respectiva realia ad Creaturas possibles, concedo; secundum respectiva intentionalia, seu quatenus Deus est etiam expressio possibilitum in seipsis, nego antecedens, & consequentiam. Quod autem hic novus modus cognoscendi importet novam perfectionem, patet, quia cognoscere obiectum immediate de se est bonum appetibile, & perfectio; immo cæteris paribus præstat cognitio immediate mediata (esto perfectius cognoscatur objecta in Deo, quam in seipsis, eo quod in Deo continentur eminenter, & perfectiori modo, quam in seipsis; unde cognitio Matutina præstat Vespertinæ) contra vero tertia entitas non est bona, & appetibilis ratione sui, sed ratione totius, quod constituit; ergo si ea sublata habetur perfectissime totum, erit essentialiter superflua, licet videatur addere novum modum essendi.

Ad confirm. dico, spectare ad perfectionem Divine cognitionis, quod possibilia cognoscantur in seipsis. Verum quidem est, quod eo ipso ac comprehenditur Divina essentia, habetur cognitio perfectissima, qua nulla major excogitari potest; at sicut non comprehenditur Divina essentia, si solum attingatur secundum prædicata absoluta, & non secundum respectiva realia, seu si attingatur v. gr. ut independens, & non ut Omnipotens; ita nec comprehenditur, si attingatur secundum prædicata respectiva realia, & non etiam secundum intentionalia respectiva, seu si attingatur ut præcontinens possibilia, & non etiam ut exprimens possibilia in seipsis.

X. Objic. ult. Illud solum cognitio Divina exprimit immediate, quod per essentiam Divinam, tamquam per speciem intelligibilem, immediate representatur; atqui Divina essentia immediate solum representat sci-

seipsam; possibilia vero representat mediate, & indirecte: ergo cognitio Divina non attingit possibilia immediate in seipsis.

Confirm. quia aliter cognitio possibilium in seipsis deberet ab ipsis possibilibus gigni; Nam ex Augustino, Notitia gignitur ex objecto, & potentia, tanquam eorum proles.

Resp. Thomistas putare, quod essentia Divina per modum speciei intelligibilis representet seipsam immediate, & Creaturas in seipsa mediate: Scotiste vero, Nominales, Granados tract. 2. disp. 4. quod per modum speciei intelligibilis immediate representet & seipsam, & Creaturas. Martinez docet, essentiam Divinam neque se, neque Creaturas representare per modum speciei intelligibilis proprie, & formaliter loquendo: sicut enim non competit Deo proprie, & formaliter potentia ad intelligendum per modum actus primi, quia haec dicit ordinem ad actum secundum realiter distinctum; ita non competit Deo proprie ratio speciei intelligibilis, seu impressa, quia haec dicit ordinem ad intellectiorem realiter distinctam. Quare juxta hanc sententiam dicendum competere Deo rationem speciei intelligibilis largo modo; in quo sensu D. Thom. hic art. 5. ad 3. dicit, essentiam Divinam esse formam intelligibilem, scilicet largo modo, cum non sit forma informans. Hinc essentia Divina per modum speciei intelligibilis largo modo sumptae representat tam seipsam, quam possibilia in seipsis, nec non in seipsis immediate; esto ad representandum possibilia in seipsis determinetur ab ipsamet essentia, ad cognoscendum vero possibilia in seipsis determinetur ab ipsis possibilibus immediate, & solum radicaliter a seipsis; non secus ac ad cognoscendum futura in seipsis.

Ad confirm. Sicut cognitio Divinae essentiae non gignitur proprie, sed identificatur cum tali objecto; ita cognitio possibilium, necnon futurorum in seipsis non gignitur proprie a tali objecto, sed iis positus datur necessitas, ut Divinus intellectus ea representet; unde non datur proles stricte dicta.

QUAESTIO IV.

Quomodo per scientiam Visionis cognoscatur Deus futura libera absoluta?

I. Scientia visionis dicitur cognitio Divina terminata ad contingentia,

sive praeterita, sive praesentia, sive futura. De Fide autem est, Deum cognoscere infallibiliter futura tam libera soli Deo, ut est creatio Mundi, Antichristus &c., quam libera Creaturae, quae scilicet pendunt a libero arbitrio creato, ut peccatum Antichristi. Psalm. 138. dicitur, *Intellexisti cogitationes meas a longe*; & Eccl. 23. *Antequam crearentur omnia, sunt cognita*. Hoc autem constat tum a posteriori ex Prophetis; unde Tertullianus lib. 2. contra Marcion. c. 5. dixit: *Prascentia Dei tot habes testes, quos Prophetas fecit*: tum a priori, quia ea cognoscere, est perfectio simpliciter simplex, ac proinde debita Deo. Difficultas itaque est, quomodo infallibiliter ab aeterno futura praesentium libera cognoscantur, & quomodo praesentia ista infallibilis cohaereat cum libertate nostrorum actuum? Circa primum multiplex est sententia. Thomistae putant, futura a Deo infallibiliter ab aeterno videri in praesentia reali, quam habuerunt ab aeterno in *Nunc* aeternitatis: Alii docent, ea videri in essentia Divina, sicut videntur possibilia: Alii in decretis Dei liberis: Alii in causis eorum proximis: Alii demum in seipsis; non secus ac futura libera conditionata.

II. Dico 1. Futura contingentia non videntur a Deo in praesentia reali, quam habuerunt ab aeterno in *Nunc* aeternitatis. Ita communissime apud Amic. disp. 12. sect. 4. contra Thomistas non tamen contra D. Thom., ut ostendit Vasq. disp. 64. cap. 5. (esto Cajetanus dicat, post 15. annorum constans studium affectum esse mentem Angelicam id admittentis). Est etiam contra Granad., Ruiz, Molinam.

Conclusio constat ex dictis in 1. disp. q. ult. art. 2. ubi sic ratiocinati sumus; Futura ab aeterno non existerunt; ergo non habuerunt praesentiam realem, seu coexistentiam cum Deo ab aeterno, sed tantum habuerunt praesentiam objective, & intentionalem; atque adeo cognoscuntur a Deo ab aeterno, & non ob eorum praesentiam realem, quam habuerunt ab aeterno in *Nunc* aeternitatis. Et ratio a priori est, quia Antichristus v. gr. non coexistit aeternitati toti, & totaliter, ut nec immensitatis; ergo antequam existeret Antichristus, existit aeternitas, & tunc aeternitas non coexistit Antichristo; ergo si tunc cognoscitur Antichristus, non cognoscitur ob praesentiam realem, quam tunc habeat.

Confirm. Si quod est in tempore, fuit praesens realiter Deo ab aeterno, sequeretur,

tur, quod productio Mundi fuisset ab æterno, quod est contra Fidem; Proverb. c. 8. dicitur: *Antequam quicquam faceret, ordinata sum*. Adde, quod si futura conditionata libera Deus cognoscit in seipsis, & non in præsentia reali ad æternitatem, poterit hoc idem dici de futuris absolutis.

III. Dico 2. Deus non videt futura contingentia in sua essentia, sicut videt possibilis. Ita communiter cum Scoto, Suar. contra Cajet. Durandum, Zumel apud Amic. Nec ea videt in suis Ideis, ut docuit Bonavent. in 1. dist. 25.

Prob. Divina essentia, aut Idea est indifferens ad coexistendum, vel non coexistendum cum futuro contingenti, v. g. cum Antichristo; ergo futura contingentia videri non possunt in essentia, aut Idea Divina secundum se considerata.

Dices 1. Deus nequit aliter determinari ad cognoscendum, quam a sua essentia, & a seipso; aliter indigeret alio a se distincto, ut possit habere suas perfectiones, scilicet intellectionem; ergo in sua essentia cognoscit futura contingentia.

Resp. Deum non posse determinari ad cognoscenda contingentia ab alio a se distincto per modum virtutis, sed posse ab alio determinari per modum conditionis, *sine qua non*; aliter quomodo cognosceret per scientiam mediam futura libera conditionata? Hoc autem non fert ullam dependentiam Dei ab alio a se distincto; quia huiusmodi conditio, quæ prærequiritur, non est quid physicum, sed logicum, scilicet ipsa futuritio sive absoluta, sive conditionata objecti, seu actus liberi. Ex infinita itaque Dei perfectione oritur, quod possit condere Creaturam liberam, & sic a futuritione actus liberi tamquam a conditione prærequisita determinari ad cognoscendum futura libera ab æterno.

Dices 2. Nequit Deus ab æterno cognoscere determinate actum liberum futurum, nisi ab æterno detur id, quod determinat ad hanc cognitionem; sed ab æterno nihil datur præter Divinam essentiam; ergo a Divina essentia duntaxat Deus determinatur ad cognoscenda futura libera.

Resp. ab æterno dari non physice, sed logice huiusmodi determinativum, scilicet futuritionem sive absolutam, sive conditionatam actus liberi, quatenus ab æterno verum est, quod actus liber sit futurus potius, quam non futurus pro tali tempore, aut sub tali conditione.

Dices 3. Omnipotentia continet etiam existentiam omnium effectuum creatorum; ergo possunt in ea omnes effectus creati cognosci.

Resp. Omnipotentiam continere quidem existentiam actus liberi, sed non connecti cum illo; cum possit dari Omnipotentia absque existentia cuiuscunque actus liberi creati; unde nequit in Omnipotentia determinate cognosci actus liber, ut exercite existens.

IV. Dico 3. Futura contingentia, quæ non sunt libera Creaturæ, sed Deo, videri possunt infallibiliter in Divinis decretis ab æterno. Ita enim communiter contra Mayron. apud Amic. putantem, decreta Dei posse mutari.

Prob. facile. Decretum Divinum producendo v. gr. Antichristo est infallibiliter connexum cum futuritione Antichristi; ergo Deus attingendo comprehensive suum decretum, attingit infallibiliter futuritionem Antichristi; non secus ac comprehendendo Omnipotentiam connexam cum possibilibus attingit in illa infallibiliter ipsa possibilis.

V. Dico 4. Futura, quæ sunt libera Creaturis, ut peccatum Antichristi, nequit Deus infallibiliter cognoscere in eorum causis proximis. Ita DD. Societ. cum D. Th. q. 14. art. 13., & alibi apud eundem Amic. contra Prædeterminantes, & Con-determinantes.

Prob. non potest in medio indifferenti videri infallibiliter actus potius, quam non actus; ergo non possunt futura libera prævideri a Deo infallibiliter in eorum causis proximis, quæ supponuntur indifferentes ad actum, vel non actum. Unde D. Th. loc. cit. dicit: *Quicumque cognoscit futurum coningens in causa sua tantum, non habet de eo nisi conjecturalem cognitionem*.

Ex quo communiter docent contra Thomistas, Angelicum non agnovisse physicam prædeterminationem; Si enim daretur physica prædeterminatio ad actum liberum, Deus in tali prædeterminatione, utpote essentialiter connexa cum actu libero, ad quem prædeterminaret, infallibiliter ipsum actum liberum videret; atque adeo non haberet de illo meram conjecturalem cognitionem. Hinc Galtrucius in Institutione Physicæ universalis disp. 4. cap. 4. prob. 4. dicit: *Cum in publicis disputationibus Parisiis olim proponeret huiusmodi argumentum R. P. Joannes Bagoius Theologia Cleromontana Parisiensis Professor, tunc Reverendissi-*

mus P. Turcius Generalis Ordinis non dubitavit idcirco palam asserere, alienam esse a D. Thomæ doctrinam de ejusmodi physicis prædeterminationibus. Idemque Bagotius apud Platellium n. 107. hæc habet: Anno 1664. in magno Conventu Patrum Dominicanorum propugnata sunt, præsentē Reverendissimo Patre Turco, Theſes Theologicæ; ad quarum oppugnationem invitatus, prædeterminationes physicas impugnavi hoc argumento, quod aperte repugnant principiis D. Thomæ de Divina contingentium præsentia, in ejus Schola receptissimis. Sub finem disputationis omnia argumenta more suo paucis reasumpſit, eruditissime urſit, ac magis explicuit Reverendissimus P. Turcius: Ubi ad meum ventum est, diserte asseruit, esse ipsissimam S. Thomæ doctrinam; & subiunxit, *Sancto Doctori immerito ascribi prædeterminationes physicas, ejus principiis evidenter contrarias.*

VI. Dico 5. Futura Creaturis libera prævideri possunt ab æterno infallibiliter a Deo in complexo scientiæ mediæ de futuritione actus conditionata (scilicet si daretur auxilium, A) & decreti de conferendo auxilio, A. Ita Lumbium n. 283. & Platellius n. 105. Immo etiam actus boni prævidetur in solo decreto prædefinitivo, ut notat Martinez contr. 3. disp. 1. non tamen actus mali in decreto permissivo.

Prob. posita hujusmodi scientia mediæ, ac decreto explicato, infallibiliter habetur actus liber absque detrimento libertatis, ut dicemus in de Gratia, cum de prædefinitione consequente scientiam mediæ; ergo Deus in complexo hujus scientiæ mediæ, & decreti potest infallibiliter ab æterno prævidere actum liberum Creaturarum tam bonum, quam malum, nec non liberam omissionem. Quod autem actus bonus liber prævideri etiam possit in decreto prædefinitivo, constat, quia hujusmodi decretum non solum vult auxilium indifferens, sed etiam ipsum actum bonum efficaciter; ergo essentialiter connectitur cum actu bono prædefinito, atque adeo in tali decreto infallibiliter prævidetur actus bonus; sicut prævideretur etiam in decreto prædeterminante, si hujusmodi decretum ratione inimpedibilitatis non everteret libertatem actus prædeterminati. Denique quod in decreto permissivo actus mali non possit hujusmodi actus prævideri, patet, quia decretum permissivum de se est indifferens, ut conjungatur, vel non conjungatur cum actu peccaminoso, eo quod il-

lum non intendat; ergo in eo decreto solum, seorsim a scientia mediæ prævia, actus malus prævideri non potest. Decretum quippe permissivum peccati de se solum fert collationem auxilii prævisi per scientiam mediæ inefficacis, non impediendo actum malum, cum quo prævidetur ex culpa voluntatis conjungendum, eo quod Deus ex munere causæ primæ non teneatur illum impedire. Hujusmodi autem decretum quatenus collativum auxilii sufficientis (esto prævisi inefficacis) de se est indifferens, ut conjungatur tam cum actu bono, quam cum actu malo; ergo in hoc decreto qua tali, quod est permissivum actus mali, non potest potius actus malus, quam bonus prævideri.

VII. Dico ultimo: Deus per scientiam visionis videt infallibiliter futura libera absoluta in seipsis; adeo ut ratio, a qua tanquam a conditione determinetur Divinus intellectus ad hæc futura libera infallibiliter cognoscenda, sit actualis eorum existentia pro futura temporis differentia. Ita communiter DD. Societ. contra Thomistam apud Martinez contr. 7. disp. 6. Ita etiam D. Th. q. 14. art. 13., ubi habet: *Deus cognoscit futura contingentia, non solum prout sunt in suis causis, sed etiam prout nunquodque eorum est in seipsis.* Unde fit, quod si per impossibile futura essent futura citra ullum Dei decretum, adhuc ea possent immediate a Deo cognosci: Et si Deus poneret sua decreta in tempore, adhuc ab æterno præcognosceret futura.

Prob. conclusio 1. a pari: Deus futura libera conditionata videt per scientiam mediæ in seipsis, non tamquam ea aliter cognoscere, ut infra ostendemus; ergo etiam futura libera absoluta videt per scientiam visionis in se ipsis.

Secundo a priori, quia Deum cognoscere futura in seipsis, non tamquam in objecto formali, seu ratione, ac virtute cognoscendi, sed tamquam in objectis ultimo determinantibus per modum conditionis, nullam dicit imperfectionem; ergo hæc cognitio non est Deo deneganda. Antecedens probatur, quia hujusmodi cognitio nullatenus pendet a tali objecto, nec requirit ejus physicam existentiam ab æterno, sed solum logicam, quæ solum importat illam physicam existentiam, quam habebit pro sua temporis differentia ex exercitio libertatis creatæ dependentis modo consentaneæ a Deo; ergo hujusmodi cognitio nullam præfert imperfectionem.

Confirm. Divisā intellectio ratione suæ summæ perfectionis est ab intrinseco determinata independentē a quavis alia virtute extrinseca ad certo, & infallibiliter cognoscendum omnem veritatem; prout est cognoscibilis sine imperfectione; sed futura libera eo ipso ac habitura sunt ex libera determinatione Creaturæ actualē existentiam pro futura temporis differentia, habent ab æterno determinatam veritatem, adeo ut possint citra imperfectionem a Deo cognosci in se ipsis; ergo Divina intellectio necessario repræsentat infallibiliter futura libera in se ipsis. Et ratio radicalis est, quia pro quolibet instanti debet esse verum, quod res aut determinate sit, aut determinate non sit; cum non detur medium inter ista contradictoria; ergo Deus ab æterno infallibiliter videt futura, prout determinate erunt pro sua temporis differentia.

VIII. Objic. 1. Si Deus ab æterno cognosceret determinate futura libera in se ipsis, cognitio Divina esset falsa; ergo nequit sic ea cognoscere. Prob. antec. cognitio est falsa, si repræsentet determinate objectum, quod est indifferens; sed futurum liberum est indifferens ad esse, vel non esse; ergo si repræsentetur a Deo determinate ab æterno, cognitio Divina esset falsa.

Confirm. Futurum liberum vel consideratur in priori ad decretum liberum Dei, vel in posteriori; si in priori, est omnino indifferens ad esse, vel non esse; unde nequit cognosci determinate; si in posteriori; ergo cognoscitur determinate in decreto, non in se ipso.

Resp. nego antec. Ad probationem; Aliud est objectum esse contingens, seu indifferens extrinsece, ut ponatur, vel non ponatur a sua causa; aliud vero esse indifferens intrinsece, hoc est neque existens determinate, neque determinate non existens; potest enim aliquid esse contingens, & tamen determinate nunc existere, sicut Petrus determinate sedet, licet contingenter; Hoc idem nos dicimus de actu libero pro instanti futuro; unde peccatum Antichristi existet determinate, licet contingenter, cum non possit dari medium inter determinate existere, & determinate non existere pro quolibet instanti; quare cognitio Dei non erit falsa per hoc, quod repræsentet determinate objectum, quod est indifferens extrinsece, seu contingens.

Ad confirm. dico, Futurum liberum non considerari determinate existens in priori ad decretum collativum concursus indiffe-

rentis; sicut nec in priori ad voluntatem creatam, cum non possit considerari existentia effectus determinati in priori ad causas suas, quare consideratur in posteriori ad decretum, sed nequit in eo decreto utpote indifferenti cognosci infallibiliter peccatum Antichristi v. gr., ut ostendimus in quinta conclusione; quare solum infallibiliter cognosci potest in se ipso.

IX. Objic. 2. Non sunt contradictoria istæ dux propositiones: Objectum determinate erit, & objectum determinate non erit; sicut non sunt contradictoria istæ: Creatura necessario existit, & Creatura necessario non existit; cum sint ambæ falsæ: sed sunt contradictoria istæ; objectum determinate erit, & objectum non erit determinate; ergo per hoc, quod non detur medium inter contradictoria, non sequitur, quod Deus debeat ab æterno videre aut determinate futuritionem actus liberi, aut determinate non futuritionem in seipso: sed solum sequitur, quod non videat determinate illum in seipso.

Confirm. quia Philosophus 1. Perihermen. cap. ult. negat, in propositionibus contradictoriis de futuris contingentibus alteram partem esse determinate veram: Et ratio est, quia omnis determinatio veritatis fundari debet in aliqua entitate (cum veritas sit passio entis; & ex eo, quod res est, vel non est, propositio dicatur vera, aut falsa) sed futurum contingens antequam existat nullam habet entitatem, neque in se, ut patet, neque in causa, utpote indifferenti ad dandum, vel nondandum esse; ergo futurum contingens non habet ab æterno determinatam veritatem; unde nequit a Deo determinate cognosci in seipso.

Resp. quod sicut in instanti præsentis non datur medium inter has duas propositiones: Petrus determinate sedet, & Petrus determinate non sedet, cum non possit dari a parte rei præcisio ab utraque hac veritate determinata: non secus ac si essent propositiones formaliter contradictoriae, ut sunt istæ: Petrus sedet determinate, & Petrus non sedet determinate: ira prorsus dicas pro instanti futuro. Immo ex determinatione, quam habet objectum præsentis, fit, ut propositio antecedenter enunciāns idem objectum tamquam futurum, aut propositio consequenter enunciāns illud tamquam præteritum, sit determinate vera, aut determinate falsa. In forma dist. antec. illæ dux propositiones non sunt contra-

traditionis formaliter, concedo; æquivalenter, nego antecedens, & consequentiam. Et ratio a priori est, quia existere, & non existere sunt formaliter contradictoria; sed determinate esse, habetur per existentiam, determinate non esse habetur per non existentiam; ergo determinate esse, & determinate non esse sunt æquivalenter duo contradictoria. Quare sicut per adversarios Deus necessario objecta presentia videt determinate; ita objecta futura.

Instabis, futurum liberum in priori ad ejus existentiam, necnon in priori signo ad suas causas (nempe in priori ad existentiam voluntatis, & decreti oblativi concursus indifferenter) neque intelligitur fore determinate, neque determinate non fore; cum repugnet intelligere existentiam, vel non existentiam rei pro eo signo, quo præcenditur ab existentia, vel negatione existentie cause ad illius existentiam prærequisitæ; ergo pariter futurum liberum, antequam determinate existat, vel determinate non existat, non poterit a Deo provideri in seipso vel determinate futurum, vel determinate non futurum.

Resp. concessio antecedente, nego consequentiam. Disparitas est, quia quando futurum consideratur in priori signo ad sui existentiam, aut in priori ad existentiam suæ cause, pro eo signo rationis, quo præcenditur tam ab ejus existentia, quam a negatione existentie, repugnat quod simul ejus determinata existentia, aut non existentia intelligatur, ut est perspicuum. At quamvis id a nostro intellectu sic præcendente non intelligatur, nihilominus ex parte objecti pro quovis instanti res vel existit determinate, vel determinate non existit: Sicuti quamvis in priori ad lucem a Sole causatam neque intelligatur lux, neque carentia lucis; ex parte tamen objecti pro toto illo instanti, quo est Sol, est etiam lux; ergo bene poterit intellectus Divinus ex infinita sua perspicuitate ab æterno quodcumque objectum cognoscere prout erit, videlicet vel attingendo ejus existentiam determinatam, si determinate erit, vel negationem existentie determinatam, si determinate non erit.

Ad confirm. dupliciter considerari potest futurum contingens; Primo nulla facta suppositione futuritionis, sed præcendendo ab ejus futuritione, vel non futuritione, & considerando illud tantum in suis causis indifferenteribus; & sic propositio de futuro

contingenti neque consideratur ut vera, neque ut falsa, & juxta hunc sensum procedit doctrina Aristotelis, ut notat Amicus; quia tamen hujusmodi præcisio, quæ potest haberi per intellectum, nequit dari a parte rei, id est propositio de futuro contingente secundum se considerata semper est determinate vera, vel determinate falsa. Secundo considerari potest futurum ex suppositione futuritionis, aut non futuritionis, & in hoc sensu proprio de tali futuro habet determinatam veritatem, vel falsitatem; nam ex suppositione futuritionis jam futurum habet entitatem pro illa temporis differentia, & sic propositio de tali futuro habet determinatam veritatem; sicut enim futurum pro instanti A, crastino verificabitur cras propositionem de presenti. Nunc existit; ita Nunc verificatur propositio de futuro, Cras existit: per illud enim idem, per quod verificatur in instanti B, propositio de presenti, Res existit, verificatur etiam in instanti A propositio de futuro, Res existit, & verificatur etiam in instanti C propositio de præterito, Res existit.

Ubi recolendum est ex logicis, futuritionem, quam habet futurum ratione decreti de illo ponendo, esse futuritionem causalem; existentiam vero ipsius futuri, quæ est objectum decreti, esse futuritionem formalem. Hanc autem non posse competere futuro, nisi in posteriori ad futuritionem causalem, patet; quia omnis effectus est in posteriori ad suam causam.

X. Objic. 3. incoherenter dicitur, quod Deus futura libera absoluta non videat in presentia reali æternitatis, & simul quod ea videat intuitive in se ipsis; ergo alterutra conclusio est falsa. Prob. antec. Nisi Deus videret futura in presentia reali æternitatis, non posset ea cognoscere intuitive; cum cognitio intuitiva seratur in existentiam, non in futuritionem rei; ergo non posset ea Deus videre in seipsis. Quare dicendum futura videri in presentia reali æternitatis, ut habet Angelicus 1. p. q. 86. art. 4. dicens: *In se ipsis quidem futura cognosci non possunt, nisi a Deo, cui etiam sunt presentia, dum in cursu verum sunt futura, in quantum ejus intuitus simul fertur supra totum temporis cursum.*

Resp. nego antecedens. Ad probationem; Deus ab æterno cognoscit intuitive futura, licet ea non sint realiter presentia ab æterno, quia ad rationem cognitionis intuitive solum requiritur, quod exist-

stentia rei exercita pro tempore determinato determinet cognitionem ad illam attingendam pro tali temporis differentia, unde existentia rei sit objectum terminativum simul, & determinativum, quod totum haberetur in casu nostro. Per hoc autem quod futurum habeat existentiam physicam pro sua differentia temporis, dicitur ab æterno habere existentiam logicam, seu ab æterno esse determinativum sufficiens ad hoc, ut cognitio Divina illud intuitive repræsentet prout erit. Ad auctoritatem Angelici dico, ibi Angelicum loqui de præsentia intentionalis, quam habent futura ab æterno in mente Divina, quatenus ab æterno Deus simul omnia cognoscit, non vero de præsentia eorum reali.

XL. Objic. ult. Si Deus ab æterno prævideret futura libera, v. gr. peccatum Antichristi, sequeretur, quod huiusmodi prænotio utpote infallibilis everteret libertatem actus; ergo nequit Deus futura libera prævidere. Probatur antecedens. Si actus esset liber, posset non poni; sed, si non poneretur, scientia Dei falsificaretur; ergo si posset non poni, posset præscientia Dei falsificari; hoc autem repugnat; ergo posita præscientia infallibili everteretur libertas actus.

Confirm. 1. quia omne prædictum a Deo est necessarium, supposita infallibilitate Divinæ præscientiæ: sed peccatum Antichristi esset prædictum: ergo necessarium.

Confirm. 2. Quamvis Deus prævideat futurum ex suppositione, quod sit futurum; nihilominus, si voluntas creata esset libera, haberet potestatem antecedentem efficiendi, ne illud sit futurum: ergo haberet potestatem antecedentem efficiendi, quod cognitio Divina careat suo verificativo, unde falsificetur.

Confirm. ult. quia non datur potentia ad prædictum; ergo nequit voluntas creata nunc efficere, ne præverit ab æterno cognitio Divina terminata ad actum liberum creatum; ergo actus liber non esset liber, si infallibiliter prænosceretur ab æterno.

Resp. de fide esse, quod prænotio infallibilis futurorum liberorum non evertat eorum libertatem: Ecclesiastici 15. dicitur: *Deus illum reliquit in manu consilii sui*; & Psal. 138. *Intellexisti cogitationes meas a longè*; ergo libertas, & prænotio coherent; Et ratio est, quia sicuti si ego videam Petrum sedentem, visio ista, licet evidenter vera, non evertit libertatem sessionis, eo quod consequatur ad sessionem liberam,

non antecedit; ita Divina prænotio peccati Antichristi, licet infallibilis, nec evertit libertatem peccati, quia ad illud natura consequitur cognitio Divina; licet tempore præcedat ratione indivisibilitatis actus Divini æterni. Universim autem necessitas consequens non violat libertatem, ut advertit D. Anselmus duplicem distinguens necessitatem, scilicet antecedentem, & consequentem; necessitas antecedens est illa, quæ facit rem esse; necessitas vero consequens est, quam facit ipsa res; sicut ex suppositione, quod Petrus sedeat, habet necessitatem consequentem ad non ambulandum: hinc necessitas antecedens destruit indifferentiam principiorum, & facit rem esse necessariam; sicut pedes destruant indifferentiam ad sedendum, & ambulandum, & faciunt sessionem esse necessariam; & in sententia Societatis prædeterminatio physica cum sit inimpedibilis, trahit actum necessariam, non secus ac visio Dei facit amorem Dei esse necessarium, quia destruit indifferentiam principiorum. Contra vero necessitas consequens hanc indifferentiam non destruit, sed supponit; sicut sessio libera, ad quam consequitur necessitas ad non ambulandum, supponit indifferentiam ad sessionem, & ambulacionem; & in hoc sensu ad peccatum liberum Antichristi futurum necessario consequitur præscientia infallibilis Dei ab æterno; non secus ac ad sessionem liberam Petri necessario aliquando consequitur mea visio evidenter vera de tali sessione. Unde fit, ut sicut Petrus non potest non sedere in sensu composito meæ visionis impotentia solum consequente, non antecedente, ita non possit Antichristus non peccare in sensu composito prævisionis Divinæ ab æterno.

In forma nego antecedens: ad probationem distinguo consequens: si posset peccatum Antichristi non poni in sensu composito præscientiæ, posset hæc falsificari, concedo; si posset non poni in sensu diviso a præscientia, nego primam, & ultimam consequentiam.

Ad 1. confirm. distinguo cum Angelico majorem: Omne prædictum a Deo est necessarium necessitate dicti, seu necessitate consequente, concedo; necessitate rei, seu antecedente, nego majorem, & consequentiam. Peccatum v. gr. Antichristi prævisum a Deo dicitur a D. Thom. esse necessarium necessitate dicti, quatenus est necessario verum hoc dictum, seu hæc propositio, quod

res sic prout cognoscitur a Deo; at non est necessarium necessitate rei, quia non ponitur a causa determinata ad illud, sed a voluntate indifferente ad peccandum, vel non peccandum.

Ad 2. dist. 1. conseq. Haberet voluntas creata potestatem antecedentem efficiendi, ne detur verificativum cognitionis Divinæ, in sensu composito talis cognitionis, nego; in sensu diviso; quatenus, si non poneretur hoc verificativum, impediretur ea cognitio Divina, concedo 1. & nego 2. conseq.

Ad ultim. distin. antec. Non datur potentia ad præteritum, quando præteritum aliquo modo tanquam a conditione prærequisita pendet a futuro; sicut præscientia Dei de peccato Antichristi pendet ab illo tanquam a prærequisito, nego antecedens; quando nullatenus pendet ab ipso futuro, omitto antecedens, & nego consequentiam. Id, quod fuit, ex suppositione, quod fuerit, non potest non fuisse, sed præscientia de peccato Antichristi poterat ab Antichristo impediri, ne fuisset ab æterno, posito quod possit non peccare: Sicut D. Petrus potens non negare Christum Donumum, poterat impedire, ne præfuisset revelatio facta a Salvatore de ejus trina negatione; aliter non libere peccasset.

QUÆSTIO V.

Utrum Scientia Visionis, an Scientia simplicis intelligentia sit Causa Rerum?

I. **C**ertum est apud Theologos, causam rerum omnium esse Divinam scientiam; dicitur enim Psalm. 113. *Omnia in Sapientia fecisti.* Proverb. 3. *Domine Sapientia fundavit Terram.* D. Dionys. *Scientia Divina omnium est Artifex.* Et ratio ex D. Thom. est, quia scientia Dei se habet ad Creaturas, sicut scientia Artificis ad opus artis; sed scientia Artificis est causa, & principium, quo Artifex operatur dirigendo potentias executivas; ergo. Hinc licet verum sit, quod Omnipotentia ratione nostra distinguitur ab intellectu Divino, non secus ac intellectus a voluntate; nihilominus causa rerum non dicitur esse Omnipotentia, sed intellectus, juxta illud Psalm. 135. *Qui fecit Calos in intellectu;* sicut in Artifice causa artefactorum dicitur esse ars, seu cognitio directiva, non potentia executiva; & ratio est, quia opus magis tribuitur mandanti, ac

— Pars I.

dirigenti, quam exequenti; sicut in moralibus Homicidium magis tribuitur mandanti, quam exequenti; victoria magis Duci dirigenti, quam militibus: Quicquid sit, an scientia Dei sit causa rerum concurrente efficienter, an vero ut ostendens obiectum, quod Deus per voluntatem vult facere, & per Omnipotentiam facit? quod non pertinet ad questionem præsentem.

II. Difficultas solum est, Num causa rerum sit scientia simplicis intelligentiæ, an vero scientia visionis. Thomistæ communiter cum Cajetan., Capreolo, Soncin., Salmaticens., Lumbier docent, causam rerum esse scientiam visionis. DD. Societatis communissimè cum Suar., Vasqu., Martin., Arriag, disp. 18. esse scientiam simplicis intelligentiæ; quod probant tum ex Angelico hic quæst. 14. art. 8. ubi comparat Dei scientiam scientiæ Artificis; hæc autem non dirigit, quatenus videt opus jam factum, sed quatenus videt factibile; ergo scientia Dei non dirigit, nec causat creaturas, quatenus videt illas jam postas, sed quatenus videt eas posse poni: Tum ex Patribus passim docentibus cum Hieronym., Augustino, Chrysostomo, præscientiam futurorum esse posteriorem ad futurorum existentiam; atque adeo non posse scientiam visionis esse causam futurorum. Justinus Martyr qu. 58. hæc habet: *Non est causa ejus, quod futurum est, prænotio, sed quod futurum est causa est prænotio.*

III. Ut autem doctrina Thomistarum a nobis impugnanda percipiatur, sciendum, Thomistas præter scientiam simplicis intelligentiæ, quæ est causa rerum remota, & præter actum Divinæ voluntatis, quo Deus efficaciter vult ponere aliquod ex iis obiectis per scientiam simplicis intelligentiæ propositis, admittere in intellectu Divino alium actum, qui dicitur imperium, & scientia practica; hic enim actus supponit electionem liberam voluntatis, & imperat Omnipotentia dicendo, Fac hoc. Hanc scientiam Recentiores Thomistæ dicunt, esse causam proximam rerum, & quia est contingens, ideo est scientia visionis, unde scientia visionis dicitur causa rerum. Quomodo autem hujusmodi imperium dici possit scientia visionis, si præcedit, non consequitur rem contingentem, explicat Lumbier n. 213. dicendo, solam scientiam visionis speculativam esse de rebus factis, & consequi ad res contingentes, scientiam vero Visionis practicam esse de rebus faciendis, & antecedere res contingentes; illas

¶

causam

enim intuetur, ut existentes pro posteriori ad talem scientiam, quæ est earum factiva, & applicativa Omnipotentia: ad executionem; Sicut cognitio, qua Verbum procedit a Patre, intuetur ut existentem Spiritum Sanctum, qui est in posteriori originis tum ad ipsam cognitionem, tum ad Verbum per ipsam productum: Quamvis enim in illo priori intueatur Spiritum Sanctum ut existentem, non intuetur tamen Spiritum Sanctum ut existentem pro priori ad productionem Verbi. His explicatis sit

IV. Unica conclusio. Sola scientia simplicis intelligentiæ est causa rerum, nullatenus vero scientia visionis. Ita communiter DD. Societatis cum D. Thom. contra Thomistas.

Prob. posita scientia simplicis intelligentiæ representantis omnia factibilia tamquam virtute, & ratione causandi, ac dirigente ad operandum, & posito actu Divinæ voluntatis applicante hanc virtutem, quod scilicet velit hoc potius, quam illud factibile ponere, & circumscripta omni alia scientia visionis, intelligitur Deus proxime potens causare Creaturas; & posito actuali influxu Omnipotentis, intelligitur Deus actu causans Creaturas; ergo causa rerum nullatenus est scientia visionis. Antecedens probatur, & quidem quod non requiratur ut causa rerum scientia visionis speculativa, concedunt ipsi Thomistæ, & est manifestum, quia huiusmodi scientia consequitur ad res jam factas; ergo nequit esse illarum causa; aliter simul esset in posteriori, & in priori, quod repugnat. Quod vero neque prærequiritur ut causa rerum scientia visionis practica, nempe illud imperium, seu actus intellectus dictans, Fac hoc, probatur: tum quia huiusmodi imperium est omnino superfluum; cum scientia simplicis intelligentiæ, & Omnipotentia sufficienter applicentur ad agendum (illa ut dirigens, hæc ut exequens) per actum Divinæ voluntatis, quo Deus vult potius hoc factibile ponere, quam aliud; tum etiam quia esse huiusmodi imperium prærequireretur ad applicandam scientiam simplicis intelligentiæ, & Omnipotentiam ad agendum, nullatenus deberet dici causa rerum; quia applicativum causæ non est causa; aliter approximatio ignis posset dici causa combustionis.

Confirm. Scientia practica est scientia approbationis, quæ solum importat scientiam simplicis intelligentiæ representantem pro-

ducibilia cum actu voluntatis, quo vult hoc possibile producere, quin sit necessarium imperium superadditum; ergo sola scientia simplicis intelligentiæ est causa rerum. Antecedens probatur paritate adducta ab Angelico Artifice, qui ut causet opus artificiatum, solum cognoscere debet, quoniam pacto fieri possit, debetque velle applicare potentias executrices ad opus, quin requiratur ullus actus intellectus imperans. Et dato, quod aliquando in Creatura requiratur hoc imperium ad superandam aliquam difficultatem in exercitio operis, non propterea requiritur in Deo, qui nullam patitur difficultatem in operando. Præterea sicut in Creatura non requiritur imperium ut causa operis, sed ut applicativum causæ, (scilicet Idææ dirigentis, & potentiarum exequentium) ita si daretur in Deo imperium, neque requireretur ut causa rerum, sed solum ut applicativum Omnipotentia: ad Creaturas producendas; ergo a primo ad ultimum sola scientia simplicis intelligentiæ est causa rerum.

V. Obijc. 1. Scientia simplicis intelligentiæ est indifferens ad producendum Mundum, vel non producendum; ergo indiget prævio determinativo; quæ autem non est nisi scientia visionis, seu actus intellectus, qui dicitur imperium, dictans, Mundum esse faciendum; ergo causa rerum non est scientia simplicis intelligentiæ, sed scientia visionis. Probat minor, quia scientia, qua Deus operatur ad extra, est scientia, quæ terminatur ad rem ut aliquando existentem, non vero ut possibilem; atqui nisi detur imperium, non datur huiusmodi scientia; cum scientia simplicis intelligentiæ solum terminetur ad possibilia; ergo sine imperio non datur scientia, quæ fit causa rerum.

Confirm. ex August. lib. 15. de Trinit. c. 13. ubi ait: *Quia servit Deus, Creaturas creavit, non quia creavit, servit.* Et ex Gregorio 20. moral. cap. 24. *Quæcumque sunt, non ideo ab æternitate videntur, quia sunt, sed ideo sunt, quia videntur.*

Resp. nego min. Sufficienter enim determinatur scientia simplicis intelligentiæ, & Omnipotentia ad agendum ab actu Divinæ voluntatis. Ad probationem distingo majorem, scientia operativa est scientia, quæ terminatur ad rem; ut aliquando existentem, causando talem existentiam, concedo; præsupponendo huiusmodi existentiam, ut obiectum, nego majorem, & consequentiam.

Ad confirm. Patres etiam scientiam simplicis intelligentiæ vocant scientiam visionis, ut advertit D. Thom. qu. 2. de Veritate art. 9. quia scientia simplicis intelligentiæ ratione suæ certitudinis, & claritatis æquivalet visioni. Cæterum sicut verum est, Deum creasse Creaturas, quia eas scivit scientia simplicis intelligentiæ, & non e contra; ita verum est, Deum Creaturas existentes non vidisse ab æterno scientia simplicis intelligentiæ, quia sunt; sed ideo sunt, quia Deus vidit, eas scientia simplicis intelligentiæ esse possibiles; nisi enim præviderentur possibiles, non existerent.

VI. Objic. 2. Scientia, qua Deus operatur ad extra, terminatur ad rem ut aliquando existentem; sed scientia terminata ad Creaturas ut existentes est scientia visionis; ergo scientia visionis est causa rerum.

Resp. distinguo majorem: Scientia, qua Deus operatur ad extra, terminatur ad rem ut aliquando existentem, tanquam causa ad effectum ab illa directive causatum, concedo; tanquam cognitio ad objectum ab ipsa representatum sub ratione existentis, nego majorem; & distinguo minorem: Scientia terminata ad Creaturas ut existentes est scientia visionis, si terminetur ad illas hoc secundo modo, concedo; si ad illas terminetur illo priori modo, nego minorem, & consequentiam. Sic scientia Artificis terminatur ad existentiam arefacti, etiam quatenus est ejus causa dirigendo Artificem ad opus; sub qua ratione talis scientia non est intuitiva, sed abstractiva.

VII. Objic. 3. Decretum liberum est causa rerum; sed scientia visionis identificatur cum decreto libero; non secus ac scientia simplicis intelligentiæ identificatur cum ætæ voluntatis Divino necessario; ergo scientia visionis est causa rerum.

Confirm. Scientia, quæ est causa rerum, debet esse libera; sed sola scientia visionis est libera; ergo sola scientia visionis est causa rerum. Probat major, quia scientia causativa rerum debet esse indifferens ad causandum, vel non causandum; ergo debet esse libera.

Resp. in sententia Societatis contra Thomistam scientiam visionis de actibus liberis nostris non posse identificari cum decreto collativo auxilii indifferents; cum non possit in causa indifferenti videri effectus determinatus. Quare hujusmodi scientia visionis vel constituitur per quamdam virtualitatem in intellectu Divino consequentem ad nostros actus liberos, vel constituitur per in-

tellectum Divinum, & inadæquate etiam per ipsos actus liberos tanquam per connotatum extrinsecum, juxta varias sententias explicandas, cum de constitutivo decretorum liberorum Dei: Quicquid sit, an scientia visionis de consensu A, possit etiam constitui per complexum scientiæ mediæ de tali consensu sub auxilio indifferenti, & Decreti de conferendo tali auxilio, aut etiam constitui possit adæquate per ipsum decretum prædefinitivum consensus, coherentem ad ea, quæ diximus in conclusione quinta quæstionis antecedentis. Illud negari nequit, quod Deus habeat scientiam visionis de suis decretis liberis, & quod in suis decretis videat Creaturas, quæ ab iis causantur, tanquam in medio essentialiter cum Creaturis connexo; v. gr. in decreto libero de creando Antichristum videt tanquam in medio ipsum Antichristum futurum. Ex quo tamen non fit, quod sicut decretum liberum est causa effectus contingentis pendens a solo Deo, puta Antichristi, ita scientia visionis de hoc effectu sit etiam illius causa. Et ratio est, quia scientia, quæ causat res contingentes, debet illas præcedere, non consequi; solâ autem scientia simplicis intelligentiæ antecedit decreta libera causantia res contingentes, atque adeo res ipsas contingentes antecedit: Scientia vero visionis de decretis, & de rebus, quæ ab iis causantur, consequitur hæc objecta, non antecedit; ergo nullatenus potest scientia visionis esse causa rerum.

Ad confirm. distinguo majorem; Scientia, quæ est causa rerum, debet esse libera in essendo, seu debet esse contingens, nego majorem; debet esse libera in causando, hoc est indifferens, ut causet potius, vel non causet, concedo majorem, & distinguo pariter minorem, sola scientia visionis est libera in essendo, concedo, in causando, nego minorem, & consequentiam.

Hinc sequitur 1. Causam conservationis rerum non esse scientiam visionis; cum Deus non dirigatur ad conservandas res pro instanti A per visionem, quæ ipsas videt existere in instanti A; sed per scientiam simplicis intelligentiæ, quæ videt, quomodo possint conservari, & existere in instanti A.

Sequitur 2. Deum pro instanti reali A, quo aliquid causat, illud representare dupliciter, videlicet in priori signo rationis ut potens existere, atque adeo per scientiam simplicis intelligentiæ; qua Divina

voluntas dirigitur ad ejus effectum; in posteriori vero signo rationis repræsentat illud ut existens tum in fieri, tum in facto esse per scientiam visionis contemplantis existentiam objecti.

QUÆSTIO VI.

De Scientia Media.

I. Diximus, scientiam mediam esse scientiam Dei certam, & infallibilem de Futuris liberis conditionatis, v. gr. de eo, quod facturus esset Petrus, si vocaretur; hæc autem scientia ideo vocatur media, quia participat de scientia simplicis intelligentiæ, quatenus antecedit omnne decretum liberum; & de scientia visionis, quatenus est de objecto contingenti. Rursus participat de scientia necessaria, quia necessario Deus videt quid esset facturus Petrus, si vocaretur; & participat de scientia visionis contingente, quia contingens est, quod videat consensum potius Petri conditionatum, quam dissensum.

Notandum tamen 1. quod sicut Futura conditionata, quæ secundum se essentialiter habent connexionem cum conditione prævia, spectant ad scientiam simplicis intelligentiæ; ut ista conditionalis, Si Sol est, dies est; si est Homo, est Animal rationale: ita Futura conditionata, quæ habent necessariam connexionem cum conditione, non secernuntur se, sed ex libero Dei decreto decernente ea inter se conjungi, spectant ad scientiam visionis, ut est illa conditionalis 4. Reg. 13. *Si percussisses quinquies, aut sexies, five septies (idest iaculo Terram) percussisses Syriam usque ad consumptionem*. Ratio est, quia sicut pertinet ad scientiam visionis decretum liberum Dei decernens conjunctionem hujus futuri conditionati cum tali hypothesi; ita ad eandem scientiam pertinet tamquam objectum indirectum ipsum futurum conditionatum. Quare ad scientiam mediam solum spectant futura conditionata, in quibus conditio tum ratione sui, seu ex parte ipsius rei, tum ex parte Dei est indifferens ad utramque partem contradictionis.

Hæc tamen conditio alia dicitur esse conducent, alia disparata: Dicitur esse conducent, quæ vel est causa, vel conditio naturaliter requisita ad effectum liberum, v. gr. Si peteres eleemosynam a divite, ea tibi daretur. Dicitur vero disparata, quæ

nullam habet connexionem cum futuro conditionato, v. gr. Si Turca dormiret, tu orares. De utraque hac veritate conditionate agendum in præsentī, inquirendo, An Deus ea cognoscat independenter a quolibet decreto actu existente absoluto ex parte actus, conditionato ex parte objecti? sed præsertim agendum de veritate conditionata sub conditione conducente.

II. Notandum 2. hoc vocabulum scientiæ mediæ esse in Scholis inventum a Patre Petro Fonseca nostræ Societatis ann. 1566. deinde typis mandatum ab ejus discipulo P. Molina ann. 1589. in sua Concordia; non quia hujusmodi scientia a Patribus, aut a Theologis antiquis negaretur; sed quia olim nomine scientiæ visionis explicabatur notitia infallibilis Dei de quibuscumque objectis contingentibus etiam conditionate futuris. Quia tamen ex tempore præsertim Molinæ suborta fuit questio, quomodo contingentia conditionate futura cognoscerentur a Deo, ideo hoc novo nomine scientiæ mediæ cognitio isthæc Divina significari cæpit ad distinctionem cognitionis reliquorum contingentium. Ubi e contra nomen Prædeterminationis ita cæpit a Bannez eodem ferme tempore usurpari, ut nec hujusmodi nomen, nec ejus significatum a Patribus, & Theologis antiquis agnitus unquam fuerit, ut passim DD. Societatis ostendunt.

Denique sciendum, ab anno 1602. usque ad 1607. disputationes 47. habitas fuisse (videlicet 37. coram Clemente VIII., & 10. coram Paulo V.) inter Patres Societatis, & Patres Dominicanos, qui scientiam mediam, alia scilicet Molinæ propositiones impugnabant; ac demum Pontificem decrevisse, quod utriusque Familii sententiæ possent tuto, ac impune defendi, dummodo neutra pars alteram carpat censuris, vel injuriis laceffat. His præjactis, quæremus primo, An vere detur in Deo cognitio certa, & infallibilis contingentium conditionate futurorum? Secundo, Utrum Deus ea cognoscat in aliquo decreto absoluto ex parte actus, & conditionato ex parte objecti, ut volunt Prædeterminantes, an vero in seipsis? in quo consistit? cardo præsentis questionis. In sequenti vero inquiremus, An detur etiam in Deo scientia media reflexa, seu scientia suorum decretorum conditionate futurorum? v. gr. An si Adam non peccasset, Deus decrevisset Incarnationem?

ARTICULUS I.

An Deus videat contingensia conditionate futura?

III. D^{icendum} cum communissima, Deum de facto habere scientiam certam, & infallibilem contingentium conditionate futurorum. Conclusionem hanc Amicus disp^o 12. dicit esse de fide, cum de ea constet ex scripturis mox laudandis. Ple-rique Thomistæ docent, negari non posse si- ne injuria divinitatis. Salmaticenses tamen, & Gonzalez apud Platellum n. 118. putant, conclusionem non esse certam, quia Cabre- ra, Ledes, & alii antiquiores Thomistæ docuerunt, Deum probabilem tantum ha- bere noticiam de his Futuris.

Prob. 1. quia sæpe Deus hujusmodi Fu- tura revelavit in Scripturis; ergo cum Di- vina revelatio sit infallibilis, est pariter in- fallibilis eorum cognitio. Antecedens pro- batur: nam 1. Reg. 23. cum David consu- leret Dominum, & interrogaret, an si ma- neret Ceilæ, Saul descensurus esset ad eum capiendum? & an Celiæ traditurus essent ipsum in manu Saulis? respondit Domi- nus: *Descendet; Tradetur.* 3. Reg. 11. dixit Deus Salomoni, ac Israelitis: *Ne ingre- diamini ad eas* (videlicet ad mulieres alie- nigenas) *certissime enim auvertent corda ve- stra, ne sequamini Deos earum.* Sap. 4. dicitur: *Rapius est, ne malitia mutaret intelle- ctum ejus.* Matth. 11. & Lucæ 10. dixit Christus Dominus: *Pe tibi Corozaim, & ti- bi Bethsaida, quia si in Tyro, & Sidone sa- tis fuissent virtutes, quæ factæ sunt in vo- bis, olim in cinere, & cilicio penitentiam e- gissetis:* Et quævis in Græco dicitur: *Forse penitentiam egissent.* Augustinus ta- men tract. 27. in Joannem advertit: *Ille, qui omnia scis, quando dicit, Forsitan, non dubi- tat, sed increpat:* Sic Joannis 8. *Si me sci- retis, & Patrem meum forsitan sciretis.*

Confirm. ex Patribus suspicientibus al- tissima Dei consilia, qui cum præviderit tot Angelos, & Homines perituros, ad- huc eos condere voluerit. August. lib. de dono Persever. ait: *Poteras illos Deus, præ- sciens esse lapsuros, antequam id fieret, au- ferre de hac vita.* Et in Enchiridio c. 9. re- futans Semipelagianos dicentes, perducì ad baptismum parvulos prævisos eo bene usuros, si viverent, non perducì vero prævisos male usuros, convincit id esse falsum, quia aliquin etiam Tyrii salvandi fuif-

Pars I.

sent, quos Deus prævidit credituros, scis, ut Judæis, prædicatum fuisset Euangelium.

Prob. 2. ratione, quia cognoscere certo, & infallibiliter etiam futura libera condi- tionata est perfectio simpliciter simplex; non secus ac cognoscere præsentia, præte- rita, & futura libera absoluta; ergo hu- jusmodi cognitio non est deneganda Deo, præsertim quia maxime conducit ad ejus providentiam, quippe quæ definitur, *Ra- tio ordinans unumquodque per media congrua ad suum finem;* non posset autem Creatu- ras rationales ad suum finem ultimum per media apta rite perducere, si careret hac scientia, ut infra ostendetur; ergo.

Confirm. Ad infinitam Dei cognoscitivi- tatem spectat certo, & infallibiliter co- gnoscere quicquid est certo cognoscibile, & affirmabile; sed futura libera conditionata sunt certo cognoscibilia, & affirmabilia; ergo ad infinitam Dei cognoscitivitatem per- tinet ea certo, & ipsa infallibiliter cognosce- re. Prob. min. Præsentia, & futura libera absoluta ideo sunt certo cognoscibilia, & affirmabilia, licet sint contingencia, quia habent certam, & determinatam verita- tem; cum non detur a parte rei medium inter existere determinate, & non existere determinate pro quolibet instanti, sive præ- senti, sive futuro; atque neque datur me- dium inter existere determinate posita con- ditione, & non existere determinate, posita eadem conditione pro quolibet pariter in- stanti; ergo sicut contingencia præsentia, & futura absolute habent certam, & de- terminatam veritatem, adeoque sunt certo cognoscibilia, & affirmabilia, ita etiam contingencia futura conditionate.

IV. Hinc habes primo, duplicem dari ob- jectivam veritatem, & cognoscibilitatem; aliam Intrinsecam identificatam cum ipsa rei entitate sive actu existente, sive futura, aut absolute, aut conditionate; aliam Ex- trinsecam identificatam cum Divina cog- nitione, quæ potest extrinsece denominare objectum certe cognitum, aut affirmatum. Futura absoluta, & conditionata non ha- bent ab æterno cognoscibilitatem intrinse- cam, habent tamen extrinsecam; sicut Hir- cocervus non habet intrinsecam, sed habet extrinsecam cognoscibilitatem; & eodem modo possibilia solum habent ab æterno cognoscibilitatem extrinsecam, seu per de- nominationem a cognitione Divina, quæ potest illa cognoscere etiam in se ipsis.

Habes 2. Actus liberos creatos tam præ- sentes, quam absolute futuros prius ratio-

ne cognosci a Deo, ut conditionate futuros, quam ut absolute futuros, vel existentes: v. gr. Penitentia D. Petri prius ratione cognoscebatur conditionate futura sub tali vocatione, quam futura absolute: Ratio est, quia actibus liberis prius ratione competit, quod posita conditione ponantur, quam quod sint absolute futuri.

V. Obijc. 1. Futura libera conditionata sunt contingentia; ergo non sunt determinate vera, sed habent indifferentiam ad veritatem, vel falsitatem; ergo non possunt a Deo ab æterno determinate, & certo cognosci. Probat per consequentiam, quia huiusmodi futura nullum habent esse; ergo non possunt habere esse determinatum in se, sed solum esse indifferens in causa.

Confirm. Omnis denominatio de præsentibus debet habere de præsentibus si minus omnia constitutiva, saltem ultimam actualitatem; v. gr. ut detur denominatio Antichristi cogniti, licet non debeat dari Antichristus, debet tamen de præsentibus dari cognitio, quæ est actualitas ultima in ordine ad hanc denominationem; ergo, ut detur ab æterno hæc veritas, si Petrus vocaretur, consentiret, deberet ab æterno dari consensus Petri, qui est ultima actualitas; sed talis consensus non datur ab æterno; ergo nec veritas illa conditionata.

Resp. nego primam consequentiam. Ad probationem distinguo antecedens: Futura conditionata nullum habent esse nunc, aut ab æterno absolute, concedo; nullum habent esse, posita conditione, nego antecedens, & distinguo consequens: non possunt habere esse determinatum in se nunc absolute, concedo, pro tempore importato per copulam, & conditionate, nego consequentiam: Sicut futura absoluta, v. gr. peccatum Antichristi non habet esse intrinsecum, ac determinatum in se physice ab æterno, & tamen ab æterno habet suum esse logicum, quatenus habebit suum esse physicum pro tempore importato per copulam, quod requiritur, & sufficit, ut ab æterno sit determinate vera hæc propositio; Antichristus peccabit; siquidem ex Philosopho, ex eo, quod res est, vel non est pro tempore importato per copulam, propositio dicitur vera, vel falsa; ita prolixius futura conditionata habent ab æterno suum esse logicum, quatenus habent suum esse physicum determinatum pro tempore importato per copulam, purificata conditione; quod re-

quiritur, & sufficit, ut propositio de futuro conditionato ab æterno sit determinate vera; unde infallibiliter a Deo talis veritas cognoscatur. Quare non negamus contingentiam actus liberi conditionate futuri, nec dicimus, solam indifferentiam in causa sufficere, ut determinate cognoscatur; sed dicimus, præter indifferentiam, quam habet actus liber in causa, habere etiam necessarium suum esse, vel suum non esse determinatum pro quolibet instanti tum absolute, tum posita quacunque conditione; & huiusmodi esse, vel non esse determinatum reddere cognitionem, ac propositionem de illo determinate veram, vel determinate falsam ab æterno.

Ad confirmationem, licet denominationes physice, seu quæ habentur a forma physice existente requirant de præsentibus aut formam, aut ultimam actualitatem, ut denominatio albi, cogniti, &c.: at denominationes logicæ, & mere intentionales requirunt ultimam actualitatem solum logicæ, quatenus requirunt, ut ultima actualitas habeat esse physicum pro tempore importato per copulam, & prout requirit talis denominatio; sic denominatio Adami olim peccantis habetur a peccato præterito, quod nunc tamen logicæ existit, idemque dicas de denominatione Antichristi peccaturi; & eodem modo denominatio Petri conditionate consentientis habetur ab ipsa existentia physica consensus, non quæ sit nunc, aut quæ fuerit, aut sit futura absolute, sed quæ esset conditionate; unde nunc tantum logicæ existit; Et ratio est, quia hoc tantum esse conditionatum requiritur, & sufficit, ut habeatur talis denominatio, & sit vera hæc propositio, Si Petrus vocaretur, consentiret.

Hoc solet apte a Logicis, & a Theologis explicari comparando differentias temporis cum differentiis loci; sicut enim hæc propositio, Turca dormit Constantinopoli, est hic vera, licet somnus, seu ultima actualitas non detur hic, nisi tantum logicæ; ita prolixius hæc propositio de futuro absoluto, Antichristus peccabit, sicut etiam hæc alia de futuro conditionato, Petrus consentiret, si vocaretur, est nunc vera, licet peccatum Antichristi, & consensus Petri conditionatus non detur nunc physice, sed tantum logicæ, seu prout requiritur ad has denominationes.

VI. Obijc. 2. Augustinus de prædestinatione Sanctorum c. 9., & alibi reprehendit scientiam conditionatorum, ut erroneam

neam adversus Semipelagianos . Præterea c. 14. hæc habet: *Hoc præcivit Deus, quod futurum erat, non quod futurum non erat*: atqui futurum conditionatum non erit futurum; ergo non præcivit a Deo.

Confirm. 1. ex Navarrete: Vel illa particula conditionalis, *Si*, se tenet ex parte Dei, ita ut sensus sit, quod si Petrus vocaretur, tunc Deus illum converteret, & hoc importat in Deo imperfectionem, quia deberet Deus expectare aliquid extra se ad deccernendum quid esset facturum: vel illa conditionalis se tenet ex parte rerum, ita ut sensus sit, quod attenda natura Petri sub his conditionibus sequeretur consensus; & hoc dici non potest, quia in sola natura liberi arbitrii indifferentis nequit cognosci effectus determinatus.

Confirm. 2. quia ut scientia ista conditionatorum esset infallibilis, & digna Deo, deberet Deus videre infallibilem connexionem inter conditionem, & conditionatum; sed hæc connexio infallibilis pugnat cum libertate consensus, ut patet: ergo non datur in Deo scientia isthæc media.

Resp. cum Fasolo nu. 235, & Mauro, Augustinum non reprehendere scientiam conditionatorum, quæ a Semipelagianis admitteretur, sed solum prout ab iis admitteretur; atque adeo damnabat tantum ejus abusus. Semipelagiani utebantur scientia ista Divina ad salvandum, quod Deus daret primam Gratiam ex meritis conditionate prævisis, ne aliquin esset acceptor Personarum per hoc, quod absque ullo merito daret Gratiam uni, & alteri illam negaret. At D. Augustinus, & D. Prosper opposuerunt Semipelagianis, quod sicut Deus potest absque ullo merito prævio velle, quod Baptismus conferatur uni Infanti, qui statim decedit, & salvatur; ac permittere, quod alteri baptismus negetur, unde damnatur; ita potest absque ullo merito prævio dare huic adulto primam Gratiam efficacem, & negare illam alteri, quin sit acceptor Personarum; & ratio est, quia non distribuit bona communia, sed bona propria, quæ potest ad libitum conferre.

Hinc Semipelagiani addiderunt alterum errorem dicendo, quod etiam Pueri, qui baptizantur, obtineant baptismum ex meritis conditionate prævisis. Sed Catholici omnes cum Augustino docent, merita conditionata non esse merita; aliter posset Deus quemlibet ad arbitrium salvare, aut damnare, cum videat tam merita, quam demerita conditionata uniuscujusque sub variis

conditionibus. Quare demerita, aut merita, quæ non sunt, sed censent, non possunt, sed possent premiari, vel puniri. Hunc itaque scientiæ conditionalium abusum damnat Augustinus, quæ salvetur, quod Deus primam Gratiam conferat ex meritis conditionatis; non damnat tamen, sed pluribus in locis admittit hanc scientiam, quæ salvetur, quod Deus absque ullo prævio merito det nobis primam Gratiam efficacem, vi cujus beatitudinem mereamur, & quod prædestinatio ita pendeat a nostro libero arbitrio, ut tamen sit beneficium uni Divinæ benevolentia tribuendum: licet enim Beatitude non sit nobis conferenda, nisi propter merita, nihilominus nullum meritum nostrum præcessit ad actum Divinum prædestinantem nos, & ordinantem nostræ merita ad beatitudinem obtinendam. Quæ omnia circa scientiam mediam salvari non possunt, ut in sequenti articulo clarius apparebit.

Ad id, quod additur: sicut ex Augustino Deus præcivit, quod futurum erat, non vero quod non erat futurum; quatenus repugnat, ut præcognoscat futurum id, quod non est futurum; ita pariter in eodem sensu præcivit ab æterno, quod futurum esset, non vero quod futurum non esset sub aliqua conditione.

Ad 1. confirm. dico, particulam conditionalem, *Si*, se tenere ex parte omnium, quæ præcedunt consensum, ita ut sensus sit, sicut omnia, quæ fuerunt facta Judæis, facta fuissent Tyriis, isti converterentur; quod nec fert imperfectionem in Deo, nec fert, quod consensus conditionate futurus prævideatur in libero arbitrio indifferenti, sed in seipso, ut dicemus articulo sequenti.

Ad 2. dicendum, quod ut scientia Dei sit infallibilis, non debet videre connexionem infallibilem, seu necessariam inter conditionem, & conditionatum, sed solum debet videre connexionem contingentem infallibiliter; hæc autem habetur præcise per hoc, quod si poneretur conditio, poneretur consensus; quod non pugnat cum libertate consensus.

ARTICULUS II

Num futura libera conditionata prævideantur a Deo in aliquo Decreto, an in se ipsis.

VII. **H**ic est, ut diximus, cardo difficultatis, & præcipua dissensio inter Thomistas, & DD. Societatis; cum enim negari non possit falsis scripturis, & citra injuriam divinitatis, quod Deus de facto cognoscat, quid Tyrri v. gr. essent facturi, si prædicatum fuisset illis Evangelium, prout prædicatum fuit Judæis, dubitatur solum, Num Deus videat consensum conditionatum Tyrriorum in ipso consensu; sicut per scientiam visionis videt futura absoluta in se ipsis; an vero videat in aliquo decreto actu existente absoluto ex parte actus, conditionato ex parte objecti, quo Deus ab æterno decreverit salvare Tyrrios conditionate, scilicet si prædicaretur illis Evangelium? Posito enim hoc decreto infallibiliter connexo cum consensu Tyrriorum conditionato, videretur hic consensus a Deo per scientiam visionis, qua videntur omnia connexa cum decretis liberis Dei, & non per scientiam mediam, qua attinguntur objecta independentes a quovis actuali Dei decreto; ac proinde si Deus videt futura libera conditionata in his decretis, solum datur in Deo scientia simplicis intelligentiæ, & visionis, non vero media.

VIII. Dico equidem 1. cum Doctoribus Societatis contra Prædeterminantes, & Con-determinantes, Futura libera conditionata non videri a Deo per scientiam visionis in ullo decreto absoluto ex parte actus, conditionato ex parte objecti. Ita ex Angelico, qui quæst. 14. art. 13. docet, quod Deus mere conjecturaliter videat futura libera in causis suis; si autem ea videret in decreto essentialiter cum iis connexo, non videret conjecturaliter, sed infallibiliter in tali causa; atque adeo ex Angelico videntur a Deo futura libera infallibiliter in seipsis per scientiam mediam. Huic etiam Conclusioni aspiquantur Malderus, Lorca, Duvalius, Petrus a S. Joseph, Mascarennas, Pennortus, Caspensis, Cavellus, Faber, & alii pluresque ducenti apud Henao, & apud Platellum n. 123.

Probatur: Hujusmodi decretum actu existens, in quo Deus videret futura libera conditionata infallibiliter, deberet esse de-

cretum prædeterminans, aut condeterminans; aliter non connecteretur infallibiliter cum consensu conditionato: acqui si esset prædeterminans, aut condeterminans, everteret libertatem talis consensus; ergo nequit consensus liber conditionate futurus a Deo prævideri in ullo decreto actu existente. Major patet. Minor hic supponitur ex dicendis in de Gratia.

Dices. Quare negata scientia media, nequit dari decretum prædefinitivum consensus conditionate futuri, quod non violat ejus libertatem, cum in sententia Societatis Deus prædefiniat de facto actus bonos liberos nostros absque eversione libertatis?

Resp. in tantum dari posse in sententia Societatis decretum prædefinitivum consensus liberi, absque eversione libertatis, in quantum hujusmodi decretum supponit scientiam mediam de tali consensu: sic enim potest voluntas impedire, ne fuerit ab æterno scientia media de consensu, & consequenter impedire potest decretum prædefinitivum talis consensus; unde cum infirmitate Divini decreti prædefinitivi bene coheret in sententia Societatis libertas consensus prædefinit, non secus ac cum infallibilitate Divinæ præscientiæ de peccato Antichristi coheret libertas Antichristi ad non peccandum. At negata scientia media in Deo, decretum intentivum nostri consensus ita esset infirmitate, & essentialiter connexum cum consensu, ut simul esset inimpedibile a voluntate creata: unde esset eversum libertatis. Non posset enim voluntas nostra impedire decretum Divinum directe, ut patet, cum non sit actus nostræ voluntatis; nec posset illud impedire indirecte, hoc est impediendo scientiam mediam prærequisitam ad illud, cum in sententia Prædeterminantium, & Con-determinantium hæc scientia non præsupponatur; ergo hujusmodi decretum esset essentialiter connexum cum consensu, & inimpedibile a voluntate, atque adeo esset eversum libertatis.

Ratio autem brevissima, cur decretum prædeterminans, (& in communiori sententia etiam prædefinitio antecedens scientiam mediam, & universim quodcumque antecedens inimpedibile, & impossibile cum utraque parte contradictionis) evertat libertatem, est, quia voluntas sub hoc decreto prædeterminante ad consensum nec potest ponere dissentium in sensu composito, componendo scilicet prædeterminationem ad consensum cum dissentio; quia ta-

lis prædeterminatio supponit incompensabilis cum dissensu; nec posset ponere dissensum in sensu diviso, hoc est dividendo a se prædeterminationem ad consensum, & abigendo illam; cum supponatur inimpedibilis a voluntate tum directe, tum indirecte, ut ostendimus; ergo voluntas sub tali prædeterminatione simpliciter non posset ponere dissensum, unde rueret libertas; non fecit ac voluntas sub visione beata caret libertate ad peccandum, cum non possit peccare neque in sensu composito, neque in sensu diviso.

Confirm. conclusio; quia cum a plerisque Thomistis negetur prædeterminatio Divina ad malum, eo quod faceret Deum autorem peccati, non posset in his decretis prædeterminantibus videri a Deo dissensus, sed peccatum; unde in sententia Prædeterminantium ignoraret Deus peccata, quæ poneret voluntas, posita aliqua conditione.

Confirm. 2. auctoritate Scripturarum, & Patrum; Ex Scripturis quidem, quia si futura conditionata præviderentur in decreto actu existente, & conditionate prædeterminante, indigna fuisset Christo Domino illa exprobratio facta Judæis dicendo, *Si in Tyro, & Sidone, &c.* nam poterant Judæi respondere: ideo Tyrii converterentur, quia Deus decreto suo prædeterminante decrevit eorum conversionem, si iis prædicaretur Euangelium; nostram autem conversionem non decrevit. Ex Patribus vero; quia inepte quærent, cur v. g. voluerit Deus Diabolum, & Adamum creare, cum præviderit eos peccaturos; si enim in Deo daretur decretum conditionate prædeterminans, idem esset quære, cur voluerit eos creare, cum præviderit peccaturos? ac quære, cur voluerit eos creare, cum voluerit eos creare, & ad peccatum prædeterminare? quod esset SS. Patribus indignum.

Confirm. 3. quia decreta, in quibus Deus videret infallibiliter actus liberos conditionate futuros, deberent esse necessaria, & infinita; Necellaria quidem, quia aliter daretur objectum, de quo Deus interrogatus dicere posset, Ignoro; quod repugnat Divinæ cognoscitivitati. Deberent etiam esse infinita, saltem terminative, & virtualiter relate ad quamcunque Creaturam liberam, quia de quolibet Homine, vel Angelo deberet Deus scire, quid veller sub infinitis variis circumstantiis. Sed repugnat huiusmodi decreta esse necessaria, cum

Deus possit nihil decernere de possibilibus; aliter non esset plene liber: repugnat etiam, quod sint infinita de quolibet individuo possibili, ut ipsi Adversarii fatentur; *Absurdum est*, inquit Gonetius disp. 3. de voluntate, *fingeri in Deo infinita decreta conditionata circa infinitas fere combinationes possibiles*. Unde Joannes a S. Thom. qu. 14. dicit, tantum sciri a Deo illos eventus conditionatos, qui connexionem habent cum hoc Universo condito, non reliquos: ergo Deus futura libera conditionata non videt in decretis.

IX. Prob. denique conclusio, quia huiusmodi decretum subjective absolutum, & objective conditionatum, in quo Deus prævideret futura libera conditionata, est essentialiter superfluum; ergo non est admittendum. Probatur antecedens: huiusmodi decretum vel poneretur ut objectum, in quo tamquam in medio cognito Deus cognosceret futura conditionata, vel ut causa eorumdem purificata conditione; sed neque deservit ut objectum habens rationem medii ad cognoscenda futura conditionata; cum possit ea Deus cognoscere immediate in se ipsis, ut potest futura absoluta, & possibilia, juxta superius dicta; unde sicut esset superfluum decretum, in quo Deus videat possibilia, necnon decretum, in quo videat futura absoluta, si mere deserviat ut medium, & non ut causa futurorum; ita est essentialiter superfluum decretum, in quo Deus videat futura libera conditionata, si illud non deserviat ut eorum causa: atqui neque huiusmodi decretum deservit ut causa futuri liberi conditionati; non solum quia everteret ejus libertatem, ut hic supponimus; sed etiam quia ad ponendum esse eum, purificata conditione, requiritur, & sufficit decretum omnino absolutum, quod ponatur conditione purificata; ergo decretum prævium absolutum duntaxat ex parte actus, & conditionatum ex parte objecti non deservit ut causa futuro: um conditionalium, atque adeo est omnino superfluum. Certe per Adversarios, ut Petrus in instanti A. consentiat, sufficit decretum prædeterminans absolutum, quin requiratur decretum ullum conditionatum; ergo ut Petrus purificata conditione consentiat, sufficit etiam decretum prædeterminans absolutum, quod purificata conditione existit, quin prærequiratur ut causa consensus ullum decretum conditionatum: Sicut voluntas, quæ est causa consensus, sufficit quod ponatur purificata conditione.

dictione, quin debeat ante conditionem præexistere, ut possit consensum causare.

Confirm. Decretum conditionatum, quod ponitur ab Adversariis, purificata conditione non daretur; ergo nullatenus potest causare consensum. Probatur antecedens, quia purificata conditione habetur effectus absolutus; ergo tunc requiritur causa absolute existens; atque adeo requiritur decretum volens absolute causare consensum liberum; ergo decretum conditionatum, quod vellet, si, tunc non daretur.

X. Dico 2. Futura libera conditionata videntur a Deo in seipsis per scientiam medium independentem a quovis decreto actu existente. Ita DD. Societatis, & plerumque his 100. alii Auctores, ut diximus in prima Conclusionem, ac præsertim plurimi Scottiæ cum Fabro, Cavello, & aliis; & plures etiam Universitates.

Prob. Non potest Deus futura libera conditionata videre in ullo decreto, ut ostendimus in conclusione antecedente; nec potest ea videre in causis proximis, utpote indifferentibus; ergo debet videre in seipsis, non secus ac futura libera absoluta.

Confirm. Ideo futura libera absoluta videt Deus per scientiam visionis in seipsis, etiam si possit ea pariter videre in complexo scientiæ mediæ de tali actu sub tali auxilio, & decreti de conferendo hoc auxilio, aut in decretis prædefinitivis juxta superius dicta, quia futura absoluta libera pro instanti quo erunt, habent solum indifferentiam extrinsecam in sua causa; in seipsis vero habent determinatum esse, aut determinatum non esse: Atqui hoc etiam dicendum de futuris liberis conditionatis; quippe quæ pariter, purificata conditione, aut determinate essent, aut determinate non essent, cum non possit dari medium inter hæc duo contradictoria a parte rei, ut supra ostendimus; ergo etiam futura libera conditionata videntur a Deo in seipsis. Idcirco autem diximus, non posse dari medium inter determinate esse, & determinate non esse, quia unumquodque per suum esse, vel per suum non esse habet necessario determinationem ad existendum, aut ad non existendum; sed inter esse, & non esse non datur medium, eo quod sint formaliter contradictoria; ergo nec datur medium inter esse determinate, & determinate non esse a parte rei pro quolibet instanti, eo quod hæc sint contradictoria æquivalenter, ut diximus, cum de scientia

visionis, & adverte Martinez contrav. 3. disp. 2. sect. 2.

Dices: Vel consideratur futurum conditionatum in priori ad decretum, & sic præscindit ab esse, vel non esse; vel consideratur in posteriori ad decretum, & sic determinationem habebit a decreto, non a seipso: ergo futurum conditionatum nequit a Deo videri in se ipso independentem a decreto.

Resp. futurum conditionatum non considerari in priori ad decretum, quod esset ex parte hypothæsis, sed in priori ad decretum absolutum, quod actu sit; sicut enim actus liber debet esse a decreto Dei oblativo concursus indifferentis, ita etiam debet esse a voluntate creata; sed futurum conditionatum non consideratur ab Adversariis in priori ad voluntatem, quæ esset, sed in priori ad voluntatem, quæ actu sit; ergo neque considerari debet a nobis in priori ad decretum, quod esset, sed in priori ad decretum absolutum, quod actu sit. Hoc posito dicendum, quod in posteriori ad decretum, quod esset, si purificaretur conditio, futurum conditionatum habere esse determinatum, non quidem a decreto, utpote indifferenti, sed ratione sui, quatenus in quolibet instanti vel debeat determinate esse, vel determinate non esse, cum non detur medium inter hæc contradictoria; atque adeo in priori ad quodcumque decretum actu existens potest a Deo determinate cognosci futurum conditionatum. Et sensus est, quod decretum Dei actu existens non sit medium, in quo futurum conditionatum cognoscatur, licet verum sit, quod hujusmodi futurum purificata conditione non esset sine decreto, a quo dependeret: Ad eum modum, quo possibile cognoscitur a Deo independentem a decreto actu existente, quatenus nullum decretum liberum est medium, in quo cognoscantur possibilia, licet verum sit, non cognosci a Deo ullum possibile, quod possit poni a parte rei independentem a decreto, a quo causetur.

ARTICULUS III.

Diluantur objecta.

XL. Objic. 1. Nequit Divinus intellectus ab ipsis objectis creatis determinari ad ea cognoscenda; ergo non videt futura libera conditionata in seipsis, sed in decreto absoluto ex parte actus, & con-

conditionato ex parte objecti. Probatur antecedens 1. si determinaretur ab objectis creatis, indigeret illis ad cognoscendum; & quia cognitio Divina identificatur cum essentia Divina, ideo indigeret illis Deus ad efficiendum, atque adeo non esset Deus independentes, & a se.

Secundo, quia nihil potest determinare cognitionem Divinam, si nihil sit: sed futurum pure conditionatum nihil est; ergo.

Tertio, quia quod non est, nequit determinare intellectum creatum ad aliquid cognoscendum; ergo a fortiori intellectum Divinum, qui vi sua independenter ab influxu objecti potest omnia cognoscere.

Quarto, quia quod non est actu cognoscibile, sed solum cognoscibile, si existeret, non potest, sed solum posset a Deo cognosci; atqui quod non est, sed esset, non est actu cognoscibile, sed solum esset cognoscibile, si existeret, cum cognoscibilitas identificetur cum entitate, & sit passio entis; ergo si entitas futuri conditionati non datur, sed daretur, huiusmodi objectum non est, sed solum esset cognoscibile a Deo.

Resp. hæc omnia probare, quod neque possit Deus ab æterno cognoscere futura absoluta in seipsis: Neque dicas, ea cognosci in præsentia æternitatis, cum ostenderimus, ea non esse ab æterno præsentia Deo realiter, sed tantum objective. In forma distinguo antecedens. Nequit Deus determinare ad aliquid cognoscendum ab objectis creatis tamquam a conditionibus, nego; tamquam a virtute influxiva, aut ratione cognoscendi, con. antec. & nego consequ.

Ad 1. prob. Deus cognoscit, quæ debet cognoscere, etiam si nihil præter ipsum physice existat; unde nullatenus indiget Creaturis. Sicut autem requiritur esse possibile Creaturarum, ut possit Deus eas cognoscere ut possibiles, & ut possit eas ponere; ita requiritur futuritio conditionata, aut absoluta objecti, ut possit Deus illud cognoscere prout esset, vel erit; quod nullam inducit in Deo indigentiam, aut dependentiam, nisi grammaticaliter, & in sensu non involviente imperfectionem in Deo. Quare distinguo antecedens; indigeret Deus objectis creatis, quatenus Divinus intuitus prærequireret esse logicum illorum ad ea cognoscenda, prout essent, purificata conditione, concedo, esse physicum, nego antec. & consequ.

Ad 2. distinguo majorem. Nequit deter-

minare Divinam cognitionem, quod non est, nec physice, nec logice, seu quod nec est, nec esset, concedo; quod non est physice, sed est logice, seu quod non est, sed esset, nego majorem, & distincta minore, nego consequentiam.

Ad 3. nego consequentiam. Disparitas est, quia Intellectus creatus indiget objecto tamquam virtute partialiter influxiva ad cognitionem; & ideo si non sit physice, nequit determinare intellectum creatum ad cognoscendum, quia quod physice non existit, nequit causare: at relate ad intellectum Divinum, objectum creatum se habet ut purum determinativum, & ut pura conditio, quin debeat influere aut per seipsum, aut per speciem impressam in Divinam cognitionem: quod autem non est physice, potest esse huiusmodi conditio, si habeat esse conditionatum, seu logicum.

Ad 4. distinguo majorem: Quod non est cognoscibile neque cognoscibilitate objectiva intrinseca, & physice existente, nec cognoscibilitate objectiva extrinseca, & logice existente, nequit a Deo cognosci, concedo, quod non est cognoscibile cognoscibilitate intrinseca, sed est cognoscibile cognoscibilitate extrinseca per denominationem a potentia cognoscitiva potente illud representare, nequit a Deo cognosci, nego majorem, & distinguo minorem; Futurum conditionatum non habet cognoscibilitatem intrinsecam identificatam cum physica ejus entitate nunc existente, concedo; non habet cognoscibilitatem extrinsecam, nego minorem, & consequentiam; Sicut enim possibilia, nec non entia chimerica habent solum cognoscibilitatem extrinsecam, & logicam, ita futura conditionata.

XII. Objic. 2. Ratio potissima, cur ab Authoribus Societatis admittatur in Deo scientia media, est, quia aliter salvari non posset Divina Providentia relate ad Creaturas liberæ quæ liberæ; sed hæc ratio non probat, immo potius probat oppositum; ergo non datur scientia media. Major patet, quia nisi Deus per scientiam mediam prævideret actus hominis conditionate futuros, puta conversionem Petri, si vocaretur, dum prædestinat Petrum, & vult illum salvare, vel conferret auxilium prædeterminando Petrum ad conversionem, & non salvaretur libertas talis conversionis; vel conferret auxilium indifferens, & jam posset Petrus non converti. Unde posset Deus dicere: Si novissem, quod auxilium collatum esset inefficax, non dedissem hoc, sed aliud;

aliud ; quod dedecet Providentiam Divinam, relate ad quam nihil debet accidere casuale, & fortuitum, sed omnia debent ad finem præstitutum apte conferre. Probatur itaque minor: si daretur scientia media, Deus de se esset indifferens ad habendam scientiam mediam de consensu potius, quam de dissensu Petri, si vocaretur auxilio A; ergo si Petrus consentiret sub auxilio A, fortuito accideret Deo scientia media de consensu; ergo ex eo quod nihil dari possit Deo fortuitum, probatur potius, non debere dari scientiam mediam, sed debere Deum futura conditionata in decretis prædeterminantibus cognoscere, unde ratio adducta probat oppositum.

Resp. plurimas esse rationes, quibus Authores Societatis contendunt, debere dari scientiam mediam. Prima est, quia cum Deus sit summe cognoscitivus, debet adu cognoscere quæcumque potest cognoscere, & statim ac potest: atqui potest Deus cognoscere futura libera conditionata, & potest illa infallibiliter cognoscere in priori ad decreta libera; ergo debet pro illo priori ea cognoscere, atque adeo dari debet scientia media. Major est certa. Minor constat tum solutione argumentorum, tum etiam quia futurum liberum conditionatum independentem a decreto, vel esset determinate, vel determinate non esset posita conditione, cum non deat medium inter hæc contradiCTORIA; ergo habet quicquid requiritur, ut possit in seipso infallibiliter determinate cognosci in priori ad quodvis liberum Dei decretum absolute existens. Qua de causa communissime negant, possibilem esse prædefinitionem ante scientiam mediam, & solum disputant, An si per impossibile ea daretur, converteret libertatem consensus prædefinitæ. Secunda ratio est, quia decretum absolutum ex parte actus, conditionatum ex parte objecti, in quo videantur futura conditionata, est essentialiter superfluum, ut supra ostendimus. Tertia, quia vel Deus deberet ignorare peccata conditionate futura, si non daretur decretum prædeterminans relate ad illa, vel deberet prædeterminare ad malum, & sic esse Author peccati. Quarta, quia si darentur huiusmodi decreta, indigna fuisset Christo Domino exprobratio illa facta Tyrrii, ut supra diximus. Quinta potissima ratio est, quia aliter conciliari non posset libertas Creaturæ cum infirmitate Divini decreti, ut ostendimus in de Gratia; nam si decretum prædestinans Petrum v. gr. non

supponat scientiam mediam, vel non est infirmitas, si sit oblativum concursus indifferens ad consensum, vel dissensum; vel everit libertatem Creaturæ, si sit prædeterminans. Denique præter alias rationes illa est etiam potissima, quæ in argumento adducitur, quia scilicet non posset aliter salvari Divina Providentia relate ad Creaturas liberas: cum enim Providentia sit Ratio ordinans unumquodque ad finem suum per media congrua, debet Providentia Divina ordinare Creaturas liberas ad affectionem finis ultimi per actus liberos, & meritorios; atqui negata scientia media non posset Creaturas liberas ad Beatitudinem ordinare, nisi per decreta prædeterminantia everita libertatis; ergo rueret Divina Providentia relate ad Creaturas liberas, qua liberas.

In forma negotii minorem. Ad probationem distinguo antecedens: Deus esset de se indifferens ad habendam scientiam mediam de consensu potius conditionato Petri, quam de dissensu, si supponatur, quod Petrus consentiret, nego; nulla facta suppositione, concedo antecedens, & nego consequentiam. Deus ex sua virtute cognoscitiva non est indifferens, sed metaphysice determinatus ad habendam scientiam mediam de consensu in hypothese, quod Petrus consentiret; non secus ac est determinatus metaphysice ad æterno ad habendam scientiam visionis de peccato Antichristi in hypothese, quod sit peccaturus; ergo scientia media de consensu, licet sit contingens, non per hoc est casualis, & fortuita Deo. Quomodo enim dici potest, quod Deo accadat casu id, ad quod Deus est metaphysice determinatus? Illud dicitur Creaturæ accidere fortuito, & casu, quod evenit inopinato, & præter expectationem; At Deo scientia media de consensu evenit ex necessitate, posito quod Petrus consentiret; ergo non accideret Deo casualiter.

Instabis: Respectu Dei casu accidit, quod Petrus potius consentiret, quam dissentiret; ergo licet scientia media de consensu necessario conflurgat, posito quod Petrus consentiret, accidit tamen Deo casualiter consensus Petri conditionatus.

Resp. nihil Deo casu accidere, cum omnia, quæ dantur a parte rei, eveniant aut Deo prædefiniente, aut permittente. Consensus Petri conditionatus esset quidem creaturæ liber, & non Deo; at non propterea diceretur Deo accidere casu, cum

non possit a parte rei poni in statu absoluto sine prævia Dei ad prædefinitionem, aut permissionem. Quare nego antecedens.

Replicabis: Deus neque prædefinit actu, neque permittit consensum conditionatum Petri; sed quod accidit, ita ut a Deo nec præfiniatur, nec permittatur, casu accidit Deo: ergo ut prius.

Resp. dist. maj. Deus non præfinit, aut permittit consensum conditionatum; ita tamen, ut non possit hujusmodi consensus conditionatus a parte rei poni, nisi Deo præfiniente, aut permittente, concedo; aliter nego majorem: & distingo minorem, quod accidit physice, seu quod ponitur a parte rei non prædefinitum, aut permittum a Deo, accidit casu, concedo; quod evenit logice, ita ut non possit physice poni a parte rei, quin a Deo præfiniatur, aut permittatur, nego minorem, & consequentiam.

XIII. Objic. 3. Si daretur in Deo scientia media independentes a decreto actu existente, deberet esse in Deo in priori ad quodvis decretum liberum: ergo non esset libera Deo; sed neque esset libera Creaturæ; ergo nullatenus esset libera, nec contingens, sed omni ex parte necessaria, quod repugnat. Probatur minor subsumpta, primo quia Creatura ab æterno non est; ergo consensus conditionatus Creaturæ, prærequisitus ad scientiam mediam de illo, quæ fuit ab æterno, nequit dici liberi Creaturæ, cum non possit libertatem exercere, quod nihil est; ergo talis scientia media non est libera Creaturæ. Secundo, quia libertas Creaturæ oriri debet a primo libero: ergo si hujusmodi scientia media esset aliquo pacto libera Creaturæ, deberet pariter esse libera Deo; cum autem nullatenus sit libera Deo, nec erit libera Creaturæ. Tercio, quia si consensus conditionatus, & scientia media de illo essent unice libera Creaturæ, jam Creatura exerceret rationem primi liberi, & primæ causæ. Quarto Deus posita conditione non posset impedire hunc consensum conditionatum, quod repugnat supremo Dei dominio.

Resp. nego minorem subsumptam. Ad 1. probationem; quod non est, sed erit, aut esset, nequit physice nunc libertatem exercere, sed poterit, aut posset; quare ut consensus vel absolute, vel conditionate futurus dicatur liber, non requiritur, quod Creatura de facto sit libera, sed solum requiritur, quod Creatura aut futura sit libera absolute, aut si ponatur conditio, in

forma distinguo consequens; consensus conditionatus nequit dici liber Creaturæ, quæ sit, concedo; Creaturæ, quæ esset, nego consequentiam.

Ad 2. Deus est quidem primum, sed non unicum liberum, sicut est prima, sed non unica causa; ergo conferendo libertatem Creaturæ, confert illi, quod possit seipsam determinare; quare libertas Creaturæ refunditur in primum liberum, non quia Deus determinat actus Creaturæ, quæ est secundum liberum, sed quia secundum liberum per virtutem acceptam a primo libero potest ad arbitrium se determinare. Concesso itaque antecedente, nego consequentiam. Ubi adverto, scientiam mediam dici liberam solum terminative, & objective, quatenus terminatur ad actum liberum Creaturæ, non vero subjective, nec efficienter; actus enim liber conditionatus Creaturæ est solum conditio, & determinativum ad talem scientiam, non vero virtus influxiva ad Divinam cognitionem.

Ad 3. nego sequelam. Creatura non est primum liberum per hoc, quod se determinet, quia virtutem ad se determinandum non habet a se, sed a primo libero; sicut enim Creatura vivens non est primum vivens per hoc, quod moveatur ab intrinseco; quia hoc ipsum moveri ab intrinseco habet ab alio, nec potest motum ab intrinseco exercere sine concursu primæ causæ extrinsecæ: ita Creatura libera non est primum liberum per hoc, quod se determinet; quia posse se determinare, & eligere habet ab alio, nec potest actum liberum ponere citra concursum liberum primæ causæ. Quod si Deus determinaret Creaturam, Deus esset Unicum, & non primum liberum. Quare Prædeterminantes destruant in Deo rationem primi liberi, non vero Fautores scientiæ medix.

Ad 4. sicut per Adversarios non est contra Dei dominium, quod posita prædeterminatione ad consensum, non possit Deus consensum impedire; ita nec est contra Dei dominium, quod posita conditione, sub qua prævisus est consensus liber, non possit Deus consensum impedire; quandoquidem posita conditione illa consensus tunc est necessarius ex suppositione; sicut peccatum Antichristi, posita revelatione de illo, non potest a Deo in omnium sententia impediri, quia est necessarius necessitate consequente, quæ coheret cum ejus libertate, non vero necessitate antecedente.

XIV. Objic. 4. Ut possit dari scientia media

dia independentē a Dei decreto, deberet consensus Petri conditionate futurus esse in se determinatus; aliter scientia media non esset infallibilis; sed non potest haberi effectus in se determinatus determinatione scilicet formali, & intrinseca, nisi ab aliquo Dei decreto habeat suam determinationem causalem, & extrinsecam; ergo independentē a decreto dari nequit scientia media de consensu conditionaro.

Confirm. Vel consensus Petri conditionatus, posita conditione, haberet esse determinatum a decreto, quod datur de facto, & habetur intentum; vel a decreto, quod tunc esset, & veniret ex parte hypotheseos, & hoc dici non potest; quia decretum, quod tunc esset, deberet esse aut prædeterminativum, aut permissivum actus conditionate futuri, atque adeo deberet præsupponere aliam scientiam mediam; & sic in scientiis mediis præviis ad decreta Dei, quæ veniunt ex parte hypotheseos, daretur processus in infinitum.

Respond. verum esse, quod actus liber in se determinatus determinatione formali, & intrinseca habere debet determinationem extrinsecam, & causalem ab aliquo Dei decreto, quatenus causari debet non minus a voluntate, quam a decreto Divino ad actum concurrente; ac sicut per Adversarios consensus conditionate futurus non requirit voluntatem, aut prædeterminationem, quæ actu sit, sed quæ esset; ita in sententia Societatis non requiritur decretum aut prædeterminativum, aut permissivum, quod sit, sed quod esset. In forma distinguo minorem; effectus determinatus, qui non sit, sed esset determinatus posita conditione, non potest habere determinationem formalem, & intrinsecam, nisi a decreto, quod tunc esset, posita conditione, concedo, quod sit nunc, nego minorem, & consequentiam.

Ad confirm. Consensus conditionatus haberet determinationem causalem a decreto, quod tunc esset, & veniret ex parte hypotheseos; huiusmodi autem decretum non esset prædeterminativum, aut permissivum, ita ut supponeret scientiam aliam mediam præviā, quæ veniret ex parte hypotheseos, quia sic abiremus in infinitum in scientiis mediis, sed sufficit, quod si consensus poneretur in statu absoluto, procederet a decreto aut prædeterminativo, aut permissivo scientiam mediam præsupponente. Quare ut explicetur objectum scientiæ mediæ, debet diligenter adverti cum Haunold. n. 306.,

& Mauro q. 45. n. 37. quod ex parte hypotheseos debeant solum venire omnia, quæ constituunt actum primum proximum indifferentem ad consensum, vel dissensum, ut sunt voluntas, decretum oblativum concursus indifferentis, vocatio &c.; ex parte vero conditionati venire debet ipse consensus, vel dissensus, & quæcumque cum his actibus sunt necessario connexa.

XV. Hinc fit 1. quod quia actus primus proximus indifferentis non constituitur per decretum prædeterminativum, aut per scientiam mediam præviā, ideo ex parte hypotheseos venit solum decretum Dei, ut oblativum concursus indifferentis, non vero ut prædeterminativum: & ratio a priori est, quia prædeterminatio consensus, & scientia mediæ prævia ad prædeterminationem non est necessaria ex parte ipsius consensus (quandoquidem etiam sub decreto permissivo dissensus poni potest consensus, ut patet; aliter decretum permissivum peccati everteret libertatem) sed est necessaria ex parte Dei providentis, & perfectissime volentis, ut dicemus in de Gratia, ostendendo eum communiori, Prædeterminationem actus boni esse necessariam in quacumque Providentia.

Fit 2. quod auxilium prout venit ex parte hypotheseos non habeat rationem doni specialis, habet enim rationem specialis doni, quatenus est prævisum efficax, & datur per decretum prædeterminativum consensus; sicut centum aurei dati Petro non habent rationem doni specialis, antequam sint prævisi illum a morte liberaturi.

Fit 3. quod licet in statu absoluto nemo salvetur sine prævia prædestinatione (sicut nemo bene operatur sine prævia prædeterminatione) nihilominus in hac scientia mediā, si Petrus haberet auxilium A, salvaretur, ex parte hypotheseos, non venit prædestinatio, nec prædeterminatio.

Fit 4. Prædeterminationem consensus, & Gratiam congruam, seu efficacem esse necessariam, ut consensus sit futurus absolute, non vero ut sit futurus conditionate; sicut nec est necessaria, ut consensus possit esse. Neque dicas, eandem esse causam utriusque consensus tam absoluti, quam conditionati; unde eadem prædeterminatio prærequiritur in utroque. Nam licet eadem sit causa quoad vires intrinsecas, non tamen quoad infallibilitatem, & connotationem extrinsecam, seu quoad ea, quæ requiruntur ex parte Dei; & ideo ad consensum absolutum prærequiritur scientia media prævia,

via, & praedeterminatio, non tamen ad conditionatum.

Fit ultimo, quod quia cum consensu essentialiter connectitur concursus Dei in actu secundo, scientia media praevia de illo, & praedeterminatio, si ponatur a parte rei, ideo in hac propositione, Si Petrus vocaretur, consentiret, ex parte conditionati venit cum consensu etiam concursus Dei in actu secundo, scientia media praevia, & praedeterminatio; ex parte vero hypothesis venit Petrus sub vocatione, & sub decreto Dei oblativo concursus indifferenteris; unde fit sensus, Si Petrus vocetur, & Deus exhibeat concursum in actu primo indifferenteris, Petrus ponet consensum, ad quem Deus concurret in actu secundo, & dabitur de illo scientia media praevia, ac praedeterminatio, si de statu conditionato transeat in absolutum. Ubi advertit Henao sect. 448. n. 5736. quod sicut per Praedeterminantes in hac propositione, Si Petrus vocaretur, consentiret; quae in illorum sententia cognoscitur per scientiam visionis in decreto subjective absoluto, objective conditionato, ex parte hypothesis venit sola vocatio, non vero decretum praedeterminans; quia aliter in decretis praedeterminantibus praerequisitis ex parte hypothesis abiremus in infinitum: ita in sententia Societatis ex parte hypothesis venit solum vocatio, & decretum oblativum concursus indifferenteris, non vero scientia media, aut decretum praedeterminativum, ne in his sit abire in infinitum.

XVI. Obijc. 5. Si daretur scientia media, incideremus in haeresim Massiliensem, qui agnoscebant in Pueris merita conditionata a Deo praevia, vi quorum obtinerent Baptismum. Docebant enim, ideo Deum conferre huic Pueri baptismum, quia praevidebat illum bene operaturum; sicut ideo Deus rapit aliquem Iustum, antequam peccet, quia praevidebat illum peccaturum, si diutius viveret, juxta illud Sap. 4. *Raptus est, ne malitia mutaret intellectum eius.*

Confirm. 1. quia admissa scientia media nos elegerimus Christum Dominum, ejusque Fidem, non vero ipse nos, contra illud Joan. 15. *Non vos me elegistis, sed ego elegi vos.* probatur sequela, quia scientia media est necessaria, ut Christus nos eligat ad Fidem; sed scientia media supponit non credituros, si vocemur; ergo antequam Christus eligat nos, supponi debet, quod nos elegerimus Christum.

Confirm. 2. quia posita scientia media in-

dependenter a Dei decreto non esset Deus, qui discerneret electos a Reprobis; sed Electi se discernere, & in seipsum de hoc gloriari possent; contra illud Apostoli; *Quis est, qui se discernit? Quis gloriatur, in Domino gloriatur.* Probatur sequela, quia prima radix discretionis esset actus bonus conditionatus, qui haberet ex electione libera Creaturae, non Dei. Hinc Augustinus adversus Massilienses interrogatus a D. Prospero, num scientia conditionata nita- tur in electione Dei, an e contra; Respondet c. 10. de Praedestinatione Sancto- rum, decretum Praedestinationis praecedere scientiam futurorum: *Praedestinatione quippe Deus, inquit, ea praescivit, quae fuerat ipse facturus: Et lib. de bono Perseverantiae c. 17. habet: Hac Dei dona, si nulla est praedestinatio, non praesciuntur a Deo.*

Resp. errasse Semipelagianos tum in eo, quod vellent, posse Homines per vires naturales mereri Gratiam, quod repugnat Apostolo dicenti ad Rom. 11. *Si autem gratia, jam non ex operibus, alioquin gratia jam non est gratia:* tum etiam in eo, quod vel- lent Pueros ex meritis conditionate praevi- sis obtinere baptismum. Quod ex eo constat esse falsum, quia relate ad unumquemque praevidentur a Deo tam merita, quam demerita conditionate futura; unde cuilibet negari posset baptismum in poenam. Et ratio ulterior est, quia quod solum esset, & non est, nequit habere rationem meriti, aut demeriti; sicut enim nequit esse causa physica, quod non est, ita nec causa moralis, seu meritoria, quae spectat ad genus causae efficientis. Quare potest quidem Deus, quem praevidet per scientiam mediam bene operaturum sub auxilio A, specialiter illum diligere, conferendo illi omnino gratis citra ullum meritum praevium ex sola sua benevolentia hujusmodi auxilium A, congruum, & efficax; & quem praevidet peccaturum, si diutius vivat, rapere antequam peccet: hanc tamen benevolentiam cum sit omnino gratuita, & nullatenus pendens ex meritis conditionatis longe discrepat ab errore Massilien- sium.

Ad primam confirmationem nego sequela: ad probationem dist. minorem; scientia media supponit nos in statu conditionato credituros fide supernaturali, si vocemur auxilio supernaturali, & per decretum subjective simul, & objective conditionatum, collativum Gratiae, concedo; independenter ab auxilio supernaturali, seu Gratia a-

dua-

Actuali, nego minorem, & consequentiam. Quare semper verum est, quod Christus eligat nos ad Fidem supernaturalem, tum quia vocatio pro statu conditionato supponitur supernaturalis indebita, & gratia per Christum; tum etiam quia huiusmodi Gratia pro statu absoluto nobis confertur ex speciali benevolentia omnino gratis.

Ad 2. nego pariter sequelam. Prima radix nostræ Prædestinationis est Gratia Christi, non solum quia gratis datur nobis ex meritis Christi auxilium prævisum efficax, sed etiam quia consensus conditionatus supernaturalis nequit haberi pro statu conditionato, nisi per vires Gratiz. Hinc Augustinus contra Massilienses docuit, quod Prædestinatio, seu decretum collativum Gratiz præcedat scientiam futurorum, quia merita supernaturalia, quæ Deus præscit conditionate futura, non præscit conditionate futura per vires naturales, sed per vires Gratiz, & dependenter a decreto tum subjective, tum objective conditionato collativo Gratiz, ut explicat Amicus hic n. 218.

Adde, quod etiam in pura Natura bona operatio nostra, & beatitudo naturalis debeatur Deo principaliter: Tum quia gratis Deus ex speciali benevolentia de statu conditionato extraheret bonas nostras operationes ad statum absolutum: Tum etiam quia quamvis in statu absoluto determinatio ad bonum esset ex electione libera Creaturæ; at inclinatio ad bonum in genere nobis indita esset a Deo, necnon a Deo essent vires ad bene operandum tam in statu absoluto, quam pro statu conditionato: unde scientia conditionatorum nullatenus requirit decretum Thomisticum subjective absolutum, & objective conditionatum.

XVII. Dubitatur hic primo, An sicut Deus videt per scientiam mediam futura conditionata conducentia, ita videat etiam disparata, v. gr. Si Turca dormiret, Petrus converteretur? Negat Vasquez, & Arrubal, quia veritas propositionis conditionalis consistit in formali illa illatione consequentis ab antecedente; sed ubi nulla est connexio, nulla potest esse illatio; ergo &c. Quia tamen difficultas est de scientia istorum quoad materiale eorum veritatem, seu de veritate conditionati, posita conditione disparata, etiam si veritas conditionati non inferatur ex tali conditione; ideo dicendum cum Suariorum, Albertino, & aliis apud Amicum n. 247., quod Deus per scientiam mediam videat etiam futura con-

ditionalia disparata, quæ pendent a libertate Creaturæ; cum eadem sit ratio de futuris conditionalibus conducentibus, ac de disparatis.

XVIII. Dubitatur 2. per quam scientiam Deus videat, quid esset facturum liberum arbitrium sub conditione impossibili? V. g. Num Lucifer peccaturus esset, si fuisset Michael? Ad quod dicendum cum Mauro q. 46. id videri a Deo per scientiam simplicis intelligentiæ, quia necessario ex prædicato hypothesis sequitur, quod si Lucifer fuisset Michael, fecisset quæ fecit Michael, atque adeo non peccasset; ex subiecto vero hypothesis necessario sequitur, quod fecisset, quæ fecit Lucifer, atque adeo peccasset. Unde utramque partem contradictionis videt sequuturam, & ideo id cognoscit per scientiam simplicis intelligentiæ, qua cognoscuntur objecta impossibilia. Et similiter per eandem scientiam cognoscit Deus, Utrum v. gr. Spiritus Sanctus si non procederet a Filio, per locum intrinsecum ab eo distingueretur? Verum per scientiam visionis videt conditionalia disparata, quæ unice pendent a Dei decreto jam posito, v. gr. Si Petrus luserit, creabo Antichristum. Ratio est, quia hoc secundum pendet unice a decreto Dei actuali volente, vel utrumque (videlicet luserit Petri, & Antichristum) vel neutrum; quod autem pendet a decreto Divino actuali, videtur per scientiam visionis; ergo. Denique futura conditionalia disparata, quæ pendent a libertate Dei, v. gr. Si Petrus luderet, vellem creare Antichristum, videntur a Deo per scientiam mediam reflexam; sicut per hanc scientiam videntur futura conditionalia conducentia, quæ paterentur pendere a Dei libertate, nec supponunt ullum decretum actuale, v. gr. Si Petrus ingemisceret, condonarem illi peccata, ut mox apparebit.

Q U Æ S T I O VII.

An detur in Deo Scientia media Reflexa

I. Dubitatur, An sicut per scientiam mediam directam Deus videt, quæ Creatura factura esset libere sub aliqua conditione, v. gr. An Petrus consentiret, si vocaretur; ita per scientiam mediam reflexam videat, quid ipse Deus libere facturus esset sub aliqua conditione, v. g.

v. gr. An si Adam non peccasset, voluisset incarnari? An si Judas orasset, dedisset auxilium efficax ad penitendum? Quod hæc Deus cognoscat, negari nequit citra injuriam divinitatis; aliter de hoc interrogatus deberet respondere, Ignoro. Quare prima sententia Molinæ, Haunoldi, Mauri docet, Deum ea cognoscere per scientiam visionis in decreto actuali, absoluto ex parte actus, conditionate ex parte objecti, juxta viam Thomistarum. Secunda sententia Ruiz disp. 87., & aliorum docet, ea Deum cognoscere tam per scientiam visionis in tali decreto, quam per scientiam mediam reflexam in seipsis, sicut futura libera absoluta videntur a Deo tum in seipsis, tum in complexo scientiæ mediæ de his actibus sub tali auxilio, & decreti de conferendo tali auxilio. Tertia sententia communior cum Fonseca, Suariorum, Vasquez, Arrubale, Amico n. 246. docet, ea cognosci a Deo per scientiam mediæ reflexam independentem ab ullo decreto actu existente; cui ad hærendum.

II. Dico itaque cum tertia sententia, dari in Deo scientiam mediam reflexam, qua cognoscuntur in seipsis decreta Dei conditionate futura independentem ab ullo decreto actu.

Prob. Ideo datur scientia media directa attingens futura conditionata libera Creaturæ in seipsis, quia Deus est summe cognoscitivus, debetque cognoscere quæcumque potest cognoscere statim ac potest; cum autem possit hæc futura cognoscere ante quodcumque decretum actuale, consequenter & cognoscit independentem a decreto actu existente, atque adeo per scientiam mediam directam; sed hoc pariter probat, dari scientiam mediam reflexam attingentem in se ipsis futura conditionata libera Deo; ergo utraque scientia media dari debet. Prob. min. Ideo possunt cognosci per scientiam mediam directam in priori ad quodcumque decretum actuale futura conditionata libera Creaturæ, seu quid faceret Petrus, si vocaretur, quia pro illo priori verum debet esse, vel quod daretur determinate consensus, vel quod determinare non daretur, cum non detur medium inter hæc duo contradictoria; atqui pariter in priori ad quodcumque decretum actuale verum debet esse, quod posita v. g. Oratione Judæ, vel daretur determinare decretum Divinum collativum auxilii efficacis ad penitendum, vel determinare non daretur; ergo pariter pro illo priori potest

Parti I.

Deus cognoscere futura conditionata sibi libera, atque adeo datur scientia media reflexa.

Prob. 2. quia sicut decretum actuale est essentialiter superfluum relate ad scientiam mediam directam; ita relate ad reflexam: ergo. Probatur antecedens, quia decretum actuale neque requiritur ut medium, in quo Deus cognoscat sua decreta conditionata, cum ea possint immediate cognosci in seipsis, non secus ac actus liberi conditionate futuri Creaturarum: Neque requiritur ut causa eorum, quæ Deus vellet ponere purificata conditione: v. gr. ut Deus cognoscat hanc veritatem conditionalem, Si Judas oraret, vellem dare illi auxilium efficax, non requiritur decretum actuale, ut causa talis auxilii purificata conditione, quia ad talem effectum causandum sufficit decretum omnino absolutum, quod daretur tunc purificata conditione. Neque demum requiritur ex parte voluntatis Divinæ, ex eo scilicet, quod debeat Deus actu se determinare ad volendum, vel nolendum quodcumque objectum tum absolute, tum posita qualibet conditione; nam primo juxta probabilem sententiam, dari potest in Deo pura omnis libera relate ad quodcumque objectum creatum: Deinde quamvis negata possibilitate puræ omissionis liberæ in Deo, debeat Deus actu decernere quid absolute velit, aut nolit, ita ut unumquodque objectum creatum debeat existere, aut non existere, ex mero arbitrio Divinæ voluntatis illud positive volente, aut positive nolente; nihilominus circa futura conditionata non requiritur in Deo ullum exercitium liberum voluntatis Divinæ, quippe quod est omnino superfluum; cum abunde sufficiat decretum omnino absolutum, quod necessario consurgeret in Deo purificata conditione; ergo decretum actuale in casu nostro est essentialiter superfluum.

Confirm. quia hujusmodi decretum actuale, quod ponunt Adversarii, absolutum ex parte actus, conditionatum ex parte objecti, in quo Deus videat decreta sua libera conditionate futura, neque dici potest, quod ponatur a Deo contingenter, & libere: Ratio est, quia Deus necessario debet cognoscere sua decreta libera conditionate futura, ne dicatur ignorare aliquid objectum de se affirmabile; ergo si ea deberet cognoscere in decreto actuali, hujusmodi decretum deberet esse pariter necessarium, atque adeo nequit a Deo poni li-

G

be.

bere, & contingenter. Rursus neque dici potest, quod a Deo ponatur necessario; tum quia Deus non esset plene liber ad nihil decernendum de conditionate futuris; tum etiam quia huiusmodi decreta deberent esse infinita, ut supra diximus, quod censetur inopinabile; ergo huiusmodi decretum nullatenus requiritur, ut medium ad cognoscenda decreta Dei conditionate futura.

III. Objic. 1. ex Mauro. Si daretur scientia media reflexa, qua Deus independenter a decreto actuali cognosceret, quid esset voliturus, posita aliqua conditione contingenti, sequeretur, quod Deus esset creatus alium v. gr. Mundum independenter ab illo suo decreto, seu quin illum vellet libere creare. Sequela est absurda; ergo & id unde sequitur. Prob. sequela, quia independenter ab illo decreto actuali Deus habet v. gr. hanc scientiam mediam reflexam, quod esset creatus alium Mundum, si haberet scientiam mediam directam, v. gr. de peccato Antichristi, scilicet quod, si Antichristus vocaretur, dissentiret; ergo purificata ista conditione, seu posita ista scientia media directa, Mundus infallibiliter crearetur, quia Deus vellet illum creare.

Confirm. 1. quia posita ista scientia media reflexa, sequeretur quod Petrus v. gr. esset predestinatus potius, quam reprobis antecederet ad quodvis Dei decretum. Probatur, quia Deus antecederet ad quodvis decretum actuale habet v. gr. hunc actum scientie medice reflexe, Si viderem per scientiam mediam directam Petrum confensurum auxilio A, illum predestinarem; & supponamus, Deum habere de facto hunc actum scientie medice directæ, Si Petrus haberet auxilium A, consentiret; jam ex utroque hoc actu inferitur, quod Petrus sit predestinatus antecederet ad quodvis decretum actuale: ergo. Probatur hoc antecedens, quia per primum actum importatur predestinatio Petri conditionate futura sub hypothesi, quod datur secundus actus; per hunc autem secundum actum importatur purificatio conditionis; ergo per utrumque importatur absolute futura Petri predestinatio.

Confirm. 2. ex Pallavic. lib. 8. nu. 321. quia data scientia media reflexa, Deus ante quodvis exercitium sue libertatis necessitatur ad dandum v. gr. Petro sanitatem. Probatur: habet Deus hanc scientiam reflexam, Si Petrus oraret sub auxilio A, darem illi sanitatem; habet rursus hanc

aliam scientiam directam, Si darem Petro auxilium A, oraret; ex utroque hoc actu sequitur, quod Deus ante exercitium sue libertatis, deberet dare Petro sanitatem.

Resp. nego sequelam. Ad probationem nego consequentiam: Aliud enim est, ut supra diximus, quod independenter a decreto cognoscatur objectum conditionate futurum, aliud vero, quod objectum sit conditionate futurum independenter a decreto; sicut aliud est, actum liberum Creaturæ independenter a decreto actuali cognosci per scientiam simplicis intelligentiæ possibilem; aliud vero, cognosci possibilem, seu potentem poni a parte rei independenter a decreto actuali; primum est verum, secundum est falsum; sic etiam actus liberi conditionate futuri Creaturæ cognoscuntur a Deo per scientiam mediam directam independenter a decreto actuali, sed non cognoscuntur, quod purificata conditione essent exituri independenter a decreto, quod tunc daretur.

Ad 1. confirm. nego pariter sequelam; Uterque enim ille actus inferit necessario non solum predestinationem, sed etiam predestinationis decretum; nam scientia media reflexa dicit, quod sub ea conditione Deus esset predestinaturus Petrum, atque adeo, quod purificata conditione daretur decretum predestinationis. Huiusmodi autem decretum non diceretur dari consequenter ad utramque illam scientiam, sed concomitanter. Ratio est, quia futurum conditionatum, purificans conditionem, evaluit absolutum; ergo in casu nostro futurum conditionatum, quod est objectum scientie medice reflexe, (scilicet quod si daretur illa scientia media directa de consensu Petri sub auxilio A, daretur decretum predestinationis) purificata hac conditione, quod scilicet datur talis scientia media directa, intelligitur esse futurum absolutum; ergo in eo signo, in quo intelligitur scientia media directa purificans conditionem scientie medice reflexe, intelligitur concomitanter decretum predestinationis causans huiusmodi predestinationem; unde futurum predestinationis non est antecederet ad decretum, quod daretur. Et licet talis futurum cognoscatur in seipso, quin ad illam cognoscendam prærequiritur ultimum decretum actuale, intelligitur tamen decretum, quod daretur, in eodem signo, in quo intelligitur purificatio illius conditionis, hoc est pro eo signo, quo intelligitur scientia illa media directa purificans

ficans conditionem reflexæ.

Ad 1. nego sequelam; Quia eodem modo prior illa scientia media reflexa trahit decretum collativum sanitatis, concomitanter ad purificationem conditionis.

IV. Objic. 2. Si daretur scientia media reflexa, v. gr. quod si Adam non peccaret, Deus non incarnaretur, purificata hac conditione necessitaretur Deus ad non se incarnandum; sed repugnat, quod Deus, non peccante Adamo, non potuisset incarnari; ergo non datur scientia media reflexa.

Confirm. Si supponatur, quod repugnet in Deo pura omisso libera, non poterit Deus dicere, Ego nolo quicquam actu decernere circa creationem alterius Mundi: si enim nihil decerneret, jam pure omitteret, quod est contra suppositum; ergo nec potest dicere: Ego nolo quicquam decernere, circa quid esset facturus, si Adam non peccasset; ergo repugnante pura ommissione libera, Deus habet de facto decreta conditionata ex parte objecti, circa quid esset facturus sub qualibet conditione; atque adeo in his decretis actualibus, & non per scientiam mediam reflexam, videt futura conditionata sibi libera.

Resp. distingo majorem, necessitaretur necessitate consequente, hoc est supposito, quod ad id vellet se determinare, concedo; necessitate antecedente, nego majorem, & distincta minore, nego consequentiam. Sic Christus Dominus prævidens in Verbo suos actus liberos, non poterat deinde illos non ponere; & Antichristus posita præscientia infallibili peccati, nequit non peccare; & D. Petrus posita revelatione non poterat non negare Christum, impotentia tamen consequente, non antecedente, quæ unice est everfiva libertatis.

Ad confirm. nego primam consequentiam; Disparitas est, quia si supponatur, quod repugnet in Deo pura omisso libera, ad perfectionem Divini domini spectat, quod Creaturæ non exstant, nisi ex exercitio Divini domini, & ad perfectionem Divinæ voluntatis spectat, quod non careat actu secundo perfectissimo composibili cum libertate ad nihil producendum; unde sicut intellectus Divinus carere nequit actuali cognitione etiam circa contingentia, ita Divina voluntas carere nequit actuali voluntate libera circa objecta contingentia. At circa objecta conditionate futura non debet Divina voluntas habere volitionem actualem liberam; quippe quæ esset omnino superflua, ut ostendimus; sufficit enim rela-

te ad illa decretum absolutum, quod daretur purificata conditione, & omnino inutile est decretum actuale conditionatum ex parte objecti prævium.

Neque dicas, etiam inutile esse in Deo nolitionem actualem v. gr. alterius Mundi, quandoquidem etiam sine tali decreto alter Mundi non exiit; & tamen hujusmodi nolitio dari debet ex perfectione Divinæ voluntatis, posito quod repugnet pura omisso libera; ergo idem in casu nostro.

Nam 1. si paritas valeret, probaret, quod sicut est necessaria in voluntate Divina nolitio positiva alterius Mundi, posito quod non detur ejus volitio, ita sint necessaria in Deo infinita decreta actualia absoluta ex parte actus, conditionata ex parte objecti terminata ad actus liberos conditionate futuros tam suos, quam Creaturarum, quod tamen communiter DD. censent inopinabile. Secundo Argumentum non solum impugnatur scientiam mediam reflexam, sed etiam directam. Tertio disparitas est, quia sufficienter voluntas Divina exercet positive suam libertatem circa decreta sua conditionalia, per hoc quod purificata conditione tunc habeat decretum absolutum; unde decretum prævium conditionatum ex parte objecti est omnino superfluum; Contra vero relate ad alterum Mundum nullatenus exerceret positive libertatem suam, si careret positiva nolitione illius.

V. Objic. ult. ex Haunoldo. n. 314. si daretur scientia media reflexa, sequeretur hæc manifesta contradictio, v. g. quod si Petrus haberet auxilium A, non haberet auxilium A. Probatur sequela. Habeat Deus hanc scientiam reflexam, Si Petrus prævideretur per scientiam mediam directam dissonans auxilio A, non darem illi auxilium A; purificetur deinde hypothesis, & habeat Deus hanc scientiam mediam directam: Si Petrus haberet auxilium A, dissonaret: ex utroque hoc actu scientiæ reflexæ, & directæ sequitur, quod si Petrus haberet auxilium A, non haberet auxilium A. Quod sic manifeste ostenditur: Si haberet auxilium A, dissonaret, si dissonaret, non haberet auxilium A; ergo si haberet auxilium A, non haberet auxilium A.

Confirm. ex eodem, quia sequeretur etiam, quod Petrus posset per actum secundum liberum suæ voluntatis impedire actum primum proximum essentialiter requisitum ad illum actum secundum; quod tam est impossibile, quam est impossibile, quod actus secundus sit sine primo. Probatur se-

quela; Auxilium indifferens est essentialiter requisitum ad actum secundum liberum tamquam constitutivum actus primi proximi ad consensum, vel dissensum; sed Petrus per dissensum posset impedire tale auxilium supposita illa scientia reflexa, si dissensiret, non darem illi auxilium; ergo posset Petrus per actum secundum, scilicet per dissensum, impedire actum primum proximum requisitum ad ipsum.

Confirm. 2. quia eodem modo posset Petrus impedire, ne creetur; nam si Deus habeat hanc scientiam reflexam, si Petrus dissensiret auxilio A, non crearem illum; & hanc aliam directam, si Petrus haberet auxilium A, dissensiret; jam posito hoc auxilio A, Petrus dissensiret, & dissensiendo purificaretur conditio illa scientie reflexe, unde Petrus non crearetur, atque adeo posset Petrus impedire, ne creatus sit, quod est chimericum.

Resp. 1. argumentum solvendum ab omnibus, sive futura conditionata libera videantur in seipsis per scientiam mediam, sive in decreto absoluto ex parte actus, conditionato ex parte objecti per scientiam visionis; quare hoc argumentum non impugnatur scientia media, sed scientia futurorum conditionalium, quam nemo sanæ mentis negare potest: non solum quia ratione naturali constat, non posse Deum summe cognoscitivum illa ignorare; sed etiam quia ex Scripturis constat, ea de facto cognoscere, sive spectent ad scientiam mediam directam, sive ad reflexam: dicit enim Deus, Genes. 19. *Si invenero Sodomis 50. Justos in medio Civitatis, dimittam omni loco propter eos*; ergo cognoscebat Deus, quod si fuissent ibi 50. Justi, non evertisset illam Civitatem, quod spectat ad scientiam mediam reflexam.

Secundo directe ad argumentum respondent nonnulli expeditissime transmittendo, quod non possit dari scientia media reflexa, quæ assumat pro hypothese scientiam mediam directam, si ex hoc sequantur inconvenientia adducta. Ex quo non sequitur, non dari in Deo saltem scientiam mediam reflexam, quæ non assumat per hypothese directam: v. g. Si Adam non peccasset, adhuc incarnaretur.

Resp. equidem 3. Absolute, quod uterque ille actus scientie reflexe, & directæ possit in Deo dari seorsim, non conjunctum; sicut enim utraque ex Propositionibus contradictoriis contingentibus potest esse vera seorsim, non conjunctum; ita in

casu nostro ambo illi actus scientie reflexe, & directæ sunt possibiles, non tamen compossibiles; unde si datur in Deo hæc scientia reflexa, si Petrus prævideretur per scientiam directam dissensurus auxilio A, non darem illi auxilium A, tunc non poterit in Deo dari scientia illa media directæ, si Petrus haberet auxilium A, dissensiret; & viceversa si datur hæc scientia directæ, non dabitur illa reflexa. Et ratio est, quia ex utraque illa scientia conjunctum, & categorematice sumpta, non vero ex utraque seorsim, & syncategorematice sequuntur absurda illa in argumento adducta; ergo utraque illa scientia conjunctum, non vero seorsim repugnat. Ratio autem a priori est, quia ista veritas scientie reflexe, si Petrus dissensiret auxilio A, non darem hoc auxilium, nequit componi in Deo cum voluntate conferendi auxilium A, constitutivum actus primi proximi indifferens ad consensum, & dissensum; nam si daretur dissensus, auxilium non conferretur; ergo non poterit simul esse verus actus scientie directæ, si darem auxilium A, dissensiret; nam in hoc actu scientie directæ debet venire pro hypothese decretum collativum auxilii consuetis actum primum proximum indifferenter, quem tamen constituere nequit, posita illa scientia reflexa; ergo itæ scientie sunt impossibiles.

VI. Consimilis responsio adhibenda erit in de Gratia disp. 2. q. 5. art. ult. nu. 17. celebri illi objectioni ex Martinez contr. 4. disp. 6. sect. 1. & Perez de Provid. disp. 5. quod ex possibilitate scientie medie reflexe sequeretur, aliquod antecedens omnino antecedens impossibile cum utraque parte contradictionis, & inimpedibile a voluntate non fore eversum libertatis. Quandoquidem posito complexo scientie hujus reflexe (si præviderem per scientiam mediam directam, Petrum consensurum auxilio A, darem illi hoc auxilium) & decreti de dando auxilio A, consensus esset liber, & tamen complexum illud antecedens esset impossibile cum dissensu, & inimpedibile a voluntate.

Ad quod dicemus cum Martinonio disp. 5. sect. 4. ex possibilitate hujus scientie medie reflexe non sequi hoc inconveniens, & Maximam illam remanere incolumem. Ratio est, quia licet complexum illud scientie reflexe, & decreti seorsim sit inimpedibile a voluntate creata; potest tamen voluntas illud complexum, & categorematice

tice sumptum, prout est impossibile cum diffensu, impedire. Ratio est, quia cum scientia illa reflexa habeat pro hypothese scientiam mediam directam, quæ est impedibilis a voluntate, & quæ impedita impediretur decretum de dando auxilio A, dependenter ab illa scientia media reflexa, ideo potest huiusmodi complexum categorematice sumptum impediri a voluntate creata. Præterquam quod negari etiam posset possibilitas in hoc casu scientiæ mediæ reflexæ, quæ assumeret pro hypothese directam, si ex illa sequeretur everfio illius Maximæ, quod scilicet Omne antecedens actum impossibile cum non actu, & impossibile sit everfivum libertatis, quam in loco ostendimus esse includibilem.

Ad 1. confirm. recurrit eadem responsio: Supposita illa scientia reflexa, quod si Petrus prævideretur diffensus auxilio A, non haberet a Deo auxilium A, nequit simul esse verum objectum illius scientiæ mediæ directæ, quod si Petrus haberet auxilium A, diffensiret; unde istæ duæ scientiæ sunt impossibiles. Idcirco autem supposita illa scientia reflexa nequit esse verum, quod si Petrus haberet auxilium A, diffensiret, quia cum illa scientia reflexa nequit componi in Deo voluntas conferendi auxilium A, ut constitutum actus primi proximi indifferens ad consensum, vel diffensum; quandoquidem si poneretur diffensus, auxilium non daretur, atque adeo diffensus in tali casu est impossibilis cum auxilio; unde auxilium nequit dici indifferens ad consensum, vel diffensum. Et ratio ulterior est, quia omne antecedens consensum impossibile cum diffensu, & impossibile est everfivum libertatis; sed huiusmodi esset decretum collativum auxilii A, supposita illa scientia reflexa; ergo huiusmodi decretum esset everfivum libertatis; unde non posset conferri auxilium, ut constitutum actus primi proximi indifferens. Et per hæc patet ad 1. confirmationem.

VII. Ex hæcenus dictis fit 1. Deum cognoscere tam actus liberos Creaturarum conditionate futuros, quam proprios in priori ad quodcumque decretum actuale; quandoquidem pro illo priori habent vel determinatum esse, vel determinatum non esse posita qualibet conditione; cum autem veritas sit passio entis, sequitur, quod pro illo priori habeant etiam determinatam veritatem, atque adeo cognoscibilitatem, & affirmabilitatem; unde a Deo summe co-

Part I.

gnoscitivo debent pro illo priori determinare cognosci per scientiam mediam: cum non possit Deus nec pro ullo instanti, nec pro ullo signo carere cognitione, quam potest pro tunc habere, eo quod hæc sit perfectio simpliciter simplex.

Fit 2. quod si transmittatur, tum quod possint dari, tum quod deinceps de factis decreta illa Adversariorum absoluta ex parte actus, conditionata ex parte objecti, tunc futura libera conditionata deberent a Deo videri tum per scientiam mediam in se ipsis in priori ad hæc decreta, tum per scientiam visionis in talibus decretis actualibus, iuxta sententiam laudatam Ruiz, & aliorum putantium, Deum videre suos actus conditionate futuros, tum in seipsis, tum in decreto actuali.

Fit 3. quod negata possibilitate scientiæ mediæ siue directæ, siue reflexæ, huiusmodi decreta actualia deberent esse necessaria, & infinita (aliter Deus ignoraret infinitos actus liberos conditionate futuros uniuscujusque) quod censetur inopinabile.

Fit 4. huiusmodi decreta relate ad actus liberos conditionales Creaturarum repugnare ex eo, quod deberent esse prædeterminantia, atque adeo everfiva libertatis; ut hic supponimus: Relate vero ad actus liberos conditionales Dei non esse necessaria, licet repugnaret in Deo pura omisso libera; cum sufficienter Deus exerceret suam libertatem positivam relate ad conditionate futura, per hoc, quod purificata conditione daretur decretum actuale, seu volens, seu positive nolens illa.

VIII. Fit 5. Huiusmodi decreta actualia esse essentialiter superflua; cum neque requirantur ut medium, in quo futura conditionata cognoscantur, neque ut causa illorum; etenim neque possunt illa causare ante purificatam conditionem, ut patet, neque post, quia tunc non darentur ista decreta objective conditionata, sed alia omnino absoluta.

Neque dicas, decretum conditionatum purificata conditione transire in absolutum, & sic esse causam illorum futurorum; Nam conditionatum purificata conditione transit in absolutum solum quoad effectum, non quoad actum, quatenus idem effectus haberi debet ab actu conditionato purificata conditione, ac ab absoluto, quin tamen possit actus conditionatus evadere absolutus; sicut quando dicitur Homo ex aratro in Sacramento fieri contritus, id solum est verum, ut advertit Suarez, relate ad effectum,

G 3

atum, non relate ad actum, quatenus idem effectus habetur ab attritione cum Sacramento, ac a sola contritione; licet attritio non evadat contritio. Quare cum decretum illud conditionatum non possit evadere absolutum, & purificata conditione requiratur in omnium sententia decretum absolutum ad causandum effectum, quia effectus absolutus postulat causam absolutam, quæ unice illi proportionatur, idcirco decretum illud conditionatum neque purificata conditione deservire potest ad effectum causandum; & ideo est essentialiter superfluum.

Fit 6. Actum liberum creaturæ, ut transeat de statu possibilitatis ad statum existentie conditionatæ, non requirere decretum ullum actuale, sed sufficere decretum conditionatum, quod daretur, si voluntas poneretur sub iis circumstantiis, in quibus prævidetur per scientiam mediam operatura: sicut nec requiritur, quod detur nunc voluntas, sed sufficit, quod daretur pro quando esset actum liberum positura. Hinc voluntas, quæ nec est, nec erit, per hoc præcise quod esset, transferre potest actum liberum de statu possibilitatis ad statum futuritionis conditionatæ, & sic efficere, quod Deus habeat de facto scientiam de aliquo actu, quam non haberet, si voluntas non esset conditionate operatura. Et ratio est, quia futuritio conditionata effectus non requirit causam, quæ sit, sed causam, quæ esset, & operaretur, si in talibus circumstantiis poneretur. Et divinus intellectus, ut cognoscat id, quod esset sub talibus circumstantiis, nec requirit, quod illud actu sit, sed solum prærequirit, quod tunc esset; ac proinde citra ullum Divinum actuale decretum voluntas creata, quæ nec est, nec erit, efficere potest, quod Deus actu cognoscat per scientiam mediam id, quod non cognosceret, si illa non esset sub talibus circumstantiis operatura. Quamvis enim nulla Creatura extrahi possit de statu possibilitatis ad statum existentie, aut ad statum futuritionis conditionatæ citra aliquod Dei decretum; nihilominus ut transferatur de statu possibilitatis ad statum futuritionis conditionatæ, non requiritur decretum actuale, sed sufficit decretum, quod esset, si voluntas in talibus circumstantiis poneretur.

Fit 7. posita futuritione conditionata consensus liberi creati, dari necessario in Divino intellectu scientiam mediam de illa, seu cognitionem de tali consensu absolutam

ex parte actus, conditionatam ex parte objecti; quin requiratur pariformiter in Divina voluntate decretum absolutum ex parte actus, conditionatum ex parte objecti. Disparitas est, quia Divinus intellectus ex infinita sua cognoscitivitate est summe determinatus ad cognoscendum quodcumque cognoscibile, ita ut repugnet, quod aliquid ignoret: At Divina voluntas est libera ad aliquid decernendum circa Creaturas. Quinimmo si daretur de facto huiusmodi decretum ad mentem Prædeterminantem, esset eversum libertatis, & relate ad actus liberos esset essentialiter superfluum, ut supra ostendimus. Quare si Deus decernat v. gr. conversionem Tyriorum in hypothesi, quod iis Evangelium prædicaretur, talis conversio non esset libera; & dato quod esset libera, tale decretum esset superfluum; quia neque requireretur ut medium, in quo conversio illa libera cognoscat; si quidem eo præciso deberet illam Deus cognoscere in seipsa; Neque requireretur ut causa talis conversionis, quia purificata illa conditione non daretur huiusmodi decretum conditionatum, sed aliud absolutum causans illam conversionem; atque adeo decretum hoc, quod astringunt Prædeterminatores relate ad actus liberos conditionare futuros, omnino repugnat.

DISPUTATIO IV.

De Divina Voluntate.

PLurima ad Divinam voluntatem spectantia variis in locis, prout fert opportunitas, a Theologis tractantur: v. g. in de Incarnatione discutitur, An Deus necessitetur moraliter ad optimum? An unico decreto omnia prædefiniat? in de Gratia fusc agi solet de Divinis Prædefinitionibus; in de Justitia, An detur in voluntate Divina virtus Justitiæ preste dicta? & sic de aliis. Quare hic solum quæri solet, per quid constituantur decreta Dei libera? nec non de Divina Providentia, quæ spectant præsertim ad Prædestinationem, & Reprobationem, quæ sunt partes Providentiæ.

QUÆSTIO I.

Per quid constituantur decreta Dei libera?

I. **D**ari in Deo voluntatem, est de Fide: dicitur enim Matth. 6. *Fiat voluntas tua*; non dari tamen in Deo voluntatem per modum actus primi physici, sed solum per modum potentie logicæ, quatenus non repugnat, quod Deus velit, nec non per modum actus purissimi, constat ex dictis Disp. antecedenti, ubi ostendimus, non dari in Deo intellectum per modum actus primi physici. Hic actus purissimus Divinæ volitionis relate ad objecta creata est liber, potens illa velle, aut nolle; dicitur enim Psalm. 13. *Omnia quaecumque voluit, fecit*. Dividitur tamen hæc Divina libertas in libertatem per modum actus primi, & libertatem per modum actus secundi; non quia proprie datur in Deo actus primus, & secundus, sed quia Divina libertas est instar libertatis creatæ in actu primo, & instar libertatis creatæ in actu secundo. Libertas enim per modum actus primi in Deo est ipsa Divina volitio prout indifferens ad volendum, vel nolendum objecta contingentia; libertas vero per modum actus secundi est ipsa eadem volitio Divina, prout volens v. gr. potius, quam nolens Mundum.

Difficultas pene inextricabilis, & ænigma absconditum est, Per quid constituatur volitio Divina per modum actus secundi, seu decretum liberum Dei? Qua in re facilius est quamcumque opinionem reflexcere, quam propriam stabilire. Et ratio difficultatis est, quia vel decretum liberum cum Deo identificatur; ergo aliquid, quod est Deus, est contingens; atque adeo Deus potest non esse, quod sapit fatuitatem: Vel a Deo distinguitur; & jam Deus perficitur ab aliquo actu contingente a se distincto, atque adeo a Creatura, quod sonat impietatem. Aristoteles enormiter in hoc erravit, dum negavit, Deum esse liberum, vel faceret immutabilem. Vasquez appellat nodum hunc insolubilem, solis Beatis manifestum. Suarez, unum nostræ Religionis Mysterium, quod in hac vita cognosci non potest. Arriaga dicit, ignorare, quid statuat; quia spinæ ubique; quæ ad sanguinem usque pungunt. Hinc, teste Goneto, disp. 3. §. 5. & Ruiz disp. 11.

de voluntate Dei, sect. 1. omnium Theologorum consensu non datur via conciliandi Dei libertatem cum ejusdem immutabilitate, quin aliquid durum, ac difficile devoretur. Et eadem penitus est difficultas de scientia libera Dei, tam visionis, quam media.

II. Celebriores sententiæ sunt. Primæ Cajetani 1. p. q. 19. art. 2. & 3. p. q. 1. art. 1. constituentis actum Dei liberum per perfectionem, quandam Deo intrinsecam, & contingentem; cuius oppositum non sit imperfectio, sed pariter perfectio: An autem huiusmodi perfectio ponatur a Cajetano modaliter a Deo distincta, an virtualiter, vel alio modo, non satis constat apud DD. ut notat Haunoldus nu. 337. Secunda est Vasqui, Aureoli, Arrubal, Granado, Amici, Recupiti, Fasoli, Platchi n. 142., & communior inter Modistas, complementum decreta libera per aliquod Deo extrinsecum, v. gr. volitionem Mundi per actionem Mundi productivam, & Mundi nolitionem per huius negationem, ita ut complementa hæc extrinseca non constituent Dei volitionem, aut nolitionem, sed solum denominationem Dei volentis, aut nolentis. Tertia Nominalium, ac Suarii docentium, decreta libera importare quandam modum tum realiter, tum virtualiter indistinctum a Deo, & contingentem, atque adeo meram habitudinem ad connotata extrinseca. Alii cum Mauro recurrunt ad veritates quasdam objectivas, æternas, & contingentes. Alii ad quoddam ens, seu respectum rationis; in quibus tamen sententiis explicandis variant communiter quam maxime. Ultima inter celebres sententiæ est D. Th., ac Thomistarum apud Gonetum disp. 3., Lumbier n. 300., Ruiz, Perez, Esparzz, Haunoldi, Arandæ, & aliorum docentium, actum Dei liberum importare terminationem quandam contingentem realiter cum Deo identificatam, sed virtualiter distinctam, non secus ac Personalitates Divinæ important perfectionem realiter identificatam cum Natura, & virtualiter distinctam, ut dicemus in de Trinitate; cum hoc tamen discrimine, quod Personalitas v. g. Patris possit non esse in Filio, non vero possit simpliciter non esse, volitio vero v. gr. Mundi possit simpliciter non esse; ita tamen, ut ea non existente, non possit non esse in Deo nolitio Mundi, quæ defectum volitionis supplet; vel si admitatur possibile in Deo pura omisitio libera, adhuc possit Deus carere tum volitione, tum

nolitio Mundi, quæ sit aliqua terminatio Deo intrinseca, & contingens, quæ Mundus denominetur volitus, aut nolitus: Sicut enim in Verbo præter vim terminandam unionem hypostaticam, datur de facto contingenter terminatio ipsa intrinseca talis unionis, quæ Verbo est extrinseca, ita ut Verbum denominetur intrinsece unitum humanitati non per unionem, tamquam per formam, sed per terminationem intrinsecam contingentem, quæ ad talem unionem dicat habitudinem, ut dicemus in de Incarnatione; ita terminatio ista libera, quæ Deus denominatur volens Mundum, cum sit Deo intrinseca, utpote vitalis, non habetur constitutive per ipsum Mundum Deo extrinsecum, sed per virtualitatem quandam cum Deo realiter identificatam, & contingentem, quæ dicat habitudinem ad Mundum volitum, ut infra explicabimus.

ARTICULUS I.

Num apte salvetur libertas actus Divini per perfectionem quandam defectibilem, aut per complementa extrinseca, aut per meram habitudinem ad extrinseca connotata;

III. **V**asquez, & Suar. hac in re dissident inter se. Suarius enim putat, decretum Dei liberum haberi per quandam habitudinem, & respectum rationis ad connotatum extrinsecum, quæ habitudo non sit perfectio quandam intrinseca Deo, & contingens juxta sententiam, quæ tribuitur Cajetano; nec sit virtualitas quædam Deo intrinseca, & contingens juxta sententiam Thomistarum, sed sit solum quædam Adaleitas, seu non quid, sed cujus, ut discurrunt Nominales in sententia de Modis. Docet præterea, quod Deus volens, & nolens Mundum sit idem secundum suppositionem, & in recto; sed quia aliter se habet ad Mundum volitum, & aliter ad Mundum nolitum, ideo non est idem secundum significationem; siquidem in denominatione Dei volentis Mundum significatur præter Deum ipse Mundus; in denominatione Nolentis significatur præter Deum negatio Mundi: Sicut in denominatione Patris non habetur secundum suppositionem, & in recto aliud, quam Petrus; habetur tamen aliud secundum significationem, quia per denominationem Patris significatur in obliquo Filius, quo deficiente deficit denominatio Patris, licet nihil de-

ficiat, quod constituitur in recto, & secundum suppositionem hujusmodi denominationem.

Vasquez vero, & plurimi Recentiores inherentes viæ Modistarum putant, denominationem Dei volentis Mundum constitui inadæquate, & compleri per ipsum Mundum volitum; Nitunturque illi maxime: Id, quo præcise sublato tollitur aliqua denominatio, est constitutum talis denominationis; aliter si eo præcise sublato tolleretur denominatio, & nihil constituens ipsam tolleretur, ea non tolleretur; nunquam enim tollitur constitutum, si nullo ejus constitutum tollatur, cum constitutum nihil sit præter omnia sua constitutiva. Neque dicas cum Nominalibus, posse denominationem, v. g. Patris, tolli præcise sublato Filio, tamquam requisito, non tamquam constitutivo hujus denominationis, & eodem modo tolli posse denominationem Dei volentis Mundum, præcise sublato Mundo tamquam requisito. Nam contra est primo, quia requisitum solum requiri potest, ut forma ponatur in subiecto apto, non vero ut communicet illi denominationem; quod constat inductione: Approximatio v. gr. est requisitum, ut calor uniatur subiecto, & Anima corpori; sed his positus non potest subiectum non denominari calidum, & corpus non denominari vivens; ergo si forma denominans Petrum Patrem, esset solus Petrus, & forma denominans Deum volentem Mundum, esset sola Dei volitio necessaria, sequeretur, quod independentem ab ullo connotato, seu requisito extrinseco semper haberetur denominatio Patris, & Dei volentis Mundum. Secundo a priori, quia requisitum non est requisitum sibi, sed alteri; ergo Filius v. gr. solum potest esse requisitum, ut habeatur denominatio Patris, ab ipso saltem inadæquate distincta; atqui Filio præcise sublato, habetur per Adversarios quicquid constituit denominationem Patris, scilicet forma denominans in subiecto capaci; ergo præcise sublato Filio deberet dari denominatio Patris: & eodem modo sublato Mundo deberet dari denominatio Dei volentis Mundum; si forma denominans omnino distinguatur ab ipso Mundo. His explicatis

IV. Dico 1. Decreta libera Dei non superaddunt volitioni Divinæ necessariæ perfectionem aliquam Deo intrinsecam contingentem, aut realiter distinctam, ut vult Vortius Calvinista apud Platellium n. 140; aut

aut modaliter, seu formaliter & ex natura rei, aut virtualiter tantum distinctam a volitione Dei necessaria juxta sententiam, quæ a nonnullis tribuitur Cajetano (qui tamen solum docet, esse perfectionem quamdam extensivam, per hoc, quod ejus oppositum non sit imperfectio) Hæc conclusio admittitur communissime, ne Deus concipiatur ut potentialis intrinsece compositus, defectibilis, & mutabilis.

Prob. Omnis Divina perfectio est infinita, atque adeo est ipse Deus; ergo si decretum liberum esset perfectio Divina contingens, ipse Deus esset contingens, & defectibilis, nec non capax alicujus perfectionis, quæ caret, v. g. nolitionis Mundi; unde Deus esset potentialis, & compositus.

Neque dicas, quod possit hujusmodi perfectio deficere, quin possit deicere Deus, eo quod necessario detur alterutrum ex decretis liberis oppositis; unde si deesset volitio Mundi, daretur nolitio. Nam hoc ipsum dedecet Deum, quod scilicet Divinæ perfectiones cum ipso identificatæ admisceant imperfectiorem contingentem, defectibilitatis, potentialitatis, & compositiōis.

Præterea, si perfectio illa decreti liberi constitutiva ponatur distincta modaliter, & non mutuo separabilis a Deo, ecce compositionem realem Deo indignam: si vero ponatur distincta formaliter, cum sit separabilis a Deo, sequeretur, quod posset una formalitas separari ab alia, & consequenter idem a seipso: si demum ponatur distincta virtualiter, a fortiori repugnat, quod sit separabilis; potuisset enim Deus non identificari cum volitione Mundi, cum qua de facto realiter identificatur. Utrum autem possit Deus realiter identificari cum terminatione aliqua virtualiter distincta, & contingentem, quæ non sit nova perfectio, sed novum prædicatum, seu novum munus, & nova habitudo ad Creaturas, discutimus articulo sequenti.

V. Dico 2. Actus Dei liber non constituitur adæquate, & formaliter per ipsam Dei volitionem necessariam sub connotato extrinseco, juxta sententiam Nominalium, quæ a nonnullis etiam tribuitur Suariorum disp. 20. metaph. sect. 9. qui tamen verius adheret sententia Thomistarum a nobis propugnandæ, cum expresse dicat n. 46. volitionem liberam in Deo importare terminationem, & causalitatem contingentem, quam prius vocaverat respectum rationis,

Prob. Si solum volitio Dei necessaria constitueret denominationem Dei volentis Mundum citra ullam virtualitatem, seu terminationem ad Creaturas contingentes, sequeretur, quod semper, & necessario daretur denominatio Dei volentis Mundum, quia semper, & necessario darentur constitutiva talis denominationis; sicut semper ac habentur constitutiva denominationis calidi, habetur calidum; cum constitutum non sit aliud præter omnia sua constitutiva. Neque dicas, quod deficiente connotato, puta Mundo, deficeret talis denominatio. Nam si connotatum non constituit talem denominationem, eo deficiente non deficient constitutiva denominationis, atque adeo nec deficit ipsa denominatio ab iis constituta.

Confirm. 1. quia in hac sententia volitio Divina mundi, & nolitio ejusdem, quæ sunt impossibiles, essent idem realiter, & formaliter; quia essent realiter, & formaliter idem cum tertio, scilicet cum volitione Dei necessaria.

Confirm. 2. In hac sententia causa formalis adæquata, qua Deus constituitur volens Mundum, posset esse sine suo effectu formali, atque adeo sine se ipsa, cum causa formalis identificetur cum suo effectu formali.

Confirm. 3. quia non possunt actus liberi voluntatis creatæ salvari per hoc, quod voluntas quodammodo se habeat ad hunc, vel illum terminum; ergo neque actus liberi voluntatis Divinæ.

Neque dicas 1. Actus liberos creatos importare perfectionem absolutam; secus vero decreta libera Dei, quæ non possunt a voluntate Divina realiter distingui.

Nam contra est, quia idcirco forma absoluta identificari nequit cum subiecto, quod denominatur, quoties denominatio est contingens, quia universum nequit denominatio deficere, nisi per defectum formæ in subiecto; sed hoc probat, quod nec possit forma respectiva cum subiecto identificari; quod denominatio, quæ habetur a forma respectiva, est contingens; ergo utrobique par ratio. Præterquamquod Actus liberi creati sunt etiam formæ respectivæ importantes respectum tam ad subiectum, quam ad terminum: unde in multorum sententia se habent insar Modorum, qui non indigent actione distincta, ut producantur.

Neque dicas 2. ex hoc, quod actus liberi Divini realiter identificentur cum volitione

ne necessaria, non sequitur, quod etiam actus liberi creati debeant identificari cum voluntate creata; ergo ex hoc, quod volitio libera Divina constitui possit per volitionem necessariam taliter se habentem ad objecta contingentia, non sequitur, quod etiam volitio libera creata constitui possit per voluntatem taliter se habentem.

Nam contra est, quia ideo Actus liberi Divini realiter identificantur cum volitione necessaria, quia cum sint infinite perfecti, debent excurrere realiter, & formaliter ad quamcumque perfectionem; unde virtualitas, quæ superaddit actui necessario Dei constitutiva actus liberi, nequit esse nova perfectio; contra voluntas creata est capax novæ perfectionis, & ideo ex novo actu non solum habet novum prædicationem, novam terminationem, & novum munus, sed etiam novam perfectionem realiter distinctam, & separabilem. At si posset Deus habere novas denominationes sine novis constitutivis denominationum, quare non posset id etiam competere voluntati creatæ; cum ruat jam principium illud, quod nova denominatio importet novam formam, saltem virtualiter distinctam. Unde sicut potest in sententia Nominalium idem aliter se habere in ordine ad aliud, absque nova forma relativa distincta, quare non poterit idem aliter se habere in ordine ad se absque nova forma absoluta distincta.

VI. Dico ult. Actus Dei liber non potest compleri per complementum extrinsecum, juxta sententiam explicatam Aureoli, Vafquii, & plurimorum Recentiorum.

Prob. 1. cum, Cattaneo, in metaph. disp. 24. q. 3. ex capite Aseitatis Divinæ. Nam juxta hanc sententiam Deus non esset a se, & sibiimet sufficientissimus: indigeret enim ad existendum alio a se distincto, quod esset vel complementum decreti positivi, seu ens positivum, vel complementum negativum, seu ens abusivum. Certe Deus non esset a se, si ad existendum indigeret aliquo ente positivo a se distincto vage, scilicet vel Mundo A, vel Mundo B; ergo a fortiori si indigeret vage aliquo ente a se distincto, vel positivo, vel abusivo, quippe quod est umbra entis.

Confir. Hoc ens abusivum, quod esset complementum extrinsecum decreti de nihil producendo, vel esset ex parte objecti a Deo constitutum, & recurrit, quod Deus indigeret aliquo vage a se distincto, ut posset existere; unde non esset sibiimet suffi-

cientissimus, & a se: vel non est aliquid ex parte objecti a Deo distinctum, ergo sicut dari potest decretum de nihil producendo absque complemento extrinsecum, ita poterit quodcumque aliud decretum sic haberi. Præterquamquod si decretum illud negativum per solum Deum constituitur, sequitur, quod etiam quando datur decretum de productione Mundi, daretur etiam illud decretum de nihil producendo, eo quod dentur omnia constitutiva.

Prob. 2. ex capite libertatis cum eodem Cattaneo. Repugnat actui libero determinatio, quæ non sit ab intrinsecum; sed complementum extrinsecum esset Dei determinatio ad denominationem actus liberi, putata ad volendum Mundum, ergo repugnat, quod complementum hujus denominationis sit extrinsecum. Major constat: in hoc enim habetur ratio actus liberi, quod sit electio ab intrinsecum, ita ut si ab extrinsecum voluntas determinetur, jam non sit libera. Hinc in sententia Societatis prædeterminatio physica, licet sit a Deo prima causa, per hoc præcise libertatem everit, quia voluntas creata determinaretur ab extrinsecum; unde a fortiori voluntas Divina non esset libera in actu secundo, si non determinaretur ab intrinsecum, seu a se. Minor est ipsa doctrina Adversariorum, quod scilicet productio Mundi v. g. quæ complet denominationem Dei nolentis. Mundum, non sit aliquid Dei intrinsecum: unde id, quod determinat voluntatem Divinam ad volendum Mundum, non est ab intrinsecum. Adde, universim repugnare, quod aliquid sit ab intrinsecum, & non sit intrinsecum, ut constat inductione in actibus intellectus, & voluntatis, necnon in aliis actibus vitalibus, qui sunt ab intrinsecum, & sunt intrinseci; ergo si complementum actus liberi Divini esset aliquid ab intrinsecum voluntatis Divinæ, deberet pariter esse voluntati Divinæ intrinsecum. Potest quidem aliquid esse intrinsecum, & non ab intrinsecum, ut habitus, prædeterminatio physica; ipsa etiam mea existentia est mihi intrinseca, sed non ab intrinsecum. At nequit aliquid esse ab intrinsecum, & non intrinsecum. Et ratio est, quia forma denominans, quæ est ab intrinsecum, vel debet uniri physice, vel debet identificari cum subiecto denominationis, ut constat inductione. Concedimus quidem Adversariis, in hoc differre libertatem Dei a libertate Creaturæ, quod Creatura sit indifferens ad applicandum sibi hunc, vel illum actum; Deus vero solum sit indif-

differs ad applicandam voluntatem suam huic, vel illi objecto: At sicut Creatura, ut velit liberare, debet ab intrinseco applicare sibi actum voluntatis, ita Deus ut velit liberare Mundum v. g. debet ab intrinseco applicare voluntatem suam Mundo libere volito; atqui si volitio necessaria Dei applicaretur Mundo per complementum extrinsecum, puta per actionem productivam Mundi, non applicaretur ab intrinseco; ergo decretum volens Mundum revera non esset actus liber, quippe qui non esset ab intrinseco.

Confirm. 1. quia potuit Deus nihil velle condere, vel ob finem A, vel ob finem B, v. gr. vel ne detur lapsus Luciferi, vel ne detur lapsus Adami, juxta illud Sap. 4. *Rapitur est, ne malitia mutaret intellectum ejus.* In hoc autem casu non posset assignari complementum extrinsecum decreti de nihil producendo potius ob finem A, quam ob finem B; ergo hæc sententia non subsistit. Dicere autem, quod in ipsis negationibus darentur veluti modi negativi diversi, est dicere aliquid inopinabile; & recurrit, quod negationes deberent esse aliquid a Deo distinctum, unde Deus non esset subiectus sufficientissimus.

Confirm. 2. quia Deus non solum est liber ad facere, vel non facere, sed etiam ad velle facere, vel nolle facere; ergo antecedenter ad facere Mundum, seu ad actionem Mundi productivam dari debet velle liberum Dei applicans Omnipotentiam ad facere. Antecedens patet; tum quia in Deo non est idem facere Mundum, ac velle facere Mundum, cum Mundum fecerit in tempore, voluerit tamen ab æterno illum facere; tum etiam quia aliter dum dicitur Psal. 13. *Omnia quæcumque voluit, fecit*, significaretur, omnia quæcumque fecit, fecit, vel omnia quæcumque voluit, voluit; quæ esset propositio identica, & nugatoria. Ratio dumtaxat a priori est, quia volitio, aut cognitio Dei necessaria non differt a libera per hoc, quod illi superaddatur aliquid extra lineam volendi, aut cognoscendi; atqui complementum extrinsecum, licet sit effectus volitus, & cognitus a Deo, est omnino extra lineam volendi, & cognoscendi (quis enim dixerit, quod lapis v. g. voluit pertinere ad lineam volendi?) ergo complementum extrinsecum nequit pertinere ad constitutionem decreti liberi.

VII. Ex dictis colligitur, nec subsistere sententiam Card. Pallavicini lib. 4. cap. 40.

& Mauri qu. 58. putantium, terminationes liberas, seu applicationes contingentes volitionis, ac scientiæ Dei consistere in quibusdam veritatibus objectivis æternis, & contingentibus, realiter a Deo distinctis. Ratio est, quia vel hujusmodi veritates sunt quid creatum; & quomodo sunt ab æterno? quomodo possunt complere actum Dei liberum, si non sunt aliquid intrinsecum Deo; cum omnis determinatio in potentia libera debeat esse ab intrinseco? Si vero sunt aliquid increatum, quomodo a Deo distinguuntur circa compositionem in Deo, potentialitatem, contingentiam? Quare vel recurrunt argumenta contra sententiam Cajetani, si sunt aliquid increatum; vel argumenta contra sententiam Vasquezii, si dicantur esse aliquid creatum.

ARTICULUS II.

Utrum complementum decreti liberi sit quædam terminatio ad objectum creatum Deo intrinseca, & contingens?

VIII. CUM non possit actus Dei liberi compleri per aliquid Deo extrinsecum, compleri debet per complementum intrinsecum; hujusmodi autem complementum nequit esse perfectio quædam Deo intrinseca, & contingens, ut diximus tum contra Vortium Calvinistam, tum contra sententiam, quæ tribuitur Cajetano; & idcirco debet Deo esse intrinsecum identice, quin importet perfectionem aliquam contingentem, & separabilem a Deo. In hoc autem explicando variant DD. Fonseca, & Salas 1. 2. tract. 3. disp. 1. juxta viam Nominalium docent, hujusmodi complementum intrinsecum esse modum quemdam realiter a Deo indistinctum, & contingentem. Antonius Perez hujusmodi complementum vocat formalitatem quandam præscindentem ab imperfectione, vel perfectione. Thomistæ cum Godoy, Goneto, nec non Ruiz, Esparza, Haunold, Aranda, Cataneus, Lumbier hujusmodi complementum vocant terminationem, seu habitudinem liberam, quæ sit quædam virtualitas a Deo distincta; Quod videtur docuisse D. Thom. 1. contra Gent. c. 82. ubi dicit, habitudinem voluntatis Divinæ ad se esse necessariam, & naturalem, habitudinem vero ejusdem ad alia esse voluntariam. Quod autem D. Thom. agnovit distinctionem virtutem in Deo inter actum necessarium, & libe-

liberum, constat ex quæst. 25. de potentia Dei, ad tertium, ubi operationem necessariam cum libera comparat, sicut comparatur natura Divina cum Personalitatibus.

IX. Dico equidem cum Angelico, & aliis nuper laudatis, complementum actus liberi Divini importare terminationem; seu habitudinem quandam ad Creaturas intrinsicam Deo, & contingentem, solum virtualiter ab actu voluntatis necessario distinctam: sicut Personalitates virtualiter distinguuntur a Natura Divina; & sicut in Verbo denominationi uniti cum Humanitate assumpta præter unionem hypostaticam Verbo extrinsecam importat in ipso Verbo quandam terminationem intrinsicam contingentem, qua circumscripta, Verbum non diceretur unitum intrinsicè, & substantialiter, sed mere extrinsecè, & accidentaliter cum humanitate; ad eum modum quo objectum cognitum mere extrinsecè unitur cum cognoscente, ut dicemus in de Incarnatione.

Prob. Complementum actus liberi Divini nequit esse Deo intrinsicum, & realiter distinctum, ac contingens, juxta sententiam Vostii: Neque potest esse omnino Deo extrinsecum juxta sententiam Vasquii recurrentis ad complementa extrinsecà; Neque omnino identificatum cum Deo, juxta sententiam Nominalium recurrentium ad connotata extrinsecà; ergo debet esse ita Deo intrinsicum, & identificatum, ut aliquatenus ex parte objecti distinguatur ab actu voluntatis Divinæ necessario; cum autem sufficiat distinctio virtualis, quæ est omnium minima, idcirco distinguitur a Deo distinctione virtuali. Nequit tamen ita distinguui, ut importet perfectionem contingentem superadditam actui necessario, ut diximus contra Cajetanum; cum non possit cumulo omnium perfectionum nova perfectio superaddi, aut hæc ab illo abesse: ergo hujusmodi complementum, seu terminatio libera ad Creaturas est solum quædam virtualitas superaddita actui necessario præscindens a perfectione, & imperfectione, quæ solum possit a Deo abesse secundum quid, seu secundum denominationem, aut habitudinem, terminationem, munus, seu exercitium libertatis, non vero simpliciter, propriè, & secundum entitatem: eo modo, quo de factis nulla perfectio Divina deficit in Filio (urpote cumulo omnium perfectionum) licet illi deficiat Paternitas, & spiratio passiva.

Confirm. non minus in Deo ratione fecunditatis debet salvari communicabilitas

essentiz cum incommunicabilitate Personarum, quam ratione liberatis salvari debet necessitas Divinæ volitionis cum contingentia ad hoc, vel illud volendum; sed apte salvatur communicabilitas illa, & incommunicabilitas per distinctionem virtutalem inter naturam communicabilem, & Personalitates incommunicabiles, quæ nullam perfectionem, aut imperfectionem superaddant Naturæ; quin possit aliter hoc Mysterium salvari, ut hic supponimus; ergo apte etiam salvatur necessitas, & contingentia per distinctionem virtutalem inter volitionem necessariam Dei, & terminationem liberam ad Creaturas, quæ nullam perfectionem, aut imperfectionem superaddat actui Dei necessario. Et recurrit pariter confirmatio magis dulcida ex eo, quod possit Verbum carere terminatione intrinsicà ad unionem hypostaticam sibi extrinsecam.

X. Ex quibus fit 1. quod sicut non deficeret in Verbo ulla perfectio, si deficeret terminatio intrinsicà ad unionem hypostaticam, ita nec deficeret in Deo perfectio, si deficeret terminatio libera sibi intrinsicà ad Mundum, qua denominatur volens Mundum; & sicut non deficit in Filio ulla perfectio, licet deficit illi Paternitas virtualiter distincta a Natura Divina, eo quod Filius sit cumulus omnium perfectionum; ita in casu.

Fit 2. quod sicut Personalitates solum realiter, & identice sunt omnis perfectio, formaliter vero sumptæ præscindunt a perfectione, & imperfectione, cum non possit in Deo dari ulla imperfectio, nec aliqua perfectio abesse; ita istæ terminationes liberæ.

Fit 3. quod sicut solus Deus capax est distinctionis virtualis inter Naturam, & Personalitates; ita solus Deus capax est ejusdem distinctionis inter volitionem necessariam, & liberam. Ratio a priori est, quia distinctio virtualis importat convenientiam in omni perfectione, & disconvenientiam in aliquo predicato ad salvandam contradictionem; Solus autem Deus ratione fecunditatis habere potest inter Naturam, & Personalitates convenientiam in omni perfectione, cum sit cumulus omnium perfectionum, & discrepantiam in aliquo predicato; unde Natura sit communicabilis, non Personalitas; natura sit una, & non triplex; Personalitas sit triplex, & non una; ergo solus Deus capax est distinctionis virtualis inter Naturam, & Personalitates;

Et

Et eodem modo inter volitionem necessariam, & liberam, ad salvandum, quod illi sit indefectibilis, hæc vero contingens. Contra vero in Creaturis distinctio virtualis repugnat, quia cum nulla Creatura sit cumulus omnium perfectionum, eo ipso quod Creaturæ additur novum prædicatum, ei additur nova perfectio, si huiusmodi prædicatum sit consonum tali entitati; aut additur imperfectio, si illi sit dissonum, aut superfluum; Deo autem potest prædicatum aliquod esse consonum, & superaddi, quin superaddatur ulla perfectio, cum repugnet, cumulo omnium perfectionum aliquam perfectionem superaddi; sicut etiam repugnat, quod huiusmodi prædicatum importet imperfectionem, aut limitationem perfectionis, cum sit Deo consonum, & importet excursum ad quamcunque perfectionem realiter, & identice.

Fit 4. quod sicut in sola Natura Divina, utpote cumulo omnium perfectionum, ratione fecunditatis datur exigentia activa, quod identificetur cum Personalitatibus inter se oppositis; in Personalitatibus vero datur solum exigentia passiva, quod identificetur cum cumulo omnium perfectionum, & ideo Personalitates non sunt formaliter perfectio; ita in sola volitione necessaria ratione libertatis datur exigentia activa, ut identificetur cum alterutra ex terminationibus liberis impossibilibus; in istis vero datur solum exigentia passiva identitatis realis cum volitione necessaria cumulo omnium perfectionum; & ideo terminationes liberæ formaliter sumptæ non sunt perfectiones. Vel dicas cum Esparza qu. 22. ad secundum, quod sicut Personalitates exigunt identificari cum Deo exigentia ipsius Deitatis essentialiter fecundæ, non vero exigentia propria Personalitatum; ita terminationes liberæ.

Fit 5. quod sicut Personalitates formaliter sumptæ neque sunt formaliter ens (aliter in Deo essent tria entia, quod est contra Fidem) neque sunt formaliter non ens, quia essent formaliter nihil; sed sunt Entis potius, quam Ens, seu adalitates entis, & virtualitates præscindentes ab ente, vel non ente; sicut in metaphysicis differentie substantiæ neque sunt formaliter substantia, neque accidens, sed præscindunt ab utroque; ita prorsus terminationes liberæ.

Fit ultimo, quod sicut non tenet ista illatio: Filius non est Pater, qui est Deus; ergo Filius non est Deus; ita nec tenet i-

sta illatio: Non datur nolitio Mundi, quæ si daretur, esset Deus; ergo non datur Deus; Nec tenet hæc alia illatio, Volitio Mundi, quæ est Deus, poterat non esse; ergo poterat non esse Deus. Ratio a priori est, quia sicut a negatione Personalitatis non tenet illatio ad negationem Divinitatis cum illa identificatæ; ita a negatione nolitiois Mundi identificatæ cum Deo non tenet illatio ad negationem Dei, & a contingentia volitionis Mundi non tenet ad contingentiam Dei; eo quod volitio Mundi sit solum contingens secundum quid, & denominative, seu secundum virtualitatem, quæ præscindit ab ente, vel non ente, non vero simpliciter proprie, & secundum entitatem.

XI. Objic. 1. Paritas distinctionis virtualis inter naturam Divinam, & Personalitatem non favet huic opinioni; ergo non est ad rem. Antecedens probatur, tum quia multi cum Nominalibus negant, præter distinctionem eminentialem inter Personas dari distinctionem virtualem inter Naturam Divinam, & Personalitates; tum etiam quia in tantum dari posset hæc distinctio virtualis, in quantum possunt Pater, & Filius identificari cum Natura Divina, & distingui realiter inter se; sed non possunt volitio, & nolitio Mundi identificari cum volitione Dei necessaria, & distingui inter se, quia nolitio Mundi deberet de facto existere; sicut de facto existunt Pater, & Filius identificati cum Natura divina; ergo.

Confirmatur: etiam dato, quod Personalitates secundum se non sint perfectiones relativæ superaddite absolutis, prout multi docent, certe nolitio, & volitio Mundi nequit pariformiter se habere, ac Paternitas, & Filiatio. Nam utraque hæc Personalitas est entitas relativa; & licet non sint duo entia, cum una sit divinitas, atque adeo unum Ens substantivè sumptum; sunt tamen due entitates relativæ; at volitio, & nolitio Mundi non sunt due entitates, immo nolitio Mundi de facto est simpliciter nihil; ergo paritas est nulla.

Resp. paritatem Trinitatis non adduci ad conclusionem probandam, sed ad emolliendam sententiæ arduitatem, ostendendo, quod fere omnes difficultates, quæ nobis oblectantur, enodandæ sint in sententiæ communissime admissa in schoiis Thomistica, Scotica, & Recentiorum, exceptis Nominalibus, quod sc. admittenda sit distinctio virtualis, si minus formalis, inter Na-

Naturam, & Personalitates. Hæc autem paritas sub oculis ponit, quod sicut Divinitas ratione distinctionis, virtualis potest identificare sibi duo prædicata impossibilia, scilicet communicabilitatem Naturæ, & incommunicabilitatem Personalitatum; ita posset identificare sibi necessitatem volitionis, & contingentiam terminationis libertatis, v. gr. ad Mundum volitum; & sicut possunt Paternitas, & Filiatio inter se opponi, & simul identificari cum Divinitate, ita pariter volitio, & nolitio libera Mundi. Cæterum, quod Paternitas, & Filiatio utraque sit necessaria, & per circum-
 insectionem necessario sint in Divinitate; contra vero volitio, & nolitio libera sint impossibiles, est discrimen materiale non infringens vim paritatis; illud quippe requiritur ad fecunditatem; hoc vero ad libertatem Dei. In forma nego antecedens; ad probationem nego minorem: quamvis nolitio Mundi non existat secundum denominationem Dei nolentis, & secundum virtualitatem propriam exercitii libertatis; adhuc identificatur cum Divinitate secundum totum, quod dicitur de entitate, & perfectione; unde nolitio Mundi de facto existit simpliciter, & entitative, licet non existat secundum quid, & denominative, seu secundum virtualitatem nolitionis; sicut Filiatio secundum omnem perfectionem realem Divinitatis existit in Patre, licet non secundum denominationem Filii.

XII. Neque dicas, quod hic modus respondendi coincidat cum sententia Nominatum a nobis rejecta articulo superiore. Nam coincidimus quidem cum ea sententia in hoc, quod dicamus nolitionem Mundi non existere secundum quid, & denominative, sed existere simpliciter, & entitative; discrepamus tamen cum Nominatibus in constitutivo actus liberi: illi enim negant, quod deficiente denominatione volentis deficiat in Deo ulla virtualitas intrinseca; nos vero dicimus, virtualitatem hanc præcipientem a perfectione, & imperfectione deficere; aliter deficeret denominatio sine defectu formæ denominantis, & deficeret constitutum, quin deficiat ultimum ex constitutivis, quod est impossibile.

Ad confirmationem dico, pariformiter se habere Personalitates, & actus liberos Dei in eo, quod facit ad rem, licet paritas non eodem modo in omnibus militet; cum fecunditas ferat necessitatem in utraque Personalitate opposita; secus vero libertas; ac

propterea fecunditas fert in Divinitate potentiam similitudinis ad identificari realiter cum Personalitatibus oppositis; libertas vero fert solum similitudinem potentie ad identificari realiter cum terminationibus liberis impossibilibus. Quare cum paritas militet in eo, quod militare debet, dicendum, quod Paternitas, & Filiatio licet sint id, propter quod duæ Personæ realiter distinguuntur, revera tamen non sint duæ entitates; cum de fide sit, non esse duo entia. Idemque dicas de terminationibus liberis.

Aliqui docent, Paternitatem, & Filiationem esse duas entitates non absolute, sed cum addito, scilicet duas entitates relativas, & sic etiam esse duas perfectiones relativas. Verum, ut advertit Haunoldus n. 343. questio est potius de voce: nam vel nomine entitatis, & perfectionis relative venit entitas, & perfectio cum addito differente, ita ut revera non sint entitates simpliciter dicte, sed virtualitates, seu entitates supertranscendentes, & habemus intentum; vel sunt entitates cum addito restringente, sicut accidens dicitur esse entis ens, & in hoc sensu deberet esse absolute verum, quod in Deo dentur tria entia, & tres res; Quod nemo dixerit. Verum quidem est, Personalitates Divinas realiter inter se distingui, ut docet Angelicus 1. parte qu. 28. art. 3. quatenus sunt id, ratione cujus Personæ Divinæ realiter distinguuntur; at si considerentur secundum id, quod superaddunt Naturæ Divinæ, non possunt dici realitates, sed virtualitates præcipientes ab ente, & non ente, a perfectione, & imperfectione. Et hoc idem dicimus de terminationibus liberis; volitio enim, & nolitio Mundi realiter inter se distinguuntur; quamvis non superaddant volitioni necessarias realitatem, aut perfectionem, sed solum virtualitatem, & adalci-
 tatem entis. Quod etiam dicendum de terminatione illa Verbo intrinseca, ratione cujus dicitur intrinsece terminans unionem hypostaticam, quod in Creatis non est reperire; unde Concilium Toletanum undecimum dixit: *Si ratione hoc Mysterium caligeretur, non esset mirabile; si exemplo, non esset singulare.*

XIII. Objic. 2. Quamvis terminatio ista libera formaliter sumpta præcindat a ratione entis, vel non entis, non præcindit tamen a contingentia propria libertatis; ergo nequit esse Deo intrinseca, & identificata. Probatur consequentia, quia nequit
 idem

identificari contingens, & necessarium; sicut enim pugnat esse, & non esse, ita pugnant posse non esse, quod est proprium rei contingentis, & non posse non esse, quod est proprium rei necessarii.

Confirm. 1. quia terminatio illa libera, puta, volitio Mundi potest non esse, atque adeo est defectibilis; ergo si realiter cum Deo identificaretur, Deus esset defectibilis. Præterquamquod contingentia de se importat formaliter imperfectionem, atque adeo nihil contingens potest cum Deo identificari.

Confirm. 2. quia separabilitas est signum distinctionis realis; sed ista terminatio libera est separabilis a Deo, cum de facto detur Deus, quin detur nolitio Mundi; ergo deberet a Deo realiter distinguere.

Confirm. ult. quia impossibile est realiter identificari cum A id, quod ab A realiter distinguitur; sed nolitio libera Mundi realiter distinguitur a Deo, cum de facto a Deo sit separata; ergo non potuit cum Deo realiter identificari. Quibus adde ex Pallavicino, non posse cum Deo identificari id, quod potest a Deo contemni, ac respui, ut est nolitio Mundi.

Resp. duplicem dari contingentiam; alteram propriam Creaturæ, quæ consistit in hoc, quod possit transire a non esse ad esse, & ab esse ad non esse; Alteram, quæ potest convenire actibus liberis Divinis: hæc autem solum fert, ut decretum liberum Dei ita sit, ut potuerit non esse, vel e contra, quin tamen possit transire ab esse ad non esse, vel a non esse ad esse. Prior contingentia, quæ dicitur contingentia in genere entis, fert mutabilitatem, & imperfectionem; posterior vero, quæ dicitur contingentia in genere denominationis, seu exercitii, importat identice omnem perfectionem; cum sit propria entis summe perfecti; quod ratione libertatis habere debet huiusmodi contingentiam in terminationibus liberis.

In forma distinguo antecedens: Terminatio ista libera non præsindit a contingentia in genere denominationis, seu exercitii propria libertatis divinæ, concedo; a contingentia in genere entis propria libertatis creatæ, nego Antecedens, & Consequentiam. Ad probationem: Sicut in Patre identificantur realiter duo prædicata opposita, scilicet communicabilitas Naturæ Divinæ, & incommunicabilitas paternitatis; ita in Deo identificantur necessitas volitionis, & contingentia terminationis li-

beræ. Ad id, quod additur, dicendum; repugnare solum esse simpliciter, & non esse simpliciter, sicut etiam posse non esse simpliciter, & non posse non esse simpliciter; non tamen repugnare ista duo esse simpliciter, seu entitative, & non esse secundum quid, seu denominative; nec ista duo, posse non esse secundum quid, & non posse non esse simpliciter. Et eodem modo repugnat, quod A sit indifferens ad identificari cum B, simpliciter, & entitative, ita ut si non identificetur, desit aliqua perfectio; non repugnat tamen, quod A sit indifferens ad identificari denominative cum B; sicut volitio Mundi est indifferens ad identificari cum Deo, cum hoc spectet ad perfectionem libertatis Divinæ.

Ad 1. confirmationem: Huiusmodi terminatio libera potest non esse secundum quid, & denominative, non vero simpliciter; unde est contingens contingentia in genere denominationis, & exercitii propria actus liberi Divini, quin possit dici defectibilis defectibilitate propria importante mutabilitatem, & inconstantiam, quæ unice importat formaliter imperfectionem.

Ad 2. Separabilitas quoad entitatem, & perfectionem arguit distinctionem realem, non vero separabilitatem quoad denominationem propriam virtualitatis Divinæ contingentis, cum huiusmodi virtualitas debeat realiter identificari cum omni perfectione, & solum sit contingens quoad denominationem: sicut enim Filiatio non existit in Patre, & quodammodo a Patre separatur, quin Pater, & Filius sint duæ res; esto realiter distinguantur; ita nolitio Mundi non existit in Deo volente Mundum, & quodammodo ab eo separatur (scilicet secundum denominationem, non vero simpliciter, & entitative) quin denominatio volentis, & nolentis Mundum sint duæ res, esto realiter distinguantur.

Ad ultimam: major est falsissima in Mystero ineffabili; Pater enim secundum denominationem Patris realiter distinguitur distinctione non pura a Filio, cum quo etiam realiter identificatur secundum essentiam, & in cumulo omnis perfectionis; ut proinde dixerit Christus Dominus; *Ego, & Pater unum sumus*, indicando identitatem, & distinctionem. Et eodem modo nolitio Mundi realiter distinguitur a volitione Mundi secundum denominationem, realiter tamen cum illo identificatur secundum entitatem, & in cumulo omnis perfectionis. Quare semper præ oculis habendum My-

ste

Aerium Trinitatis, ut coherenter ad illud discurramus in mysterio libertatis. Ad id quod additur, distinguo majorem; nequit identificari cum Deo, quod potest a Deo contemni simpliciter, concedo; quod potest solum contemni secundum denominationem, seu secundum esse virtuale, nullatenus vero secundum realitatem, & perfectionem, quam importat identice, nego majorem; & distincta pariter minore nego consequentiam.

QUÆSTIO II.

De Providentia quoad ea, quæ spectant ad Prædestinationem, & Reprobationem.

DE Fide est, inesse Deo Providentiam; dicitur enim Sapient. 8. *Attingis a fine usque ad finem fortiter, & disponis omnia suaviter.* Definitur autem Providentia a Boetio, *Divina ratio, quæ cuncta disponit.* A Damasceno vero definitur, *Voluntas Dei, per quam res gubernantur.* a D. Thoma *Ratio ordinis rerum in finem, in Deo præexistens.* Ab aliis communius, *Præscientia, & dispositio mediorum ad finem.* Cum autem Deus omnia præsciat, & unicuique disponat media ad assequendum finem suum, idcirco est summe providus; licet enim Creaturæ rationales aliquando suum ultimum finem non consequantur per media a Deo disposita, hoc tamen unice provenit ex culpa ipsius Creaturæ, cum media de se sint apta, & sufficientia ad finis consequutionem.

Utrum autem Providentia formaliter consistat in solo actu intellectus præscribentis ordinem mediorum ad finem juxta sententiam Thomistarum, an vero in solo actu voluntatis intendentis finem, & eligentis media juxta viam Scotistarum, an demum in utroque actu tum intellectus, tum voluntatis, ut docent communius cum Molina? questio est levis momenti, & forte etiam de voce; Illud certum est, utrumque actum requiri, quicquid sit, an uterque de formali, an alter de formali, alter de connotato: Probabilius mihi est, actum voluntatis importari principalius, quia ad finem a Creaturis assequendum præstat, quod decernantur, quam quod cognoscantur a Deo media ad talem finem. Omittimus hic in-

quirere, Utrum Divina Providentia Creaturas rationales ad finem ultimum assequendum ordinet per decreta prædeterminantia juxta viam Thomistarum, an vero per media de se indifferentia, sed infallibiliter prævisa effectum habitura, juxta viam Societatis, nec non alia his affinia, de quibus alibi. Solum inquirimus de præcipuis actibus Divinæ Providentiæ, scilicet de Prædestinatione, & de Reprobatione, Utrum Deus ante scientiam visionis de absoluta futuritione meritum, aut demeritorum Creaturas rationales prædestinet, aut reprobet, faciendo ex eadem massa aliud vas in honorem, aliud in contumeliam, ut loquitur Apostolus. ad Roman. 9.

ARTICULUS I.

Num Prædestinatio fiat ante, vel post prævisam meritum absolute futuram?

II. **D**E Fide est, dari Prædestinationem, cum Apostolus ad Roman. 8. dicat: *Quos prædestinavit, hos & vocavit.* Prædestinatio autem in genere est Divinæ præordinatio Creaturæ intellectualis ad Gratiam, & Gloriam. Sed prout restringitur ad Homines post peccatum originale, definitur prædestinatio ex Augustino lib. de bono Perseverantiæ cap. 14. *Præscientia, seu preparatio beneficiorum, quibus certissime liberatur, quicunque liberatur:* Cum enim Providentia in genere sit Præscientia, ac Preparatio mediorum ad finem, hinc talis Providentia, seu Prædestinatio est talis Præscientia, ac preparatio mediorum ad finem ultimum Creaturæ rationalis: & sicut Deus infallibiliter ad finem suum perducit Creaturas non liberas, ita pariter infallibiliter per media apta perducit ad finem suum Creaturas Rationales; quas autem infallibiliter perducit, illas dicitur prædestinare. Unde Bellarminus lib. 2. de Gratia, & Libero arbitrio cap. 9. dicit, Prædestinationem esse *Dei Providentiam, quæ certi Homines ex massa perditionis misericorditer selecti per infallibilia media in vitam eternam diriguntur.*

Hujusmodi Prædestinationem fieri non posse ante scientiam mediam, seu ante Prævisionem meritum conditionate futurorum, est communissima doctrina Societatis: nam si fieret ante scientiam mediam,

vel fieret per decretum prædeterminans, aut condecernens, & hoc in sententia Societatis est eversum libertatis; unde Prædestinatio non esset ad Gloriam, ut ad coronam, & mercedem operationum liberarum, prout hic inquirunt; vel fieret per decretum prædeterminativum, & hoc etiam communis censetur esse libertatis eversum, si scientiam mediam antecedar; Et licet Prædestinatio ista antecedens non everteret libertatem, ut docent nonnulli, adhuc in omnium sententia est impossibilis, ut dicemus in de Gratia, quia scilicet Deus prædestinando ante scientiam mediam nec perfecte cognosceret, nec sapienter decerneret: non cognosceret perfecte; quia non haberet scientiam mediam anteceder ad decreta libera prout posset, & idcirco deberet illam pro eo priori signo habere: nec decerneret sapienter, quia ad sapienter decernendum, oportet prius prænoscere media apta ad finem intentum. Quare difficultas solum est, num Prædestinatio fiat ante, vel post scientiam visionis de meritis absolute futuris?

III. Notandum tamen, Prædestinationem aliam dici radicalem, aliam formalem. Radicalis importat voluntatem Divinam conferendi hanc seriem Gratiarum, quæ prævisæ sunt per scientiam mediam finaliter efficaces, unde perducant ad Gloriam. Et de hac radicali prædestinatione indivisibiliter sumpta non est dubium, quod facta sit anteceder ad merita, cum de Fide sit contra Semipelagianos, Deum independentem a nostris meritis conferre nobis hanc seriem Gratiarum, quas prævidit finaliter efficaces. Potest quidem Perseverantia finalis cadere sub meritum congruum, & probabiliter potest etiam in alia Providentia cadere sub meritum condignum (ut dicemus parte 5. disp. ult. ubi de merito) primam tamen Gratiarum actualem, ex qua haberi potest meritum sive congruum, sive condignum ad perseverantiam finalem, ne de congruo quidem mereri possumus, cum principium meriti non cadat sub merito. Hinc est, quod quando Deus liberaliter vult Electis hanc seriem Gratiarum conferre, vult virtualiter dare illis efficaciter Gloriam, sicut qui vult assentiri præmissis, vult virtualiter assentiri conclusioni, & qui vult finem, virtualiter vult media; & consequenter prædestinatio radicalis explicata est omnino independentem a meritis. Prædestinatio vero formalis est ipsa voluntas Divina conferendi Gloriam ut coronam, &

Parti I.

de hac prædestinatione procedit præsens quæstio, num scilicet fiat ante, vel post scientiam visionis de meritis absolute futuris.

IV. Prima sententia Scottistarum, Thomistarum, Suar., Bellar., Ruiz, Recup. docet, prædestinationem formalem fieri ante prævisionem meritorum, quia videtur intentio finis præcedere electionem mediorum.

Secunda sententia cum Alensi, Bonav., Vasquio, Lugo, & aliis Recentioribus docet, fieri post absolutam prævisionem meritorum, eo quod præmium dari non possit, nisi post existentiam meriti pro statu absoluto, atque adeo post scientiam visionis de tali merito. Juxta utramque hanc sententiam debet esse verum, quod Deus non decernat omnia unico simplicissimo decreto; nam juxta primam sententiam Deus in priori signo prædestinat Electos decernendo illis Gloriam ut coronam, & in posteriori signo decernit auxilia efficacia, ut possint gloriam assequi dependentem a meritis, & sic in posteriori ad prædestinationem videt merita absolute futura. Juxta secundam sententiam Deus pro priori decernit auxilia efficacia, & postquam per scientiam visionis cognoscit merita absolute futura, decernit Electis Gloriam; atque adeo utraque sententia supponit decretorum multipliciter, sive realem ex parte complementi extrinseci, aut ex parte connotatorum, sive virtualem cum prioritate, & posterioritate ex parte objecti.

Tertia sententia cum Granado, Lumbier, Mauro, & Recentioribus communis docet, Deum omnia decernere unico simplicissimo decreto; quod fuisse propugnabimus in de Incarnatione disp. 3. qu. 2. Sic enim eadem simplicissima cognitione attingit causam, & effectum, meritum, & præmium; ita eodem simplicissimo actu voluntatis vult etiam causam, & effectum, meritum, & præmium, simulque intendit finem, & eligit media; atque adeo in hac sententia Prædestinatio formalis, seu decretum de danda Gloria ut corona, ex parte objecti neque est ante, neque post scientiam visionis de meritis absolute futuris, sed in eodem signo, in quo Deus post scientiam mediam decernit dare Electis auxilia efficacia, sicut videt per scientiam visionis merita absolute futura, & simul decernit Gloriam ut coronam in præmium meritorum. Nitiur hæc sententia auctoritate D. Th. 1. parte q. 19. a. 5. ubi hæc

H

ha-

habet: *Deus sicut uno actu omnia in sua essentia intelligit, ita uno actu vult omnia sua bonitate.* Unde sicut in Deo intelligere causam non est causa intelligendi effectum, sed est intelligere effectum in causa, ita velle finem non est causa volendi eam, quæ sunt ad finem, sed est velle, ea quæ sunt ad finem, ordinari ad finem. Vult ergo Deus hoc esse propter hoc, sed non propter hoc vult hoc. Hactenus Angelicus.

V. Ad pleniorcm intelligentiam sciendum est primo, communiter Theologos in actibus intellectus, & voluntatis Divinæ admittere varia signa ex parte objecti, quatenus ex parte objecti aliquis actus intellectus, seu voluntatis præcedit alium, atque adeo est in priori signo ad illum; sic scientia simplicis intelligentiæ dicitur ex parte objecti præcedere scientiam mediam, & esse in priori signo ad ipsam; & ratio est, quia scientia simplicis intelligentiæ est omnino necessaria; scientia vero media est aliquatenus contingens. Universum autem contingens consequitur ad necessarium, & eodem modo scientia visionis dicitur consequi ad scientiam mediam ex parte objecti, quia scientia visionis est omnino contingens; scientia vero media participat de scientia necessaria: Pariformiter decreta libera ex parte objecti sunt in posteriori signo ad voluntatem Dei necessariam. Juxta hanc viam a Theologis quaeritur, Utrum sicut volitio necessaria est in priori signo ex parte objecti ad decreta libera, ita pariter in ipsis decretis detur ex parte objecti prioritas, & posterioritas; ita ut decretum prædeterminativum sit in priori signo ad decretum collativum auxiliorum efficacium, an vero e contra? An demum juxta tertiam sententiam neutrum ex his decretis præcedat alterum, sed omnia Deus decernat in eodem signo?

Sciendum 2. quod negata pluralitate decretorum ex parte objecti, negari non possit in decretis Divinis pluralitas formalis, seu ex parte actus, per hoc scilicet, quod idem decretum æquivalet pluribus: ad eum modum, quo licet ex parte objecti intellectivum, & volitivum Divinum non distinguantur, ratione tamen nostra distinguuntur per hoc, quod eadem entitas Divina æquivalet duobus actibus, quorum alter sit actus intellectus, alter voluntatis: & quia si isti duo actus distinguerentur, actus intellectus præiret actum voluntatis, ideo in Deo intellectivum dicitur esse in priori ad volitivum, non quidem priorita-

te objectiva, sed formalis; non secus ac in homine rationale præcedit risibile prioritate logica, non physica. Et eodem modo, si Deus unico decreto intendit finem, & eligit media, intentio finis dicitur ratione nostra præire electionem mediorum, quia decretum Dei simplicissimum æquivalet duobus, quæ si distinguerentur, intentio finis antecederet electionem mediorum. Et juxta hunc sensum adhuc dubitatur, Utrum prædeterminatio ad gloriam sit in priori, an vero in posteriori signo rationis ad previsionem absolutam meritorum, seu ad decretum collativum auxiliorum efficacium, in quo per scientiam visionis prævidentur merita absolute futura? Et in hoc eodem sensu instituitur questio in de Incarnatione, Utrum Deus præfinitur Incarnationem in remedium peccati in priori ad scientiam visionis de peccato absolute futuro! Ubi dicemus, Deum eodem simplicissimo decreto ex parte objecti permisisse peccatum, & præfinitur Incarnationem in remedium peccati, cum sola tamen prioritate rationis inter decretum permissivum peccati, & decretum præfinitivum Incarnationis in ejus remedium. Dicemus pariter, communissime reputari absolum, & indignum Clementia Divina, quod decretum reprobativum sit in priori etiam rationis ad decretum permissivum peccati, ita scilicet, ut idem simplicissimum decretum æquivalet duobus, quæ si distinguerentur, Decretum reprobativum antecederet, & vera esset hæc causalis: Ideo Deus permittit peccatum Judæ, quia illum reprobavit. Et ratio est, quia Deus videtur primario intendere penam æternam Judæ, & in ordine ad illam permittere peccatum. Contra vero non repugnat, sed est consonum Divinæ Bonitati, quod decretum prædeterminativum sit in priori rationis ad decretum collativum auxiliorum efficacium, quia in hoc casu Deus primario intendit Gloriam ut coronam, & in ordine ad illam decerneret auxilia efficacia.

Sciendum ultimo, Doctores varia signa concipere in decretis Divinis relate ad Prædeterminationem. Scotistæ, & alii communius statuunt quatuor signa, & dicunt, quod Deus videns homines propter peccatum Adæ esse reos damnationis, in primo signo elegit aliquos, quos specialiter dilexit, prædestinando illos ad Gloriam, & circa alios se habuit præcisive: In secundo signo decrevit, Prædestinatis dare hanc sententiam Gratiarum finaliter efficacium: In

ter-

tertio per scientiam visionis vidit illos auxiliis Divinis cooperaturos, & meritorios finaliter Gloriam: In quarto ex prævisione meritorum vult dare Gloriam, ut mercedem, & coronam. Illud autem primum signum etiam in plura alia dividit Scotus relate ad Incarnationem ponendam, dicendo, quod in primo signo prædestinavit Christum ut venturum in carne, præscindendo a passibili, vel impassibili: In secundo prædestinavit Electos in Christo: In tertio prævidit, prædestinatos casuros in Adamo: In quarto decrevit remedium per passionem Christi, & sic decrevit Christum in carne passibili. His præmissis

VI. Dico 1. Prædestinatio ad Gloriam ex parte objecti neque est in priori, neque in posteriori ad prævisionem absolutam meritorum, sed in eodem signo, in quo Deus post consultationem scientiæ mediæ decernit collationem auxiliorum efficacium: atque adeo per scientiam visionis videt merita absolute futura, decernit simul Gloriam ut coronam, atque adeo prædestinat Electos.

Prob. Deus unico simplicissimo decreto omnia decernit, ut hic supponimus ex dicendis in de Incarnatione; ergo Prædestinatio formalis ad Gloriam neque est in priori ex parte objecti, neque in posteriori ad decretum collativum auxiliorum efficacium, atque adeo ad prævisionem absolutam meritorum, sed se habet concomitanter.

VII. Dico 2. In præsentī Providentia probabilis est, Prædestinationem esse in posteriori ad merita absolute prævisa, non quidem posterioritate objectiva, quæ repugnat, posita unitate decreti, sed formali, seu rationis, & per æquivalentiam; quatenus si distinguerentur decretum prædestinationis, & decretum de dandis auxiliis efficacibus, hoc antecederet; unde vera sit hæc causalis; Ideo Deus decernit Gloriam, quia decernit auxilia efficacia, & videt merita; non vero e contra: Ideo confert auxilia efficacia, quia prædestinat ad Gloriam: Ad eum modum, quo: ideo Deus est volitivus, quia est intellectivus, & non e contra. Ita Alenf., Bonavent., Vass., Lugo, Less., Pallavic., & alii apud Platellum.

Prob. 1. ex Scripturis, & Patribus. Secundæ Petri 1. dicitur: *Fratres magis satagite, ut per bona opera certam vestram vocationem, & electionem faciatis.* Secundæ ad Timoth. 2. *Si quis emulaverit se ab istis, erit vas ad honorem, id est electus ad gloriam, ut com-*

munissime Patres interpretantur. Ad Rom. 8. *Quos præscivit, & prædestinavit &c.* Ubi Ambros. lib. 5. de Fide c. 3. addit: *Non enim ante prædestinavit, quam præsciret, sed quorum merita præscivit, eorum merita prædestinavit.* August. etiam habet: *Non tamen electio præcedit justificationem, sed electionem justificatione.* Idemque docent alii Patres apud Amic.

Prob. 2. ratione. Quia præmium non habet rationem præmii, nisi supponat merita in statu absoluto: ergo connaturalius est, quod Deus ideo decernat Gloriam ut coronam, quia præsupponit merita in statu absoluto, & non e contra; atque adeo in præsentī Providentia prædestinatio formalis dicenda est in posteriori ad prævisionem meritorum, posterioritate formali, seu rationis.

Confirm. quia hic modus prædestinandi decernendo prius merita, seu media, quam decernatur Gloria, seu finis, est magis consonus Divinæ Bonitati desideranti omnium salutem; siquidem modus prædestinandi ante prævisa merita tollit a nobis sollicitudinem bonorum operum, & salutis; enervatque zelum Animarum, quia salus videtur semper eodem modo ponenda, prout est præfixa.

Utum autem in alia Providentia possit Prædestinatio formalis esse in priori prioritate rationis ad collationem auxiliorum efficacium, seu ad scientiam visionis de meritis absolute futuris? omittimus inquirere; Videtur tamen non repugnare; quia hic modus prædestinandi ex una parte ostendit majorem benevolentiam Dei erga Electos, intendendo directè eorum felicitatem, & in ordine ad illam conferendo auxilia efficacia: ex altera parte non tollit libertatem meritorum, quia auxilia efficacia dat quidem Deus, & ut efficacia, & ut utilia ad finem Prædestinationis, sed non debet eatenus eo animo dare, ut si essent inefficacia, non daret illa, sed daret alia efficacia; potest enim Deus conferre post scientiam mediam auxilium A efficax amore efficaciter, & ut conferat Gloriam, tanquam coronam, etiamsi noller aliud auxilium conferre, nec prædestinare, si auxilium A prævisum fuisset inefficax, ut hic supponimus ex dicendis in de Gratia: Sicut volens aliquid donare Principi enit Gemmam 1000. aureis, licet noller illam emere, nec veller aliquid donare, si Gemma illa emenda esset bis mille aureis.

Ex quibus sequitur, hunc ordinem

decretorum ponendum esse in negotio Prædestinationis cum distinctione rationis inter decreta, ut notat idem Platelius. Primo enim Deus decrevit creare Homines, quos creavit, & creatus est, & illos ad finem supernaturalem ordinare, volendo voluntate tantum inefficaci eorum salutem. Secundo permixsit peccatum Adæ, in quo omnes peccarent, excepta Deipara, prout explicabimus in de Pœnitentia, cum de peccato originali. Tercio decrevit Incarnationem in remedium peccati. Quarto intuitu meritum Christi decrevit dare omnibus Gratiâ sufficientem ad resurgendum, aliis tamen efficacem. Quinto demum prævisis omnium meritis, & demeritis finalibus, decrevit absolute, & efficaciter aliquibus dare Gloriam, aliis vero pœnam æternam.

VIII. Objic. 1. Ex Scripturis, & Patribus videtur colligi, electionem ad Gloriam esse ante prævisionem meritum. Ad Rom. 9. dicitur: *Cum nondum nati fuissent, aut aliquid boni egissent, aut mali, ut secundum electionem præpositum Dei maneret, non ex operibus, sed ex vocante dictum est ei, (id est Rebecca) quia major serviet minori; sicut scriptum est, (Malachia 1.) Jacob dilexi, Esau autem odio habui.* Idemque docent pluribus in locis Augustinus, Prosper, & passim alii Patres cum Angelico qu. 23. art. 4., & 5. ex illo ad Rom. 8. *Diligentibus Deum omnia cooperantur in bonum iis, qui secundum præpositum vocati sunt sancti;* ergo in præsentî Providentia Prædestinatio est in priori ad merita prævisa.

Confirm. quia prædestinatio est opus Misericordiæ, & liberalitatis Divinæ, cum dicitur ad Rom. 9. *Non est volentis, neque currentis, sed misentis Dei;* atqui si esset in posteriori ad merita prævisa, esset opus Justitiæ: ergo prius.

Resp. Scripturas, & Patres, ubi videntur favere sententiæ oppositæ, loqui de Prædestinatione radicali, seu de voluntate conferendi sœnem Gratiarum finaliter efficaciam, ad quam consequitur Gloria ut corona: hæc enim Prædestinatio procul dubio non est ex meritis, sed ex liberalitate Divina. In textibus a nobis adductis sermo est de Prædestinatione formali, seu de decreto dandi Gloriam ut mercedem meritum; hæc enim prædestinatio supponit merita, atque adeo est post merita absolute prævisa. Adde, sæpe Scripturas, & Patres, dum dicunt Electionem, & vocationem non esse ex operibus, intelligere de operibus

naturalibus. Denique Cornelius, & alii probabiliter putant; Esau odio habitum a Deo esse saluum; nam ubi dicitur, *Jacob dilexi, Esau odio habui*, intelligendum est de dilectione, quæ Jacob non in se, sed in sua Posteritate prælatas est Posteris Esau in ordine ad bona temporalia, & ad quædam bona spiritalia, puta Sacerdotii, ac Messie ex iis orti, &c.

Ad confirmationem dico, Prædestinationem radicalem esse opus Misericordiæ; formalem vero esse opus Justitiæ Divinæ. Sicut si Rex promitteret bravium certantibus, promissio hæc radicaliter est opus liberalitatis; collatio vero bravii post pugnam est debita ex Justitia, & ideo formaliter est opus Justitiæ; ita Prædestinatio in radice est opus Dei misentis, at formaliter post merita est debita ex Justitia, juxta illud ad Timoth. 4. *Reposita est mihi corona Justitiæ.* Hinc fit, independenter a meritis haberi electionem radicalem ad Gloriam, quæ tamen danda est dependenter a meritis.

IX. Objic. 2. ex Scoto apud Amic., & ex Goneto disp. 2. art. 1. §. 7. fundamentum oppositæ sententiæ: *Voluntas finis præcedit voluntatem mediorum;* ergo voluntas dandi Gloriam electis præcedit voluntatem dandi merita, quæ sunt media ad Gloriam assequendam; atque adeo Prædestinatio non est post, sed ante merita absolute prævisa. Antecedens probatur, quia ordinate volens prius vult finem, quam media; quandoquidem intentio efficacis finis causat efficacem voluntatem mediorum, & intentio finis inefficax causat voluntatem mediorum inefficacem.

Resp. 1. cum Platelio n. 213. argumentum probare nimis; quod scilicet neque in alia Providentia dari possit Prædestinatio post prævisionem meritum, cum Deus nunquam possit aliquid velle inordinare; quod tamen Adversarii non contendunt.

Resp. 2. cum Amico dist. antec. Voluntas finis inefficax præcedit voluntatem mediorum, ômitto; voluntas finis efficacis, subdistinguo; si media sint ponenda unice ab ipso intendente finem, pariter transmitto; si media sint ponenda etiam ab alio libere operante, ut in casu nostro, nego antecedens, & consequens. Ad probationem pariter dico, quod ordinate volens prius inefficaciter velit finem, quam media, non vero efficaciter, quando media sunt aliquoties ab alio ponenda. In casu autem nostro media ad affectionem Gloriæ ut coronæ sunt merita, quæ non sunt ponenda a so-

lo Deo, nec a sola Creatura libera, sed ab utroque, ita tamen, ut principalius sint a Deo, juxta illud Apostoli: *Non ego, sed Gratia Dei mecum*; & ideo Deus volens inefficaciter salutem omnium, ut prædestinet aliquos ad Gloriam ut coronam, vult connaturalius Gloriam conferre in posteriori ad meritum prævisionem.

Resp. 3. cum Mauro qu. 67. nu. 22. distinguo antecedens: Voluntas finis præcedit voluntatem mediorum in Agente intellectivo creato, qui debet succellione attingere ordinem mediorum ad finem, concedo; in Agente intellectivo Increato, qui comprehendit simul finem, & ordinem mediorum ad finem, nego antecedens, & consequentiam. In tantum Agens creatum prius vult finem, quia per cognitionem, qua dirigitur ad intendendum finem, non sufficienter dirigitur ad eligenda media; aliter simul omnia decerneret; ergo Deus comprehendens omnia debet simul finem, & media decernere; & quia finis in casu nostro, nempe gloria, intenditur ut corona, ideo decernitur post merita absolute prævisa, cum non possit dari præmium præcise propter meritum conditionatum.

ARTICULUS II

De Reprobatione.

X. **R**eprobatio definitur, *Præscientia, & preparatio damnationis quorundam*; & importat in Deo voluntatem permittendi peccatum, & puniendi in æternum propter illud. Verum sicuti distinguimus duplicem prædestinationem, alteram radicalem, quæ consistit in voluntate dandi seriem auxiliorum finaliter efficacium; alteram formalem, quæ consistit in voluntate dandi Gloriam; illamque diximus esse opus Misericordiarum, & haberi ante merita prævisa; istam vero esse opus Iustitiarum, & fieri post merita absolute prævisa posterioritate tamen rationis, & per æquivalentiam: Ita duplex pariter distinguenda est Reprobatio, altera negativa, quam Scotus vocat præcivism, quæ aliquatenus responderet prædestinationi radicali, & consistit in Divina voluntate dandi Judæ v. gr. seriem auxiliorum finaliter inefficacium, animo tamen sincero, ut ad salutem conducant; & hujusmodi Reprobatio est independens a demeritis: etenim Deus non teneretur dare ulli auxilia prævisa efficacia; sed revere beneficium est, si solum conferat sufficien-

Part. I.

tiam ad bene operandum animo sincero; ut sequatur bona operatio: licet magis beneficium esset, si conferret auxilia efficacia. In hoc sensu dicitur ad Rom. 9. *Cui vult, miseretur, & quem vult, indurat*. Explicat autem Augustinus modum hunc indurandi dicendo: *Non quidem adiuvando, sed deservendo, non imperiando malitiam, sed non imperiando misericordiam*. Alia vero dicitur Reprobatio positiva, quæ a Scoto vocatur Punitive, & respondet Prædestinationi formalis, unde consistit in voluntate dandi Judæ penam æternam propter ejus demerita.

XI. Hæc positiva Reprobatio ex parte objecti neque est ante, neque post demerita absolute prævisa, posita unicatè Divini decreti, ut patet. Verum sicut Prædestinationis formalis in præsentis Providentia est in posteriori signo rationis ad merita absolute prævisa, ut ostendimus; ita Reprobatio positiva est in posteriori ad demerita; unde vera sit hæc causalis: Ideo Deus decernit penam æternam, quia videt per scientiam visionis demerita in decreto istorum permissivo, & non e contra; ut constat ex illo Matth. 15. *Ita maledicti in ignem æternum, esurivi enim, & non dedistis mihi manducare*. Immo ut notat Platel. nu. 208. licet nonnulli doceant, Prædestinationem formalem esse in præsentis providentia, aut saltem possibilem esse in alia Providentia, in priori ad prævisionem meritum; vix tamen est reperire aliquem ex Catholicis, qui doceat, Reprobationem positivam esse in priori ad demerita. Et Arriag. disp. 39. de Deo n. 8. dicit, Probabilius id repugnare, quia videretur Deus directe, & primario penam æternam intendere, & in ordine ad illam peccatum permittere: sicuti si prædestinaret in priori ad merita, directe, & primario intenderet Gloriam ut coronam, & in ordine ad illam conferret auxilia efficacia. Hinc August. lib. 3. contra Julian. habet: *Bonus est Deus, justus est Deus, potest sine bonis meritis liberare, quia bonus est, non potest sine malis meritis damnare, quia justus est*.

In hoc autem differt Prædestinatio radicalis a Reprobatione negativa, seu præcivism, quod illa ex duplici capite sit benefica Electis; tum quia confert illis sufficientiam ad salutem; tum etiam, quia confert animo specialiter benevolo auxilia prævisa efficacia: at Reprobatio negativa cum importet collationem auxiliorum finaliter inefficacium, quatenus ex culpa voluntatis non conjunguntur cum bona operatione.

H 3 cit.

est Reprobis benefica solum in quantum confert illis sufficientiam ad salutem; non secus ac voluntas conferendi Gratiā sufficientem est voluntas benefica. Sicut enim Author Naturæ est beneficus dando nobis oculos, licet aliquis claudendo palpebras nolit eis uti ad videndum; ita Deus in ordine supernaturali est beneficus conferendo Gratiā sufficientem, ac feriem Gratiarum finaliter inefficacium, licet ex culpa voluntatis non conjugantur cum bona operatione. Sic etiam ingens est beneficium relate ad omnes Verbi Incarnatio, Eucharistiæ institutio, &c. quamvis Christus Dominus positus sit in ruinam multorum, & Eucharistiæ, quæ Vita est bonis, mors sit malis; cum huiusmodi pravi effectus unice ex nostra culpa orientur.

XII. Ex quibus innoteſcit, quod hic anxie quari solet, Quomodo scilicet Reprobatio negativa cohxreat in Deo cum voluntate salvandi omnes; & quomodo non inferat in voluntate Divina amorem peccati, nec amorem gehennæ antecederet? Dicendum enim, quod Deus gratias finaliter inefficaces conferat animo sincero, & non illusorio, ut ponatur actus bonus, & salus obtineatur; atque adeo confert auxilia inefficacia non qua inefficacia, sed eo animo, ut si præviderentur efficacia, libentius ea ipsa daret, & abstineret a positiva Reprobatione. Propterea Deus non intendit, sed solum permittit, seu non impedit peccatum cum Gratiā sufficienti ex culpa voluntatis conjugendum, eo quod non teneatur illud impedire (aliter non posset Creaturas liberas condere, nec Iulitiam puniendo, aut misericordiam parcendo exercere) Unde bene intelligitur, quod conferendo Gratias finaliter inefficaces, quantum est ex se, sit beneficus erga Reprobos, intendatque serio eorum salutem, & quod solum consequenter ad eorum culpam velit eos punire.

Neque obſtat, quod mallet Judas v. gr. carere auxiliis supernaturalibus finaliter inefficacibus, quam iis donari, juxta illud Matth. 26. *Bonum erat ei, si natus non fuisset homo ille.* Nam in serie auxiliorum finaliter inefficacium, (sicut in Gratiā pice sufficienti) tria possunt considerari, & quod conferunt a Deo, scilicet auxilium; & quod ponitur a voluntate, scilicet culpa; & complexum ex utroque. Si spectetur primum, insipienter quis recusaret tam ingens donum; si spectetur secundum, certe illud non est Dei beneficium, & quilibet

bet sapientissime mallet non esse; immo quodvis aliud malum subiret, quam culpam; si demum spectetur complexum indivisibiliter sumptum auxilii, & culpæ, quilibet prudenter mallet eo carere, non quidem ob priorem complexi partem, sed ob posteriorem; quis enim non præligat quovis bono etiam æterno carere, si illud cum propria culpa conjugendum esset?

XIII. Hinc fit, Causam Reprobationis negativæ jam explicatæ esse unice Divinam voluntatem, proculdubio Reprobis beneficam, & benevolam; dicitur enim Ezech. 33. *Nolo mortem Peccatoris, sed magis ut convertatur, & vivat;* causam vero Reprobationis positivæ, seu causam, cur Deus velit Reprobis penam æternam infligere, esse propriam Reproborum voluntatem libere ad culpam se determinantium, cum Deus non nisi consequenter ad culpam velit eos punire; siquidem ut loquitur Tertullianus, *De suo est misericors, de nostro justus.*

Neque dicas, quod Deus prævidens, ad hanc seriem Gratiarum finaliter inefficacium consequi culpam, & gehennam, volendo seriem illam Gratiarum, velit in radice gehennam; unde Deus sit causa Reprobationis non solum negativæ, sed etiam positivæ. Nam sicut Deus non vult in radice culpam, quam prævidet, & permittit; ita non vult in radice gehennam; cum illam solum velit consequenter ad culpam, quod docuit Angelicus hic qu. 6. art. 6. dicens: *Deus antecedenter vult, omnes Homines salvos fieri, sed consequenter vult, quosdam damnari secundum exigentiam suæ Justitiæ.*

ARTICULUS III.

An permissio peccati possit esse effectus Prædestinationis?

XIV. **D**Uo requiruntur, ut possit aliquid dici effectus Prædestinationis. Primum est, quod sit effectus Dei; cum enim Prædestinatio sit actus Divine mentis, & voluntatis, effectus prædestinationis debet esse effectus talis actus, atque adeo effectus Dei; propterea peccatum, quod non potest esse Dei effectus, nec potest esse effectus prædestinationis. Alterum est, quod aliquatenus ad salutem conducat, & simul ca intentione ponatur, ut conducat; aliter si posset tantum conducere ad salutem, & de facto non conducere, non esset effectus illius peculiaris voluntatis.

suntatis, qua Deus diligit Elektos præ Reprobis; cum etiam Reprobis det dona supernaturalia, quæ possint ad salutem conducere. Hinc Incarnatio, Redemptio, Sacramenta, bona supernaturalia, & naturalia non dicuntur esse effectus Prædestinationis, nisi prout applicata Prædestinato, ita ut actu ad ejus salutem conducant saltem remote, ac dispositivè, seu occasionaliter, & indirectè; sicut remote aliquando conducunt bona temporalia, & occasionaliter aliquando peccatum ipsum præteritum ad salutem æternam confert.

Pariformiter discurrendum de effectibus Reprobationis. Cum enim etiam Reprobatio sit actus Divinæ mentis, & voluntatis, sequitur, quod etiam effectus Reprobationis debeat esse Dei effectus, & ad damnationem actu conducere. Unde fit, quod licet merita sint effectus Prædestinationis, cum sint Dei effectus, demerita tamen, seu peccata, cum non sint Dei effectus, non possint esse effectus Reprobationis. Similiter bona temporalia, vel etiam spiritalia, quibus homo abutitur, non sunt effectus reprobationis, quia quamvis sint Dei effectus, non dantur tamen ea intentione, ut iis homo abutatur, & ad damnationem conducant. Primarius autem effectus Reprobationis positivæ, seu Punitivæ est damnatio; non secus ac primarius effectus Prædestinationis formalis est salus æterna. Effectus vero Reprobationis præcisivæ, seu negativæ est series gratiarum finaliter inefficacium; seu negatio Beneficiorum, quibus Reprobi certissime salvarentur, & ex quorum subtractione ex propria culpa damnantur: Sicut effectus Prædestinationis radicalis est series causarum finaliter efficacium, seu collatio beneficiorum, quibus Prædestinati certissime liberantur. Tunc autem permissio peccati est effectus Reprobationis, quando in penam peccati antecedentis permittitur subsequens, unde oritur series gratiarum finaliter inefficacium. Quod si permittitur unum peccatum, post quod homo damnetur, hujusmodi permissio est ipsa voluntas Dei reprobativa negative, non vero effectus Reprobationis.

XV. Dubitatur nunc, An permissio peccati possit esse effectus Prædestinationis, adeo ut non solum ad salutem occasionaliter conducat, sed etiam ea intentione a Deo permittatur peccatum, ut conducat; quatenus scilicet sepe homines per peccatum fiunt humiliores, & sanctiores; unde ad Rom. 8. dicitur: *Diligentibus Deum omnia cooperantur in bonum*; ubi Glossa addit, *Etiam peccata*. Et Aug. lib. de corr. & grat. cap. 9. ait: *Usque adeo diligentibus Deum omnia cooperantur in bonum, ut etiam si aliqui eorum deviant, & exorbiunt, etiam hoc ipsum faciat eis proficere in bonum, quia humiliores redeunt, atque doctiores*. Valsq. disp. 93. Arrubal, & alii negant, posse esse effectum Prædestinationis peccati permissionem; quia non videtur hæc posse intendi ut utilis ad humiliationem, & salutem, nisi intendatur a Deo ipsum peccatum, ratione cujus permissio peccati est utilis.

Communiter tamen Thomistæ cum Suar. lib. 3. cap. 8. Gran. Tann. affirmant, putantes, postea ad Deo permissionem peccati intendi ut utilem ad salutem, quin intendatur ipsum peccatum, sed præcisè per hoc, quod præcognoscatur peccatum ponendum esse a Creatura: Ad cum modum quo juxta sententiam, quam propugnabimus, Deo dante, in de Incarnatione, potest Deus ante scientiam visionis de peccato absolute futuro intendere Incarnationem ut redemptivam, atque adeo ut præsupponentem essentialiter peccatum, abique ullo amore peccati, præcisè per hoc quod præcognoscat per scientiam mediam, peccatum ponendum esse a Creatura, si confertur ei tale auxilium inefficax animo sincero, ut conjungatur cum bona operatione; quandoquidem peccatum non habet rationem medii conducentis ad finem præintantum Incarnationis redemptivæ, sed habet rationem requisiti, seu potius materiæ per Incarnationem destruentæ; ut proinde non debeat amari ab intendente finem, nec debeat ab eo poni, sed satis fit, quod præcognoscatur ponendum a Creatura.

XVI. Dico equidem cum hac secunda sententia, Permissionem peccati posse esse effectum Prædestinationis in sensu explicato.

Prob. tum auctoritate D. Augustini loco laudato, & aliorum Patrum passim doctum, Deum sepe permittere peccatum, ut sit contra Superbiam conturbatio illa medicinalis, juxta phrasim ejusdem Augustini: Tum etiam ratione, quia permissio peccati, cum sit ipsa Dei voluntas conferens auxilium inefficax, est bona, & est sepe utilis ad salutem, quatenus peccatum, quod non impeditur a Deo, est occasio humilitatis, & penitentiae: unde Augustinus lib. 14. de civit. cap. 13. habet: *Audeo dicere: superbis utile est cadere in aliquod apertum, manifestumque peccatum, ut*

Abi displicent: ergo potest permissio peccati esse effectus Prædestinationis. Probat per consequentiam, quia ad hoc ut aliquid sit effectus Prædestinationis, solum requiritur, quod sit a Deo, quod conducatur ad salutem, & quod eo animo ponatur, ut conducatur; atqui permissio peccati non solum est a Deo, & sæpe occasionaliter ad salutem conducitur, sed etiam potest a Deo intendi ut utilis ad salutem citra amorem peccati; cum possit Deus amare utilitatem ad salutem ortam ex peccato, quin amet ipsum peccatum, sed præcisè prævidendo, quod peccatum sit ponendum a Creatura; ergo potest permissio peccati esse effectus Prædestinationis.

Adde ex Suariorum l. c. quod licet Deus non possit permittere peccatum ob finem v. gr. penitentiae essentialiter præsupponentis peccatum, saltem potest illud permittere ob finem humiliationis, aut alterius actus non præsupponentis necessario peccatum; in quo casu permissio peccati est effectus prædestinationis ex hoc, quod per illam intendatur actus virtutis, qui occasionaliter ponuntur post peccatum, quamvis possent aliunde a Prædestinato poni.

XVII. Objic. 1. Deus non potest intendere bonum, quod potest ex peccato provenire, nisi præsupposita præscientia peccati ut futuri, ut advertit Augustinus in Genesim ad literam; Sed voluntas permittere peccatum in bonum prædestinati antecedit præscientiam peccati ut futuri; ergo non potest Deus permittere peccatum ut conducens ad gloriam prædestinati; atque adeo non potest permissio peccati esse effectus Prædestinationis. Minor patet, quia permissio peccati trahit peccatum, & ejus præscientiam; ergo antecedit præscientiam peccati ut futuri.

Resp. Augustinum, teste Suario, solum velle, quod ad permissionem peccati præsupponatur præscientia peccati ut futuri conditionate, non ut futuri absolute. Idque ex eo constat, quia Augustinus ibi inquit, cur Deus voluerit creare Angelos, quos præciebat peccaturos? Hæc autem quaestio esset inepta, ut patet, si præsupponeretur in Deo præscientia peccati ut futuri absolute, & non tantum conditionate. In forma distinguo majorem: nisi præsupposita præscientia ut futuri conditionate, concedo, ut futuri absolute, nego majorem, & distinguo pariter minorem, nego consequentiam. Ad probationem minoris dico, permissionem peccati præsupponere

scientiam mediam de peccato conditionate futuro, & trahere scientiam visionis de peccato absolute futuro.

XVIII. Objic. 2. ex Vasquio. Permissio peccati non est gratia per Christum; non enim est homini bona, sed mala; Christus autem nobis promeruit tantum bona; ergo permissio peccati non est effectus Prædestinationis, quippe quæ per Christum nobis conferuntur.

Resp. cum Arr. n. 16. & Platelio nu. 197. quod permissio peccati secundum se non sit homini bona, ut nec est bona mors; verum sicut mors potest esse homini bona, & esse gratia per Christum, quatenus causat salutem æternam, & subest Divinæ ordinationi illam ad salutem ordinanti, juxta illud Sap. 4. *Raptus est, ne malitia mutaret intellectum ejus*; ita permissio peccati potest sub eadem ratione esse homini bona, & habere rationem specialis beneficii per Christum, quatenus scilicet conducit ad salutem per actus humilitatis, aut penitentiae consequentes; unde potest sub hac ratione a Deo intendi, & esse effectus Prædestinationis.

XIX. Objic. 3. Permissio peccati, seu voluntas conferendi auxilium prævisum inefficax, in tantum posset esse effectus Prædestinationis, in quantum posset a Deo poni ut utilis ad salutem prædestinati citra amorem peccati; sed hoc est impossibile; ergo non potest permissio peccati esse effectus Prædestinationis. Prob. minor, in tantum enim permissio peccati est utilis ad humiliationem, & salutem prædestinati, in quantum trahit peccatum; ergo est utilis ratione peccati; ergo si ametur utilis, amatur id per quod est utilis, nempe peccatum, atque adeo nequit poni utilis sine amore peccati.

Confirm. quia si posset poni a Deo permissio peccati ut utilis ad salutem prædestinati, possemus nos etiam illam a Deo petere, ut ponatur; sed nos non possumus petere a Deo, ut permittrat peccatum sine amore peccati; ergo nec potest a Deo poni permissio peccati citra amorem peccati.

Resp. argumentum probare nimis, videlicet, quod nec possit Deus permittere peccatum ad manifestandam gloriam suam, & Justitiam suam, quod nemo dixerit; in tantum enim potest Deus permittere peccatum ad manifestandam justitiam suam, in quantum est utilis ad talem finem; Sed est utilis in quantum trahit peccatum; ergo deberet juxta ratiocinationem Adversarium

rum amare peccatum. In forma nego minorem. Ad probationem: concessa antecedente, & prima consequentia, nego secundam. Potest enim permissio peccati esse utilis ratione peccati ut prærequisiti, & occasionaliter tantum conducentis ad salutem; non ut mediæ causantis, & præcontingentis ullo pacto bonum salutis; ac proinde non debet amari, sed satis est, quod prævidetur illud ponendum esse a creatura. Universum enim amans finem efficaciter, licet teneatur amare media necessaria ad talem finem, ac teneatur etiam ipse ponere prærequisita ad illum, nisi ea ponantur ab alio; at quando videt hæc esse ab alio ponenda, non tenetur ipse ponere, nec amare illa. Sic quia ad Martyrium obtinendum prærequiritur peccatum Tyranni, & est medium prædicatio Evangelii; ideo qui vult efficere Martyrium obtinere, debet quidem velle prædicare Evangelium Barbaris, at non debet velle peccatum Tyranni; sed satis est, quod prævideat, huiusmodi peccatum ponendum esse a Tyranno; quod si hoc non prævideret, & vellet Martyrium absolute, & non conditionate, procul dubio peccaret, quia teneretur ipse inducere Tyrannum ad tale peccatum, ut posset obtinere martyrium efficaciter intentum. Sic etiam Deus volens efficaciter Incarnationem ut redemptivam, non debuit decernere Adamo auxilium inefficax cum amore peccati redimendi, sed sufficit, quod præviderit, peccatum esse ponendum ab Adam, ut potuerit velle collationem auxilii inefficacis ob finem Incarnationis redemptivæ, ut dicemus in loco.

Ad confirmationem: Sicut Deus ut causa prima potest licite peccatum permittere, seu non impedire (aliter non posset condere Creaturam liberam) quin tamen ego licite possum non impedire peccatum proximi, quando possum commodè: ita potest Deus ut causa prima permittere peccatum, & velle hanc permissionem ut utilem prædestinato, quin possum ego licite illam petere a Deo absolute; sed solum possum a Deo conditionate petere, quod si Petrus peccet, peccatum illi prodest ad humiliationem, & ad salutem.

XX. Adde, quod posset Deus sine ullo amore peccati intendere permissionem peccati ut conducentem ad salutem Prædestinati, intendendo hanc conducentiam conditionate, dicendo: Volo conferre auxilium A Petro eo animo, ut si fuerit efficax, prodest illi ad salutem ejus bona operatio; sin fuerit inefficax, prodest illi peccatum ad

humiliationem, & sic etiam ad salutem; Vel dicendo hoc alio pacto, Confero Petro auxilium A, ut fiat actus bonus, quia tamen prævideo, quod ex culpa Petri auxilium erit inefficax, & conjungatur cum peccato, & simul prævideo, quod deinde ille peccati memor magis humiliabitur, ideo do tale auxilium, ut saltem inde prodeat hæc major humiliatio confers ad salutem Petri; in hoc autem affectu nullus apparet amor peccati; ergo saltem poterit juxta has vias permissio peccati esse effectus Prædestinationis.

DISPUTATIO V.

De Deo Trino.

Arcanum aggredimur, de quo hæc habet Augustinus lib. 1. de Trinit. c. 3. *Nec periculosius alicubi erratur, nec laboriosius aliquid queritur, nec fructuosius aliquid invenitur.* Multifariam in eo errant Hæretici. Sabellius dixit, ratione tantum Personas inter se distinguui, ac propterea etiam Patrem, ac Spiritum Sanctum esse incarnatos, & passos fuisse; unde Sabelliani dicti sunt Patripassiani. Arius dixit, solum Patrem esse Deum. Macedonius negavit Spiritui Sancto divinitatem. Trichiteæ dixerunt, tres Personas esse tres Deos. Græci schismatici negant, Spiritum Sanctum a Filio procedere. Contra hos errores in Concilio Lateran. sub Innoc. III. definitum est, Tres esse Personas Divinas, unam vero Divinitatem; ita ut alius sit Pater, alius Filius, alius Spiritus Sanctus; non tamen aliud, sed eadem res, quæ non generat, nec gignitur, nec procedit, licet Pater generet, Filius gignatur, & Spiritus ab utroque procedat.

Huiusmodi Mysterium non videtur naturali lumine evidenter cognoscibile, aut demonstrabile; quod Suarez putat esse de fide. Matth. 11. dicitur: *Nemo novit Filium, nisi Pater, neque Patrem quis novit, nisi Filius, & cui voluerit Filius revelare.* Et ratio est, quia in tantum potest ratione naturali demonstrari existentia unius Dei, in quantum Creaturæ propter essentialem dependentiam a Deo ad ejus cognitionem manuducunt; sed non manuducunt ad cognitionem Trinitatis; cum non connectantur cum Deo, quatenus Trino; ergo nequit evidenter hoc Mysterium naturali lumine demonstrari.

Hinc dicitur esse non quidem contra, sed supra rationem naturalem; Nequit enim

nim esse contra rationem; cum vero non possit esse contrarium vero; unde hoc Mysterium non opponitur ulli principio naturali lumine noto, ne huic quidem principio, Quæ sunt eadem uni tertio, sunt idem inter se; Nam principium hoc intelligendum est de iis, quæ sunt eadem uni tertio tum realiter, tum virtualiter. Quod si nolis admittere distinctionem virtualem inter Naturam, & Personalitates, dicas, illud intelligendum esse de iis, quæ sunt eadem uni tertio adæquate; sicut enim anima, & corpus possunt identificari cum Homine inadæquate, & tamen realiter inter se distingui; ita potest Pater, & Filius, esse idem cum Natura Divina, & tamen inter se realiter distingui; quia pariter Pater, & Filius identificantur cum Natura Divina, sed non adæquate, quatenus Pater non identificatur realiter cum omni eo, quod est natura Divina, puta cum Filio; siquidem una Persona realiter distinguitur ab altera (licet non distinctione pura, sicut Anima distinguitur a corpore), sed distinctione non pura admittente realem identitatem; identificatur enim Personæ cum Natura Divina. Hinc fit, quod in hoc Mysterio fit in speciem tantum expositivus huiusmodi syllogismus: Hic Deus est Pater; hic Deus est Filius; ergo Filius est Pater, re tamen vera sit vitiosus, & non concludat defectu distributionis requisitæ; non enim est verum, quod quicquid est Deus fit Pater. Sic nec concludit huiusmodi syllogismus; Hic Homo est Anima; hic Homo est corpus; ergo corpus est Anima; quia non est verum, quod quicquid est hic homo sit Anima. Præcipuas de hoc Mysterio questiones pro angustis temporis breviter perstringemus.

Q U Æ S T I O . I.

De vocabulis huius Mysterii propriis.

Cum in sublimitate tanti Mysterii acies ingenii obtundatur, nec facile suppetant verba, quæ illud ad vivum expriment, idcirco ad errores vetandos præmittenda est notitia quorundam terminorum, qui passim hic usurpantur.

Primo quidem consideranda sunt in hoc Mysterio prædicata Essentialia, & notionalia. Essentialia pertinent ad Naturam, æque adeo sunt communia tribus; Notio-

nalìa pertinent ad Personas, & sunt ea, ex quibus distinctionem Personarum agnoscimus, unde non sunt omnibus communia; Definuntur quippe Notio ex August. 5. de Trinit. 6. quod fit *Ratio notificans Personam*. Quinque sunt in Deo prædicata notionalia, scilicet *Innascibilitas*, & *Paternitas*, quæ soli Patri competunt; *Filiatio*, seu *Generatio passiva*, quod soli Filio; *Spiratio activa*, quod Patri simul, & Filio; denique *Spiratio passiva*, quod uni Spiritui Sancto competit. Prædicatum Notionale superadditum prædicato essentiali, seu absoluto, istud contrahit, unde non prædicatur de tribus: sic intelligere notionale uni Patri competit generanti Filium. In tantum autem in Patre præter Paternitatem datur specialis notio, scilicet *Innascibilitas*, quin detur in Filio consimilis Notio, quæ dicatur *Inspirabilitas*, nec in Spiritu Sancto *Inspirativitas*, aut Ingenerativitas, quia Notio, ut notat D. Tho., importat specialem aliquam excellentiam in Persona, quam constituit; Innascibilitas autem, seu Improducibilitas ex suo conceptu importat perfectionem specialem, quæ non relucet in Inspirabilitate, aut Inspirativitate, vel Ingenerativitate, & ideo solum in Patre datur Notio Innascibilitatis.

Secundo dantur in hoc Mysterio Relationes, per quas una Persona ordinatur ad alteram. Iste autem sunt quatuor, scilicet Paternitas, Filiatio, Spiratio activa, & Spiratio passiva. Tres tamen ex istis realiter distinguuntur, & dicuntur Proprietates, quatenus unius tantum Personæ sunt propriæ; etenim spiratio activa omnino identificatur cum Paternitate, & Filiatione; siquidem nullam dicit cum illis oppositionem, & in Divinis omnia sunt unum, ubi nulla obviat Relationis oppositio.

Hinc fit 1. Notionem magis late patere, quam Relationem, cum Innascibilitas fit Notio, & non fit Relatio. Fit secundo, Relationem magis late patere, quam proprietatem, quia Spiratio activa est Relatio, & non est Proprietas stricte dicta; Immo est Relatio omnimode identificata cum Paternitate, & Filiatione, ut communiter docent contra Durandum.

II. Tercio. Dux dantur Personæ spirantes adjective, sed unus datur spirator substantive; quia una est in utraque Persona spirante substantia. Ad eum modum, quo tres sunt creatores Mundum, sed unus est Creator, quia una trium est substantia, &

& Divinitas; unde pariter dicimus, duas esse Personas productas, sed unum esse producentem Spiritum Sanctum. Ratio est, quia adjectiva multiplicantur per multiplicationem suppositorum; unde tria sunt alba, si una albedo sit in tribus suppositis; substantiva vero multiplicantur per multiplicationem formæ substantialis; unde non dantur tres Homines, si una Anima sit in tribus corporibus. Hinc tres sunt Personæ Divinæ, quia tria sunt supposita, unus vero est Deus, quia una est Divinitas. Propterea temeraria, & periculosa censetur a Ruiz disp. 70. locutio Durandi dicentis, Patrem, & Filium esse duo principia Spiritus Sancti; sicut enim unicuique est principium creans Mundum, ita unicuique est principium spirans Spiritum Sanctum.

Quarto dantur etiam Origines activæ, & passivæ. Generatio, quatenus respicit Patrem, qui est actuale principium Filii, dicitur origo activæ, & quatenus respicit Filium, dicitur origo passivæ; quæ etiam dicitur Nativitas. Sic Spiritio quatenus respicit Patrem, & Filium, qui sunt principium Spiritus Sancti, dicitur origo activæ; & quatenus respicit Spiritum Sanctum, dicitur origo passivæ.

Quinto datur etiam Hypostasis, quæ nunc ex usu Conciliorum, & Patrum pro eodem usurpatur, ac Persona, & suppositum, licet olim ab Hieronymo, & aliis usurparetur pro substantia, ut notat Platel. n. 279.

III. Sexto. Verbum in Divinis est terminus productus a dicente, seu a loquente alteri, quem generando producit, & reddit intelligentem, communicando illi suam intelligentiam: unde Verbum Divinum est similis Verbo nostro vocali, per quod alteri communicamus conceptum nostrum, quam Verbo mentali, quo formaliter nos reddimus intelligentes; & sicut Verbum vocale non est immediate ab intellectu, sed ab ore, & in Angelis a potentia loquutiva ori respondente; ita Verbum Divinum non est immediate ab intellectu Divino essentiali, sed a notionali, seu a potentia generativa, quæ ori respondet, ut notat Lyranus in illud Eccles. 24. *Ego ex ore Altissimi prodivi.*

Septimo. Verbum, & Filius in Divinis sunt idem, sed non sunt synonyma; tum quia Verbum non solum importat relationem realem Producti a producente, præter importat Filius, sed etiam relationem rationis representantis ad objecta repræ-

sentata; tum etiam quia Filius dicit explicite originem Viventis a vivente in similitudinem Naturæ; Verbum vero dicit explicite ordinem procedentis a dicente. Ubi notandum, quod licet detur vocabulum speciale, quo significetur terminus productus ab intellectu notionali, scilicet verbum, non datur tamen vocabulum speciale, quo significetur terminus productus a voluntate notionali; unde Spiritus Sanctus vocatur Amor, qui est eternus communis tam actui dilectionis Divinæ essentiali, quam termino productus per dilectionem notionalem a Patre, & Filio: Nihilominus ut exprimat Spiritus Sanctus, appellari solet Amor productus, seu spiratus. Verbum tamen Divinum est per se subsistens, & substantiale dicenti, ac proinde non solum est id, quod Pater loquitur, seu loquendo producit; necnon id, quo loquitur, videlicet objecta per ipsum representata; sed est etiam id, cui Pater loquitur, seu cui Pater loquendo communicat cognitionem omnium sibi notorum. Hinc Pater loquitur Verbum, tanquam terminum locutione productum; loquitur etiam per Verbum, non quidem tanquam per os, seu per potentiam locutivam (hæc enim est proprietates relativæ Patris, quæ constituit principium formale proximum productionis Verbi) neque tanquam per locutionem activam; sed loquitur per Verbum tam sumptum inadequate pro ipsa generatione passiva, tanquam per passivam locutionem, quam sumptum inadequate pro essentia Divina communicata, tanquam per formale manifestativum: loquitur denique Pater ipsi Verbo, ut Personæ cui objecta manifestat.

Octavo. Una Persona ab alia procedit, & producitur, non tamen causatur, aut dependet; tum quia hoc importat imperfectionem; tum etiam quia causari dicitur, quod accipit esse contingens; ita ut alio indigeat; tum demum quia ex Philosopho 2. physic. causare est infundere esse in aliud, quod in Divinis haberi nequit. Nonnulli tamen cum Græcis, ut notat Petavius de Trinit. lib. 5. c. 5. usurpant in Divinis hoc nomen causare, & dependere, fumendo illud large pro procedere, produci, & emanare, demptis imperfectionibus; satis tamen est iis abstinere, cum in sensu proprio imperfectionem præferant.

IV. Nono. Processiones, seu productiones Divinæ habentur per intellectum, & voluntatem, non quidem essentielles, utpo-

re communes tribus, sed notionales, quibus dumtaxat competit *dicere*, & *spirare*. Platelius n. 236. docet, Processiones, seu actus notionales, scilicet Generationem, & Spirationem non includere actus essentialis intelligendi, & volendi, sed esse meras proprietates relativas. Illud certum est, quod principium totale producens non sit sola proprietas, seu Personalitas, sed Persona importans Naturam, & Personalitatem; & solum dubitatur, quodnam sit principium quo, seu virtus immediate productiva, quod infra discutiemus; sic etiam terminus totalis processionum, seu productionum est Persona, quicquid sit, an terminus formalis harum productionum sit Divina essentia, quæ non producitur, sed communicatur, an vero Personalitas, quæ producitur, in quo etiam DD. variant apud Ruiz disp. 98. sect. 6. Actio autem productiva Personarum identificatur cum ipsa virtute productiva, seu cum principio quo.

V. Dubitatur 1. Utrum in Deo præter tres subsistentias relativas detur etiam subsistentia absoluta propria Naturæ? Asserunt dari, qui nomine subsistentiæ volunt importari ultimam perfectionem in linea substantiæ non indigentem alia; hoc enim prædicatum competit Naturæ Divinæ, utpote cumulo omnium perfectionum. Negant vero, qui putant subsistentiam importare complementum substantiale reddens substantiam incommunicabilem alteri ut supposito. Hinc, ut notat Platelius, quæstio hæc plurimum habet de nomine.

VI. Dubitatur etiam, Utrum actus notionales, scilicet Generatio, & Spiratio ad diva dici debeant voluntarii, ac liberi, an potius necessarii, ac naturales? Ariani, & Eunomiani dixerunt, esse liberos libertate indifferentiæ. Plures Catholici dicunt, esse voluntarios, ac liberos libertate a coactione, seu a necessitate extrinseca, præsertim productionem Spiritus Sancti, quæ procedit a voluntate. ita Scotus in 1. dist. 10. Possunt tamen huiusmodi actus dici naturales, & necessarii juxta doctrinam Angelici 1. p. qu. 41. art. 2. quia Natura agit cum determinatione ad unam partem, voluntas vero cum indifferentia: cum autem huiusmodi actus non possint non dari, ideo videtur dicendi naturales, præsertim Generatio Verbi, quæ non procedit a voluntate; unde nec potest dici formaliter voluntaria, nedum libera; quavis Deus volens, & non coactus generet Filium; & in hoc tantum sensu voluntarie, hoc est

voluntate comitante, ut loquitur D. Tho: non voluntate præcedente, tamquam principio generandi ut quod.

VII. Dubitatur demum, An Personalitates ut præcisæ a Natura dici debeant entitates, & importent formaliter perfectionem? Quod non possint dici entia, est de Fide; cum non dentur in Deo tria entia. Docent tamen nonnulli, posse dici tres entitates, unitates, bonitates, veritates relativas; & Okam, Aureolus, Suar., Vasq. apud Maurum qu. 107. docent importare perfectionem non quidem absolutam, sed respectivam, atque adeo perfectionem simplicem, non simpliciter simplicem; quia non est melior perfectio relativa, quam absoluta, unde non est melior ipsa, quam non ipsa. Scotus tamen, Cajet., Capreol., Bellarminus, & alii apud Ruiz verius negant, esse perfectiones præcisæ secundum esse *Ad*, & quæ relationes sunt, licet realiter, & identice importent omnem perfectionem absolutam. Ratio est, quia aliter tota Trinitas esset perfectior singulis Personis; & cumulo omnium perfectionum incluso in Natura Divina posset alia perfectio superaddi, quod repugnat: Quamvis enim quilibet Persona includat reliquas per circuminfectionem, seu per identitatem cum Natura, juxta illud Joan. 10. *Pater in me est, & ego in Patre*: at formaliter una non includeret perfectionem alterius, & nulla illarum includeretur in Natura.

Neque dicas, quod perfectiones relativæ contineantur eminenter in absolutis, ut perfectiones Creaturarum in Deo; unde non superaddunt Deo perfectionem; sicut neque Deus cum creaturis est quid perfectius solo Deo. Nam contra est, quia perfectio, quæ nullam dicit in conceptu suo imperfectionem, debet in Deo contineri formaliter; perfectiones Creaturarum ideo in Deo continentur tantum eminenter, quia continentur demptis imperfectionibus, v. gr. dempta limitatione, quam habent in Creaturis; sed Relationes Divinæ nullam dicunt imperfectionem; ergo deberent in Natura Divina contineri formaliter. Præterquamquod, ut notat Gonetius, si darentur in Deo tres Bonitates, & tres perfectiones relativæ, Deus non esset unus bonus, sed tres boni, quod tamen est contra August. 5. de Trinit. 8. ubi habet: *Bonus Pater, bonus Filius, bonus Spiritus Sanctus, nec tres boni, sed unus bonus*.

Neque dicas 2. ex Philosopho, & D. Th. perfectum esse id, cui nihil deest in proprio

prio genere ; sed Personalitatibus Divinis nihil deest ; ergo imbibunt perfectionem . Nam , ut docet Augustinus apud eundem Gonetum , perfectum est , cui nihil deest in proprio genere dicente perfectionem , non vero in quocumque genere , aliter etiam peccatum esset perfectum , cum nihil deest illi in genere suo ; Personalitates autem in suo genere non dicunt secundum se perfectionem , ut ostendimus , & ideo non dicunt formaliter perfectionem , licet identice sint omnis perfectio .

QUÆSTIO II.

Utrum præter distinctionem realem non puram , quæ intercedit inter Personas , detur etiam distinctio virtualis inter Naturam , & Personalitates Divinas ?

I. **E**X Fide constat , inter Divinas Personas intercedere realem distinctionem non puram , hoc est mixtam identitatem ; dicitur enim 1. Joan. 5. *Tres sunt , qui testimonium dant in Cælo , Pater , Verbum , & Spiritus Sanctus , & hi tres unum sunt .* Et Joan. 10. dicit Christus : *Ego , & Pater unum sumus ;* Ubi August. tract. 26. in Joan. subdit : *Quod dicit unum , liberat te ab Ario ; quod dicit sumus , liberat te a Sabellio .* Ille enim negabat Divinitatem Filio , & Spiritui Sancto , atque adeo identitatem in Natura cum Patre ; Hic vero negabat distinctionem Personarum .

Difficultas nunc est , An præter hanc distinctionem realem , quam vocant eminentialem , detur alia distinctio objectiva inter Naturam , & Personalitates , vi cuius verificentur hæc prædicata contradictoria , quod Natura Patris communicetur Filio , non communicetur Paternitas ; sive hæc distinctio dicenda sit modalis , atque adeo aliquatenus realis , qualis intercedit inter rem , & modum , ut putat Durandus : sive formalis , seu ex natura rei , atque adeo actualis juxta sententiam Scotistarum ; sive solum virtualis , seu potentialis ad mentem Thomistarum ? Nominales cum Arimin. in 1. dist. 33. & plurimi Recentiores docent , omnia salvari per distinctionem realem eminentialem inter Personas , quam docet Fides ; quia sicuti non sunt prædicata contradictoria , Hominem esse similem imper-

fecte cum Equo , & simul esse imperfecte dissimilem , atque adeo posse concipi conceptu Animalis communi cum Equo , quin concipiatur conceptu rationalis cum eodem Equo communi ; ita supposita distinctione reali non pura , seu imperfecta inter Personas , nec sunt contradictoria , Patrem identificari imperfecte cum Filio , & ab eodem imperfecte distingui , atque adeo utrumque esse unum Deum , non unam Personam , ex quo putant , rejici posse distinctionem objectivam inter Naturam , & Personalitates .

II. Dico equidem 1. cum utraque Schola Thomistica , & Scotica , & quamplurimi Recentioribus , Arriag. disp. 4. sect. 4. Herrera , Mauro qu. 98. præter distinctionem eminentialem inter Personas Divinas admittendam esse distinctionem objectivam inter Naturam , & Personalitates .

Probatur : Quoties ex parte objecti verificantur prædicata contradictoria de aliquo entitate , ad declinandam contradictionem debet in ea dari aliqua distinctio objectiva ; sed de essentia Divina , & Personalitatibus verificantur ex parte objecti prædicata contradictoria ; ergo dari debet inter illas distinctio objectiva . Probatur minor . Primo , quia de facto Filiazio terminat unionem hypostaticam ; natura vero illam non terminat ; si vera sit sententia , quod unio terminatur ad solam Personalitatem ; in sententia vero communiori , quod unio hypostatica terminetur ad Personam Verbi , Natura Divina identificata cum Personalitate Verbi terminat unionem , quin illam terminet Paternitas ; ergo de Natura , & Personalitatibus verificantur contradictoria : sicuti si cognitio terminaretur ad Animal in Homine , & non ad rationale , in omnium sententia de Animalis , & rationali verificarentur prædicata contradictoria objectiva ; unde deberent ex parte objecti distingui . Præterea ab omnibus Theologis inquiritur , Utrum principium quo , productivum Verbi , & Spiritus Sancti sit Natura , an Personalitas , an utrumque ? hæc autem quæstio esset inepta , nisi ex parte objecti Natura , & Personalitas distinguerentur ; ergo de facto distinguuntur ex parte objecti .

Probatur ulterius eadem minor ; quia Natura Divina communicatur , seu identificatur cum Filiazione , Paternitas vero a Filiazione distinguitur : ergo Natura , & Paternitas verificant contradictoria .

III. Responso Adversariorum intercalaris est , contradictoria hæc non verificari , quia Natura communicatur Filio communi-

catione faciente unum Deum, & tres Personas, qua etiam communicatione Paternitas eidem Filio communicatur, & similiter Paternitas distinguitur a Filio distinctione faciente plures Personas, non plures Deos, qua etiam distinctione distinguitur Natura a Filio; unde de Natura, & Paternitate non verificatur predicata opposita: Sicut non verificantur contradictoria in Homine, per hoc, quod sit similis cum Equo similitudine imperfecta, & non sit similis similitudine perfecta.

Verum si attente advertatur, in hoc labyrintho verborum Adversarii occultant, non excludunt distinctionem objectivam inter Naturam, & Personalitates; Quod perspicuum sit, si paucis tota res explicetur. Idem est dicere, quod essentia communicetur Filio communicatione faciente unum Deum, non unam Personam, ac dicere, Pater communicatur Filio essentialiter, non personaliter; sed hoc importat essentiam Patris communicari Filio, non Paternitatem: ergo essentia Patris, & Paternitas verificantur contradictoria objectiva. Sicut enim si Petrus, & Paulus ex parte objecti identificarentur formaliter, & distinguerentur numerice, ita ut una esset forma, seu natura humana in utroque, & duplex hæcitas, tunc in omnium sententia deberet dari distinctio objectiva inter Naturam, & hæcitatem ad salvanda ista contradictoria, quod Natura utriusque sit una, & hæcitas non sit una; ita cum Pater, & Filius identificentur essentialiter, seu secundum essentiam, & distinguantur personaliter, dari debet distinctio objectiva inter essentiam Divinam, & Personalitates, ad salvanda ista contradictoria, quod Natura sit una, & Personalitas sit multiplex. Et eodem modo, quia in lacte v. gr. album, & dulce identificantur subjective, & distinguuntur formaliter, quatenus unum est subiectum, & duplex forma accidentalis albedinis, & dulcedinis; debet consequenter inter subiectum, & has formas dari distinctio objectiva ad salvandum, quod subiectum sit unum, & forma accidentalis non sit una, sed duplex.

Ratio a priori desumitur ex definitione contradictionis, quæ ex Philosopho 1. Elenchor. 3. est *Affirmatio, & negatio ejusdem de eodem, & relate ad idem*; atqui data omnimoda identitate inter Naturam, & Paternitatem, daretur affirmatio, & negatio ejusdem de eodem secundum idem; ergo daretur contradictio, Prob. min., quia

de Natura affirmaretur identitas cum Filiatione ex parte objecti; de Paternitate vero hæc identitas negaretur; Et rursus natura, & Paternitas essent omnino idem; ergo affirmatio, & negatio ejusdem de eodem, & secundum idem. Quod patet in paritatis adductis; daretur enim contradictio, si una esset Natura Petri, & Pauli ex parte objecti, hæcitas vero duplex; & inter Naturam, & Hæcitatem nulla daretur distinctio aut formalis, aut virtualis; idemque dicas, si lac esset unum, albedo, & dulcedo duplex, & inter lac, & has formas nulla daretur distinctio.

Confirm. 1. quia absolute, & sine addito, (hoc est nulla adhibita distinctione, quam Adversarii obtrudunt, ut veritas delitescat) potest dici, Essentia Patris est essentia Filii; contra vero nequit absolute, & sine addito dici: Personalitas Patris est Personalitas Filii: ergo de essentia, & Personalitate verificantur contradictoria.

Confirm. 2. quia si nullatenus distingueretur essentia a Paternitate, sequeretur, quod Pater, & Filius identificarentur non solum essentialiter, seu quoad essentiam, sed etiam personaliter; & viceversa non solum distinguerentur personaliter, sed etiam essentialiter. Probat sequela: Talis enim est distinctio, vel Identitas, qualia sunt extrema distinctionis, vel identitatis; adeo ut si extrema sint res, distinctio, vel identitas sit realis; si formalitates, sit formalis; si modalitates, sit modalis; si Personalitates, sit Personalis; atqui Pater, & Filius important essentiam identificatam cum Personalitate; ergo identitas inter illos est essentialis simul, & personalis; & viceversa distinctio est personalis simul, & essentialis.

Paritas ab Adversariis adducta de similitudine imperfecta retorquetur; Nam si Homo ex parte objecti esset similis cum Equo solum secundum Animalitatem, & non secundum rationalitatem, omnes docent, quod inter animalitatem, & rationalitatem deberet intercedere distinctio ex parte objecti; ergo cum de facto ex parte objecti Pater identificetur cum Filio solum secundum essentiam, & non secundum Personalitatem, debet ex parte objecti inter essentiam, & Personalitatem intercedere distinctio.

IV. Dico 2. Distinctio objectiva, quæ intercedit inter Naturam, & Personalitates Divinas, non est realis, nec modalis, nec

nec formalis, sed tantum virtualis intrinseca. Ita Thomistae, & communius Recentiores.

Probatur: quod non sit realis, est de Fide contra Gilbertum Porretanum apud D. Thom. quia in Deo daretur quaternitas rerum. Quod neque fit modalis, contra Durandum, patet, quia in Deo datur compositio realis; cum Modus realiter a subiecto distinguatur: unde haec sententia a Valentia, Molina, & aliis apud Godoy censetur erronea. Praeterea, quod neque sit formalis, seu actualis, & ex natura rei, contra Scotistas probatur, tum quia nulla datur necessitas hujus distinctionis actualis, quae fert actualem compositionem in Deo, repugnantem summæ simplicitati; tum etiam quia in hoc differt distinctio actualis Scotica a virtuali, seu potenciali Thomistica, quod per distinctionem actualem, seu formalem una formalitas obiective negatur de alia; contra vero per distinctionem virtualem potest tantum una virtualitas concipi, praescindendo obiective ab altera, licet utraque ex parte obiecti sit actu idem; unde distinctio virtualis excludit compositionem actualem; & solum admittit virtutem ad compositionem, & distinctionem; atqui summæ simplicitati Divinae repugnat actualis compositio, contra vero est necessaria æquivalentia ad compositionem, & distinctionem, ut ostendimus; ergo solum distinctio virtualis intrinseca intercedit inter Naturam, & Personalitates.

Confirmatur, quia distinctio formalis fert formalitates, & perfectiones, seu quidditates inter se actu distinctas; distinctio vero virtualis stat sine distinctione perfectionum ex parte obiecti; sed fert solum distinctionem prædicatorum, quorum alterum præscindat a perfectione, & imperfectione, eo quod dicat tantum existentiam passivam ad identificari cum cumulo omnium perfectionum; atqui distinctio ista virtualis bene cohaeret cum perfectione infinita Divina, quæ ratione fecunditatis, & libertatis illam exigit; scens vero distinctio formalis inter perfectiones. Et ratio ulterior est, quia ex duabus formalitatibus, seu perfectionibus Divinis vel alterutra esset infinita, & jam excurreret ad omnem omnino perfectionem; unde altera esset omnino superflua; vel utraque esset finita, & non posset complexum utriusque conflare perfectionem Divinam infinitam; nunquam enim finitum additum finito facit infinitum, atque adeo repugnat in Deo

distinctio formalis inter Naturam, & Personalitates.

V. Obijc. 1. contra primam conclusionem. Distinctio obiectiva summæ simplicitati Divinae obest; ergo non datur distinctio virtualis obiectiva inter Naturam, & Personalitates; sicut nec inter attributa.

Confirm. 1. In tantum hæc distinctio deberet dari, in quantum verificantur hæc contradictoria, quod essentia communicetur Filio, Paternitas vero, licet cum essentia identificata, non communicetur; sed hæc non sunt contradictoria; ergo non debet dari distinctio obiectiva. Probatur minor: sicut enim non sunt contradictoria, Animam esse unitam corpori unione substantiali, & non esse unitam unione accidentali; ita non sunt contradictoria, essentiam communicari Filio uno genere communicationis, quo scilicet habeatur unus Deus, non communicari vero alio genere communicationis, quo scilicet cum Patre fiat una Persona.

Confirm. 2. Si Paternitas, & essentia verificarent prædicata contradictoria, deberent distingui realiter: Universum enim contradictoria verificari non possunt sine distinctione reali; Quod si posset oppositio contradictoria, quæ ex Philosopho est omnium maxima, stare sine distinctione reali, a fortiori posset oppositio relativa; unde dici posset, quod Pater, & Filius non distinguantur realiter, sed solum virtualiter, licet opponantur relative.

Resp. non obesse summæ simplicitati Divinae distinctionem virtualem; sicuti non obest distinctio realis inter Personas; hæc enim est consona fecunditati Divinae; illa vero ab hac distinctione reali se jungi nequit; inter attributa tamen distinctio obiectiva non est necessaria.

Ad 1. confirmationem: Quamvis communicari uno genere communicationis, & non alio non sint contradictoria; at quando A, & B ita communicantur uno genere communicationis, & non alio, ut idcirco de utroque verificentur contradictoria obiectiva; tunc negari nequit inter A, & B distinctio ex parte obiecti. In casu nostro Natura, & Paternitas ita communicantur essentialiter, & non personaliter, ut idcirco de Natura verificetur identitas cum Filio, & de Paternitate distinctio. Rursus verificatur quod posuit Personalitas terminare unionem hypostaticam, quin terminet illam Naturam, aut viceversa: ergo negari nequit inter Personalitates, & naturam distinctio obiectiva.

Ad

Ad secundam nego sequelam. Possunt enim sine distinctione reali verificari contradictoria, ubi possibilis sit distinctio virtualis ferens consensum, seu convenientiam in omni perfectione, & disconvenientiam in aliquo predicato; quod uni Deo competere potest. Et ratio est, quia solus Deus per accessum novi predicati non est capax novæ perfectionis; unde ratione secunditatis, & libertatis potest realiter identificari cum predicatis oppositis.

Neque hinc sequitur, quod Pater, & Filius relative oppositi possint realiter identificari, & solum virtualiter distingui. Ratio est, quia relativa ex suo conceptu fuit ad alterum, atque adeo essentialiter important distinctionem realem; ubi enim datur alteritas, datur realis distinctio.

VI. Objic. 2. Si daretur distinctio virtualis inter essentiam, & Paternitatem, deberet rursus in ipsa Personalitate Patris dari nova distinctio virtualis inter prædicatum Paternitatis, & prædicatum incommunicabilitatis; quod tamen nemo admittit. Probat sequela. Ideo datur in primo casu distinctio virtualis, quia essentia communicatur Filio, non vero Paternitas; ergo quia relate ad Personalitatem Patris verificatur hæc alia contradictoria, quod Paternitas denominet essentiam Divinam Patrem, incommunicabilitas vero talis Personalitatis non denominet essentiam Divinam incommunicabilem, ideo in ipsa Personalitate Patris deberet intercedere distinctio virtualis inter prædicatum Paternitatis, & prædicatum Incommunicabilitatis.

Resp. nego sequelam: disparitas primo danda est ab Adversariis, qui solum agnoscunt distinctionem eminentialem, seu realem non puram inter Personas, non vero inter prædicata Paternitatis, & incommunicabilitatis, quæ competunt Patri. Directe dico, ideo dari inter Naturam, & Personalitates distinctionem virtualementem, quia unum prædicatum communicatur, non alterum; at licet prædicatum Paternitatis denominet essentiam Divinam Patrem, & prædicatum Incommunicabilitatis non denominet essentiam incommunicabilem, non fit, quod de eadem Personalitate Patris verificentur contradictoria, ita ut unum prædicatum Paternitatis communicetur essentiae, & non alterum; sed solum sequitur, quod essentia sit capax unius denominationis, & non alterius, quæ ab eadem forma præstantur; unde non debet dari distinctio virtualis inter prædicatum Paternitatis,

& incommunicabilitatis. Sicut Gratia accidentaliter denominat Christum Dominum Dei Amicum, & non Filium Dei adoptivum, eo quod sit incapax talis denominationis. Sic cognitio denominat objectum materiale cognitum, & non denominat spirituale &c. quia universim forma potens præstare plures denominationes aliquando unam potius, quam alteram præstat ob incapacitatem subiecti citra distinctionem virtualementem. Et ratio a priori est, quia non per hoc quod unam tantum denominationem tribuat subiecto, ideo definit illi communicari secundum totum suum esse. Hinc tota Paternitas communicatur essentiae, licet essentia solum denominetur Pater, & incommunicabilis incommunicabilitate Patris, non vero incommunicabilis incommunicabilitate essentiae; quia est incapax talis denominationis. Sic Humanitas Christi denominatur sancta a sanctitate Verbi, non vero immensa, aut omnipotens, quia incapax est harum denominationum.

VII. Objic. 3. contra 2. conclusionem: Si daretur distinctio objectiva inter Naturam, & Personalitates, illa deberet esse formalis, seu actualis, non vero virtualis. Probat sequela; quia de Paternitate v. gr. negari potest, quod ex parte objecti identificetur cum essentia realiter simul, & virtualiter, quod negari nequit de ipsa essentia, quæ realiter simul, & virtualiter secum identificatur; ergo ex parte objecti prædicatum Paternitatis, & prædicatum essentiae est duplex; atque adeo datur inter illa distinctio actualis.

Resp. nego sequelam: ad probationem concedo, ex parte objecti dari duplex illud prædicatum, quod tamen non est duplex actu, sed virtualiter; sicut ex parte objecti verificatur, quod Petrus sit animal, & sit rationalis, atque adeo ex parte objecti datur in Petro duplex hoc prædicatum animalis, & rationalis, quod tamen non est duplex ex parte objecti: ita proportionaliter in casu nostro.

VIII. Objic. ult. Evidens est, non posse identificari prædicata contradictoria; sed data hac distinctione virtuali verificarentur contradictoria: ergo huiusmodi distinctio repugnat. Prob. min. Nam esse omnino idem cum essentia, & non esse omnino idem cum essentia sunt prædicata contradictoria; atqui data ista distinctione virtuali verificaretur de essentia, quod sit omnino idem cum essentia, & de Paternitate verificaretur,

tur, quod non sit omnino idem cum essentia, eo quod ab illa distinguatur virtualiter; ergo de essentia, & Paternitate realiter identificatis verificarentur contradictoria.

Resp. 1. argumentum probare, quod nec detur distinctio virtualis, nec formalis inter Naturam, & Paternitatem. Deinde directe nego minorem: ad probationem; tunc verificantur prædicata contradictoria, quando idem affirmatur, & negatur de eodem relate ad idem, non vero relate ad diversa; seu quando idem affirmatur, & negatur de eodem omnino eodem tum realiter, tum virtualiter; ut si affirmetur quod Petrus sit homo, & negetur, quod sit Animal rationale. In casu nostro affirmarentur de essentia, & Paternitate illa duo prædicata opposita; essentia tamen, & Paternitas supponerentur identificata solum realiter, non vero virtualiter, atque adeo esse idem; non tamen omnino idem, sed virtualiter duplex, unde non verificarentur prædicata contradictoria.

QUÆSTIO III.

Quodnam sit Principium quod producat Verbum, & Spiritus Sancti?

I. **P** Principium quod productivum in Divinis constituitur tum per prædicatum absolutum, tum per relationem: v.g. Id quod producit Verbum, est tum Deitas, seu essentialis intellectio, tum etiam Paternitas; altero enim ex his sublato non intelligitur Principium quod productivum; non enim sola Paternitas est id, quod producit, cum operationes non sunt suppositivæ, sed suppositorum: Nec producit sola natura Divina, tum quia operationes non sunt Naturæ ut quod, sed suppositi; tum etiam quia quod producit, distinguatur debet a termino producto: natura autem, quæ est in Patre, non distinguitur a Natura, quæ est in Filio; ergo Natura seorsum a Personalitate non est principium productivum ut quod; Propterea principium quod productivum Spiritus Sancti est pariter tum Deitas, tum Personalitas Patris, & Filii.

Quæstio apud DD. solum est de Principio productivo quo, seu de virtute productiva, qua Pater v.g. dicitur potens producere, seu generare Filium, Num scilicet

Part. I.

cet consistat adæquate in sola Natura, an in sola relatione Paternitatis, an vero in utroque? Prima sententia cum Bonavent., utroque Lugone, Amico, & aliis illam reponit in sola relatione prout connotante Divinam essentiam tanquam conditionem per se requisitam; sicut v. gr. virtus causativa Amoris consistit in Bono sub cognitione, tanquam sub conditione. Secunda sententia reponit illam formaliter in aggregato ex absoluto, & relativo. Ita Zunica, Bonzpei &c. Tertia communior cum Suar. lib. 6. c. 15. Vasqu. disp. 164., Ruiz, Fasolo, Becan. Lumbier qu. 5. art. 4. reponit illam in absoluto connotando relationem.

II. Dico equidem cum hac tertia sententia, Principium productivum quo in Divinis consistere formaliter in absoluto connotante in obliquo tanquam conditione relativum. Unde virtus generativa formaliter habetur in Deitate sub Paternitate tanquam sub conditione: & proportionaliter dicas de virtute spirativa. Ita D. Tho. qu. 41. art. 5. ubi aperte dicit, potentiam generativam, seu principium quo esse perfectionem absolutam. Unde Thomistæ communiter docent, Deitatem esse principium radicale quo; principium vero formale quo esse intellectionem essentialem respectu Filii; & volitionem essentialem respectu Spiritus Sancti, completas in obliquo, seu modificatas per relationes.

Prob. 1. autoritate SS. Patrum. Cyrillus Alexandrin. lib. 1. thesauri c. 3. dicit; *Generativam virtutem esse essentia Divina*. Basilii lib. 5. contra Eunomium dicit; *Pater natura Divina proprium Filium genuit*: si autem genuit Natura, consequenter natura est potentia generativa. Augustinus apud Arnag. dicit, *Verbum esse ex Sapientia Patris*. Apertius loquitur Joannes Theolog. Orator celeberrimus in Concilio Florentino adversus Græcos, dicens: *Principium, quo Pater generat, est id solum, quod communicabile est*: unde aperte excludit a principio quo, seu a virtute generandi Paternitatem. Neque dicas, hujusmodi Autoritates intelligendas esse de vi communicativa formaliter, quæ consistit in essentia Divina formaliter communicata tribus. Nam aperte Patres loquuntur de Generatione, atque adeo de vi communicativa active, seu de potentia productiva.

Neque dicas 2. hujusmodi autoritates intelligi posse de virtute radicali, quod scilicet Deitas tantum sit radix Relationis,

in qua deinde formaliter insit potentia productiva. Nam primo gratis detorquentur huiusmodi locutiones ad significatum improprium. Deinde male Joannes Theologus diceret, principium quo esse id solum, quod communicabile est, excludendo relationem, nisi loqueretur de principio formali quo tunc controverfo.

Prob. 2. ratione ex Angelico, quia universim quoties plura concurrunt ad aliquid producendum, toties virtus productiva non debet ascribi ei, quod nullam, aut fere nullam similitudinem habet cum termino producto; sed ascribitur ei, quod debitam habet cum illo similitudinem; idque multo magis si productio tendat ad ponendum terminum perfectissime similem suo principio: atqui ad productionem Filii v. gr. in Divinis perfectissime similis Generanti, in qua concurrunt tam perfectio absoluta, scilicet Deitas, & intellectio essentialis, quam Paternitas, solum cum Filio genito habet omnimodam similitudinem perfectio absoluta, nullam vero, aut fere nullam Paternitas; immo potius illi opponitur relative; ergo Paternitas se habet, ut conditio, intellectio vero essentialis, ut virtus adequata productiva. Minor constat; nam sicut individuatione causæ fere nullam habet similitudinem cum individuatione effectus, quia individuatione est ratio, per quam ultimo distinguitur unum ab alio; ita Paternitas pene nullam habet cum Filiatione similitudinem, (licet convenientiam solum analogice in ratione Personalitatis) quia est ratio relative opposita, & potius est ratio dissimilativa, quam perfectissime assimilativa, prout Pater in Divinis perfectissime assimilatur Filio; magis quam effectus univocus suæ causæ.

Major pariter patet, tum quia universim productum est imago realis sui principii, sicut effectus est imago suæ causæ; unde debet illi assimilari; tum etiam quia causa, & principium producents aliquo modo præcontinet effectum, seu terminum productum, atque adeo hic convenit cum illo, si minus formaliter, & perfecte, ut causa univoca cum suo effectū, saltem virtualiter, & imperfecte ut causa æquivoca.

III. Confirm. 1. inductione: nam concurrentibus ad productionem hominis v. g. Natura humana, & Hæcceitate, aut subsistentia, vis activa tribuitur naturæ, in qua effectus assimilatur, non vero hæcceitati, aut subsistentiæ: similiter concurren-

tibus ad productionem caloris tam calore, quam approximatione, & subiecto, v. gr. Aqua, vis productiva caloris non tribuitur approximationi, aut Aquæ, sed calori. Quod si concurrat ignis, calor, approximatō ad productionem substantialis ignis, hic effectus non tribuitur approximationi, sed aut igni, aut soli calori, aut utrique juxta varias sententias, eo quod his tantum assimilatur, non approximationi.

Confirm. 2. quia vis productiva ad extra tribuitur soli Omnipotentis cum Natura Divina identificata, non vero tribus Personalitatibus; ergo pariter vis productiva ad intra ascribenda est solis perfectionibus Divinis absolutis, & essentialibus intelligendi, & volendi, non vero relationibus. Probatur consequentia, tum quia non videtur, cur aliter discurrendum sit de subsistentiis relativis Divinis in ordine ad productiones ad intra, ac in ordine ad productiones ad extra; tum etiam, quia similiter discurrimus de subsistentia creata in ordine ad effectus procedentes a Natura subsistente, idcirco enim vis productiva non tribuitur subsistentiæ creatæ, quia hæc est ultimum complementum Naturæ de se operativæ, cum Natura sit principium motus, & quietis; nihil enim operatur ad extra, nisi prius sit completum ad intra; unde est, quod Animalia non generant, antequam ad debitam perfectionem pervenerint; & Omnipotentia, licet de se contineat perfectionem omnium possibilem, nequit tamen operari ad extra, antequam sit completa ad intra per subsistentias relativas, quas exigit non ex indigentia, sed ex abundantia perfectionis, ut se diffundat: sicut etiam exigit possibilitatem Creaturarum; ergo pariter in principio generativo Divino vis productiva tribui debet Naturæ, non Paternitati; quia pariter Paternitas est requisitum, ut possit Natura se communicare; & natura præcontinet terminum producendum, scilicet Filium etiam identice, atque adeo modo perfectissimo; unde habet tam vim formaliter, quam active communicativam.

Neque dicas, quod debeat distingui realiter vis generativa active a generativa passive; non secus ac distingui debet generatio activa a passiva, & generans a genito; sed præcisè relationibus Paternitatis, & Filiationis nulla datur distinctio inter prædicata Patris, & Filii; ergo vis generativa activa, & passiva nullatenus intelligi potest præcisè relationibus, atque adeo per relationes constituuntur.

Nam

Nam contra est, quia sicut per Adversarios non debet distingui principium radicale quo produciens a principio radicali quo productum, scilicet Deitas, sed solum principium formale quo (constitutum in eorum sententia per relationes) ita per nos non debet distingui principium formale quo produciens a principio formali quo productum, v. g. intellectio absoluta, sed solum distingui debent conditiones ad producendum, scilicet relationes. Et ratio a priori est, quia prædicatum, quod competit denominationi, seu denominationi, non semper competere debet formæ denominanti: ex. gr. prædicatum cognoscens non competit cognitioni, quæ est unica forma talis denominationis, cum cognitio non cognoscat, nisi ut quo, quatenus facit cognoscens; sic albedo non est alba, sed facit formaliter album; ergo pariter prædicatum Generans, quod competit Patri, non debet competere soli formæ denominanti, nempe Deitati; propterea Deitas, seu intellectio essentialis, licet sit adæquate virtus generativa activæ, non per hoc denominari debet generans, unde nec debet distingui a principio formali quo productum, sed sufficere, quod Generans distinguatur a Genito.

IV. Objic. 1. Possesse generare, seu ratio quia Pater sit potens generare, est quid notionale, seu differentiale, cum non conveniat aliis Personis; atqui sola relatio est quid notionale, & discriminativum unius Personæ ab aliis; ergo sola relatio est principium productivum quo. Neque dicas, quod Pater discriminetur ab aliis Personis per aggregatum ex natura, & Paternitate, aut per solam Naturam connotantem Paternitatem. Nam Pater, ut potens generare, pure differt ab aliis; sed solum per Paternitatem pure differt; ergo solum per Paternitatem sit potens generare: sicut Aqua calida solum per calorem est potens calefacere, licet subiectum requiratur tanquam conditio ad productionem caloris, & tanquam constitutum principii productivi caloris, ut quod.

Resp. dist. maj. posse generare ut quod est quid notionale, concedo; posse generare ut quo, nego majorem, & concessa minore nego consequentiam. Non Natura, sed Pater dicitur potens generare ut quod; ita tamen ut ad hanc denominationem de formali veniat Natura, de connotato Paternitas. Sicut enim Persona Patris est propria Patris, licet natura, quæ constituit Patrem,

sit communis; ita principium generativum ut quod est notionale, seu proprium Patris, licet id, quod venit de formali ad illud constituendum, seu principium quo sit Natura Divina communis tribus; sicut quando Aqua calida calefacit, principium quod, seu integra denominatio constituitur ex aqua, & calore, sed ratio formalis est solus calor, & subiectum est merum requisitum.

V. Objic. 2. Principium generativum, ut quo, debet realiter distingui a termino genito; sola autem relatio Paternitatis realiter distinguitur a Filiatione, non vero natura; ergo sola relatio est principium formale generativum ut quo. Major probatur, quia Pater distinguitur a Filio præcise, quia generat illum; ergo a fortiori vis generativa Patris, seu principium generativum ut quo distingui debet a termino genito; nam propter quod unumquodque tale, & illud magis; sed propter virtutem generativam, & generationem Pater distinguitur a Filio; ergo a fortiori virtus generativa distingui debet a Filio.

Resp. nego majorem. Ad probationem concessio antecedente, nego consequentiam. Illud enim principium, propter quod unumquodque tale &c. non habet locum universum in causis physicis, sed in causa finali; nam si homo v. gr. amatur propter Deum, a fortiori amatur ipse Deus; at in physicis non valet: Homo est ebrius propter vinum; ergo a fortiori vinum est ebrium: Intellectus cognoscit propter cognitionem; ergo a fortiori cognitio cognoscit: cognitio enim, quæ cognoscit ut quo, non debet cognoscere ut quod; Ita proorsus licet Pater distinguatur a Filio propter virtutem generativam, non sequitur, quod virtus generativa distingui debeat a Filio; sicut licet Pater propter Personalitatem sit Persona, non sequitur, quod ipsa personalitas sit Persona. Universum enim tunc solum in physicis habet locum principium illud, propter quod unumquodque tale, &c. quando prædicatum competit ut quod utrique parti, scilicet tam denominationi, quam formæ, v. gr. calidum propter calorem calefacit; ergo a fortiori calefacit ipse calor; vis enim calefactiva convenit etiam calori ut quod.

VI. Objic. 3. Formalis determinatio ad posse generare debet esse aliquid ab essentia distinctum; quandoquidem essentia est etiam in Spiritu Sancto, quin sit in Spiritu Sancto formalis denominatio ad posse gene-

rare; sed sola Paternitas in Patre generante est aliquid ab essentia distinctum; ergo sola Paternitas est formalis determinatio ad posse generare, seu principium generativum ut quo; sicut quia solus calor determinat formaliter aquam ad posse calefacere, solus calor est virtus calefactiva ut quo.

Resp. in eo dumtaxat sensu Paternitatem determinare Paternitatem ad denominationem potentis generare, in quo sensu cognitio determinat formaliter bonum ad denominationem proxime amabilis, & approximatio determinat formaliter ignem ad denominationem proxime combustivi; scilicet ut mera conditio, & ut forma minus rigorosa determinans ad denominationem tanquam praequisitum, quin tamen denominationem constituit; contra vero calor determinat formaliter aquam ad posse calefacere, non ut requisitum, sed ut forma presse dicta, constituens denominationem potentis calefacere.

VII. Obijc. ut. Quoties denominatio ad quate sumpta partim est absoluta, partim relativa, toties pars illa relativa sumitur ad quate a sola relatione; sicut denominatio potentis disgregare visum sumitur a sola albedine: sed denominatio potentis generare ut quod, partim est absoluta, partim relativa, ergo pars relativa sumitur a sola relatione; atqui pars relativa est ipsa virtus generativa; (quippe quae convenit soli Patri, & quod est proprium Patris, est sola relatio) ergo virtus generativa, seu principium productivum ut quo est sola relatio.

Resp. nego minorem subsumptam: Virtus enim generativa nullatenus est relativa; cum enim sit tantum productiva ut quo, non ut quod, sit, quod pars relativa solum sit in producente ut quod, non in potentia productiva. Quare potentia generativa ut quo est quid commune Tribus, & ut fiat propria Patris denominationi potentis generare, requiritur pars relativa, non tanquam forma, sed tanquam conditio ad generationem; esto sit forma minus rigorosa huius denominationis potentis generare; eo pacto, quo approximatio in igne est forma minus rigorosa huius denominationis potentis proxime comburere.

Neque dicas, hinc sequi, quod denominatio potentis generare possit competere Tribus, quia virtus generativa, quae est forma presse dicta denominationis potentis generare, competit Tribus, si identificetur cum sola intellectione essentiali: ad eum

modum, quo si forma denominationis potentis calefacere sit in aqua, etiam aqua suscipere potest hanc denominationem.

Nam licet forma presse dicta denominationis potentis generare sit communis Tribus, cum tamen talis denominatio constituitur per solam Paternitatem, tanquam per conditionem ad productionem, non sequitur, quod talis denominatio possit alii a Patre competere: v.g. si forma denominationis potentis calefacere, puta calor, uniatur aquae, etiam aqua suscipit hanc denominationem, quia calor ut tribuat hanc denominationem, requirit tanquam conditionem aliquod subiectum materiale, quodcumque illud sit, sive aqua, sive ignis: at si uniatur Angelo, non denominat Angelum potentem calefacere: ita in casu nostro virtus generativa ut quo, ut denominet potentem generare, requirit tantum Paternitatem ut conditionem; unde Filius nequit suscipere hanc denominationem potentis generare, licet cum ea forma identificetur.

QUAESTIO IV.

Quare sola processio Verbi sit Generatio, non vero Processio Spiritus Sancti?

I. DE Fide est, solum Verbum esse Filium Dei naturalem, imaginem substantialem Patris, generari, & nasci; unde dicitur Psalm. 2. *Filius meus es tu; ego hodie genui te*; Spiritum Sanctum non esse imaginem, sed donum, non nasci, nec generari; nec esse Dei Filium, licet accipiat a Patre, & Filio eandem naturam, non secus ac Verbum a Patre: Unde in Symbolo D. Athanasii dicitur: *Spiritus Sanctus a Patre, & Filio non factus, nec creatus, nec genitus, sed procedens*; & idcirco Verbum in Scripturis vocatur *Unigenitus*.

Defudant tamen Theologi in assignanda ratione, cur non possit etiam Spiritus Sanctus dici Filius genitus, & Imago Spiratoris? adeo ut multi Patres cum Nazianzeno, Damasceno, Augustino, & multi Scholastici cum Gregorio, Gabriele, Mayore apud Vasqu. disp. 113. n. 14. doceant, rationem hanc non esse querendam, sed credendam. Verum supposita fide, quod solum Verbum dici possit Filius, docent Thomistae, id oriri, quia soli Verbo competit definitio Generationis; scilicet origo viventis a vi-

vente, principio conjuncto in similitudinem Naturæ, per hoc, quod vi suæ processio- nis Verbum non solum procedat ut vivens a vivente conjuncto, quatenus procedit de substantia producentis Patris, accipiendo illam inter se, quod etiam competit Spi- ritui Sancto; sed etiam quia procedit via intellectuali, cujus est assimilare; Spiritus vero procedit per voluntatem, cujus non est assimilare. Vsq. vero, & Recentiores communis putant, idcirco solum Verbum esse Filium, ac procedere in similitudinem Naturæ, quia solum Verbum vi suæ processio- nis est imago Patris; cum enim acci- piat omnia a Patre præter Paternitatem, exprimit illum perfectissimo modo, estque imago illius non solum intellectualis, sed etiam naturalis, & consubstantialis; per hoc enim, quod procedat ut Verbum men- tis, procedit in ordine ad exprimendum, & representandum suum principium, scilicet Patrem, quatenus illud principium est ob- jectum, ex cujus cognitione procedit; unde Augustinus 7. de Trinit. 2. dicit: *Es Verbum, quo Filius*: contra verò Spiritus Sanctus est quidem ejusdem Naturæ, non vero naturæ similis cum Patre, & Filio, quia vi suæ processio- nis habet solum acci- pere eandem Naturam, non vero repræ- sentare suum principium; cum non proce- dat per intellectum, & ut Verbum men- tis, sed per voluntatem notionalem. Equi- dem præsciendū, num istæ, aut aliæ rationes sint sufficientes, quas passim discutiunt, & impugnant DD. apud Arriag. disp. 47. Lumbier n. 447. & alios

II. Dicendum censeo cum Zunica disp. 2. dub. 20. Mayor., Richard., & aliis, Verbum esse Filium, ac Verbi processio- nem esse Generationem, seu originem vi- ventis a vivente conjuncto in similitudi- nem Naturæ, per hoc quod Verbum acci- piat a Patre naturam secundam, atque adeo illi assimilatur in fecunditate; quod non competit Spiritui Sancto.

Prob. 1. quia Florentinum hæc habet: *Credentes Spiritum Sanctum ex Filio nequa- quam procedere necesse est, ut intelligant Spi- ritum Sanctum ex solo Patre procedere, & consequenter Verbum non esse Filium*; ergo Ecclesia Latina adversus Græcos existimat bonam hanc illationem, si Verbum non spiraret, non esset Filius; atque adeo exi- stimat, essentialiter pertinere ad rationem Filii acceptationem Naturæ secundæ.

Prob. 2. ratione, quia ex Philosopho Na- tura est Principium motus, & quietis in

eo, in quo est; ergo ille solum dicitur procedere ut similis in Natura, atque adeo esse Filius, qui ex vi suæ processio- nis assimilatur cum suo principio in ratione ista principii motus, & quietis; sed soli Verbo id competit per hoc, quod acci- piat a Patre Naturam secundam; ergo solum Verbum est Filius, & sola proces- sio Verbi est Generatio per hoc, quod solum Verbum accipiat Naturam secundam. Probat. min. quia Natura dicitur princi- pium motus, & quietis non solum per hoc, quod suo modo moveatur ad actus immanentes sibi consentaneos, in quibus conquiescat, sed multo magis per hoc, quod sit principium actionis productivæ, produ- cendo terminum sibi similem quoad e- jus fieri potest, quoties Natura est capax hujusmodi actionis productivæ; atque adeo Natura Divina dicitur principium motus, & quietis non solum per hoc, quod sit principium virtuale operationis intellectu- væ, & volitivæ, sed multo magis per hoc, quod prout est in Patre, sit principium pro- ductivum Filii perfectæ similis Genitori; quatenus illi omnia communicat Pater præ- ter Paternitatem, atque adeo tum prædi- cata essentialia, tum etiam notionalia, scilicet spirationem activam, & secundari- tem: atqui soli Verbo ratione suæ proces- sio- nis competit, quod procedat in similitu- dinem Naturæ Divinæ, prout est in Pa- tre modo explicato; ergo soli Verbo com- petit procedere in similitudinem Naturæ per hoc, quod vi suæ processio- nis assimi- letur suo principio in ratione motus, & que- tis.

Unde fit primo, quod solum Verbum sit imago perfectissima Patris, representando tam prædicata essentialia, quam notionalia Patris, præter Paternitatem, in qua debet dissimilari.

Fit 2. eo esse Verbum, quo est Filius, & e contra, juxta locutionem Augustini; per hoc enim quod sit Verbum repræsen- tans omnia, quæ sunt in Patre, accipit ab illo Naturam secundam, & sic est Fi- lius. Quamvis revera Verbum, & Filius non sint synonyma, siquidem Filius expli- cite solum dicit originem viventis a vivente in similitudinem Naturæ: Verbum vero explicite dicit non solum relationem rea- lem producti ad principium producentem, sed etiam relationem representantis objecta, quæ sibi manifestantur.

III. Confirm. conclusio, quia quod conve- nit omni, & soli Filio, convenit Filio in

quantum tali; sed omni, & soli Filio, perfecte simili suo Genitori (sive sit Filius creatus, sive increatus) competit procedere ab illo in similitudinem Naturæ modo explicato, scilicet sumendo Naturam prout est principium motus, & quietis (idque tam prout est principium sive formale, sive virtuale operationum immanentium, quam prout est principium productivum alterius suppositi) ergo de ratione Filii, qua talis, est accipere a Patre naturam faciendam, atque adeo assignatur sufficiens ratio, cur solum Verbum sit Filius.

Neque dicas, non omne, quod competit omni, & soli, spectare ad primum conceptum; nam risibilitas v. gr. competit omni, & soli Homini, & tamen non constituit Hominem, sed est ejus proprietas; ergo pariter facienditas potest esse solum proprietas Filii constituti per facienditatem radicalem.

Nam adhuc dato, quod Filius constituitur per accptionem Naturæ radicaliter faciendæ, bene assignatur ratio, cur Spiritus Sanctus non sit Filius. Deinde dico, Filium qua talem accipere a Patre formalem facienditatem, quia formaliter de ratione Naturæ est esse principium non solum operationum immanentium, sed etiam transcendentium; ergo ut Verbum procedat in similitudinem Naturæ, prout est in Patre, formaliter accipere debet ab illo facienditatem.

IV. Objic. 1. Potest aliquis dici Filius, etiamsi non accipiat a Patre Naturam faciendam, dummodo accipiat Naturam Patris, in quantum est principium operationum immanentium: ergo non assignatur ratio sufficiens, cur Spiritus Sanctus non dicatur Filius. Probat antecedens; Leopardus enim, & Lycisca, hoc est natus ex Lupo, & Cane, ac similes generare non possunt, & tamen dicuntur Filii.

Confirm. 1. quia Angeli habent Naturam rigorose dictam, & tamen generare non possunt.

Confirm. 2. quia vel ad rationem Naturæ presse dictæ requiritur, quod possit generare alium Filium, & in hoc sensu Verbum non procederet in similitudinem Naturæ, atque adeo non esset Filius, cum non accipiat a Patre Naturam productivam alterius Filii; vel sufficit, quod Pater communicet Filio Naturam in quantum productivam alterius suppositi, & non alterius Filii, & sic Filius in Divinis non esset perfecte similis Patri; siquidem majore

rem similitudinem cum Patre habet Filius creatus accipiens ab illo Naturam productivam etiam alterius Filii; ergo impertinenter se habet ad rationem Filii, quod Verbum accipiat a Patre Naturam faciendam.

Resp. Leopardum, Lyciscam, & similes dici Filios, vel quia possunt in aliquibus Regionibus generare, ut docet Plinius; vel quia per accidens tantum non generant, non vero ex intentione Naturæ. Pardus enim, & Læna natura sua intendunt Filium perfecte similem generare. Vel demundicas, Leopardum non esse perfecte, & univocæ Filium, eo quod non accipiat Naturam perfecte similem generanti, neque in operationibus transcurrentibus, neque in ipsis etiam immanentibus.

Ad 1. confirm. sicut Angeli habent rigorose naturam, licet careant principio vegetandi, & tamen Homo non esset perfecte similis Genitori, si non acciperet ab illo principium vegetandi, quod potest participare; ita Angeli habent rigorosam naturam, per hoc, quod sit principium intellectuum, & volitionum, licet careat principio productivo alterius Angeli, utpote iis indebito. Homo tamen sicut non esset perfecte similis Genitori in Natura, si non acciperet ab illo principium vegetandi; ita si non acciperet principium productivum alterius Hominis, eo quod hujus sit capax; ergo pariter Verbum non procederet in similitudinem Naturæ perfectam, si non acciperet a Patre facienditatem, quæ potest alteri a Patre communicari.

Ad 2. Filius creatus ex imperfectione habet, quod accipiat a Patre vim productivam alterius Filii; quia Filius creatus ex imperfectione potest multiplicari. Contra vero Filius Divinus ex infinita perfectione est immultiplicabilis; unde solum potest a Patre accipere vim productivam alterius suppositi, non alterius Filii. Hinc Filius Divinus perfectiori modo est similis Patri, quam Filius creatus; eo modo, quo Deus v. gr. dicitur perfectiori modo liber, quam Creatura, licet Creatura sit libera etiam ad peccandum, non vero Deus.

Neque replices, quod etiam Spiritus Sanctus a principio spirante accipiat Naturam Divinam secundum omnia predicata Naturæ, quæ potest sine imperfectione ipse recipere; unde pariter dici posset Filius saltem minus perfectus. Nam Spiritus Sanctus non accipit a Patre, & Filio id, quod omni, & soli Filio convenit, & quod potest in Divinis secundum se communicari;

scilicet fecunditatem, & ideo non est dicendus Filius minus perfectus, nisi forte lis sit de voce.

V. Obijc. 2. Ad conceptum Naturæ Divinæ non spectat fecunditas; ergo Verbum non est Filius, quia accipit Naturam fecundam. Prob. antecedens. Nam Spiritus Sanctus habet eandem Naturam Divinam, & tamen non habet fecunditatem. Consequentia videtur sequi, quia Verbum est Filius per hoc, quod procedat in similitudinem Naturæ; potest autem esse perfecte similis in Natura. Patris independenter ab acceptione fecunditatis; ergo non est Filius, quia accipit fecunditatem. Sicut enim quia ad Naturam Divinam non spectat Paternitas, ideo Filius est perfecte similis Patri; licet non accipiat ab illo Paternitatem; ita a pari. Et ratio a priori est, quia ad conceptum Naturæ Divinæ solum spectat esse principium virtuale operationum Divinarum essentialium, scilicet intelligendi, & volendi, quod perfectissimè a Filio participatur.

Confirm. Si deberet Verbum participare fecunditatem Patris, ut dicatur Filius, seu procedens in similitudinem Naturæ, sequeretur, quod non esset perfecte, & univoce similis Patri, licet participet fecunditatem; cum non participet vim generativam Patris.

Resp. Verum quidem esse, quod ad conceptum Naturæ Divinæ, prout est in Tribus, non spectet fecunditas; cum Spiritus Sanctus habeat completissimam Naturam Divinam sine fecunditate: falsum tamen est, Naturam Divinam, prout est in Patre, non dicere formaliter fecunditatem: atque adeo ut Filius sit perfecte similis Patri in Natura Divina prout contracta ad Patrem, debet accipere etiam fecunditatem. Sic ad conceptum Naturæ Angelicæ non spectat esse principium operationum sensivarum, aut principium productivum alterius suppositi; ad conceptum vero Naturæ humanæ utrumque hoc spectat; & ideo ut a Filio accipiat humana Natura similis Patri, debet utrumque illud principium accipere.

Neque dicas, hinc sequi, quod Pater, Filius, & Spiritus Sanctus non sint unus, ejusdemque Naturæ; siquidem natura Patris, & Filii importat fecunditatem, quam non importat natura Spiritus Sancti. Nam contra est, quia natura Divina concipi potest prout communis Tribus, & sic præscindit a fecunditate: potest et-

iam concipi, prout communis Patri, & Filio, & sic involvit fecunditatem, quam excludit prout contracta ad Spiritum Sanctum. Potest demum concipi, prout est in solo Patre, & sic non solum dicit fecunditatem communicabilem Filio, sed etiam principium generativum, quod est simpliciter incommunicabile. Quare sicut in Deo concipimus intellectionem, & volitionem tum essentialiam, tum notionalem, ita concipere debemus tum naturam essentialiam, quæ est communis Tribus, tum notionalem, quæ ita convenit Patri, ut etiam Filio communicetur, consistens in principio productivo alterius suppositi.

Ad confirm. Filius Divinus, licet non accipiat vim generativam, adhuc est perfecte similis Patri, cum communice in omnibus ejus prædicatis, quæ a Patre in quantum tali communicari possunt; Pater autem solum communicare potest fecunditatem, non vim generativam ex infinitate perfectionis. At Spiritus Sanctus, licet ex infinitate etiam perfectionis non accipiat fecunditatem, non per hoc dici potest Filius, cum non competat illi prædicatum fecunditatis, quod omni, & soli Filio competit, atque adeo per se spectat ad rationem Filii.

VI. Obijc. ult. Natura definitur Principium motus, & quietis in eo, in quo est; ergo principium productivum alterius non spectat ad definitionem Naturæ; atque adeo similitudo in Natura requisita ad conceptum Generationis non est similitudo in Natura fecunda.

Confirm. a posteriori; quia Patres Latini disputantes cum Græcis, ut probarent, Spiritum Sanctum procedere a Filio, nunquam usi sunt hac ratione (quæ ceteroqui esset obvia, & apertissima) quod Filius constituitur per acceptionem Naturæ fecundæ; ergo signum est, hoc non spectare ad rationem Filii quæ talis.

Resp. Naturam definitur Principium motus in eo, in quo est, & ideo includere debet principium productivum alterius; licet enim terminus productus non sit in principio producente, actio tamen productiva est in principio; in Divinis enim virtus productiva ad intra cum actione productiva identificatur, & in creatis actio productiva supponitur esse in Agente; quare Natura est principium motus in eo, in quo est, etiam quatenus est principium productivum. Præterquamquod etiam terminus productus, scilicet Filius, est in Patre se-

candum essentiam, in qua identificatur. Deinde transmissio, quod Natura, prout definitur a Philosopho, non significet principium productivum alterius; at Natura, prout sumitur in definitione Generationis, hoc debet respicere, cum hoc sit commune omni, & soli Filio tam Increato, quam creato, scilicet habere similitudinem in fecunditate Naturæ; esse vero principium operationum immanentium, licet conveniat omni Filio, non tamen convenit soli Filio, cum etiam Spiritui Sancto conveniat esse Patri similem in principio intelligendi, & volendi. Et ratio est, quia, ut notat Zunica, in definitione Generationis Natura venit, in quantum est quoddam principium conjunctum, & intrinsecum operandi de substantia sua aliquod suppositum vivens, qui est modus operandi proprius substantiæ viventis; & ideo Natura in definitione Generationis debet venire non solum ut est principium operationum immanentium, sed etiam transeuntium.

VII. Hinc fit 1. quod licet largo modo dici possit cum Damasc. lib. 1. de Fide c. 18. Spiritus Sanctus imago Filii, quatenus est illi perfecte similis in natura essentiali; solus tamen Filius est vera, ac prefata imago Patris, quia solus Filius vi suæ processione est similis Patri tam in natura essentiali, quam in notionali, atque adeo perfecte representativus sui principii. Fit 2. verisimum esse, quod habet Augustinus, & Magister sententiarum, Verbum eo esse Filium, quo Verbum, & e contra: per hoc enim quod sit Verbum representans omnia prædicata etiam notionalia Patris, dempta Paternitate, habet rationem Filii, & e contra.

Ad confirmationem: Patres Latini disputantes cum Schismaticis non poterant asserere, sed debebant ostendere, Filium habere vim productivam Spiritus Sancti, unde non poterant contra Schismaticos ostendere, Spiritum Sanctum procedere a Filio ex hoc fundamento, quod scilicet de ratione Filii sit accipere naturam fecundam. Nos autem supponimus de Fide certum, quod Filius Divinus sit fecundus; unde ex hac noticia certa ex Fide, & ex noticia lumine naturali habita, quod Filius creatus accipiat a Patre Naturam fecundam, dicimus, omni, & soli Filio competere fecunditatem, atque adeo de ratione Filii esse accipere naturam fecundam; & idcirco solum Verbum esse Filium, quia solum Verbum accipit naturam fecundam.

QUÆSTIO V.

*Utrum Verbum procedat ex cognitione
suum necessarium, tum contin-
gentium?*

I. Filius procedens per intellectum citatur Verbum, ut habetur Joan. 1. In principio erat Verbum, hoc est terminus locutione productus; & ideo Augustinus 7. de Trinit. 2. dixit, *Filius esse Verbum, quia est Sapientia genita*. Quia tamen solus Pater loquitur Filio, seu reddit Filium intelligentem Verbo a sua locutione productum, hinc solus Pater producit Verbum. Quando vero Scripturæ tribuunt locutionem Trinitati, juxta illud Psalm. 32. *Dixit, & facta sunt: Verbo Domini Celi firmati sunt*, tunc Verbum sumitur improprie pro efficaci imperio Divino circa operationes ad extra, quæ se habent instar locutionis externæ, quatenus per illas Deus se manifestat. Verbum itaque proprie dictum in Divinis procedit ab intellectione Patris ut suo formali principio. Difficultas nunc est, ex quam intellectione Patris procedat? Prima sententia Scoti asserit, procedere ex cognitione essentiarum Divinarum, & attributorum. Secunda Becani ex cognitione etiam Patris. Tertia Vasquii ex cognitione etiam Filii. Quarta Arrubal ex cognitione etiam Spiritus Sancti. Quinta communior ex cognitione omnium necessarium tum intra, tum extra, atque adeo etiam possibilem. Ultima ex cognitione etiam contingentium, ut Arriaga, & alii Recentiores.

II. Dico 1. Verbum procedit ex cognitione omnium necessarium. Ita Thomistæ, Lumbier, Suar. lib. 8. c. 6. Maurus, & fere omnes Societatis ex D. Th. qu. 24. art. 1. ad 3. & Augustino 16. de Trinit. c. 14. ubi ait, Verbum esse de omnibus, quæ sunt in scientia Dei; nam si aliquid minus esset in Verbo, quam in scientia, Verbum non esset æquatum.

Prob. Verbum Divinum est Verbum perfectissimum; ergo Pater debet per Verbum dicere omnia, quæ ipse cognoscit, atque adeo debet Verbum procedere ex æquata scientia simpliciter intelligentiæ, seu ex cognitione omnium omnino necessarium: sicut etiam Spiritus Sanctus procedere debet ex amore omnium, quæ necessario Deus amat;

Confirm. 1. quia Verbum procedere debet perfectum, & plenum in linea intellectivi, & dicibilis, quantum possibile est; potest autem accipere cognitionem omnium necessariorum, & ea exprimere, seu dicere: ergo de facto ita contingit.

Confirm. 2. Verbum juxta viam Scoti procedit ex cognitione comprehensiva Divinae essentiae; ergo procedit non solum ex cognitione essentiae, sed etiam Personalitatum, & possibilem, atque adeo omnium necessariorum. Prob. consequentia, quia impossibile est comprehendere essentiam Divinam, quin saltem indirecte comprehendantur Personalitates, quae in illa radican- tur, & possibilia, quorum Deus est idea necessaria; cum non possit unum correlativum sine altero comprehendere, aut saltem altero non cognito; liquidem ex Philosopho correlativa sunt simul natura, & cognitione; ergo ex hoc, quod Verbum procedat ex cognitione comprehensiva essentiae Divinae, debet etiam procedere ex cognitione Personalitatum, & possibilem, & sic dicere quaecumque Pater sua comprehensione intelligit.

Neque dicas, quod Pater primario cognoscat essentiam Divinam, & secundario Personalitates, & possibilia, & sic Verbum secundum conceptum primarium procedat ex cognitione essentiae, & ad summum ipsius Patris, cujus Verbum est imago, & secundario ex cognitione omnium aliorum, quae Pater scit; aliter sicut est imago Patris, ita esset imago reliquorum, quod est falsum.

Nam contra est primo, quia in cognitione Patris terminata ad essentiam, & ad reliqua objecta necessaria non distinguuntur ex parte objecti illae formalitates; ergo neque ex parte objecti illae distinguuntur in Verbo; atque adeo Verbum ex parte objecti simpliciter est expressivum omnium necessariorum, unde procedit ex cognitione omnium, quae Pater intelligit. Secundo nec potest dici, quod Verbum ratione nostra secundum conceptum primarium procedat ex cognitione solius essentiae: Nam Verbum ex suo primario conceptu est perfectum, & adequatum; ergo ex primario conceptu procedere debet ex cognitione comprehensiva essentiae, adaequate exprimendo quaecumque Pater intelligit comprehendendo Divinam essentiam: atqui Pater comprehendendo suam essentiam necessario comprehendit etiam Personalitates, & possibilia, ut ostendimus; ergo Verbum ex

primario conceptu exprimit omnia necessaria; unde procedit ex cognitione omnium necessariorum.

Neque obstat, quod Verbum sit solum Patris imago, aliorum vero sit exemplar potius, quam imago. Nam imago ex sua ratione procedere debet a suo Prototypo; sed Verbum solum procedit a Patre; ergo solius Patris est imago; aliorum vero est exemplar, quia alia ab ipso, non ipsum ab aliis procedit. Hinc tamen non fit, quod non possit esse aliorum expressivum, ita ut Pater per Verbum dicat omnia, quae ipse cognoscit, quia licet reliqua non possint esse objectum quodammodo motivum, possunt tamen esse objectum pure terminativum.

III. Objic. 1. Ex hoc quod Verbum procedat ex cognitione Patris comprehensiva, & perfectissima, sequitur, quod non possit procedere a cognitione ullatenus abstractiva, utpote minus perfecta, sed debeat procedere ex cognitione intuitiva; atqui cognitio intuitiva Patris in priori ad productionem Verbi nequit esse intuitiva, nisi essentiae Divinae, & ad summum ipsius Personalitatis Patris, non vero Filii, Spiritus Sancti, & possibilem; ergo Verbum procedere solum potest ex cognitione essentiae, & ad summum Patris, cujus est imago, non vero reliquarum Personalitatum, & possibilem. Minor videtur perspicua, quia cognitio intuitiva terminari debet ad existentiam praesuppositam objecti; sed pro illo priori ad productionem Verbi nequit intelligi praexistens Filius, Spiritus Sanctus, & possibilia; ergo pro illo priori cognitio Patris nequit esse istorum intuitiva.

Confirm. Si Pater produceret Verbum per cognitionem intuitivam ipsius Verbi, sequeretur, quod in priori ad productionem Verbi Pater sciret, Verbum debere ex se nasci: sed hoc est falsum; nam juxta doctrinam Cyrilli Alexandr. lib. 1. Theol. c. 8. *Non est concedendum, per primum Patrem doctum fuisse, quod Filius sibi nasceretur, quam quod eum pepererit*: ergo pro illo priori cognitio Patris non potest esse istorum intuitiva.

Resp. Verbum procedere ex cognitione comprehensiva, atque adeo intuitiva omnium necessariorum. Cognitio autem intuitiva, licet debeat terminari ad existentiam objecti, illam tamen praesupponere non debet, nisi aut quando cognitio ab objecto causatur, aut quando est illius imago; & quia Verbum est solum imago Patris, a quo produci- tur, ideo solum existentiam Patris de-
bet

bet pro priori præsupponere. Filii autem, ac Spiritus Sancti, & possibilem Verbum non est imago, sed potius exemplar; nam ut advertit Maurus n. 25. exemplar procedit ab imagine, non imago ab exemplari: Idcirco pro priori ad Verbum debet quidem præsupponi cognitio Filii, Spiritus Sancti, & possibilem, non tamen ut existentium pro illo priori originis; sicut enim Deus ab æterno cognovit intuitivè peccatum. Antichristi ut existens, non tamen ut existens ab æterno, sed pro sua temporis differentia: ita in priori ad Verbum Pater intuitivè cognoscit Spiritum Sanctum ut existentem pro posteriori originis ad Verbum, & Filium ut existentem pro posteriori originis ad Patrem; ac possibilia ut existentia secundum suam possibilitatem in posteriori ad totam Trinitatem. In forma nego minorem. Ad probationem distinguo majorem, debet cognitio intuitiva terminari ad existentiam objecti præsuppositam pro illo priori, quoties est illius imago, aut effectus, concedo; secus, nego majorem, & consequentiam.

Ad confirm. nego minorem. Cyrillus solum negavit, quod cognitio Patris præcesserit navitatem Filii, eo pacto. quod cognitio consultativa præcedit ea, de quibus ut libere faciendis consultamus, quod somniabat Eunomius, contra quem disputabat. Nam, inquit, si per prius consilio usus esset, & per prius didicisset Filium esse futurum, spatia certe aliqua Filium præcederent; Ipse autem temporis, & spatii Creator est.

IV. Objic. 1. Cognitio objecti secundarii non est per se requisita ad productionem Verbi; sed sola essentia Divina est objectum primarium, reliqua secundarium: ergo ad productionem Verbi solum prærequiritur cognitio essentiae.

Confirm. Si per impossibile Pater non cognosceret Spiritum Sanctum, adhuc cognoscendo comprehensive Divinam essentiam produceret Verbum perfectissimum; ergo a fortiori, si non cognosceret possibilia, cum quibus juxta probabilem sententiam Omnipotentia non connectitur.

Resp. distinguo majorem. Si cognitio objecti secundarii non ingreditur in cognitione objecti primarii, ~~omnino~~ majorem, si ingreditur, nego majorem, & consequentiam. Diximus, non posse comprehensive attingi unum relativum non attacco correlativo; unde nequit Patris essentia comprehendendi, quin attingantur, immo & comprehendantur simul Personalitates in essen-

tia Patris radicate, & possibilia, quorum Deus est idea, & exemplar. Hinc licet cognitio per se non pendeat ab objecto secundario non connexo cum primario, pendet tamen ab illo, si cum primario connectatur; unde nequit unum sine altero cognosci; esto enim unum sit prius alio prioritatem a quo, non est tamen prius prioritatem in quo.

Ad confirm. nego antecedens. Si per impossibile Pater non cognosceret Spiritum Sanctum, eo ipso essentiam Divinam non comprehenderet, ut patet. Verbum autem, quod non procedit ex comprehensione essentiae Divinae, non est perfectum, & adaequatum; ergo in ea hypothesi Verbum non esset adaequatum, nec Divinum. Idemque dicas, si Pater non cognosceret possibilia. Ad id, quod additur de Omnipotentia, inconnexa: primo supponi potest, omnipotentiam vel esse ipsam possibilitatem necessariam, & actualem possibilem, vel saltem cum illa connexam: Deinde transmissio, quod deficiente possibilitate possibilem, Omnipotentia non deficeret, adhuc dici potest cum Arriaga disp. 52. n. 28. quod licet Deus sit magis necessarius, quam possibilia v. gr. Leonis, adhuc Verbum procedere potest ex cognitione essentiae Divinae magis necessariae, & possibilem minus necessarium, ita ut Verbum secundum quod est expressivum essentiae Divinae, dicatur etiam esse magis necessarium, & secundum quod est expressivum possibilem, dicatur esse minus necessarium; unde sicut deficiente possibilitate Leonis, adhuc Deus maneret Deus usquequaque perfectus, ita Verbum etiam remaneret perfectissimum, licet non exprimeret possibilitatem Leonis.

Neque hinc sequitur, quod pariter Verbum procedere posset ex cognitione contingentium, & sic esse contingens, secundum quod est expressivum contingentium. Nam ut dicemus in secunda conclusione; Pater non dicitur attingere contingentia, nisi in posteriori signo ad totam Trinitatem jam constitutam, eo quod contingentia consequantur ad necessaria; si enim Verbum necessarium fundaretur in contingentibus, ipsum etiam esset contingens, ut patet.

V. Objic. ult. Verbum procedit solum ex cognitione illius, quod repræsentat; atqui per se solum repræsentat essentiam Divinam, & Paternitatem; cum solius Patris sit imago; ergo solum ex cognitione Patris procedit.

Confirm. 1. Si Verbum procederet ex cogni-

gnitione possibilem; procederet ex Creaturis ut cognitis; atque adeo aliquatenus indigeret Creaturis.

Confirm. 2. quia Spiritus Sanctus non procedit ex amore possibilem; ergo nec Verbum ex possibilem cognitione.

Confirm. 3. Ut comprehendatur potentia intellectiva creata, non debent cognosci in particulari omnes cognitiones, quae possunt ab ea poni; ergo, ut comprehendatur Omnipotentia, seu essentia Divina, non debent cognosci in particulari omnia possiblea; atque adeo potest Verbum procedere ex cognitione comprehensiva essentiae Divinae, & non possibilem. Antecedens patet. Angelus enim comprehendit seipsum, & suum intellectum, nec tamen cognoscit in particulari omnes cognitiones, quas potest ponere terminatas ad singula possiblea; aliter cognosceret clare, & distincte omnia possiblea, quod nemo dixit.

Resp. Verbum representare duntaxat Patrem tamquam ejus imaginem naturalem, cum ab eo procedat; reliqua vero representare representatione solum intentionali, non ut imaginem naturalem eorum, sed ut exemplar: Diximus enim, imaginem esse a suo Prototypo, non vero Prototypum ab imagine. Ubi notandum, Verbum esse imaginem totius Patris, licet sit simile Patri solum in Natura: & ratio est, quia imago in conceptu adequato non solum dicit similitudinem, sed etiam processionem ab exemplari; ergo ut Verbum sit imago Patris, ita debet assimilari, ut etiam ab eo procedat, atque adeo soli Naturae debet esse simile, non vero Paternitati.

Ad 1. confirm. Aliud est, Verbum procedere ex Creaturis possibleibus ut cognitis, aliud procedere ex cognitione possibilem: illud importat, quod possiblea sint principium productivum Verbi, & cognitio sit mera conditio, quod repugnat. Hoc vero importat, cognitionem terminatam ad possiblea esse principium Verbi, quod verissimum est; nec hoc importat, indigentiam Verbi a Creaturis.

Ad 2. Multi negant antecedens: supponunt enim, in Deo amorem, seu simplicem complacentiam erga possiblea esse necessariam, & ideo Spiritum Sanctum procedere etiam ex hoc amore necessario terminato ad Creaturas possibleas; quod videtur docere D. Thom. qu. 37. art. 2. ad 3. ubi habet, *Patrem dicere omnia Verbo, sicut diligit omnia Spiritu Sancto*. Verum omisso antecedente cum Thomistis: nego consequen-

tiam. Disparitas est, quia connexio A cum B fert, quod non possit cognosci A comprehensive, quin cognoscatur etiam B; at non fert, quod non possit amari A, non amato B; ut patet in connexione contritionis cum peccato; ergo ex comprehensione essentiae Divinae connexae cum possibleibus sequitur cognitio, non vero amor possibilem; atque adeo ex hoc quod Verbum procedat ex comprehensione Divinae essentiae, inferitur, quod procedat etiam ex cognitione possibilem: contra vero ex hoc quod Spiritus Sanctus procedat ex amore perfectissimo Divinae essentiae, non inferitur, quod procedat etiam ex amore possibilem.

Ad 3. nego consequentiam. Disparitas est, quia potentia intellectiva creata nequit se sola ponere cognitionem sine concursu speciei impressae intentionalis se tenentis ex parte objecti; & ideo ut hujusmodi potentia comprehendatur, sufficit, si cognoscatur, quod possit ponere quamcumque cognitionem in genere, ad quam adjuvetur a specie intelligibili; at Omnipotentia se sola potest ponere possiblea; ergo ut comprehendatur, debent in particulari omnia possiblea cognosci.

VI. Dico 2. Verbum non procedit ex cognitione contingentium; atque adeo neque ex scientia visionis, ut docent communiter contra Valentiam, Zunicam, Arriag. disp. 52. sect. 4. Maur. disp. 102. Neque ex scientia media, quae pariter participat de contingentia, licet non presupponat decretum liberum aëa existens; quod pariter Recentiores communiter docent contra Molin.

Prob. ex Amico hic n. 162. Omnia contingentia in Deo sunt posteriora necessariis, quin possit aliquod contingens praere necessarium; atqui Verbum est necessarium; ergo tum decreta libera, tum etiam scientia visionis, & media consequuntur in Deo ad productionem Verbi, atque adeo nequit Verbum procedere a scientia contingentium. Probat major, quia si posset in Deo contingens secundum quod contingens praere, ac produceret necessarium, sequeretur, quod sicut contingens potest non esse, ita posset non esse id, quod ab eo produci debet; atque adeo necessarium, quod producit a contingente, non esset necessarium.

Neque dicas, quod sicut Deus est necessarius secundum entitatem, non vero secundum denominationem volentis, aut cognoscentis scientia visionis v. gr. Mundum; ita Verbum, quod producit ab hac scientia

tia visionis, sit necessarium quoad entitatem, non quoad denominationem exprimentis Mundi existentiam. Nam per Adversarios Verbum secundum entitatem necessariam procedit a Patre, ut habente scientiam visionis; ergo sicut Pater secundum hanc denominationem reduplicando scientiam visionis est contingens, ita debet esse contingens ipsum Verbum secundum entitatem, secundum quam procedit a principio contingenti, quod repugnat; unde Anselmus aperte docet, quod Verbum variatis contingentibus, maneret omnino invariatum.

Confirm. nemo Theologorum somniavit, quod decreta libera sint in Patre, & Filio spirantibus in priori originis, ita ut Spiritus Sanctus etiam a decretis liberis procedat, eo quod non possit necessarium procedere a contingenti; ergo neque potest Verbum procedere a scientia contingentium.

VII. Objic. 1. auctoritatem Augustini lib. 11. de Trin. c. 13. dicentis, *Verbum Divinum esse de omnibus, quæ sunt in scientia Dei*; sed in scientia Dei sunt etiam contingentia; ergo Verbum procedit etiam ex cognitione contingentium.

Confirm. Filius accipit a Patre omnia præter Paternitatem, juxta illud Christi Dominum: *Omnia mea tua sunt; Mea doctrina non est mea, sed ejus, qui misit me*: ergo Filius non solum accipit a Patre scientiam simplicis intelligentiæ, sed etiam visionis.

Resp. Verum quidem esse, quod Verbum Divinum sit de omnibus, quæ sunt in scientia Dei, atque adeo etiam de contingentibus; quatenus etiam contingentia repræsentat; negandum tamen, quod ex cognitione contingentium procedat; hujusmodi enim cognitio in Patre mere concomitanter, ac veluti per accidens se habet ad ejus productionem. Sicut enim decreta libera spectant ad totam Trinitatem, & illa solum per accidens, & concomitanter se habent ad Spiritus Sancti productionem; ita scientia visionis est communis tribus, & per accidens se habet ad productionem Verbi: non secus ac virtus spirativa est communis Patri, & Filio, nec habet ullam prioritatem relate ad productionem Filii; & sicut speciali modo dicitur Spiritus Sanctus conferre nobis dona per hoc, quod procedat ut Amor spiratus; ita speciali modo Verbum dicitur repræsentare contingentia per hoc, quod procedat ut Sapientia genita.

Ad confirm. Verbum per suam proces-

sionem accipit a Patre omnia, quæ habet; non tamen omnia accipit ex vi suæ processionis; ea enim, quæ libere competunt Verbo, tantum identice, & concomitanter, seu radicaliter conveniunt illi per suam processionem; quod proportionaliter dicendum de decretis liberis relate ad processionem Spiritus Sancti.

VIII. Objic. 2. Verbum procedit ex cognitione Patris perfectissima; perfectior autem est cognitio, quæ attingit præter necessariam etiam contingentia; ergo procedit ex cognitione etiam contingentium.

Confirm. Verbum procedit ex cognitione comprehensiva essentiae Divinæ; ergo etiam ex cognitione contingentium. Probatur consequentia, quia comprehensio objecti fert cognitionem omnium, quæ in illo sunt cognoscibilia, cum debeat attingere omnia prædicata tum absoluta, tum respectiva objecti; atqui ex suppositione decreti de existentia futurorum hæc sunt cognoscibilia in essentia Divina, utpote connexa cum illis ex suppositione talis decreti: ergo.

Resp. dist. maj. ex cognitione perfectissima quoad entitatem, concedo, quoad denominationem, seu quoad terminationem liberam, nego majorem, & distinguo minorem: Cognitio attingens præter necessariam etiam contingentia est perfectior, quam attingens tantum necessariam, si facit sensum, quod non esset perfecta, sed chimærica, si tantum attingeret necessariam; concedo: si faciat sensum, quod cognitioni attingenti necessaria superaddatur nova perfectio per hoc, quod attingat etiam contingentia, nego minorem, & consequentiam.

Ad confirm. nego consequentiam. Ad probationem distinguo majorem; comprehensio fert cognitionem objecti, & omnium, quæ in illo sunt cognoscibilia per se; & ratione formalitatis necessaria; concedo; ratione formalitatis liberæ: nullam superaddentis perfectionem objecto, nego majorem, & consequentiam; unde fit: Verbum procedere per se ex cognitione Divinorum decretorum, quoad eorum entitatem, per accidens vero, & concomitanter ex cognitione illorum sub conceptu terminationis contingentis ad Creaturas.

IX. Ex quibus fit, proportionaliter esse discurrendum de processione Spiritus Sancti a Patre, & Filio; procedit enim ab utroque ex amore Divinæ essentiae, Personarum, & Creaturarum ut possibilem;

non

non ut contingendum. Ubi advertendum, quod Pater, & Filius amant se Spiritu Sancto tanquam termino per dilectionem producto, ita scilicet ut illi dilectionem essentiali communicent: Eo pacto quo Pater dicit omnia Verbo tanquam termino vi cognitionis perfectissimæ Patris producto, quatenus illi Sapientiam essentiali communicat. Verum sicut Pater est formaliter Sapiens per sapientiam essentiali identificatam cum tribus Personis; non vero per Sapientiam productam identificatam cum solo Filio; ita Pater, & Filius formaliter diligunt se amore essentiali identificato cum tribus Personis, non vero per amorem notionalem productum, identificatum cum sola Persona Spiritus Sancti. Et sicut principium quo productivum Verbi, seu Sapientie genitæ in nostra sententia est ipsa Sapientia essentialis Patris ut connotans paternitatem: ita principium quo productivum Spiritus Sancti est amor essentialis identificatus cum Divina essentia communi Tribus, ut connotans tamen utramque Personalitatem Patris, & Filii reciproce se amantium, & conspirantium eadem virtute Spirata.

QUESTIO VI.

Utrum Spiritus Sanctus distinguatur a Filio, si ab illo non procederet.

I. Spiritum Sanctum procedere de facto a Patre, & Filio, est de fide contra Græcos schismaticos: dicitur enim in Symbolo fidei, *Qui a Patre, Filioque procedit*; idque aperte colligitur ex verbis illis Jo: 15. *Cum venerit Paraclitus, quem ego mittam vobis a Patre: & Jo: 16. Si autem abiero, mittam enim ad vos.* (Missio enim Divinarum Personarum non potest competere per imperium, aut per consilium, sed solum ratione originis, ut notat Augustinus 5. de Trin. cap. 14. Nazianz. & alii Patres apud Petavium, & Ruiz) Et ratio a priori est, quia ex Concilio Florentino, Filius omnia accipit a Patre præter Paternitatem, juxta illud Jo. 16. *Omnia, que habet Pater, mea sunt*; ergo Filio etiam competit vis spirandi Spiritum Sanctum.

Neque obstat primo, quod sicut Pater se solo generat Filium per intellectum; ita videatur posse se solo spirare Spiritum San-

ctum per voluntatem. Nam, ut Spiritus Sanctus procedat juxta locutiones Sanctorum Patrum, ut *Amor reciproce duorum*, seu ut *Nexus, Amplexus, Osculum Patris, & Filii*, requiritur, ut a Patre simul, & Filio per voluntatem procedat.

Neque obstat 2. quod Christus D. solum mentionem faciat de processione Spiritus Sancti a Patre, dum dicit, Jo. 15. *Ego mittam vobis a Patre Spiritum veritatis, qui a Patre procedit*. Nam quamvis Christus D. in hoc textu explicite solum mentionem faciat de processione Spiritus S. a Patre, ut innuat more suo, omnia ad Patrem referri tanquam ad primum principium, a quo etiam ipse est; nihilominus etiam implicite meminit processionis ejusdem Spiritus S. a se, dum dicit, *Ego mittam Spiritum veritatis*; cum non possit illum mittere, nisi a se procedat; Sicut Filius non potest a Patre mitti, nisi procedat a Patre. Propterea Matth. 10. dicitur, *Qui me recipit, recipit eum, qui me misit*. & Jo. 8. *Ego, & qui misit me Pater*. Unde fit, Patri solum convenire, quod mittat, Spiritui Sancto solum, quod mittatur; Filio vero, quod mittat simul, & quod mittatur. Quamvis ad missionem non solum requiratur ratio principii ad intra ex parte mittentis, & originis passivæ ex parte missi, sed etiam quod Persona, que mittitur, vi missionis habeat esse novo modo, videlicet per aliquem effectum temporalem, qui eidem personæ missæ specialiter conveniat: Sicut Filius missus habuit novum esse per Incarnationem; & Spiritus Sanctus missus speciali modo suis donis sese effudit in Apostolos. In eo autem sensu dicitur Spiritus missus se Filium, Isaie 48. ubi hæc habentur; *Ex tempore antequam fieret, ibi eram, & nunc Dominus meus misit me, & Spiritus ejus*; in quantum Spiritus Sanctus misit Christum qua hominem; nisi malis dicere, quod ibi missio sumatur missio rigorose, prout importat effectum temporalem toti Trinitati communem.

Difficultas nunc est, Num Spiritus Sanctus distingueretur a Filio realiter, si per impossibile ab illo non procederet? Goffredus Torres apud Scotum, & alii putarunt, hanc hypothesein esse sui destructivam, atque adeo inutilem ad perfectius cognoscendas rationes formales constitutivas Filii, & Spiritus Sancti, ac invicem distinctivas. Sed in oppositum est communissimus Theologorum sensus, qui tot sæculis quaestionem hanc agitarunt propter Græcos negantes,

res, Spiritum Sanctum procedere a Filio : Ad quem errorem confutandum Patres Latini cum Joanne Theologo, & Bessarione in Concilio Florentino usi sunt hac rationatione ducente ad impossibile ; quod si non procederet a Filio, ab eo non distingueretur. Et ratio, cur hypothesi non sit inutilis, est, quia neque est destructiva subiecti adqueat, neque secundum rationem ultimo constitutivam illius : licet enim Filius si non spiraret, non esset Filius Divinus realis, de cuius ratione est, quod accipiat a Patre omnia præter Paternitatem, atque adeo quod accipiat spirationem activam ; hæc tamen hypothesi chimerica destruit solum partialiter rationem Filii retinendo in illo rationem generationis, seu processionis per intellectum, ac imaginis consubstantialis, quæ est ratio differentialis competens soli Filio, negando illi dumtaxat vim spirativam, quam habet cum Patre communem. Sic non inutiliter queritur v. gr. an si per impossibile Homo esset rationalis, & non Animal, adhuc sentiret ; in qua hypothesi non destruitur ratio ultimo constitutiva hominis, unde non sequitur per locum intrinsecum utraque pars contradictionis, quæ certe sequeretur in hac alia hypothesi, Utrum si Homo non esset rationalis, discurreret, vel utrum si Filius non esset Filius, distingueretur a Spiritu Sancto ?

III. Quia in re duo advertenda. Primum ex P. Thyrsio Gonzalez hic, Tripliciter posse per locum intrinsecum sequi utramque partem contradictionis, primo ex defectu constitui, v. gr. si Homo non esset Homo ; Secundo ex defectu constitutivi ultimi, seu differentialis, v. gr. si Homo non esset rationalis ; Tercio per defectum termini relationis, v. g. si Pater Æternus esset sine Filio : cum enim relativa sint simul natura, & cognitione, deficiente termino deficit per locum intrinsecum ipsa relatio.

Secundo notandum ex Mauro qu. 106. n. 27. rigoroſe loquendo illud dici, quod sequatur per locum intrinsecum, quod sequitur ex prædicato hypothesi, sequi vero per locum extrinsecum, quod sequitur ex subiecto hypothesi. V. gr. in hac hypothesi, si Homo non esset Animal, per locum intrinsecum non sentiret, per locum extrinsecum sentiret ; & in casu nostro, si Spiritus Sanctus non procederet a Filio per locum intrinsecum, juxta viam Themiſtam, non distingueretur, quia non habe-

reut oppositio relativa, quæ est præcisa radix distinctionis in Divinis ; per locum vero extrinsecum distingueretur, quia Spiritus Sanctus nequit non distinguì a Filio, cum Filius debeat omnia accipere a Patre præter Paternitatem, unde accipere debeat spirationem activam, ratione cujus realiter distinguitur a Spiracione passiva propter oppositionem relativam cum illa.

IV. Dico nunc cum fere communissima contra Scotistas. Si Spiritus Sanctus a solo Patre procederet, non distingueretur realiter a Filio, sed uterque esset una, eademque Persona genita simul, & spirata ; non secus ac de facto eadem Persona Patris est simul Genitor, & spirans. Conclusio usque adeo communiter recipitur, ut Ruiz disp. 68. sect. 5. putet, oppositam sententiam carere solida probabilitate, postquam Ioannes Theologus, & Bessarion in Concilio Florentino hac rationatione usi sunt contra Græcos : si Spiritus Sanctus non procederet a Filio, ab eo non distingueretur, tacite illam approbante Concilio.

Prob. In hac hypothesi inter Filium, & Spiritum Sanctum non daretur oppositio relativa producentis, & producti ; ergo non daretur distinctio realis. Consequentia probatur ex illo axiome receptissimo Boetii, quod traditur ab Anselmo lib. de process. Spiritus Sancti c. 2. *In Divinis omnia sunt unum, ubi non obviat relationis oppositio*. Et ratio est, quia distinctio realis quoties non fundatur in oppositione relativa, supponit limitationem in distinctis ; siquidem idcirco A distinguitur, seu non excurrit ad B, quia est limitatum ; ergo cum in Deo non detur limitatio, Personalitatum distinctio unice oriri potest ab oppositione relativa, quæ in hypothesi questionis non daretur inter Filium, & Spiritum Sanctum ; unde non distinguerentur realiter.

Confirm. 1. quia non alia de causa dicimus, attributa Divina non distinguì realiter ab essentia, nec inter se, nisi quia distinctio realis de se fert limitationem, & compositionem, atque adeo imperfectionem, quoties non fundatur in oppositione relativa. Hinc si relationes disparatæ possent realiter distinguì, a fortiori deberent distinguì attributa, cum de se magis opponatur absolutum respectivo, quam unum respectivum alteri respectivo, quod non est correlativum.

V. Confirm. 2. quia de facto realiter identificatur in Patre relatio Genitoris, & rela-

relatio spirantis, quæ non opponuntur relative, sed disparatæ; ergo in ea hypothesi, in qua Filius non spiraret, (unde relatio Geniti, & relatio spirati non opponerentur relative, sed disparatæ) deberent pariter identificari; atque adeo sicut defacto una, eademque Persona Patris est simul Genitor, & spirans, ita in ea hypothesi chimerica una, eademque Persona esset genitus, & spiratus.

Neque dicas cum Scotistis, non repugnare, quod idem agens duplici actione totali producat duos terminos, & ideo potest eadem Persona Patris esse Genitor, & spirans; repugnare tamen, quod idem terminus duplici processione adæquatæ producat, præsertim in Divinis, altera enim ex iis processionibus esset superflua; & ideo non potest eadem Persona esse Genitus, & spiratus.

Nam contra est, quia in ea hypothesi idem terminus, qui esset genitus, & spiratus, produceretur per unam tantum processionem, quæ simul esset ab intellectu, & voluntate Patris, unde processio per intellectum, & processio per voluntatem essent processionēs realiter inadæquatæ, & solum formaliter adæquatæ, non secus ac de facto processio activa Genitoris, & spirantis in Patre.

VI. Confirm. ult. quia in Concilio Tolet. II. c. I. dicitur: *In relatione Personarum numerus cernitur; hoc solo numerum insinuans, quod ad invicem sunt; ergo ex Concilio distinguuntur, & multiplicantur Personæ Divinæ unice ob oppositionem relativam.* Quod etiam docuit Nissen. dicens: *Eo distinguitur Spiritus a Filio, quod per ipsum est; necnon August. apud Petav. lib. 7. de Trinit. c. 9. Anselm., Dionys., ut proinde non nemo dixerit oppositam sententiam non esse tutam in Fide. Verum ab his censuris omnino abstinendum, tum quia in virtute sanctæ obedientiæ ab Innoc. XI. interdictur in diplomate Thesium confixarum, ne censura ulla notentur opiniones, quæ hinc inde apud Catholicos controversantur; tum etiam quia Sacra Congregatio Pauli V. jussu declaravit, immunem esse a Censuris Doctrinam Scoti, edixitque, ac quis librorum censor prohibere Typis auderet, quod certo constaret ex Scoto de promptum esse.*

Respondent Scotistæ, non esse idem oppositionem relationis, & oppositionem relativam: oppositio relativa habetur, quando relationes inter se opponuntur, ut re-

latio Genitoris, & Geniti; oppositio vero relationis habetur, quando relationes sunt disparatæ, ut relatio Genitoris, & spirantis, aut Geniti, & spirati. Quando Patres docent, in Divinis omnia esse unum, ubi non obviat relationis oppositio, non sunt intelligendi, quod non detur distinctio, nisi inter relationes oppositas, cum etiam dari possit inter relationes disparatas; & ideo in ea hypothesi Filius distingueretur a Spiritu Sancto, licet ab illo non procederet.

Sed contra est, quia Authores, & rationes adductæ evincunt, distinctionem realem in divinis unice haberi ex oppositione relativa. Concilium Toletanum laudatum dicit, numerum Personarum haberi, *quia ad invicem sunt; aliter etiam attributa possent realiter distingui, & relationes disparatæ Genitoris, & spirantis deberent pariter de facto in Patre distingui, unde quatuor essent Personæ.*

VII. Objic. 1. de facto relationes Genitoris, & spirati (sicut etiam Geniti, & spirati) realiter distinguuntur, licet inter illas non intercedat oppositio relativa; ergo ad distinctionem realem sufficit oppositio relationum disparatarum; hæc autem haberetur inter Filium, & Spiritum Sanctum, etiamsi Filius non spiraret; ergo in ea hypothesi distingueretur realiter.

Confirm. 1. quia si Spiritus Sanctus procederet a solo Filio, & non a Patre, adhuc a Patre distingueretur ob solam oppositionem relationum disparatarum: ergo pariter si Spiritus Sanctus a solo Patre procederet, & non a Filio, adhuc a Filio distingueretur.

Neque dicas, disparitatem esse, quia si Spiritus Sanctus procederet a solo Filio, adhuc opponeretur relative Patri mediatæ, quia immediate opponeretur Filio spiranti, & Filius opponeretur relative Patri generanti: hæc autem oppositio relativa mediatæ non haberetur, si Spiritus Sanctus a solo Patre procederet, unde non deberet a Filio distingui. Nam contra est, quia sicut Deitas radicans spirationem activam mediatæ opponitur relative spirationi passivæ, scilicet media spiratione activa, & tamen Deitas identificatur cum spiratione passiva; ita Pater generans Filium opponitur mediatæ Spiritui Sancto in hypothesi, quod Pater non spiraret, & tamen deberet cum Spiritu Sancto identificari, nisi verum esset, quod oppositio relationum disparatarum impediret identitatem inter Patrem, & Spiritum Sanctum.

Con-

Confirm. 1. Avus distinguitur a Nepote, etiam Nepos non procedat immediate ab Avo, idque ob meras individuationes diversas, non vero ob oppositionem relativam mediatam; ergo Pater distinguitur a Spiritu Sancto, etiam Spiritus Sanctus non procederet immediate a Patre, idque ob relationes disparatas diversas.

Resp. nego antecedens; de facto Relatio Genitoris, & spirati, seu Patris, & Spiritus Sanctus realiter distinguuntur non ob meram oppositionem relationum disparatarum, sed ob oppositionem relativam mediatam, quatenus scilicet relatio Genitoris radicat spirationem activam, quæ immediate opponitur spirationi passivæ. Et in hoc eodem sensu relatio Filii cum relatione spirati opponuntur relative mediate, quatenus Filius radicat spirationem activam immediate oppositam spirationi passivæ. Immo, ut infra explicabitur, Filius secundum conceptum suum adæquatum importat ipsam spirationem activam; vel quia de ratione Filii est accipere Naturam fecundam, ut ostendimus; vel saltem quia de ratione Filii Divini est accipere omnia a Patre præter Paternitatem; unde Filius in conceptu suo adequato essentialiter imbibit spirationem activam, atque adeo immediate opponitur spirationi passivæ, & idcirco relatio Filii, & spirati realiter distinguuntur.

Ad 1. confirm. nego pariter Antecedens. Si Spiritus Sanctus a solo Filio procederet, distingueretur a Patre realiter, non ob oppositionem relationum disparatarum, sed ob oppositionem relativam mediatam. Ad id, quod opponitur, dico, diversimode procedere de facto mediate Spiritum Sanctum a Divinitate, quæ radicat spirationem activam, ac procederet mediate Spiritus Sanctus a Patre, in hypothesi chimerica, quod a solo Filio procederet. Nam Divinitas, utpote importans essentialiter fecunditatem radicalem, est solum radix emanativa, non productiva, seu est principium virtuale, ex quo emanat sine distinctione reali tam spiratio activa, quam passiva; & ideo potest Deitas cum utraque relatione opposita identificari: contra vero Paternitas non esset radix emanativa, sed productiva Filii spirantis; & idcirco realiter distingueretur immediate a spiratione activa producta in Filio, & mediate a spiratione passiva producta a Filio.

Ad 2. Avus, & Nepos independentes a productione mediata, vel immediata habent constitutiva diversâ limitata, & idcirco u-

nus non excurreret ad alterum, etiam si ab altero nullatenus procederet: at constitutiva relationum Divinarum sunt identice omnis perfectio; & ideo debet una ad alteram excurrere, quoties non obstat oppositio relativa.

VIII. Objic. 1. In hypothesi, quod Filius non spiraret, haberet totum id, per quod distingueretur a Spiritu Sancto: ergo essent duæ Personæ. Probatur antecedens. In ea hypothesi haberetur totum id, per quod nunc Filius ultimo constituitur in ratione Filii, & distinguitur a Patre, & Spiritu Sancto; ergo. Probatur antecedens. Filius nunc non constituitur ultimo per Divinitatem, quippe quæ est communis tribus; neque per spirationem activam, utpote communem duobus; sed per generationem passivam, quæ est propria Filii: atqui in ea hypothesi, sublata spiratione activa, remaneret in Filio generatio passiva: ergo remaneret id, per quod ultimo constituitur, & consequenter id, per quod primo distinguitur ab omni non ipso; cum idem sit ultimo constitutum, & primo distinctum rei.

Confirm. 1. Etiam in ea hypothesi Filius procederet per intellectum, & Spiritus Sanctus per voluntatem: ergo distinguerentur. Probatur consequentia. Ex duplici titulo Filius nunc distinguitur a Spiritu Sancto; primo quia inter has Personas intercedit relatio producentis, & producti: Secundo quia Filius procedit per intellectum, hoc est nascendo; Spiritus Sanctus per voluntatem, hoc est non nascendo, sed procedendo: atqui in ea hypothesi remaneret hoc secundum caput distinctionis: ergo distinguerentur. Quod docuit Anselmus lib. de process. Spiritus Sancti c. 1. dicens: *Habet utique a Patre esse Filius, & Spiritus Sanctus, sed diversimode, quia alter nascendo, alter procedendo.* Et deinde apertius subdit: *Si per aliud non essent plures Filii, & Spiritus Sanctus, per hoc essent diversi.* Athanasius etiam dialogo primo contra Amon. docet, discrimen inter Filium, & Spiritum Sanctum ex eo esse, *Quod unus quidem ex vero sit, alter ex ore;* Videlicet quod alter per voluntatem procedat, alter per intellectum. Unde August. 5. de Trin. c. 14. ad questionem, *Cur Spiritus non sit Filius?* respondet: *existit enim non quo modo natus, sed quo modo datus.* Et Damasc. 1. de Fide cap. 18. dicit, Spiritum a Patre prodire non filialiter, sed processionaliter.

Confirm. 2. quia diversi modi productionis

nis arguunt terminos realiter distictos; v. gr. frigeſcacio, & illuminatio inferunt, frigus diſtingui a lumine, licet nec frigus producat lumen, nec e contra; ſed generatio paſſiva, ſeu nativitas, & ſpiratio paſſiva, ſeu proceſſus per voluntatem, ſunt diverſimodi productionis magis incompoſſibiles, quam frigeſcacio, & illuminatio: ergo a fortiori arguunt terminos realiter diſtictos.

Reſp. nego antecedens. Ad probationem nego antecedens. Illud enim, per quod Filius nunc diſtinguitur ab omni non ipſo, non eſt generatio paſſiva quomodocumque, ſed generatio paſſiva ut imbibens ſpirationem (ſi Filiatio conſtituatur per accceptionem Naturæ ſecundæ) vel ſaltem ut radicans ſpirationem. In ea autem hypotheſi non remaneret huiusmodi generatio paſſiva: ergo non haberetur id, per quod Filius nunc ultimo conſtituitur, & primo diſtinguitur ab omni non ipſo.

Ad probationem ſecundi antecedentis concedo primam, & ſecundam partem majoris, diſtinguo tertiam; Filius conſtituitur per generationem paſſivam tantum, nego; per generationem paſſivam imbibentem, vel radicantem ſpirationem activam, concedo majorem, & diſtincta minore, nego conſequentiam. Cum Filiatio ex ſuo conceptu ferat accceptionem omnium a Patre præter Paternitatem, in ſuo conceptu fert ſpirationem etiam activam a Patre acceptam, & non meram generationem paſ�ivam.

Ad 1. confirm. diſtinguo antecedens. Ita ut eadem Perſona realiter eſſet Filius, & Spiritus Sanctus, & ſolum formaliter qua Filius procederet per intellectum, qua Spiritus Sanctus per voluntatem (ad eum modum quo eadem realiter Dei viſio v. g. formaliter qua vitalis eſt ab intellectu, qua ſupernaturalis a lumine gloriæ; & ſicut de facto Pater formaliter qua intellectivus generat; & qua volitivus ſpirat) concedo antecedens; ita ut realiter diſtingueretur Filius a Spiritu Sancto, nego antecedens, & conſequentiam. Ad probationem nego, Filium realiter diſtingui a Spiritu Sancto ex alio titulo, quam relationis oppoſitæ. Ad authoritatem Anſelmi dico, quod ſi Spiritus, & Filius non diſtinguerentur realiter per relationem producentis, & producti, ſolum formaliter eſſent diverſi, eademque Perſona procederet *filiatiter*, & *proceſſionaliter*, ſeu per impullum, juxta phraſim Damasceni; idemque eſſent *Natus*, & *datus*, juxta phraſim Auguſtini. Quod autem hæc

ſit mens Anſelmi, patet, quia ſæpe in eodem libro repetit axioma illud: *In Divinis omnia ſunt idem, ubi non obviat relationis oppoſitio*. Scotus tamen dicit, Anſelmum hac in re fuiſſe valde anxium; D. Thom. vero putat, Anſelmum non ex propria ſententia ea verba retuliſſe, ſed ea retuliſſe in oppoſita ſententia Græcorum, & diſputative tantum. Ex Suar., ac Vaſquez ingenue fatentur, Anſelmum fuiſſe in oppoſita ſententia, cumque deinde ſecutus fuiſſe Henricum, & Scotum.

Ad 2. Lumen, & frigus, necnon illuminatio, & frigeſcacio diſtinguuntur propter limitationem, a qua habent incompoſſibilitatem; in caſu noſtro non haberetur limitatio; unde neque incompoſſibilitas.

IX. Objic. ult. Conceptus Fili, qui nunc datur, debet ſaltem inadquare, & ſecundum aliquam formalitatem reperiri in Filio illo chimerico, qui non ſpiraret Spiritum Sanctum; aliter, ut diximus, eſſet inutilis hypotheſis, & nugatoria: Quare in Filio illo chimerico remaneret ratio Filii ſecundum conceptum inadquarem, quatenus ſcilicet procedit a Patre per intellectum, & eſt imago Patris; licet non remaneret Filius ſecundum conceptum adequatum accipientis omnia a Patre præter Paternitatem; quandoquidem non acciperet ſpirationem activam; ergo Filius in ea hypotheſi diſtingueretur realiter a Spiritu Sancto. Probatur conſequentia, quia *nisi* eſſet verum, quod Filius ſecundum conceptum illum inadquarem Filii, & ſecundum quod eſt relatio diſparata, diſtingueretur in ea hypotheſi a Spiritu Sancto, ſequeretur, quod de facto huiusmodi conceptus Filii inadquarem reperiri deberet in Spiritu Sancto, eo quod cum illo non opponatur relative; unde ſicut de facto Pater eſt ſimul generans, & ſpirans, ita de facto deberet Spiritus Sanctus eſſe ſimul genitus, & ſpiratus, ſeu procedens per intellectum, & voluntatem.

Confirm. 1. Quamvis conceptus adequatus Patris ferat, quod ſit ſimul generans, & ſpirans; poteſt tamen conceptus Patris inadquarem, ſeu ratio ſpirationis communicari Filio: ergo licet conceptus adequatus Filii ferat proceſſionem per intellectum, & ſpirationem activam, deberet etiam conceptus ille inadquarem Filii communicari Spiritui Sancto, ſi relatio diſparata non fuſſiceret ad diſtinguendas Perſonas. Et ratio a priori eſt, quia in Divinis infinitas ſolum fert, quod quilibet relatio ſit infinite per-

fecta, non vero quod excurrat ad perfectionem alterius; aliter Paternitas deberet excurrere ad Filiationem, & cum ea identificari.

Confirm. 2. ex Valent., quia potest Divinitas, quæ est in Patre, communicari Filio non communicata Paternitate; ergo ratio Geniti secundum conceptum inadæquatum deberet etiam communicari Spiritui Sancto non communicata spiratione activa, si deberent in Deo omnia identificari, ubi non obviat oppositio relativa.

Resp. hoc argumentum non leve negotium facessere, adeo ut Arriaga disp. 53. n. 29. dicat, pluries audivisse illud in disputationibus urgeri, quin unquam solutionem perspicuam audivisset. Dicendum tamen, quod Filius in hypothesi chimerica, quod non spiraret, haberet conceptum Filii realis inadæquate, ita tamen, ut repugnaret secundum hujusmodi conceptum inadæquatum usquam reperiri, cum chimæra sit Filius, qui non accipiat omnia a Patre præter Paternitatem, seu qui non spiret; unde fit, quod ea formalitas imaginis, seu processionis per intellectum non possit de facto esse in Spiritu Sancto, non quia est relatio disparata, sed quia seclusa spiratione activa, ratio Filii est chimerica. Quare in forma nego consequentiam. Ad probationem, nego sequelam. Ideo Pater potest identificare sibi spirationem activam, & non filiationem, quæ pariter cum spiratione activa identificetur, quia Spiratio activa non est chimerica, sive sit in Patre, sive sit in Filio: Contra vero filiatio est chimerica, si identificatur cum spiratione passiva; tunc enim non esset acceptio omnium a Patre præter Paternitatem, quia non posset esse acceptio etiam spirationis activæ: & ideo dispar ratio.

Ad 1. confirm. Illud est discrimen inter spirationem activam, quæ reperitur in Patre, & Filio, & rationem Imaginis, quæ reperitur in Filio, quod spiratio activa secundum conceptum præcisiuum spirationis ita est perfectio, ut sit etiam perfectio, & non chimæra, sive identificetur cum Paternitate, sive cum Filiatione. Contra vero ratio Imaginis non est realis, sed chimerica, si identificetur cum spiratione passiva; quia ratio Imaginis realis debet importare acceptiorem omnium a Patre præter Paternitatem. Ad rationem a priori; infinitas in Divinis importare debet excursus ad omnes perfectiones, nisi obset oppositio relativa, ratione cuius habetur in Deitate fecunditas, quæ spectat ad cumulum perfectionum.

In casu nostro inter Filiationem, (quæ non sit chimerica, sed sit acceptio omnium a Patre præter Paternitatem) & spirationem passivam datur oppositio relativa, & ideo non potest cum spiratione passiva identificari filiatio, quæ sit filiatio realis, & non chimerica; quandoquidem si spiratio passiva esset etiam filiatio, atque adeo acceptio omnium a Patre præter Paternitatem, esset etiam acceptio spirationis activæ; atque adeo in Spiritu Sancto simul identificarentur spiratio passiva, & activa, quod repugnat.

Ad 2. Deitas identificari potest cum duabus relationibus oppositis, v. g. cum Paternitate, & Filiatione: quod scilicet conceptus adæquatus Deitatis importet fecunditatem, atque adeo identitatem cum Relationibus oppositis; Contra vero Filiatio (sicut etiam Paternitas) secundum conceptum adæquatum importat identitatem cum sola spiratione Activa, & ideo identificari non potest cum spiratione passiva, ratione oppositionis relativæ, quam habet cum illa, si consideretur secundum conceptum inadæquatum; esto secundum conceptum inadæquatum procedentis per intellectum videatur ab ea oppositione relativa præscindere secundum conceptum explicitum. Hinc si Filiatio (importans etiam spirationem activam in suo conceptu adæquato) cum spiratione passiva identificaretur, deberet dari quarta Persona producta a tali Filio; & sic processus in infinitum in Personis Divinis.

Ex quibus sequitur, quod Filiatio, & Paternitas de facto distinguantur a spiratione passiva, non quidem ob oppositionem relationum disparatarum, sed ob oppositionem relativam, quam imbibunt explicite in conceptu adæquato, & solum implicite in conceptu inadæquato. Si enim dari posset distinctio realis ob meras relationes disparatas, a fortiori posset intercedere inter essentiam Divinam, & relationes, seu personalitates (cum magis opponantur absoluta respectivis, quam respectiva disparata inter se) atqui in omnium sententia haberetur in Deo compositio, & imperfectio, si essentia a relationibus distingueretur.

gueretur; ergo a fortiori, si distinguerentur invicem relationes disparatæ.

X. Responderi deinde potest huic celebri argumento alia via, dicendo, quod spiratio activa si minus includitur in conceptu formali filiationis, saltem in eo fundetur, seu radicetur. Cum enim filiatio sit acceptio omnium a Patre præter Paternitatem, sequitur, quod si minus formaliter imbibat, saltem radice spirationem activam; ac proinde filiatio si minus immediate, saltem mediate opponitur spirationi passivæ; unde non potest cum illa identificari. Quare idcirco de facto cum spiratione passiva non identificatur filiatio, quia hujusmodi relationes opponuntur saltem mediate. Sicut enim Pater de facto non potest identificari cum Spiritu Sancto, propter oppositionem relativam mediatam, quæ intercedit inter Paternitatem, & Spirationem passivam; ita nec potest de facto Filius cum Spiritu Sancto identificari propter eandem oppositionem relativam, saltem mediatam, si filiatio supponatur, quod non imbibat formaliter, sed solum radice spirationem activam.

Neque dicas, quod sicut Divinitas radice Paternitatem, quæ immediate opponitur Filiationi, & tamen potest eam identificari cum filiatione, quin obstat oppositio relativa mediata; ita Filiatio, si supponatur quod radice Spirationem activam; quæ immediate opponitur Spirationi passivæ, adhuc potest cum Spiratione passiva identificari, quin obstat oppositio relativa mediata. Nam disparitas est manifesta, quia scilicet Divinitas cum importet in conceptu suo fecunditatem, necessario debet esse radix communis relationum oppositarum, nempe Paternitatis, & Filiationis, necnon

Spirationis activæ & passivæ; unde Divinitas radicans Paternitatem immediate oppositam Filiationi, non debet dici mediate opposita Filiationi, eo quod debeat illam etiam radicare. Contra vero Filiatio est radix solius Spirationis activæ, non vero Spirationis activæ simul, & passivæ (quod hic non est investigandum, sed de fide credendum est). & idcirco cum spiratione passiva dicitur oppositio: relativam mediatam. Unde iterum in forma ad argumentum, nego consequentiam. Ad probationem nego sequelam. Disparitas autem, quare Spiratio activa possit esse in Patre, & Filio; Filiatio vero non possit esse in secunda simul, & tertia Persona, ita ut identificetur cum Spiratione activa simul, & passiva; Disparitas, inquam, est, quia cum Filiatio radice Spirationem activam, si minus imbibit illam, sequitur, quod saltem mediate, si minus immediate, cum illa opponatur relative; unde non potest cum illa identificari; sicut non potest Paternitas identificari cum Spiratione passiva, ob oppositionem relativam mediatam, quam habet cum illa. At Spiratio activa non radice Paternitatem immediate oppositam Filiationi; cum potius in Paternitate radiceatur; (ideo enim Pater est Spirator, quia est Genitor, & non e converso; sicut etiam Filius ideo est Spirator, quia est filius, seu quia accipit omnia a Patre præter Paternitatem, & non e converso) ergo Spiratio activa non potest dici, quod mediate opponatur relative Filiationi, sed debet dici, quod in Paternitate simul, ac Filiatione radiceatur; ac proinde poterit cum utraque ista Relatione opposita identificari. Et per hæc patet iterum ad confirmationes. Hic autem fit hujus anni pensus.

(*Sed ubi Aternitatis!*)

F I N I S.

L. D. & V. sine labe Concepta.

THESES PROPUGNATÆ

EX HOC TRACTATU

DE DEO UNO, ET TRINO.

I. **D**EUM O. M. existere, est per se notum quoad se, non tamen quoad nos. Quamvis autem non sit per se notum quoad nos, Deum existere sub conceptu Dei, cumuli omnium perfectionum, est tamen per se nota ejus existentia sub conceptu aliquo convertibili cum Deo, puta sub conceptu Supremi legislatoris, a quo in conscientia obligamur; sub conceptu Numinis ab omnibus colendi, & similibus; ut proinde dari non possit ad longum tempus Dei ignorantia invincibilis sub aliquo ex his conceptibus; Nec ulla fuit Natio, cui Deus non innotuerit sub conceptu Numinis colendi.

II. Demonstrari posse Dei existentiam, Scripturæ ipsæ, & ratio proclamant. Inter alias demonstrationes tum metaphysicas, tum morales non videtur contemnenda posterioristica illa demonstratio, quæ nititur illi principio, Omne quod fit, ab alio fit; cum non possit in causis per se subordinatis dari processus in infinitum, & repugnet mutua causalitas in eodem genere causæ. Demonstratur etiam quasi a priori cum D. Anselmo Dei existentia ex conceptu Entis Optimi excludentis quemcunque defectum; Evidenter quippe descendit quasi a priori Entis optimi existentia ex ejusdem possibilitate; & ejus possibilitas evidenter infertur ex hoc, quod Nulla chimæra sit Ens Optimum excludens quemcunque defectum; cum non possit chimæra contradictionem excludere; quæ defectum imbibit, & imperfectionem.

III. Essentia Divina metaphysice inspecta apte repositur in prædicato Aseitatis, non ut involvente, sed ut radicante reliquas perfectiones, & Attributa. Ex Aseitate quippe, prout importante Independentiam in essendo, & Sufficientiam suimet, rite infertur, quod Deus fit etiam aliorum sufficientia, seu Prima Causa incausata, & quod illi omnes omnino competant perfectiones. Hinc ipsa etiam prædicata Deo, & Creaturæ communia, puta ratio Substantiæ, Viventis, Intellectivi, in Deo

sunt prædicata Secundaria, quæ ex Aseitate promanant, quamvis in Creaturis ea præsupponantur ad prædicatum essentiale, non consequantur ad illud. Attributa Divina nullatenus ex parte objecti, aut inter se, aut ab essentia distinguuntur, neque realiter, neque formaliter, seu ex natura rei, neque modaliter, neque virtualiter: Sicut enim inter Attributa partialia nonnisi distinctio rationis intercedit penes Nostros diversos conceptus, ut docent communissime, ita inter Attributa totalia.

IV. Deus ratione suæ Immenſitatis est actu, & formaliter in Spatiis imaginariis a Ratione vero suæ Æternitatis non habuit ab æterno realiter præsentia sibi temporanea, sed solum intentionaliter; ut proinde non potuerit ab æterno certo, & infallibiliter cognoscere futura libera ob eorum præsentiam in Æternitate, sed solum quia, posita eorum temporanea existentia: tanquam requisito, intellectus Divinus ex perfectione suæ infinitæ cognoscitivitatis debuit ea certo, & infallibiliter attingere; prout etiam ratiocinari debemus de certa, & infallibili cognitione liberorum actuum conditionare futurorum. Denique ratione suæ summæ simplicitatis Deus excludit etiam compositionem metaphysicam, ex genere, & differentia; Unde nulla ratio univoce dicitur de Deo, & de Creatura; nec potest Deus includi in prædicamento Substantiæ.

V. Visionis Dei possibilitas nequit ratione naturali demonstrari positive; eito possit ea satis probabiliter ostendi. Satis etiam probabiliter ostenditur ratione naturalis, cui scilicet sit connaturaliter debita Visio Dei. Inter cæteras arripet tum ratiocinatio Angelici ostendentis, illam repugnare ex eo, quod Modus operandi sequatur modum essendi; tum ratiocinatio Suarii ostendentis ejusdem repugnantiam ex hoc, quod in isto Universo numeris omnibus absoluto ea de facto non detur. Non videtur tamen efficaciter ostendi repugnantiam Creaturæ, cui & connaturaliter debita

Dei

Dei Visio ex eo, quod culibet Creaturæ repugnet comprehensio illius Universi, cuius ipsa est pars, necnon comprehensio omnium possibilem; Quæ comprehensiones in linea cognitionis non pertinent ad perfectionem Visionis Dei, quippe quæ est felicitativa Creaturæ rationalis in ordine supernaturali: Esto enim Visio Dei aliquatenus præstet comprehensioni cuiuslibet Universi, non proinde fit, quod cui non est debita comprehensio Universi, a fortiori non sit debita Visio Dei, cum ea sint in ordine diverso.

VI. Oculis corporeis non potest divinities elevari ad Deum videndum; sicut nec alia potentia materialis. Lumen gloriæ elevans, & confortans intellectum Beati intrinsece, ac permanentem in ordine ad Dei visionem elicendam, non est tota ratio agendi: Ad illam quippe immediate etiam concurrunt partialiter intellectus beati. Hic autem potest divinitus visionem beatificam producere absque lumine gloriæ intrinseco, adjunctus ab Omnipotentia specialiter assistente, & concurrente.

VII. Inæqualiter Beati Deum vident pro meritatorum diversitate. Inæqualitas tamen visionum non est unice desumenda ex inæqualitate luminis, quod in præmium confertur, sed etiam ex inæqualitate intellectuum; influit quippe intellectus perfectior in Visionem formaliter ut perfectior. Possibilis est species impressa creata Dei, quæ sit accidens obiectivum essentia Divinæ, & tanquam instrumentum libere assumptum ad concurrentem influxum obiectivo in Dei visionem: Quicquid sit, an ea de facto debeat, & an identificeetur cum lumine gloriæ; potest siquidem cum illo identificari, ita ut eadem omnino realitas utriusque munus præstet; potestque ab illo realiter distinguui. Nequit intellectus creatus quantumcumque adjunctus lumine gloriæ Deum comprehendere: Potest tamen Dei Visio esse præcisiva, ita ut videatur essentia non visis formaliter Personis, aut Attributis; & potest etiam unum Attributum videri sine alio, ac una Persona, non visa altera correlativa. De facto tamen Dei visio Essentiam, & personalitates omnes attingit, necnon Attributa totalia, non tamen omnia partialia.

VIII. Non datur in Deo proprie, & formaliter Intellectus, seu Potentia intelligendi per modum actus primi physici, sed solum in eo datur potentia ad intelligendum logica, importans solum non repu-

Part I.

gnantiam ad intelligendum, & ipsa actualis Intellectio perfectissima. Optime explicatur juxta Doctrinam Angelici, quod ex Summa Immaterialitate descendat tanquam a priori in Deo Summa Intellectivitas; sit tamen nomine immaterialitatis non veniat immaterialitas entitativa, sed exercitiva; quatenus quæ minus participant de exercitio materiz, & sunt minus receptiva, eo magis habere possunt formam alterius, & esse magis cognoscitiva: unde cum Deus omni prorsus exercitio materiz careat, est summe cognoscitivus. Per scientiam simplicis intelligentiæ Deus videt Creaturas omnes posibles, non solum in seipso, sed etiam in seipsis: hic enim novus modus cognoscendi possibilem, ita ut solum sint obiectum terminativum, ac determinativum Divinæ cognitionis, nullam præferret imperfectionem; cum de facto non aliter Deus possit futura libera conditionata cognoscere per scientiam mediam, & sic etiam videat futura libera absoluta per Scientiam Visionis; nequit proinde dici superflua in Deo cognitio ista possibilem in seipsis, quinimmo ea circumscripta, non habetur cognitio comprehensiva Dei etiam secundum ejus prædicata respectiva intentionalia, seu secundum quod est expressio possibilem in seipsis.

IX. Scientia dumtaxat simplicis intelligentiæ, qua omnia factibilia representantur, est causa rerum; non vero Scientia Visionis: non enim prærequiritur in intellectu Divino ad aliquid causandum præter Scientiam simplicis intelligentiæ alia cognitio contingens, & practica spectans ad Scientiam Visionis, quæ solet vocari Imperium præsupponens actum Divinæ voluntatis imperantis Omnipotentis factionem hujus potius, quam alterius factibilis: posita siquidem Scientia simplicis intelligentiæ representante omnia factibilia, tanquam virtute dirigente, ac ratione causandi, potest immediate Divina voluntas hanc virtutem pro libito applicare ad hoc potius, quam aliud factibile ponendum per Omnipotentiam, tanquam per virtutem exequentem. Hinc dum aliquid causatur a Deo, illud in priori representatur per scientiam simplicis intelligentiæ ut factibile, & ut potens existere, in posteriori vero rationis signo representatur ut existens tum in fieri, tum in facto esse, per scientiam visionis contemplantis objectu existentiam.

X. Per scientiam Visionis Deus non videt

K 3

dct

der infallibiliter futura libera in seipso, neque in solo suo decreto, aut in eorum causis proximis, quas hic supponimus esse indifferentes; Neque demum in praesentia reali, quam habeant temporalia ab aeterno in Nunc Aeternitatis tanquam in aliena mensura; Sed ea videt in seipsis, quatenus ratio, a qua, tanquam a conditione determinatur intellectus Divinus ad ea cognoscenda, est actualis eorum existentia pro futura temporis differentia. Videt patenter Deus futura libera absoluta in complexo tum scientiae mediae de eorum existentia conditionata sub auxilio A, tum etiam decreti collativi talis auxilii A.

XI. Deum de factohabere scientiam certam, & infallibilem contingentium conditionate futurorum, negari non potest citra injuriam Divinitatis; quamvis enim futura ista solum habeant esse logicum per hoc, quod haberent esse physicum sub tali conditione, physice tamen nullam habent actu entitatem, atque adeo nec cognoscibilitatem intrinsecam, sed solum habent extrinsecam cognoscibilitatem per denominationem extrinsecam ab intellectu Divino infinite perspicaci, qui potest, ac exigit ea cognoscere. Quare cognoscuntur futura isthaec a Deo in seipsis per Scientiam Mediam, quae ideo Media nuncupatur, quia participat Scientiae simplicis intelligentiae necessitatem, & Scientiae Visionis contingentiam. Videntur autem per hanc Scientiam a Deo tam futura libera conditionata sub conditione conducente, quam sub conditione disparata, si ea pendeant a libertate Creaturae; conditionalia tamen disparata, quae pendent unice a Dei decreto, videntur a Deo per Scientiam Visionis.

XII. Decretum absolutum ex parte actus, & conditionatum ex parte objecti neque requiritur ut causa futurorum conditionalium; siquidem purificata conditione illud non daretur; neque requiritur ut objectum, in quo ea a Deo videantur; enim possint, ac debeant videri in seipsis in priori ad quemcumque actum liberum Divinae voluntatis; propterea hujusmodi decretum est essentialiter superfluum. Immo si futura libera conditionata viderentur in decreto, quod esset essentialiter connexum cum una parte contradictionis, evteretur eorum libertas; ac proinde negata scientia media, rueret Divina Providentia erga creaturas liberas qua liberas. Ex quibus sequitur, quod ut actus creaturae liber de

actu possibilitatis transeat ad statum existentiae conditionalis, non requiratur decretum ullum Dei actuale, sed satis sit decretum conditionatum, quod scilicet tunc daretur, quando voluntas poneretur in iis circumstantiis, in quibus per scientiam mediam praevideretur libere operatura. Sicut non requiritur in omnium sententia ad talem effectum voluntas Creaturae actu existens, sed sufficit, quod ea daretur pro quando esset actum liberum positura.

XIII. Similiter per Scientiam mediam reflexam cognoscit Deus independenter ab ullo decreto actu existente, quid esset ipse factururus sub quacunque conditione indifferente, & possibili, quamvis ea nunquam sit purificanda: Sicut enim est essentialiter superfluum decretum absolutum ex parte actus, & conditionatum ex parte objecti relate ad scientiam mediam directam; ita etiam relate ad reflexam: possunt quippe decreta Divina conditionalia videri ab ipso Deo in seipsis, antecederent ad quemcumque actum liberum suae voluntatis actu existentem.

XIV. Decreta libera non superaddunt volitioni Divinae necessariae perfectionem aliquam Deo intrinsecam contingentem, sive realiter, sive modaliter, sive etiam ex natura rei, aut virtualiter ab illa distinctam. Neque constituuntur formaliter per ipsam volitionem Dei necessariam sub connotato extrinseco, quod sit iterum requisitum, & non constitutivum denominationis libere discernentis. Neque complentur per extrinseca complementa, quae non spectent ad constitutionem actus liberi Divini, sed solum constituunt denominationem libere volentis. Neque important merum respectum ad objecta creata contingentem, a Deo tum realiter, tum virtualiter indistinctum; Neque respectum ad veritates objectivas aeternas, & contingentes realiter a Deo distinctas: Sed important quandam terminationem, seu habitudinem ad objecta creata intrinsecam Deo, ab illo tamen virtualiter distinctam, quae simpliciter, & entitative sit indefectibilis, & necessaria, deficere tamen possit solum secundum quid, & denominative: Unde est contingens contingentia propria libertatis Divinae; ad quam non spectat posse transire de non esse ad esse, aut e converso, sed solum posse ab una ad aliam denominationem transire, invariata entitate usquequaque perfecta incapaci mutationis. Hinc sicut ineffabile mysterium Trinitatis

salvari nequit citra distinctionem virtualem inter essentiam, & Personalitates, quæ nihil perfectionis addant essentia, utpote cumulo omnium perfectionum; unde nulla perfectio desit uni Personæ, quamvis realiter distinguatur ab aliis, distinctione tamen eminentiali non pura: Ita mysterium absconditum Divinæ libertatis salvari nequit citra distinctionem virtutalem inter volitionem necessariam, & huiusmodi terminationes contingentes, quæ nullam perfectionem volitioni necessariæ Divinæ usquequaque perfecte superaddant, nec imperfectionem ullam imbibant ratione contingentiæ; cum non sint contingentes simpliciter, seu quoad entitatem, & perfectionem, sed solum secundum quid, seu secundum denominationem, terminationem, exercitium, & munus denominandi Deum libere decernentem.

XV. Providentia est Præscientia, ac preparatio mediorum ad finem. Videtur ea principaliter importare actum voluntatis, & minus principaliter actum intellectus, quatenus ad finem a Creaturis assequendum præstat, quod decernantur, quam quod cognoscantur media ad talem finem. Præcipui Providentiæ actus sunt Prædestinatio Creaturæ rationalis ad gloriam, ac Reprobatio: Prædestinatio hominum post originale ex Augustino est Præscientia, ac preparatio beneficiorum, quibus certissime liberantur, quicunque liberantur. Eam non posse fieri in priori ad Scientiam mediam, seu ante prævisionem meritorum conditionalium, docent communissime; careret enim Divinus intellectus perfectione sibi debita, si pro priori ad decreta libera caret aut Scientia simplicis intelligentiæ, aut etiam Scientia media; quicquid sit, an prædestinatio in priori ad scientiam mediam concepta sit eversiva libertatis. Prædestinatio radicalis importans seriem gratiarum, quæ prævisæ sunt finaliter efficaces, & perducentes ad gloriam, indivisibiliter sumpta facta est antecedenter ad merita absolute prævisæ, atque adeo in priori ad Scientiam Visionis; cum non possit prima gratia, quæ est principium meriti, cadere sub meritum. Prædestinatio vero formalis, seu Voluntas conferendi gloriam ut coronam, ex parte objecti neque est ante, neque post merita absolute prævisæ; sicut nec Reprobatio positiva præcedit, aut subsequetur demerita absolute prævisæ; cum supponamus, Deum omnia decernere uno simplicissimo decreto; non secus ac o-

mnia contingentia uno simplicissimo actu Scientiæ visionis intelligit, citra signorum multiplicitatem ex parte objecti.

XVI. Reprobatio est Præscientia, & Preparatio damnationis quorundam, ferens in Deo voluntatem permittendi peccatum reprobatorum, ac puniendi illos in æternum. Reprobatio negativa, seu præcisiva, cum importet voluntatem dandi auxilia finaliter inefficacia, animo tamen sincero, ut ad salutem perducant, sit independenter a meritis. Reprobatio vero positiva, seu punitiva importans animum puniendi propter demerita, quamvis ex parte objecti neque sit ante, neque post demerita absolute futura; æquivalenter tamen est post demerita absolute prævisæ, quatenus si permissio peccati, & decretum poenæ insurgendæ distinguerentur ex parte objecti, permissio peccati, atque adeo Scientia visionis de peccato absolute futuro antecederet decretum poenæ insurgendæ, & non e converso. Et eodem pacto in præsentia providentiæ Prædestinatio formalis est æquivalenter postmerita absolute prævisæ, quatenus si decretum de dandis auxiliis efficacibus, & decretum dandi gloriam distinguerentur ex parte objecti, illud antecederet; unde in præsentia providentiæ vera est hæc causalis: ideo Deus decrevit gloriam D. Petro, quia decrevit illi conferre auxilia finaliter efficacia, atque adeo quia prævidit per Scientiam visionis ejus merita absolute futura, & non ex opposito: hic enim modus prædestinandi expediens fuit, ut nos redderet sollicitos de meritis augendis, & de gloria acquirenda. Non repugnat tamen, quod in alia providentiæ Prædestinatio ad gloriam sit æquivalenter in priori ad merita absolute prævisæ; licet repugnet, quod Reprobatio positiva sit ullatenus in priori ad demerita absolute prævisæ; potest quippe Deus ex sua Bonitate intendere directè salutem Electorum, & in ordine ad illam conferre auxilia efficacia; dissonat tamen Divinæ clementiæ intendere directè damnationem Reprobatorum, & in ordine ad illam conferre auxilia inefficacia.

XVII. Reprobatio negativa optime coheret in Deo cum voluntate seria salvandi omnes, quatenus auxilia inefficacia dantur animo sincero, ut fiant efficacia, & bona operatio ponatur, unde si prævisæ fuissent efficacia, libentius darentur, & non haberetur reprobatio; propterea Deus etiam erga Reprobos est beneficus. Causa autem reprobationis negativæ, prout importat

tar voluntatem dandi auxilia isthuc inefficacia animo sincero, & non illusorio, ut inde prodeat operatio salutaris, est unice Divina voluntas ipsis Reprobis benefica: causa vero Reprobationis positivæ est ipsa reproborum voluntas, quæ ob demerita sit obnoxia gehennæ. Permissio peccati potest esse effectus Prædestinationis, quatenus potest ea intendi a Deo ut utilis ad Prædestinationem, citra amorem peccati.

XVIII. Arcanum, & ineffabile Trinitatis mysterium nequit ratione naturali positive demonstrari; est quippe supra, quamvis non contra rationem. Dantur in eo tres Personæ in unitate Essentiæ, & quatuor Relationes, videlicet Paternitas, & Filiatio, Spiratio activa, & passiva; quinque vero sunt Notiones, nempe Paternitas, & Innascibilitas in Patre, Generatio passiva in Filio, Spiratio activa in Patre & Filio, ac Spiratio passiva in Spiritu Sancto. Non est autem specialis notio Improducibilitas in Patre, Inspirabilitas in Patre, & Filio, Ingenerabilitas in Patre, & Spiritu Sancto, quia nulla ex his præfert specialem illam dignitatem, quam ex suo conceptu præfert Innascibilitas cum aliis. Quamvis dux sint Personæ spirantes adjectivæ, unus tamen est substantivæ Spirator; sicut unus est substantivæ Creator, licet tres sint Personæ Creantes adjectivæ.

XIX. Præter distinctionem eminentiorem, hoc est realem non puram, sed admixtam identitati reali, quam Fides docet intercedere inter Personas Divinas, admittenda etiam est ex parte objecti alia distinctio inter Naturam, & Personalitates ad salvanda prædicata contradictoria objectiva, quæ de illis verificantur. Distinctio autem

ista non est realis, aut modalis, nec formalis, seu ex natura rei, sed virtualis intrinseca, quæ uni Deo competere potest, quippe cui nequit fieri novæ perfectionis accessio. Hinc Personalitates, ut distinctæ ex parte objecti a Natura Divina, non sunt formaliter perfectiones secundum esse Ad, quamvis realiter, & identice importent omnem perfectionem absolutam. Principium Quod productivum in Divinis constituitur formaliter tum per prædicatum absolutum, tum etiam per Relationem: Principium vero quo consistit dumtaxat in Absoluto, connotante tamen in obliquo Relationem tanquam conditionem essentialiter requisitam.

XX. Unius secundæ Personæ processio est Generatio. Idcirco autem Verbi dumtaxat processio est Origo Viventis a vivente principio conjuncto in similitudinem naturæ, quia Verbum accipiendo a Patre omnia præter Paternitatem, accipit ab illo vi processionis naturam etiam secundam, atque adeo illi etiam in prædicato notionali fecunditatis assimilatur; quod non competit processionis Spiritus Sancti. Prescindimus autem, an ex aliis etiam capitibus sola secunda Persona sit Filius. Verbum procedit ex cognitione omnium necessariorum, atque adeo etiam ex cognitione Creaturarum possibilem; non tamen ex cognitione contingentium, seu ex Scientia visionis: neque etiam ex Scientia media, quæ pariter participet de contingentia. In hypothesei impossibili, quod Spiritus Sanctus non procederet a Filio, ab illo realiter non distingueretur: Siquidem in Divinis omnia sunt unum, ubi non obviat oppositio relativa.

F I N I S.

I N D E X

RERUM NOTABILIVM,

Quæ in hac Prima Parte

D E D E O

Continentur.

*Prior numerus designat Disputationem, Secundus Questionem,
Tertius numerum Marginalem.*

A

Aternitas est DEI propria, adeo ut non possit creatura sive permanens, sive successiva, aut series generationum esse ab æterno. *Disputat. 1. Quest. 4. num. 8.*

Arii sophisma ad impugnandam Filii Divinitatem. *1. 3. 7.*

Ascitas est prædicatum constitutivum Divinæ essentia. *1. 2. 2. Quomodo ex Ascitate perfectiones omnes attributales inferantur? 1. 2. 6.*

Attributa Divina nullatenus ex parte objecti distinguuntur, neque inter se, neque ab essentia. *1. 3. 2.*

B

Beati in quonam sensu Deum videant inæqualiter pro inæqualitate meritum? *2. 4. 16. Quid videant de facto in Verbo? 2. 6. 12.*

C

Cognoscitivitas Dei summa in ejus omnimoda Immaterialitate radicatur, *3. 1. 2.* Idque apte evincitur ex ratiocinatione Angelici. *ibid.*

Comprehendi Deus non potest ab intellectu creato, quantumque hic adjuvetur lumine gloriæ. *2. 6. 2.*

Creaturae possibiles videntur a Beatis in Verbo formaliter motive, non vero for-

maliter terminative. *2. 6. 12.*

Creaturas possibiles Deus non solum cognoscit in seipso, sed etiam in seipsis. *3. 2. 2.*

D

DEi existentia est per se nota quoad se, non tamen quoad nos. *1. 1. 2.* Est tamen per se nota quoad nos sub conceptu aliquo convertibili cum Deo, puta sub conceptu Supremi Legislatoris, Numinis colendi &c. adeo ut Dei ignorantia ad longum tempus sub aliquo ex his conceptibus convertibili cum Deo sit impossibilis. *1. 1. 6.*

Dei existentia, quamvis non possit demonstrari demonstratione prioristica preffecta, seu per causas; demonstrari tamen potest multipliciter posterioristice; præsertim ex illo principio: Omne quod fit, ab alio fit. *1. 1. 9.* Sicut etiam quasi a priori ex conceptu entis optimi involventis quancunque perfectionem, & excludentis quencunque defectum. *1. 1. 14.*

Deo non competit intellectus, seu potentia intelligendi per modum actus primi physici, sed logici, quatenus non repugnat, quod intelligat, & defecto sit perfectissima omnium intellectio.

Deus actu, & formaliter est in spatiis imaginariis. *1. 4. 1.*

Deus ea pollet simplicitate, ut excludat etiam compositionem ex genere, & differentia; unde non est in prædicamento substantiæ.

- stantiæ; nec ulla ratio univoce prædicatur de Deo, & de Creatura. 1. 4. 9.
- Deus possibilia cognoscit, tum in seipso, tum etiam in seipsis. 3. 2. 2. Necnon seipsum cognoscit in Creaturis; ita tamen ut cognitio isthæc solum formaliter, & ex suo conceptu sit minus perfecta; ad eum modum, quo perfectio attributalis solum formaliter, & ex suo conceptu est minus perfecta, quam perfectio essentialis, seu prædicatum asseritatis. ibid.
- Deus ab intellectu creato comprehendere non potest. 2. 6. 2.
- Deitas, quia est principium emanativum, non productivum Paternitatis, & aliarum personalitatum, non distinguitur realiter a Filiatione, quamvis hæc opponatur relative paternitati: Contra vero Pater, quia est principium productivum Filii (qui quatenus fert acceptionem omnium a Patre præter Paternitatem, debet accipere a Patre etiam Spirationem activam, ratione cuius relative opponitur Spirationi passivæ) ideo deberet a Spiritu Sancto realiter distinguui ob istam oppositionem relativam mediatam, etiam in hypothesi impossibili, quod non spiraret Spiritum Sanctum. 5. 6. 10.
- Distinctio intercedens inter Essentiam, & Personalitates Divinas debet esse ex parte objecti; non tamen realis, aut modalis, aut formalis, seu actualis ex natura rei, sed solum virtualis intrinseca. 5. 2. 4.
- Divina decreta libera non superaddunt volitioni necessariæ perfectionem aliquam Deo intrinsecam, & contingentem. 4. 1. 4. Neque salvantur per volitionem necessariam sub connotato extrinseco; Neque per complementa extrinseca. 4. 1. 6. Sed important terminationem quandam Deo intrinsecam, & contingentem, virtualiter distinctam a volitione necessaria; Eaque solum est ab ista separabilis denominative, non entitative. 4. 1. 9. Distinctio realis solum intercedit inter ea, quæ sunt separabilia quoad entitatem, & perfectionem; non vero inter ea, quæ sunt separabilia quoad denominationem propriam virtualitatis Divinæ contingentis, nullam importantis perfectionem, aut imperfectionem ex proprio conceptu, involventis tamen entitative quancunque perfectionem. 4. 1. 13.
- Divina decreta in quonam sensu admittant pluralitatem signorum? 4. 2. 5.

F

Filiatio, quæ radicat spirationem activam, realiter debet distinguui a spiratione passiva, cui opponitur relative: At spiratione activa, quia non radicat, sed radicitur in Paternitate relative opposita Filiationi, ideo non debet realiter a Filiatione distinguui. 5. 6. 10.

Filius accipit omnia a Patre præter Paternitatem, atque adeo accipit etiam spirationem activam; & propterea ratio Filii seu generationis passive, utpote imbibentis spirationem activam, de facto competere non potest Spiritui Sancto, ob relativam oppositionem saltem mediatam, quæ inter Generationem passivam, & Spirationem passivam intercedit. 5. 6. 7.

Filio qua tali convenit in quarto modo, hoc est omni, & soli, quod procedat in similitudinem naturæ, quatenus natura non solum est principium operationum immanentium, sed etiam transeuntium. 5. 4. 3.

Filius in creatis ob imperfectionem producere potest alium filium: In divinis tamen ob summam perfectionem (quatenus omnia a Patre, præter Paternitatem, accipit) solum producere potest aliud suppositum, non alium Filium. 5. 4. 4.

Futura non fuerunt ab æterno præsentia realiter Æternitati divinæ, sed solum intentionaliter. 1. 4. 4. Hinc non possunt futura ab Æterno a Deo infallibiliter cognosci ob eorum realem præsentiam in Æternitate. ibid. & 3. 3. 2.

Futura contingentia, quæ sunt libera Creaturæ, non possunt a Deo videri in sua Essentia: Neque in eorum causis proximis, utpote indifferentibus; sed videntur tum in seipsis (non secus ac futura libera conditionata) tum etiam in complexo scientiæ mediæ de actu libero conditionate futuro sub auxilio A, & decreti conferentis hoc auxilium. 3. 3. 3.

G

Generationis definitio solum competit processioni Verbi, non Spiritus Sancti. 5. 4. 2.

Gratiæ ordo ordinem naturæ universim imitatur. 2. 4. 17.

I

Illatio a distributivo ad collectivum quandoque tenet? 1. 1. 11.

Im-

R E E U M.

Immaterialitas omnimoda Dei summam in eo cognoscitivitatem radicat. 3. 2. 2.

Innascibilitas in Deo est prædicatum notionale, non vero Inspirabilitas, aut Inspirativitas. 5. 1. 1.

Intellectus, & voluntas notionalis in Deo distinguuntur ex parte objecti realiter inadæquate, intellectus quippe notionalis importat naturam sub Paternitate, voluntas vero naturam cum Paternitate simul, & Filiatione, ac intellectus, & voluntas essentialis nullatenus ex parte objecti distinguuntur. 1. 3. 6.

Intellectus inæquales cum æquali lumine gloriæ inæqualem causant visionem. 2. 4. 11

Intellectus seu potentia intelligendi in Deo non datur per modum actus primi physici, sed datur solum potentia intelligendi logica, seu non repugnantia ad intelligendum, & perfectissima intellectio. 3. 1. 2.

L

Locus intrinsecus quid importet; ita ut aliquid dicatur sequi per Locum intrinsecum, non per locum extrinsecum? 5. 63.
Lumen gloriæ non est tota ratio agendi relate ad Dei visionem. 2. 4. 3. Si sit æquale in intellectibus inæqualibus, inæqualis Dei visio causatur. 2. 4. 11.

M

Missio Divinarum Personarum quid importet? 5. 6. 1. Pater mittit, Filius mittit & mittitur, Spiritus Sanctus solum mittitur. ibid.

N

Notionalia prædicata in Deo cur sint tantum quinque, nempe Innascibilitas, seu Improducibilitas, Paternitas, Filiatio, Spiratio activa, & Spiratio passiva, quin inter ista recensetur Inspirativitas, & Inspirabilitas? 5. 1. 1.

O

Oculus corporeus nequit elevari ad Deum videndum; sicut nec alia potentia materialis. 2. 3. 1.

P

Peccati permissio num possit esse effectus Prædeterminationis? 4. 2. 14.

Personæ divinæ distinguuntur inter se distinctione eminentiali non pura, seu distinctione reali admittente realem identitatem. Hinc Personalitates Divinæ ex parte distinguuntur virtualiter ab essentia. 5. 2. 2.
Personalitates Divinæ dici possunt tres Entitates, Veritates, Bonitates relativæ; non tamen tria entia; Identice important omnem omnino perfectionem; formaliter tamen a perfectione, & imperfectione præcendant. 5. 1. 7.

Personarum Divinarum Missio quid importet? 5. 6. 1.

Possibilia Deus cognoscit tum in seipso, tum etiam in seipsis. 3. 2. 2.

Prædeterminatio radicalis habetur antecederet ad nostra merita, & independenter ab illis. 4. 2. 3. Prædeterminatio vero formalis ex parte objecti neque est ante, neque post prævisa merita absolute futura; cum Deus unico simplicissimo decreto in posteriori ad scientiam mediam omnia decernat: verum in præsentī providentia æquivalenter est in priori ad isthæc merita; & in alia providentia probabiliter potest esse in posteriori ad eadem merita æquivalenter; quamvis Reprobatio non possit esse æquivalenter in posteriori ad demerita. 4. 2. 6.
Prædeterminationem physicam D. Thomas non agnovit, neque secundum quid nominis, neque secundum quid rei. 3. 3. 5.
Principium Quo productivum Verbi; sicut etiam principium Quo productivum Spiritus Sancti, consistit in Absoluto connotante in obliquo Relativum. 5. 3. 2.

Processus in infinitum in quolibet genere causarum quare repugnet? 1. 1. 10.

Providentia quid sit, & in quo consistat. 4. 2. 1.

R

Reprobatio quid, & quotuplex sit? 4. 2. 10. Reprobatio positiva ex parte objecti neque est ante, neque post demerita absolute prævisa; æquivalenter tamen est in posteriori ad illa, quatenus si distinguerentur permissio peccati cum ejusdem prævisione, & decretum damnationi, istud consequeretur, non antiret. ibid.
Reprobatio negativa quonam pacto sit Reprobis benefica? Et quonam pacto cohereat cum Divina voluntate salvandi omnes? 4. 2. 11.

Reprobationis causa quænam sit? 4. 2. 13.

INDEX RERUM.

S

- S**cientia simplicis intelligentiæ est causa rerum, non vero Scientia visionis. 3. 5. 4.
Scientia practica in Deo importat Scientiam simplicis intelligentiæ; & actum voluntatis Divinæ operativum, quin requiratur imperium distinctum. 3. 5. 4.
Scientia media quid sonet, & undenam ortum habuerit? 3. 5. 1. Futura libera conditionata creaturarum videntur a Deo per Scientiam mediam in seipsis; & non in aliquo decreto absoluto ex parte actus, conditionato ex parte objecti. 3. 5. 8. Quibus de causis admittenda sit in Deo Scientia media? 3. 5. 12. Ea longe distat ab hæresi Semipelagianorum. 3. 5. 16. Per Scientiam mediam videntur futura libera conditionata, tam conducentia, quam disparata. 3. 5. 17.
Scientia media reflexa non est Deo dene-ganda. 3. 6. 3.
Spatia imaginaria quid sint, & an Deus sit in illis formaliter. 1. 4. 1.
Species impressa creata Dei non repugnat. 2. 5. 2. Num ea de facto detur; & an identificentur cum lumine gloriæ? 2. 5. 8.
Spirator substantivè est unus; licet duæ sint Personæ spirantes adjectivè; sicut unus est Creator, & tres sunt Personæ creantes. 5. 1. 2.
Spiritus Sanctus non est proprie Imago Patris, sicut est Filius; quippe qui naturam Patris in identitate communicatam habet, etiam quoad notionalia, dempta Paternitate. 5. 4. 7.
Spiritus Sanctus si a Filio non procederet, ab eo realiter non distingueretur. 5. 6. 4.
Substantia creata supernaturalis, cui sit con-naturaliter debita Dei visio, multis evin-citur repugnare. 2. 2. 1.
Subsistentia absoluta num detur in Deo, præter tres relativas? 5. 1. 1.

T

- T**homas physicam Prædeterminationem non agnovit, neque secundum

quid nominis, neque secundum quid rei: 3. 3. 5.

Trinitatis mysterium est supra, non contra rationem: Illudque naturali ratione est indemonstrabile. 5. 1. 1. Explicantur vocabula propria hujus mysterii. ibid.

V.

Verbum procedit ab intellectu notionali: Spiritus Sanctus vero a voluntate notionali; uterque tamen ex parte objecti ex intellectu simul & voluntate essentiali; est formaliter Verbum ab intellectu, Spiritus Sanctus a voluntate procedat. 1. 3. 6. Hinc inter intellectum, & voluntatem notionales datur ex parte objecti distinctio realis inadæquata; nulla tamen datur ex parte objecti distinctio inter intellectum, & voluntatem essentielles. ibid.

Verbum Divinum non solum est id, quod Pater loquitur, & id quo loquitur, sed etiam id cui loquitur. Ibid. Verbum quo Verbum, eo Filius, & e converso; vocabula tamen ista non sunt synonyma. 5. 4. 7. Divinum Verbum est similis Verbo nostro vocali, quam mentali. 5. 1. 3.

Verbum procedit ex cognitione omnium necessariorum; atque adeo etiam ex cognitione creaturarum possibilium. 5. 5. 2. non tamen ex cognitione contingentium. 5. 5. 6. Verbi dumtaxat processio est generatio, eo quod accipiat a Patre naturam secundam; quicquid sit, an ex alio etiam capite sola secunda Persona sit Filius, non vero tertius. 5. 4. 2.

Visionis Dei possibilitas nequit positive demonstrari. 2. 1. 1. Visio Dei est indebita cuicumque Substantiæ intellectivæ possibili, unde repugnat substantia supernaturalis. 2. 2. 1.

Visio Dei præcisiva non repugnat. 2. 6. 6. Nec solum potest videri essentia Divina, non visis ejus Attributis formaliter, & unum Attributum sine alio; sed etiam una Persona, non visa altera correlativa. 2. 6. 7.

Vocabula propria Mysterii ineffabilis explicantur. 5. 1. 1.

F I N I S.

MAG 2006465